

類分正訂

編全集文室永飲

上海新民書局
出版





由國家圖書館數位化、典藏

正訂 分類飲冰室文集全編 卷十五

文苑

飲冰室詩話

我生愛朋友。又愛文學。每於師友之詩文辭。芳馨悱惻。輒諷誦之。以印於腦。自忖於古人之詩。能成誦者寥寥。而近人詩則數倍之。殆所謂豐於昵者耶。其鴻篇鉅製。洋洋洒洒者。行將別哀錄之。爲一集。亦有東鱗西瓜。謹記其一二者。隨筆錄之。

譚瀏陽志節學行思想。爲我中國二十世紀開幕第一人。不待言矣。其詩亦獨闢新界。而淵含古聲。丙申在金陵。所刻莽蒼蒼齋詩。自題爲三十以前舊學。第二種。蓋非其所自意者也。瀏陽殉國時。年僅三十二。故所謂新學之詩寥寥極希。余所見惟題麥孺博扇有感舊四首之三。其一曰。無端過去生中事。兜上朦朧業眼來。燈下髑髏誰一劍。尊前屍塚夢三槐。金裘噴血和天鬪。雲竹聞歌匝地哀。徐甲儻容心懺悔。願身成骨骨成灰。其二曰。死生流轉不相值。天地翻時忽一逢。且喜無情成解脫。欲追前事已溟濛。桐花院

落烏頭白。芳草汀洲。雁淚紅。再世金環彈指過。結空爲色。又俄空。其三日。柳花夙有何冤業。萍末相遭。乃爾奇。直到化泥方是聚。祇今墮水尙成離。焉能忍此而終古。亦與之爲無町畦。我佛天親魔眷屬。一時撒手。劫僧祇。其言沈鬱哀豔。蓋瀏陽集中所罕見者。不知其何所指也。然遣情之中。字字皆學道有得語。亦瀏陽之所以爲瀏陽。新學之所以爲新學與。

戊戌去國之際。所藏書籍及著述舊稿。悉散佚。顧無甚可留戀。數年來所出入於夢魂者。惟一菊花硯。硯爲唐瀏陽所贈。時余承乏湖南時務學堂講席。初與絨丞定交也。譚瀏陽爲之銘曰。空花了無真實相。用造簡偈起衆信任。公之研佛塵。贈兩君石交。我作證。其時江建霞方督湘學。受代去。瀕行前一日來作別見。研與銘乃爲余刻之。今贈者銘者刻者皆已沒矣。而此研復飛沈塵海。消息杳然。恐今生未必有合併時也。念之凄咽。

近世詩人能鎔鑄新理想。以入舊風格者。當推黃公度。丙申丁酉間。其人境樓詩稿本。留余家者兩月餘。余讀之數過。然當時不解詩。故緣法淺薄。至今無一首能舉其全文者。殊可惜也。近見其七律一首。亦不記全文。惟能誦兩句云。文章巨蟹橫行日。世界羣龍見首時。余甚愛之。

嚴又陵哲學太家。人多知之。至其詩才之淵懿。或罕知者。余記其戊戌八月感事一首云。求治翻爲罪。明

時誤愛才。伏尸名士賤。稱疾詔書哀。燕市天如晦。天南雨又來。臨河鳴犢歎。莫遣寸心灰。又綠珠詞一首云。情重身難主。淒涼石季倫。明珠三百琲。空換墜樓人。蓋哭林晚翠也。

康南海之第二女公子同璧。學精史籍。深通英文。去年子身獨行省親於印度。以十九歲之妙齡弱質。凌數千里之莽濤瘴霧。亦可謂虎父無犬子也。近得其詩二章。自跋云。侍大人遊舍衛祇林。壞殿頽垣。佛法已劫。然支那女士來遊者。同璧爲第一人矣。詩云。合衛山河歷劫塵。布金壞殿數三巡。若論女士西遊者。我是支那第一人。靈鷲高峯照暮霞。淒迷塔樹萬人家。恆河落日滔滔盡。祇樹雷音付落花。

高平子以所著平等閣筆記見寄。記述兩年來都中近事。字字令人刺心。怵目。中一條其事甚瑣。而其人甚奇者。讀之亦可見中國女權消息之一斑也。錄其全文如下。庚子仲冬。由日本西京。偕日友數人。乘

玄海丸返國。便途得游朝鮮及關東關外諸地。雨雪載途。寒風砭骨。哀鴻遍野。春燕無遘。觸目心傷。魂難鬱悒。余有詩云。關山一任誰家物。觸眼吾民百感傷。雪漫長空風滿地。汽車載夢過遼陽。一日薄暮。將投逆旅。適一女子。姿容倩雅。妝服淡素。冷月凝暉。寒山蹙翠。攜一姥一僕。匆匆更望北發。余心訝之。入旅店中。見壁間題詩數首。墨痕未乾。字體秀逸。其一云。本是明珍自愛身。金鑪香擁翠裘輕。誰爲拋卻鄉關道。白雪蒼波無限程。其二曰。明鏡紅顏減舊時。寒風似翦翦冰肌。傷心又是榆關路。處處風翻五色旗。其三

云。無計能醒我國民。絲絲情淚搵紅巾。甘心異族欺凌慣。可有男兒憤不平。尙有一首。字體潦草。不能辨識。噫嘻。此何人也。問之逆旅主人。茫然不答。

希臘詩人荷馬。

舊譯作和美耳

古代第一文豪也。其詩篇爲今日攷據希臘史者。獨一無二之祕本。每篇率萬數

千言。近世詩家。如莎士比亞、彌兒敦、田尼遜等。其詩亦動數萬言。偉哉。勿論文藻。卽其氣魄。固已奪人也。中國事事落他人後。惟文學似差可頡頏西域。然長篇之詩。最傳誦者。惟杜之北征。韓之南山。宋人自稱爲日月爭光。然其精深盤鬱。雄偉博麗之氣。尙未足也。古詩孔雀東南飛一篇。千七百餘字。號稱古今第一長詩。詩雖奇絕。亦只兒女子語。於世運無影響也。中國積習。薄今愛古。無論學問文章事業。皆以古人爲不可幾及。余生平最惡聞此言。竊謂自今以往。其進步之遠。軼前代。固不待著龜。卽並世人物。亦何遽讓於古所云哉。生平論詩。最傾倒黃公度。限未能寫其全集。頃南洋某報。錄其舊作一章。乃煌煌二千餘言。真可謂空前之奇構矣。荷莎彌田諸家之作。余未能讀。不敢妄下比隲。若在震旦。吾敢謂有詩以來。所未有也。以文名名之。吾欲題爲印度近史。欲題爲佛教小史。欲題爲地球宗教論。欲題爲宗教政治關係說。然是固詩也。非文也。有詩如此。中國文學界。足以豪矣。因亟錄之。以餉詩界革命軍之青年。

大風西北來。搖天海波黑。茫茫世界塵。點點國土墨。雖曰中國海。無從問禹迹。近溯唐南蠻。遼遠漢西城。舊時職貢圖。依稀猶可識。自明遣鄭和。使節馳絡繹。凡百馬流種。各各設重驛。金葉鑄多羅。玉環獻摩勒。每以佛光明。表頌帝威德。蘇祿率羣臣。淳泥挈盡室。闌斑披實綬。扶服拜赤帟。是誰蠻夷長。竊號公侯伯。比古小諸侯。尙足稱蒲壁。其他烏了帥。爭亦附商舶。有詔鎮國山。碑立高百尺。以此明德意。比刻之罘石。及明中葉後。朝貢暫失職。豈知慕爾國。既經三四摘。鐵圍薄福龍。太半供鳥食。我行過九真。其次泊息力。婆羅左右望。羣島比蟻虱。咸歸西道主。盡披漢赤幟。日夕興亡淚。多於海水滴。行行復行行。便到獅子國。

浩浩象口水。流到硤伽山。遙望宰堵坡。相約僧躋攀。中有臥佛象。文六金身堅。右疊重累足。左握光明拳。雖具堅牢相。軟過兜羅綿。水田脫淨衣。髻雲惟華鬢。大青髮屈蠡。團金耳垂環。就中白毫光。普照世大千。八十種好相。一一功德圓。是誰攝巧匠。上登忉利天。刻此牛頭檀。妙到秋毫巔。或言佛涅槃。婆羅雙樹間。此卽荼維地。斯語原訛傳。惟佛有神力。高據兩山顛。至今雙足迹。尙隔十由延。或言古無人。只無龍鬼仙。其後買珠人。暫次成市廛。此亦造妄語。有如野狐禪。實則經行地。與佛大有緣。參天貝樹多。由此枝葉繁。獨怪如來身。不坐千葉蓮。旣付金縷衣。何不一啓顏。豈真疲津梁。老矣倦欲眠。如何沈沈

睡經過三千年。

吁嗟佛滅度。世界眼盡滅。最光王舍城。大闢禪師窟。迦葉與阿難。結集佛所說。爾來一百年。復見大會。設恆河左右流。鞦韆聲不絕。其後阿育王。第一信佛法。能役萬鬼神。日造八萬塔。舉國施與佛。金榜國門偈。九十六外道。羣言罷一切。復遣諸弟子。分受十萬偈。北有大月氏。先照佛國月。四開無遮會。各運廣長舌。漢家通西域。聲教遠相接。金人一入夢。白馬來負笈。繩行復沙度。來往踵相躡。總持四千部。重譯多於髮。華言通梵語。衆推秦羅什。後分律法論。宗派各流別。要之佉盧字。力大過蒼頡。南有獅子王。鑿字赤銅鑠。當時東西商。互通度人筏。但稱佛弟子。能關鬼羅刹。遂使諸天經。滿載商人篋。鳥喙菽子洲。畏鬼性駭怯。一聞地獄說。心畏腴摩殺。賴佛得庇護。無異棲影鴿。國主爭布金。妃后亦託鉢。尊佛過帝天。高供千百氈。樂奏梵音曲。訟聽番佛決。向來文身人。大半著僧衲。達摩渡海來。一花開五葉。語言與文字。一掃付抹撥。十年勤面壁。一燈傳立雪。直指本來心。大聲用棒喝。非特道家流。附會入莊列。竟使宋諸儒。沿襲事剽竊。最奇宗喀巴。別得大解脫。不生不滅身。忽然佛復活。西天自在王。高踞黃金榻。千百氈裘長。膜拜天上謁。西戎犬羊性。殺人日流血。喃喃誦經聲。竟能消殺伐。藏衛各蕃部。無復事鞭撻。卽令奔巴瓶。改法用金椽。論彼象教力。羣胡猶震懼。綜佛所照臨。竟過九洲闊。極南到朱波。窮北盡

鞞。大東波日本。天皇盡僧牒。此方護佛齒。彼土迎佛骨。何人得鉢緣。某日是箭節。莊飾紫金塔。供養白銀闕。倒海然脂油。震雷响金鉞。香雲幢幡雲。九天九地徹。五百虎獅象。徧地是菩薩。謂此功德盛。當歷千萬劫。有國賴庇護。金甌永無缺。豈知西域賈。手不持寸鐵。舉佛降生地。一旦盡劫奪。

我聞舒五指。化作獅子雄。能令衆醉象。敗竄頭籠東。何不勅獸王。俾當敵人衝。我聞角大力。手張祖王弓。射過七鐵豬。入地千萬重。何不矢一發。再張力士鋒。我聞四海水。悉納毛孔中。蛟龍與魚鼈。衆生無不容。何不口一吸。今化諸毛蟲。我聞大千界。一擊成虛空。譬擲陶家輪。極遠到無窮。何不氣一噴。散爲鞞藍風。我聞三昧火。燒身光熊熊。千眼金剛杵。頭出煙焰紅。何不呼阿奴。一用天火攻。我聞安息香。力能勅毒龍。尾擊須彌山。波濤聲洶洶。何不呼小婢。悉遣河神從。我聞阿修羅。橫攻善見宮。流盡赤蚌血。藕絲遁無蹤。何不取天仗。壓制羣魔凶。我聞毗琉璃。素守南天封。薜荔鳩盤茶。萬鬼聲喁喁。何不飭鬼兵力。助天王功。惟佛大法王。兼綜諸神通。聲聞諸弟子。遞傳術猶工。如何斂手退。一任敵橫縱。竟使清淨土。概變腥膻戎。五方萬天祠。一齊鳴鐘鼓。遙望西王母。虎齒髮蓬蓬。合上皇帝號。萬寶河朝宗。佛力遂埽地。感歎摧肝胸。佛不能庇國。豈不能庇教。奈何五印度。竟不聞佛號。古有韋陀書。云自梵天造。貴種婆羅門。挾此肆凌傲。凡夫鈍根輩。分定莫能較。自佛倡平等。人各有業報。天堂與地獄。善惡人自召。

卑賤衆首佗。吹螺喜相告。亦有婆羅門。漸漸服教導。食屑鴉鳩行。夜夜鶴鷄叫。塗炭身半裸。拜月脚左
蹺。各棄事天業。迴向信三寶。大地閻浮提。慈雲徧覆幬。何意梵志輩。勢盛復鼓噪。灰死火復然。尾大力
能掉。別創溫都名。布以人皇詔。佛頭橫着糞。訶罵雜嘲誚。盡驅出家人。一一出邊徼。外來波斯胡。更立
天神廟。千牛祭火光。萬馬拜日曜。詞後摩訶末。採集各經要。一經衍聖傳。一劍鎮羣暴。謂此哥羅尼。實
以教忠孝。天使乘白馬。口宣天所誥。從則升九天。否則殺左道。教主兼霸王。黃屋建左纛。繼以蒙古主。
挾勢尤傑驚。以彼轉輪王。力大誰敢校。爾來耶蘇徒。徧轉新舊約。戴以通商舶。助以攻城礮。謂天只一
尊。獲罪無所禱。一切土木像。荒誕盡可笑。頂上舍利珠。拉雜付摧燒。竟使佛威德。燈滅樹傾倒。摩耶撫
鉢哭。迦葉捧衣悼。象法二千年。今日末劫到。惡王魔波旬。更使衆魔嬈。天龍八部衆。誰不生悲惱。噫嗟
五大洲。立教幾教皇。惟佛能大仁。首先唱天堂。以我悲憫心。置人安樂鄉。古分十等人。貴賤如畫疆。惟
佛具大勇。自棄銅輪王。衆生例平等。一律無低昂。罪畏末日審。報冀來世償。佛說有彌勒。福德莫可當。
將來僧祇劫。普渡胥安康。此皆大德慧。傾海誰能量。古學水風火。今學聲氣光。辨才總無礙。博綜無不
詳。獨惜說慈悲。未免過主張。臂稱窮鴿肉。身供臥虎糧。左手割利刃。右手塗檀香。冤親悉平等。善惡心
皆忘。愈慈愈忍辱。轉令身羸尪。獸啼交鳥跡。一聽外物戕。人間多虎豹。天上無鳳凰。虎豹富筋力。故能

恣強梁。鳳凰太文彩。毛羽易摧傷。惟強乃秉樞。強權如金剛。吁嗟古名國。興廢殊無常。羅馬善法律。希臘工文章。開化首埃及。今亦歸淪亡。念我亞細亞。大國居中央。堯舜四千年。聖賢代相望。大哉孔子道。上繼皇哉唐。血氣悉尊親。聲名被八荒。到今四夷侵。盡徵諸邊防。天若祚中國。黃帝垂衣裳。浮海率三軍。載書使四方。王威鎮象主。鬼族馴狼臙。歸化獻赤土。頌德歌白狼。共尊天可汗。化外育來航。遠及牛賀洲。鞭之如羣羊。海無烈風作。地降甘露祥。人人仰震旦。誰侮黃種黃。弱供萬國役。治則天下強。明王久不作。四顧心茫茫。

往讀明詩。見劉誠意集中一篇。一千三百餘言。構思之奇。遣語之險。亦可爲吾詩界中放一異彩。雖然。長篇詩爲長短句者不難。而五言最難。爲奇險語有壯采者不難。爲莊嚴語有風格者最難。吾重公度詩。謂其意象無一襲昔賢。其風格又無一讓昔賢也。請兩錄之。以資比較。

憶昔盤古初開天地時。以土爲肉石爲骨。水爲血脈天爲皮。崑崙爲頭顱。江海爲胃腸。嵩嶽爲背脊。其外四岳爲四肢。四肢百體咸定位。乃以日月爲兩眼。循環照燭三百六十骨節。八萬四千毛竅。勿使淫邪發洩。生瘡痍。兩眼相逐走不歇。天帝愍其勞。逸不調。生病患。甲命守以兩鬼。名曰結璘與鬱儀。鬱儀手足三足老鴉。脚踏火輪蟠九螭。咀嚼五色若木英。身上五色光陸離。朝發暘谷暮金樞。清晨還上扶

桑枝。揚鞭驅龍扶海若。蒸霞沸浪煎魚龜。輝煌焜耀啓幽暗。燠煦草木生芳蕤。結璘坐在廣寒桂樹根。漱嚙桂露芬香菲。啖服白兔所搗之靈藥。跳上蟾蜍背脊騎。插光弄影蕩雲漢。閃奎燦壁葩花摘。才摘桂樹子。撒入大海中。散與蚌蛤爲珠璣。或落巖谷間。化作珣玕琪。人拾得喫者。胸臆生明暈。內外星官各職職。惟有兩鬼兩眼晝夜長相追。有物來掩犯。兩鬼隨即揮刀鉞。禁制蝦蟆與老鴉。低願屏氣服役使。不敢起意爲姦欺。天地憐兩鬼。暫放兩鬼人間埃。一鬼乘白狗。走向織女黃姑磯。槌河鼓。褰兩旗。跳下黃初平牧羊羣。烹羊食肉口吻流膏脂。却入天台山。呼龍喚虎聽指麾。東岩鑿石取金卵。西巖掘土求瓊威。岩訇洞春石梁折。驚起五百羅漢半夜撥刺衝天飛。一鬼乘白豕。從以青羊青兔赤鼠兒。便從關道出西清。入少微。浴咸池。身騎青田鶴。去採青田芝。仙都赤城三十六洞主。騎鸞翳鳳來陪隨。神魁清唱毛女和。長煙裊裊飄熊旂。蜚廉吹笙虎擊筑。罔象出舞奔馮夷。兩鬼自從天上別。別後道路阻隔不得相聞知。忽聞寒山子。往來說因依。兩鬼各借問。始知相去近不遠。何得不一相見。敍情詞。情詞不得敍。焉得不相思。相思人間五十年。未抵天上五十炊。忽然宇宙變差異。六月落雪冰天達。詭鼉山上作窟穴。蛇頭生角角有歧。鱉魚掉尾斫折巨鼈脚。蓬萊宮倒水沒湄。欂櫨枉矢爭出逞妖怪。或大如甕盎。或長如委蛇。光灼灼。形躑躅。叫鹿豕。呼熊羆。煽吳回。翔魃魍。天地左右無扶持。蚊蟲蚤虱蠅蛄蟻。嚙

膚。唾。血。圖。飽。肥。擾。擾。不。可。揮。筋。節。解。折。兩。眼。蠟。不。辨。妍。與。媿。兩。鬼。大。惕。傷。身。如。受。榜。笞。便。欲。相。約。討。藥。
與。天。帝。醫。先。去。兩。眼。翳。使。識。青。黃。紅。白。黑。便。下。天。演。天。一。水。洗。滌。盤。古。腸。胃。心。腎。肝。肺。脾。却。取。女。媧。所。
掉。黃。土。塊。改。換。耳。目。口。鼻。牙。舌。眉。然。後。請。軒。轅。邀。伏。羲。風。后。力。牧。老。龍。吉。泰。山。稽。命。魯。般。詔。工。倕。使。豐。
隆。役。黔。羸。礪。斧。具。鑪。鎚。取。金。蓐。收。伐。材。尾。箕。修。理。南。極。北。極。樞。幹。運。太。陰。太。陽。機。檄。石。皇。地。示。部。署。岳。
瀆。神。受。約。天。皇。墀。生。鳥。必。鳳。皇。勿。生。梟。與。鴟。生。獸。必。麒麟。勿。生。豺。與。狸。生。鱗。必。龍。鯉。勿。生。蛇。與。蠃。生。甲。
必。龜。貝。勿。生。蠃。與。螟。生。木。必。松。楠。生。草。必。薺。葵。勿。生。鉤。吻。含。毒。斷。人。腸。勿。生。枳。棘。覃。利。傷。人。肌。螟。蝗。害。
禾。稼。必。絕。其。蟪。蛄。虎。狼。防。畜。牧。必。遏。其。孕。孳。啓。迪。天。下。蠢。蠢。氓。悉。蹈。禮。義。尊。父。師。奉。事。周。文。公。魯。仲。尼。
曾。子。輿。孔。子。思。敬。習。書。易。禮。樂。春。秋。詩。履。正。直。屏。邪。敬。引。頑。嚚。入。規。矩。雍。雍。熙。熙。不。凍。不。餓。避。刑。遠。罪。
趨。祥。祺。謀。之。不。能。行。不。意。天。帝。錯。怪。恚。謂。此。是。我。所。當。爲。眇。眇。末。兩。鬼。何。敢。越。分。生。思。惟。嗶。嗶。向。瘖。盲。
洩。漏。造。化。微。急。詔。飛。天。神。王。與。我。捉。此。兩。鬼。拘。囚。之。勿。使。在。人。寰。做。出。妖。怪。奇。飛。天。神。王。得。天。地。詔。立。
召。五。百。夜。叉。帶。金。繩。將。鐵。網。尋。蹤。逐。跡。莫。放。兩。鬼。走。逸。入。嶽。巖。五。百。夜。叉。箇。箇。口。吐。火。搜。天。刮。地。走。不。
疲。吹。風。放。火。烈。山。谷。不。問。杉。柏。樗。櫟。蘭。艾。高。芷。蘅。茅。茨。燔。焮。熨。灼。無。餘。遺。搜。到。九。萬。九。千。九。百。九。十。九。
仞。幽。谷。底。捉。住。兩。鬼。眼。睛。光。活。如。琉。璃。養。在。銀。絲。鐵。柵。內。衣。以。文。采。食。以。麋。莫。教。突。出。籠。絡。外。踏。折。地。

軸傾天維。兩鬼亦自相顧笑。但得不寒不餒長樂無憂悲。自可等待天帝息怒解猜惑。依舊天上作伴同遊戲。

陳伯嚴吏部。義甯撫軍之公子也。與譚瀏陽齊名。有兩公子之目。義甯湘中治蹟。多其所贊畫。其詩不用新異之語。而境界自與時流異。醜深俊微。吾謂於唐宋人集中。罕見倫比。記其贈黃公度一首云。千年治治亂今日。四海蒼茫到異人。欲挈頽流還孔墨。可憐此意在埃塵。勞勞歌哭昏連曉。歷歷肝腸久更新。同倚斜陽看雁去。天迴地動一沾巾。

吳君遂刑部。武壯公長慶子也。以氣節聞一時。丁酉抗疏陳時事。請變法。格不得達。浩然挂冠歸。近頃復上疏。請歸政。迴鑾以後。薄海所想望者。惟此一舉。然莫敢言也。惟君毅然犯政府所最忌而言之。其所養可知矣。其詩肖其爲人。所著有北山樓集。宋平子跋之云。五言古體多似陶韋。五言律體多似少陵。七言律體真逼江西諸祖。蓋道實也。吾最愛其「支那有一士」兩章。其一云。支那有一士。弢迹居越東。抗志希純素。篤性秉淵冲。意曠九洲外。神遊三代中。如傷倦心目。無告哀殘癰。一夫苟不獲。叢疚在厥躬。陳詞就重華。問道訪崆峒。著書累萬言。吾道未終窮。哲人不偶世。至論無污隆。豈惟躋小康。將以致大同。挾策獻太平。疇能識王通。抱玉貴善藏。活國後良工。感子他山意。錯石資磨礱。已矣吾何悲。矯首咨鴻濛。

右贈宋平

子其二云。支那有一士。戢影居越西。結念抱冰雪。它心高虹霓。慷慨懷前修。惻愴憫羣黎。邱索與典墳。一窮探稽。種界析狼鹿。政教疏羌氏。獨永泰皇祚。屢忤末俗詆。畸士自跣跣。良馬空跌踈。始知間代才。動與世相睽。澄澄之江波。曉日鳴天雞。嶷嶷天台山。仰止難攀躋。賤子奮孤心。逆鱗嘗獨批。荃莫察中情。信讒反怒儕。邪枉固不容。悻直終見擠。三月何皇皇。兩馬猶栖栖。懷哉虞重華。風雨聞弗迷。宣尼未忘魯。子輿思王齊。已而復已而。且俟聖人兮。右贈章太炎

又有集句一首云。青天漫漫覆長路。一紙短書無寄處。欲問平安無使來。乃知貧賤別更苦。四時天氣總愁人。秋月春風等閑度。憂患衆兮歡樂鮮。朱顏日夜不如故。嗟余此去其從誰。萬里蒼蒼煙水暮。構雲有高營。祇見石與土。俛視大江奔。幽憤得一吐。我欲凌風翔。轉上青天去。當面輸心背。面笑翻手作雲覆。手雨煙銷日出。不見人。至竟江山誰是主。驅使前輩天衣無縫。而含蓄蘊藉。別有懷抱。余酷愛之。

丁叔雅戶部。雨生中丞子也。卓犖有遠志。憂國如海。而詩尤以神味勝。庚子秋。余返滬上。從友人扇頭。見其感事一首云。被髮繭足行躑躑。有人流泣哀江南。眼前所見皆餘子。大宙之亂何時戡。余絕愛之。謂以二十八字。寫盡當今時局。而自見懷抱。仁言藹如。未有能及此者也。頃從北山樓集。復見其將歸嶺南。留別一首云。百無聊賴過零丁。遙睇中原一髮青。避地詩人哀故國。渡江名士泣新亭。山河運歇英才盡。聲

鼓聲沈戰血腥。鶉首賜秦天亦醉。祇憐羈客獨長醒。絕似劍南學杜諸作也。

吾黨中天才絕特者。未有吾家伯雋孝廉若也。伯雋以辛卯年。與余同游南海先生之門。年方十四。是歲即舉於鄉。當其未禮南海也。碌碌無以異於常兒。一度摩頂受記。夙慧颺發。而尤耽內典。在齋中終日坐禪。少年同學。時或揶揄捉弄之。弗爲動也。其冬。余入都。伯雋贈三詩。其一云。惺惺真宰慎其微。萬象紛紜任所之。客賊並來善相接。佛魔俱掃得堅持。精魂須歷三千劫。大力常周十二時。游刃雖然有餘地。族間猶自見難爲。其二云。長嘯一聲天地寬。翛然來去更無難。崑崙頂上鐵船動。魍魅叢中神劍寒。壁立萬仞皆平地。坐斷十方如是觀。河嶽日星通神氣。周遊磅礴在胸肝。其三云。無明有愛如來種。一片慈悲成此身。軀殼衆生託吾輩。肝腸內熱爲斯人。游行自在虛空架。轉運無方大法輪。七寶莊嚴開世界。卻原步步踏紅塵。十四歲乳臭小兒。何處有此識想。得不歎絕。

南海先生曰。伯雋殆有夙根者。遊戲人間耳。顧伯雋寡言。吾無從窺其底蘊。以文字論之。知其非冷腸人也。記其所填詞摸兒魚一闋云。算只有江山無數。怎盛得靈氣住。氣吞地球常八九。渺爾衆生何有甚情緒。向百尺高樓。觀看行人路。滿城簫鼓。算愁裏無人。夢中無地。獨自任情苦。秋風起。春草春花又暮。忍見陀城煙樹。蕭蕭馬鳴催落日。弄得老天憔悴我何顧。算萬里堂堂。猶是神州土。笑聲歸去。待日闔雲冥。風

狂雨橫。重覓舊游處。又金縷曲一闋。記其末四句云。他若有情吾能見。吾有情更待向誰說。空佇立。肝腸
熱。然則伯雋豈忘世者耶。記昔嘗責備之。伯雋曰。我今日正在臥薪嘗胆的時候。但薪胆生涯。忽忽十年
矣。海內風雲。如此其急。而小舍利弗。尙不肯出定。吾又能無憾也。作方略考健忘不
能全其詞也

譚瀏陽之得於佛學。知瀏陽皆能言之。然瀏陽之學佛。實自金陵楊仁山居士。其遺詩有金陵聽說法一
章。卽居士所說。詩云。而爲上首普觀察。承佛威神說偈言。一任法田賣人子。獨從性海救靈魂。綱倫慘以
喀私德。法令盛於巴力門。大地山河今領取。菴摩羅果掌中論。此詩無刻本。見麥孺博筆端。瀏陽手書也。
達縣吳季清先生德瀟。作令西安。庚子義和之變。爲亂民所戕。闔門及難。識與不識。莫不痛心。天之報施
善人。真其誣哉。先生至德純孝。而學識魄力。迥絕流俗。尤邃佛理。自號雙遣居士。有子三人。長曰鐵樵。名
樵。次曰仲弢。名以榮。季曰子發。名以東。皆有過人之才。余與譚瀏陽及鐵樵約爲兄弟交。而父事季清先
生。乙未秋冬間。同客京師。吾三人者。連輿接席。未嘗一日相離也。丙申五月。鐵樵以暴病卒於漢口。瀏陽
時在滬。哭之慟。嘗爲作一傳。見時務報中。未幾季清先生之官山陰。瀏陽贈一詩云。此生當補他方佛。何
意微塵補一官。□□□□□□延陵魂氣北邙寒。下蓋弔之者也。以東當乙未。年僅十一。隨侍入都。風
采英發。徧交一時名士。瀏陽戲號之曰舍利佛。以其早慧也。丙申受學於余者一年。日讀書盡十餘卷。屬

文能二三千言。兼學英法文字。而仲弢亦來居滬上。綜核善治事。瀏陽語余曰。三吳蜀之三龍也。吾國有此等人才。豈是亡國氣象。而不意鐵樵無端以死。而兩弟亦隨季清先生斃於毒刃也。庚子夏。余在夏威夷島。得仲弢一書曰。舍利佛每言及公。卽涕不可止。余重感之。重悲之。乃書未及答。而凶耗已聞。天之喪斯夫。復何言。報中見黃公度庚子三哀詩。其一卽季清先生也。記其數聯云。以君精佛理。夙通一切法。明知入世事。如幻如泡沫。佛力尙有盡。何況身生滅。將頭臨刃時。定知不驚怕。讀此亦可以略窺先生之學矣。譚瀏陽獄中絕筆詩。各報多登之。日本人至譜爲樂歌。海宇傳誦。不待述矣。但其詩中所指之人。或未能知之。今錄原文略加案語。詩曰。望門投止思張儉。忍死須臾待杜根。我自橫刀向天笑。去留肝胆兩崑崙。所謂兩崑崙者。其一指南海。其一乃俠客大刀王五。瀏陽作吳鐵樵傳中。所稱王正誼者是也。王五爲幽燕大俠。以保標爲業。其勢力範圍。北及山海關。南及清江浦。生平專以鋤強扶弱爲事。瀏陽少年。嘗從之受劍術。以道義相期許。戊戌之變。瀏陽與謀。奪門迎辟。事未就。而瀏陽被逮。王五懷此志不衰。庚子八月。有所布畫。忽爲義和團所戕。齋志以沒。嗚呼。王五真男兒。不負瀏陽矣。

余識唐瀏陽最晚。乙未秋。與瀏陽定交。叩其友。則曰。二十年刎頸交。絨丞一人而已。余心識之。丁酉冬。講學長沙。譚公乃爲余兩人介紹焉。譚公之成仁也。唐公慟哭辭家。欲如京師收葬。至上海。則譚公忠骸已

南下。因不果往。而東渡謁南海。時有輓聯云。我與公別幾許時。忽警電飛來。忍不攜二十年刎頸交。同赴泉臺。漫羸將去楚。孤耳簫聲嗚咽。近至尊剛十餘日。被羣陰搆死。甘永拋四百兆爲奴種。長埋地獄。只留得扶桑二傑。劍氣摩空。至今讀之。猶字字精神活現。淒人心脾。蓋唐公所以繼譚公之志者。早定於二十年前矣。唐公流血後。同人復有誦其詩者。僅記二句云。賸好頭顱酬死友。無真面目見羣魔。此詩余未之見也。在南洋口口口屬余寫之。余爲續成一絕句云。道高一尺魔一丈。天地無情獨奈何。

宗室壽伯福太史富。可謂滿洲中最賢者矣。其天性厚。其學博。其識拔。愛國之心。益睟於面。乙未秋冬間。余執役強學會。君與吳彥復翩然相過。始定交。彼此以大業相期許。其後君復有知恥學會之設。都人士咸以爲狂。莫或應也。庚子八月。君果以身殉國。恥噫。可不謂朝陽鳴鳳耶。余丙申出都。君有贈詩。不能全記憶。今從北山樓集。得其原本。亟錄誌感。詩曰。飛絮亂晴煙。飛花撲綺筵。春風一回送。飄泊去南天。夫子弄雲器。高吟白馬篇。空勞買生哭。不薦禰衡賢。長枵辭京國。揚舲指媚川。海雲愁望闕。樹嶺引遶船。寶劍終騰匣。明珠暫伏淵。江湖閑歲月。好自惜華年。

武陵何鐵笛烈士來保。余未獲識面。顧夙聞譚瀏陽稱其爲人。謂生平肝胆交。除絨丞外。君爲第一。因此相神交。數年矣。庚子。君與唐瀏陽共事。而君實任衡湘。一切布畫。漢變後死事最烈。頃趙日生郵寄其

絕命詞四章。亟錄如下。銀鑰鐵鎖出圍牆。親友紛紛送道旁。三百健兒齊護衛。萬頭鑽孔看何郎。鐵笛被捕於辰州以

三百人護衛檻送長

沙故云。○曰生泣注。北宋黨八碑甫毀。東林居士獄旋興。千秋公論應猶在。兩廡孤豚媿未能。四萬八千蟲出

入。五官五藏我原無。無人何苦爭恆幹。還我清虛一丈夫。痛哭君親恩太厚。百千萬劫不能酬。忠臣孝子
今生了。且向龍潭指臂遊。

鐵笛復有滿江紅一闕。其自序云。庚子黨禍再作。亡命桃源。遂遊桃源洞。黑箐鬼語。蒼欄猩啼。魂悽魄殭。非復人間世也。按筆賦此。其詞云。造化小兒。簸弄我望門投止。黑夜裏。攀籐附葛。雨來風起。燈火一星林際出。忽聞犬吠。心頭喜。又山門閉了。寂無人。鐘聲死。撫身世。淚盈皆。悲家國。血盈臆。叶上問蒼天何苦磨人至此。靖節先生知起處。避秦有甚桃源裏。聽甚邊天啞啞。有慈鴉歸來只。

武陵蔡樹珊烈士鍾浩。血性過人。治事機警。余承乏湖南時務學堂時。君始來共學。其後復遊學東京。亦以漢難遇害。曰生復錄其獄中作四章見寄。詩云。蟻磨盤舒又一年。元黃爭戰幾推遷。寒沙白日淹鸞地。短褐雕弓射虎天。終見蝸塘同水火。那堪環玦在風煙。雞鳴午夜頻搔首。看劍挑燈意惘然。觚稜夢裏寒金雀。諫草堂前起暮鴉。誤國千秋仇介甫。通蕃幾道問充華。蜉蝣竟夕成毛羽。螳臂當車挫爪牙。西狩無麟天閨爽。逋逃人海豢龍蛇。又聞麻達葛山奇。輕重當年類舉棋。貂珥雙簪矜別邸。蘭椒三熟拜西闈。酬

天祀典憐雞寶。排日笙歌駕鳳蜺。營得兔裘身欲老。克家猶護綠幃兒。蕭牆旋起八王戈。麾寇其如召寇何。碧海膏流成赤鹵。紅蓮豔結舞妖魔。九朝冊新鈴散。老騎宮裝老淚多。辜負香衾驚破夢。不因封事動鳴珂。

邱公恪名宗華。當代青年中一有望之人物也。去冬遊學日本。入成城學校。習陸軍。以病退校。歸養滬上。余親送登舟乃歸。未及一月。竟溘然長逝。年僅逾弱冠耳。懷八斗之才。飲萬斛之恨。一事未就。齎志九原。吳氏兄弟以後。又弱一箇矣。君夫人吳孟班。先君數月卒。一時有心人。旣已痛之。蔣觀雲曾有詩云。女權撒手心猶熱。一樣銷魂是國殤。吾於孟班未得見。若公恪者。固夙以爲國流血自祝。吾亦冀其爲鐵血派中一偉人也。豈意天地無情。蘭摧玉折。公恪孟班。吾知爾不暝於泉臺矣。公恪卒後。葉浩吾有輓聯云。中國少年死。知己一人亡。而成城學校校友會。亦有祭文云。沈沈支那。大病長殲。哀哀衆生。噩夢正酣。魍魎攫人。白晝涎饑。嗟我同志。日削月剝。咄咄公恪。海邦雄男。俛仰國事。痛如酸銜。漆室哀鳴。有裨國阨。矧以憂殉。曷其能堪。嗚呼哀哉。苟生足媿。苟死甯甘。觥觥女權。一例優曇。志未一酬。墓草薺粳。海國龍伯。扶餘虬髯。振劍三彈。淚盈黃衫。讀君遺書。憂心如惓。竟君之志。後死者擔。魂兮來歆。目斷江沚。嗚呼哀哉。尙饗。太平翼王石達開。其用兵之才。盡人知之。而不知其嫻於文學也。近友人傳誦其詩五章。蓋曾文正曾招

降彼。而彼賦此以答也。詩云。曾摘芹香入泮宮。更採桂蕊趁秋風。少年落拓雲中鶴。陳迹飄零雪裏鴻。聲價敢云空冀北。文章今已遍江東。儒林異代應知我。祇合名山一卷終。不策天人在廟堂。生慚名位掩文章。清時將相無傳例。未造乾坤有主張。况復仕途多幻境。幾多苦海少歡場。何如著作千秋業。宇宙長留一瓣香。揚鞭慷慨蒞中原。不爲仇讎不爲恩。祇覺蒼天方憤憤。莫憑赤手拯元元。三年攬轡悲羸馬。萬衆梯山似病猿。我志未酬人亦苦。東風到處有啼痕。若個將才同衛霍。幾人佐命等蕭曹。男兒欲畫麒麟閣。早夜當嫺虎豹韜。滿眼河山增歷數。到頭功業屬英豪。每看一代風雲會。濟濟從龍畢竟高。大帝勳華多頌美。皇王家世盡鴻濛。賈人居貨移神鼎。亭長還鄉唱大風。起自匹夫方見異。遇非天子不爲隆。醴泉芝草無根脈。劉裕當年田舍翁。此詩自敘履歷兼述己志。所云名山一卷。著作千秋。蓋亦有所自負矣。前後四章。皆不免下里巴人之誚。獨第三章。則卽以詩論。亦不媿作者之林。且仁人之言藹如矣。至其懷抱帝王思想。不知民權大義。則固不足以責數十年前之人物也。又聞石有所作檄文。全篇駢儷。中四語云。忍令上國衣冠。淪於夷狄。相率中原豪傑。還我河山。雖陳琳駱賓王。亦無此佳語。豈得徒以武夫目之耶。南海先生不以詩名。然其詩固有非尋常作家所能及者。蓋發於真性情。故詩外常有人也。先生最嗜杜詩。能誦全杜集。一字不遺。故其詩雖非刻意有所學。然一見殆與杜集亂楮葉。余能記誦百餘首。所最愛者。

已丑出都。七律四首之一云。滄海飛波百怪橫。唐衢痛哭萬人驚。高峯突出諸山妬。上帝無言百鬼獠。漫有漢廷追賈誼。豈教江夏貶禰衡。陸沈忽望中原嘆。他日應思魯二生。又絕句十首之二云。此去南山與北山。猿鶴哀號松柏頑。或勸蹈海未忍去。且歌惜誓留人間。南山之下豆苗肥。北山之上猿鶴飛。百畝耕桑五畝宅。先生歸去未必非。戊戌國變紀事四首之三云。歷歷維新夢。分明百日中。莊嚴對宣室。哀痛起桐宮。禍水滔中夏。堯臺悼聖躬。小臣東海淚。望帝杜鵑紅。遮雲金翅鳥。啄食小飛龍。海水看翻立。昊昊怨式微。哀哀呼后土。慘慘夢金閨。千載竈爨恨。王孫有是非。吾君真可恃。哀痛詔頻聞。未竟維新業。先傳禪讓文。中原皆沸鼎。黨獄起愁雲。上帝哀臣罪。巫陽筮予魂。

侯官嚴先生之科學。學界稍有識者。皆知推重。而其文學。則爲哲理所揜。知者蓋寡。余前作廣詩中八賢歌內一解云。哲學初祖天演嚴。遠販歐鉛攙亞塹。合與沙米爲鰈鰻。奪我曹席太不廉。蓋深佩之也。頃熊季廉錄其辛丑三月舊作見寄。卽先生北行時和季廉作也。詩如下。一十九禩初告終。搏搏負地趨大同。神機揜闔縱變化。爭存物競誰爲雄。至人先天不滯物。高下體合同張弓。心知斯民致仁壽。何徒食苦師蓼蟲。大哉培根氏告我。觀物見道冥纖洪。三王五帝各垂法。當其時可皆爲功。蚩蚩之氓俾自主。如適洲渚浮艫艫。及其時過仍墨守。無益徒使百弊叢。矧茲天意存混一。異類殊俗終隸通。是時閉拒議自守。時

異毛毳當鑪烘。履而後艱常智耳。既懲勿省庸非惜。四萬萬人皆貴種。遂使奴隸神將恫。所以百千億志士。欲持建鼓搥頑聾。賢愚度量幾相越。聽者一一褻耳充。膠膠擾擾何時已。新舊二黨方相攻。去年北方致大釁。至今萬乘猶塵蒙。亦知天心未悔禍。南奔避地甘長終。豈意逃空得罄效。知交迺遇四五公。就中愛我最親摯。僂指先屈南昌熊。心期渾欲忘彼己。圭角細與加磨礱。人生行止不自詭。扁舟忽欲隨南風。瀕行握手無所贈。惟有空氣如長虹。橫流它日倘相遇。所願身道雙加豐。季廉南昌人名師。復侯官高兄弟子也。

昔嘗推黃公度夏穗卿蔣觀雲。爲近世詩界三傑。言讀穗卿詩最早。公度詩次之。觀雲詩最晚。然兩年以來。得見觀雲詩最多。月有數章。公度詩已如鳳尾麟角矣。穗卿詩則分攜以來。僅見兩短草耳。團沙之感。云何可言。近觀雲以其四長篇見貺。則「己亥秋。則天津有感寄懷嚴蔣陳諸故人」之作也。讀竟如枯楊得酒。圓滿欣美。爰急錄之如下……暮雨掩柴門。秋聲滿庭樹。瑟瑟紙屏間。一燈靜如鷺。彷彿少年時。

讀書未馳騫。卽此感生平。流轉亡吾故。乙未在武昌。始與吳生樵遇。丙申在密雲。閉戶亘朝暮。丁酉在京

師。張趙日相晤。新機始萌芽。禱祀潤雨露。戊戌在天津。大夢正驚寤。素箏載濁酒。慷慨登樓賦。在天津時與蔣性才陳潤

深等時相過從各有詩記之。今年在鄉閭。過此將焉駐。人生幾中秋。時者爲我素。問天天不聞。聽雨雨不住……東髮抱

流略。辛勤三十年。一日不忍捨。頗欲窺高堅。才短衣食迫。窮老仍愚顛。慨然望六合。豈無豪與賢。間關十數載。所在窮山淵。山陽一聞笛。中策從此捐。時會既未至。盛業由書傳。旁行百萬卷。精指窮人天。吾人十萬輩。瞠目無媿妍。學未聞大道。豈能事言銓。昔者山海隅。今有車與船。今者文字隔。誰施蹄與筌。事窮我公起。謂侯官嚴氏吾族殆帝憐。公學豈在此。而此世所先。國狗尙狂狻。耽耽吻常涎。興亡有一定。名世獨見全。冥冥津門樹。日暮起蒼煙。扁舟載吾逝。不復相流連。何時一尊酒。黽勉爲執鞭。……蔣子智由起寒素。姓名世不張。乞食走燕野。埽塵書一牀。過從日抵掌。每覺芝蘭芳。農宗己亥秋用蔣子者有農宗扁發大義。精誼貫百王。持此照震旦。可謂見膏肓。陳子錦壽墨者桀。與蔣相翱翔。疇人振絕詣。哲學搜旁行。餘事托雄劍。赴難甘探湯。嗟吾二三子。於世誠蚊虻。然而貞雲際。捨此誰與商。艱難困一飽。口吐舌爲僵。浮雲起西北。俄頃滿八荒。瀟瀟涼風至。白露將爲霜。蒲柳與松柏。於理豈久藏。爲我著明德。毋亟耀其光。……湛湛一尊酒。淵淵千卷書。蕭蕭兩株樹。寂寂三間蘆。微材豈有競。卽此亦足娛。所嗟時日迫。言將戒征車。征車亦何爲。窮達非我圖。但恨萬山外。友朋日夜疏。滔滔浙江水。亘古不得徐。東流到東海。應瀛故人居。登樓望不見。天海搖空虛。旋歸對塵俗。積懣聊一舒。侘傺獨就枕。夢見遊天衢。九奏動萬舞。熊羆自我涂。邱聃並千古。疇能辨有無。黃公度集中。名篇不少。至其「今別離」四章。度曾讀黃集者。無不首記誦之。陳伯嚴推爲千年絕作。

殆公論矣。余嚮者每章能舉其數聯。顧迄不能全體成誦。憤恨無任。季廉不知從何處得其副本。寫以見示。開緘不自知其距躍三百也。亟爲流通之於人間世。吾以是因緣。以是功德。冀生詩界天國。……別腸轉如輪。一刻幾萬周。眼前雙輪馳。益增心中憂。古亦有山川。古亦有車舟。車舟載離別。行止猶自由。今日舟與車。併力生離愁。明知須臾景。不許稍綢繆。鐘聲一及時。頃刻不少留。雖有萬鈞柁。動如繞指柔。豈無打頭風。亦不畏石尤。送者未及返。君在天盡願。望影倏不見。煙波杳悠悠。去矣一時速。歸如留滯不。所願君歸時。快乘輕氣球。……朝寄平安語。暮寄相思字。馳書迅如電。云是君所寄。既非君手書。又無君默記。雖署花字名。知誰箝紙尾。尋常並坐語。未遑悉心事。况經三四譯。豈能達人意。只有斑斑墨。類似臨行淚。門前兩行樹。離離到天際。中央亦有絲。有絲兩頭繫。如何君寄書。斷續不時至。每日百須臾。書到時有幾。一息不見聞。使我容顏悴。安得如電光。一閃至君旁。……開函喜動色。分明是君容。自君鏡奩來。入妾懷袖中。臨行翦中衣。是妾親手縫。肥瘦妾自思。今昔將毋同。自別思見君。情如春酒濃。今日見君面。仍覺心忡忡。攬鏡妾自照。顏色桃花紅。開篋持贈君。如君與相逢。妾有釵插鬢。君有襟當胸。雙懸可憐影。汝我長相隨。雖則長相從。別恨終無窮。對面不解語。若隔山萬重。自非夢來往。密意何由通。……汝魂將何之。欲與君追隨。飄然渡滄海。不畏風波危。昨夕入君室。舉手牽君帷。披帷不見人。想君就枕遲。君魂倘尋我。

會面亦難期。恐君魂來日。是妾不寐時。妾睡君或醒。君睡妾豈知。彼此不相聞。安怪相參差。舉頭見明月。明月方入扉。此時想君身。侵曉剛披衣。君在海之角。妾在天之涯。相去三萬里。晝夜相背馳。眠起不同時。魂夢相依。地長不能縮。翼短不能飛。只有戀君心。海枯終不移。海水深復深。難以量相思。

吾少年同學中。相與共晨夕最久者。惟番禺韓孔广布衣。卽其著述自署捫虱講虎客者是也。孔广評隲人物。最有特識。常在尋常人褒貶毀譽之外。嘗爲詠史絕句十餘章。其張子房一首云。慧智彌綸徧九州。空觀實證一留侯。功成撒手人天去。畢竟亡秦爲國仇。其陳龍川一首云。斬馬盜馬陳同甫。千古英雄僅見之。可惜漆光開眼日。醉時心事已飛馳。蓋孔广謂子房爲國家主義中之樂天派。謂陳同甫爲儒生之有帝王思想者也。

孔广復有熱心一首云。熱心直欲爐天地。落魄依然一國民。病裏觀人原幻境。夢中化蝶是前身。交論肉血天應淚。相到皮毛馬不真。我是三千年睡足。東方雄辯已驚神。余昔在美洲時。從報紙中見此詩。酷愛之。顧不知爲誰氏作。後乃詢知其出我孔广也。

黃公度嘗語余云。四十以前所作詩。多隨手散佚。庚辛之交。隨使歐洲。憤時勢之不可爲。感身世之不遇。乃始蒼萃成編。藉以自娛。卽在湘所見之稿也。公度之不屑以詩人自居。未肯公之同好。余又失之交臂。

未錄副本。近於詩話中稱其詩。海內外詩人。貽書索閱者甚多。然急切無從覓致也。念其官日本參贊時。如重野安釋。森春濤。龜谷行諸君。皆有唱酬。又聞天南某氏。曾在新嘉坡領事署。鈔存人境廬詩一卷。余固徵之。東瀛南海。幸得數十篇。自今以往。每次詩話中。可必有一麟一爪矣。但所刊錄。未必爲公度得意之作。要之公度之詩。獨闢境界。卓然自立。於二十世紀詩界中。羣推爲大家。公論不容誣也。

公度嘗以光緒七年。裁撤美國留學生。爲中國第一不幸事。然至今日。尙有公然與留學生爲敵者。公度聞之。感激又當何如。錄其罷美國留學生感賦一首。嘻。是亦海外學界一段歷史也。其中情狀。知之者已寡。知之而今能言之者。益希矣。錄以流布人間焉。學生乎。監督乎。當道乎。讀之皆可以自鑑也。豈真詩人之詩云爾哉。：：漢家通西域。正值全盛時。南至大琉球。東逮高句驪。有北同盟國。帝號俄羅斯。各遣子弟來。來拜國子師。皇帝臨辟雍。皇皇漢官儀。石經出玉篋。寶蓋張丹墀。諸王立橫卷。百蠻圍泮池。於戲盛德事。慨想軒與羲。自從木蘭狩。國弱勢不支。環球六七雄。鷹立側眼窺。應制臺閣體。和聲帖括詩。二三老成謀。知難濟傾危。欲爲樹人計。所當師四夷。奏遣留學生。有詔命所司。第一選俊秀。其次擇門楣。高門綴科第。若摘領下髭。黃背好八股。肯令手停披。茫茫西半球。極遠天無涯。千金不垂堂。誰敢狎蛟螭。惟有小家子。重利輕別離。紆于山頭雀。短啄日啼飢。但圖飛去樂。不復問所之。藍樓田舍奴。蓬頭乳臭兒。優給堂

殮錢。榮頒行裝衣。舟人東西人。相顧驚復疑。此乃窶人子。胡爲來施施。使者挈乘槎。四牡光駢駢。鄭重詔
監督。一一聽指麾。廣廈百數間。高懸黃龍旗。入室闔無人。但見空皋比。便便腹高臥。委蛇復委蛇。借問諸
學生。了不知東西。各隨女師去。雛雛毋相依。鳥語日啾啾。庶幾無參差。就中高材生。亦有出類奇。其餘中
不中。大半悲染絲。千花紅氍毹。四窗碧琉璃。金絡水晶柱。銀盤夜光杯。鄉遇少所見。乍見輒意移。家書言
貧窮。問子今何居。我今膳雙鷄。誰記炊屨屨。汝言盜無糧。何不食肉糜。客聞故鄉事。欲答顏忸怩。嬉戲替
戾岡。游讌賢跋支。縱譚伊優亞。酣歌妃呼豨。吳言與粵語。病忘反不知。亦有習祆教。相率拜天祠。口嚼天
父餅。手繙景教碑。樓臺法界住。香華美人貽。此間國極樂。樂不故蜀思。新來吳監督。其僚喜官威。謂此泛
駕馬。銜勒乃能騎。徵集諸生來。不拜卽鞭笞。弱者呼暑痛。强者反唇稽。汝輩狼野心。不如鼠有皮。誰甘畜
生罵。公然老拳揮。監督憤上書。溢以加罪辭。諸生盡佻達。所業徒荒嬉。學成供蠻奴。否則仍難癡。國家糜
金錢。養此將何爲。朝廷命使者。去留審所宜。使者護諸生。本意相維持。監督意亦悔。駟馬舌難追。使者甫
下車。含怒故詆譏。我不知許事。我且食蛤蜊。監督拂衣起。怒喘竹筒吹。一語不能合。遂令天地睽。郎當一
百人。一一悉遣歸。竟如瓜蔓抄。牽累何纍纍。當其未遣時。西人書交馳。總統格蘭脫。校長某何誰。願言華
學生。留爲國光輝。此來學日淺。難言成與虧。頗有聰穎士。利錐非鈍槌。忽然筵席撤。何異罄帶褌。本圖愛

相助。今胡棄如遺。相公答書言。不過別瑕疵。一旦盡遣撤。譁然稱我欺。怒下逐客令。旋禁華工來。溯自西學行。極盛推康熙。算兼幾何學。方集海外醫。天士充日官。南齊長追隨。廣譯奇器圖。諸器何夥。頤惜哉國學舍。未及設狄鞮。矧今學興廢。尤關國盛衰。十年教訓力。百年富強基。奈何聽兒戲。所遣皆卑微。部婁難爲高。混沌強畫眉。坐令遠大圖。壞以意氣私。牽牛罰太重。亡羊補恐遲。蹉跎一失足。再遣終無期。目送海舟返。萬感心傷悲。

按美國留學生於辛巳年裁撤奏請派往者曾文正公募集學生者豐順丁日昌率往者吳川陳蘭彬後派出使大臣前監督高州區譚良新會容增祥後監督京豐吳嘉南其僚友爲金某初率學生繼派副使爲香山容閩備誌永末以供參攷

頃得上海一匿名書。自題東亞傷心人者。內新樂府一章。屬登報讀之。香山西堂不是過也。因急摺以實我詩話。惟葭蒼露白。伊人爲誰。不能無舐望焉耳。空谷足然。尙希毋我遐棄。告以桃花源中人姓氏。豈勝忻慕。嘗鼎一臠。風指養養。瓊瑤之好。更望再投。詩如下。

哀星軹 譏辱國也

使臣怒。使臣怒。使臣怨阿誰。不怒赤阪妓。不怒新橋女。大夫學生汝。太不曉事。長揖空階求不已。不是龍門汝。誤投市僧認作韓。荊州從來市僧得志。慣橫行。未聞獻媚著意殺學生。使臣當日好肩背。南洋負米東洋賣。相公堂前袖獻票紙。王爺膝下跪呈扇子。王爺心緒憂肥奴。旁侍喘如牛。親捧留聲機器奏牀頭。

翁在街頭賣卦命。兒走上房司門政。兒今作貴人。紫綬金章襯綠巾。綠巾恥富貴。功名由巾起。吁嗟乎。君名不愧替錢死。

吾近作詩話。故海內名士。頗有以故人詩寫寄者。非獨鄙人欣幸。度亦我文壇同人所願望也。亟撮錄之。潘蘭史以康烈士幼博一詩見寄。乃爲蘭史題獨立圖者也。詩云。迢迢香海小闌干。獨立微吟一笑歡。我亦平生有心事。好花留得與人看。其犧牲一身。爲後來國民謀幸福之心。活現紙上。讀竟愴然。幼博先生詩不多見。吾昔誦其一二。今復不能記憶。得此狂喜不自勝。潘君吾粵人。名飛聲。嘗游德國。久主香港華字報。最主持清議者也。

蘭史又寄公度詩三章。其第一章。已錄報中。不再錄。其第二章。題爲「香港訪潘蘭史題其獨立圖」詩。云。四億萬人黃種貴。二千餘歲黑甜濃。可堪獨立山人側。多少他人臥榻容。其前三章。題爲「夜泊」詩。云。一行歸雁影零丁。相倚雙鳧睡未醒。人語沈沈蓬悄悄。沙光淡淡竹冥冥。近家鄉夢心尤亟。拍枕濤聲耳厭聽。急趁天明催鵬發。開門斜日帶殘星。案蘭史獨立圖。一時名士題詠殆徧。余記邱蒼海一聯云。黃人尙昧合羣理。詩界差存自主權。意境新闢。余亟賞之。

李曉暉以譚瀏陽遺詩見寄。類多見莽蒼蒼齋詩中者。

丁酉金陵刻本

今錄其「和友人除夕感懷四篇并敘」

「敍曰。舊作除夕詩其夥。往往風雪羈旅中。拉雜命筆。數十首不能休。已而碎其藁。與馬矢車塵同朽矣。今見饒君作。不覺逢逢在腹。憶除夕商州寄仲兄。風檣抗手別家園。家有賢兄感鶴原。兄曰嗟予弟行役。不知今夜宿何邨。風景不殊。幽明頓隔。烏邑陳言。所感深焉。亦不自知粗放爾許。」詩曰。斷送古今惟歲月。昏昏臘酒又迎年。誰知羲仲寅賓日。已是共工缺陷天。桐待鳳鳴心不死。澤因龍起腹難堅。寒灰自分終銷歇。賴有詩兵鬥火田。我輩蟲吟真碌碌。高歌商頌彼何人。十年醉夢天難醒。一寸方心鏡不塵。揮洒琴尊辭舊歲。安排險阻著孤身。乾坤劍氣雙龍獻。喚起幽潛共好春。內顧何曾足肝膽。論交晚乃得髯翁。不觀器識才終隱。卽較文詞勢已雄。逃酒人隨霜陣北。談兵心逐海潮東。飛光自撫將三十。山簡生來憂患中。年華世事兩迷離。敢道中原鹿死誰。自向冰天鍊奇骨。暫教佳句屬通眉。無端歌哭因長夜。婪尾陰陽賸此時。有約聞鷄同起舞。燈前轉恨漏聲遲。曉噉名振鐸。湖南邵陽人。武壯公臣典之子。近主蘇報。能發揮新思想者也。

何肇一以唐瀏陽兩詩見寄。皆嘗見上海亞東時報者也。其一爲送神籐陽洲之燕京。詩云。東風吹滿神勝州。日落海天飛行舟。壯士拂衣出門去。攬身一劍橫青鞵。易水蕭蕭筑聲歇。望斷燕雲十六州。哀哀長弘血化碧。頸項猶擁仇人頭。魑魅滿城風雨腥。狂鼯穴道窺人行。磨牙厲吻十萬隊。飽不颺去飢則鳴。忽

然海疆馳飛電。戰慄聲嘶涕洟并。有時邊警偶不至。梨園歌舞酣承平。晉陽休礙君王獵。文母甯知漢室傾。白馬橫江飲君酒。盧龍憶否何人手。南北中分楚漢秋。太平洋面波亂吼。從來世事如奕棋。可憐披髮伊川走。亞東之局復如何。不見魯陽揮天戈。一髮牽之全身動。蒼茫浴日生洪波。義轡停驂坤紐絕。寂寂人間曳落河。陽洲先生安藤子。芒鞋踏遍萬山紫。黃金市駿今無人。獨向燕門訪奇士。隱隱中原鼙鼓聲。迸入英陽夢魂裏。與君半載相因依。奈何一旦分別離。南浦綠波淚如雨。古愁蕩漾天之涯。其二爲次深山獨嘯荒井昌頓韻。坤輿跌宕何其神。紛綸億兆京城人。中有健者宅扶桑。雄心俠骨輕根塵。讀書不讀陰符經。百卷甲兵羅君身。洪瀾會翻世界海。何用行吟江之濱。嗟我神州黑暗獄。奇憂空湧詩小旻。東南膏血西北燼。利盡錐刀窮絲緡。邇來二百五十載。蚩蚩牛馬劬且貧。嗜愚甘鳩波綿毒。胡八竊取如醪醇。文明新運疇籥之。甯靳中土寒生風。使我羞見數君子。欲吐旋茹多酸辛。波蘭覆轍斯須耳。哀哀君道無屈伸。君不聞輔車相依虞虢勢。奈何坐令黠虜驕絕倫。

吾嘗推公度穗卿觀雲。爲近世詩家一傑。此言其理想之深遠閎遠也。若以詩人之詩論。則邱倉甲其亦天下健者矣。嘗記其己亥秋感八首之一云。遺偈爭談黃蘗禪。荒唐說餅更青田。戴鼈豈應遷都兆。逐鹿休訛厄運年。心痛上陽真畫地。眼驚太白果經天。只愁讖諱非虛語。落日西風意惘然。蓋以民間流行最

俗最不經之語入詩。而能雅馴溫厚。乃爾。得不謂詩界革命一鉅子耶。倉海詩行於世者極多。余於前後秋感各八首外。酷愛其東山感秋詩六首。詩云。痛哭秋風又一年。觚稜夢落楚江天。拾遺冷作諸侯客。袍笏空教拜杜鵑。天涯心逐白雲飛。瑟瑟秋蘆點客衣。回首大宛山上月。更無緘扎問當歸。斜日江聲走急灘。殘棋別墅局方難。後堂那有殘絲竹。陶寫東山老謝安。寒蛟海上趁人來。漠漠秋塵掃不開。滿目桑田清淺水。五雲樓閣是蓬萊。冷落山齋運甓身。天門八翼夢無因。西風吹起神州恨。塵尾清談大有人。老樹秋聲撼睡童。讀書情趣遜歐公。挑燈自寫紉蘭句。一卷離騷當國風。

自唐人喜以佛語入詩。至於蘇坡^東王山^中雅其作。大半爲禪悅語。然如溪聲便是廣長舌。山色豈非清淨身之類。不過弄頭禪。無當於理也。人境廬集中。有一詩題爲「以蓮菊花雜供一瓶作歌」。半取佛理。又參以西人植物學。化學。生理學。諸說實。足爲詩界開一新壁壘。女媧鍊石補天處。石破天驚逗秋雨。吾讀此書。真有此感。詩如下。

南斗在北海。西流春非我。春秋非秋。人言今日是新歲。百花爛漫堆案頭。主人三載蠻夷長。足徧五洲多異想。且將本領管羣花。一瓶海水同供養。蓮花衣白菊衣黃。天桃側侍添紅妝。雙花並頭一在手。葉葉相對花相當。濃如梅檀和衆香。燦如雲錦紛五色。華如寶衣陳七市。美如瓊裝合天食。如競笳鼓調箏瑟。蕃

漢龜茲樂一律。如天雨花。花滿身。合仙佛。魔同一室。如招海客。通商船。紅黃白種。同一國。一花驚喜。初相見。四千餘歲。甫識面。一花自顧。還自猜。萬里絕域。我能來。一花退立。如局縮。人太孤高。我慚俗。一花傲睨。如居居。了更嫵媚。非粗疏。有時背面。互猜忌。非我族類。心必異。有何並肩。相愛憐。得成眷。都有緣。有時低眉若飲泣。偏是同根煎太急。有時仰首翻躊躇。欲去非種誰能鋤。有時俯水。瞋不語。無滋他族來逼處。有時微笑。臨春風。來者不拒。何不容。衆花照影。影一樣。曾無人相。無我相。傳語天下。萬萬花。但是同種。均一家。古言。猗儺花無知。聽人位置。無差池。我今安排。花願否。拈花笑索。花點首。花不能言。我饒舌。花神汝莫生分別。唐人本自善。唐花。或者併使。蘭花梅花。一齊發。飄輪來往。如電過。不日便可。歸支那。此花不乾。花不萎。不必少見。多怪如橐駝。地球南化。倘倒轉。赤道逼人。寒暑變。爾時五洋。仙城化作。海上山。亦有四時之花。開滿縣。卽今種。花術益工。移枝接葉。爭天功。安知蓮。不變桃。桃不變爲菊。迴黃轉綠。誰能窮。化工造物。先造質。控搏衆質。亦多術。安知奪胎。換骨無金丹。不使此蓮。此菊。此桃。萬億化身。合爲一衆生。後果本前因。汝花未必。原花身。動物植物。輪迴作生死。安知人不。變花花。不變爲人。六十四質。亦么麼。我身離合。無不可。質有時。壞神永存。安知我不。變花花。不變爲我。千秋萬歲。魂有知。此花此我。相追隨。待到汝花。將我供瓶時。還願對花。一讀今我詩。

余自己亥冬游夏威夷。其後返上海香港檳榔嶼錫蘭。遂遊徧澳洲全境。所至非熱帶地。卽暑伏節也。於是余不見雪者殆三年。澳亞歸舟。曾有句云。冰心慣住熱世界。老國從思新少年。蓋紀實也。壬寅正月。復旅日本。獨居塔澤環翠樓者月餘。日忽晨起。則玉屑滿庭。狂喜若逢故人也。遂成兩絕句。其一云。夢乘飛船尋北極。層凌壓天天爲窄。羽衣仙人拍我肩。起視千山萬山白。其二云。三年越鳥逐南枝。汗漬塵巾鬢有絲。今日緇衣忽化素。溪橋風雪立多時。

壬寅九月。復偕平子猗庵慧之遊箱根。實五年前侍南海先生舊遊處也。旅館壁間懸先生手書一軸。卽借此旅館時所爲詩也。詩云。電燈的的照樓臺。夜屣游廊幾百回。明明如月心難掇。歷歷微塵劫未灰。風葉一秋疑積雨。瀑泉竟夕隱驚雷。曉珠斗大盈懷抱。倚徧銀屏數去來。余與三子摩挲環讀。不勝今昔之感。平子有詩云。偶捐塵境尋幽去。到眼風光萬念新。卽物卽心猶有著。度人度我總多情。迴環碧水戀紅葉。杳渺青山眷白雲。各抱相思無可說。誰爲西望一沾巾。個中感觸非我同游者。不能喻也。

南海先生遊箱根一句。得詩甚多。戊戌國變紀事四首。卽成於彼時也。余最愛誦其五古一章云。天地大逆旅。家國長傳舍。斯人吾同室。疾苦誰憐借。萬方凝秋氣。閉戶誰能謝。旣入帝網中。重重絡纓絰。荆榛蔽大道。澗谷起寸口。解脫非不能。垢衣吾敢卸。化路曾八千。惻怛又稅駕。仲尼本旅人。瞿曇乃乞者。我生亦

何之。歷劫更多暇。信宿席不煖。去住心無挂。灰飛滄海變。時於光明夜。

有自署章邱生者。以長沙舒烈士閏祥感懷詩八章見寄。烈士字蒲生。晚號萍齋。唐瀏陽至交也。以己亥

春成仁於湘中。章邱生來書敘君性行頗詳恕不能備載寶諸篋中爲他日史料昔惟聞海上諸君子。傳誦其詩。有入市無屠狗。驕人讓沐猴之

句。深以片鱗隻甲爲憾。今得此八章。烈士之志節文章。亦略見一斑矣。因亟錄之如下。一夜西風萬木凋。

繞枝烏鵲去迢迢。愁邊淚落銀河水。夢裏心翻碧海潮。日月乾坤雙照外。干戈天地一身遙。江關蕭瑟尋

常事。銅狄摩挲憾不消。太息回天力尙微。乘秋便欲破空飛。一身詎忍言功罪。萬口偏難定是非。大澤龍

蛇終啓蟄。故山猿鶴莫相違。三千死士田橫島。南望中原涕淚霏。軍符一道下從容。宜有昇平答九重。誰

向廣寒修月斧。却教洛浦應霜鐘。越禽背煖孤飛去。桀犬驕人反噬凶。落日營門敞秋色。將軍獨自頌時

雍。久已分封向醉鄉。又憑射獵入長楊。渭涇河濁雙流合。門第金張七葉昌。君子何辭化猿鶴。中朝從此

有蜩蟬。逢人莫道頭顱好。鏡裏相看半是霜。漢南司馬今人傑。萬事應非築室謀。歌舞能銷君國恨。死生

空厖友朋憂。功名白髮三持節。霄漢丹心一借籌。遙領頭銜是橫海。祇隨李蔡爵通侯。周宣車馬中興日。

漢武樓船鑿空年。奉使更無蘇屬國。談兵偏罪杜樊川。風雲淮海行看盡。子弟湖湘亦可憐。昨夜機槍又

西指。仗誰搔首問青天。重見詞源三峽傾。幾人聯袂又蓬瀛。欲隨幕燕營新壘。已與江鷗背舊盟。未死秦

灰猶有燄。僅存魯壁更無聲。關山直北愁金鼓。要借絃歌寫太平。當年亦是鳳鸞姿。雪壓霜欺歷幾時。官味乍同鷄肋戀。壯懷當有馬蹄知。濁醪味薄愁難破。故劍情深有所思。風景不殊悲舉目。買山何處採華芝。章邱生何人也。望以姓氏里居諗我。俾慰飢渴。

人鏡廬集中。性情之作。紀事之作。說理之作。沈博絕麗。體殆備矣。惟綺語絕不少概見。吾所爲公度守佛家第七戒也。頃見其「都踊歌」一篇。不禁撫掌大笑曰。此老亦狡獪乃爾。歌有序。序云。「西京舊俗。七十五至晦日。每夜亘索街上。懸燈數百。兒女豔妝靚服爲隊。舞蹈達旦。名曰都踊。所唱皆男女猥褻之詞。有歌以爲之節者。謂之音頭。譯而錄之。其風俗猶之唐人合生歌。其音節則漢人董逃行也。」詩云。長袖飄飄兮鬢峨峨。荷荷裙緊束兮帶斜拖。荷荷分行逐隊兮舞傞傞。荷荷往復還兮如擲梭。荷荷迴黃轉綠兮同揆莎。荷荷中有人兮通微波。荷荷貽我釵鸞兮餽我翠螺。荷荷呼我娃娃兮我哥哥。荷荷柳梢月兮鏡新磨。荷荷鷄鳴貓睡兮犬不呵。荷荷待來不來兮歡奈何。荷荷一繩隔兮阻銀河。荷荷雙燈照兮暈紅渦。荷荷千人萬人兮妾心無他。荷荷君不知兮棄則那。荷荷今日夫婦兮他日公婆。荷荷百千萬億化身菩薩兮受此花。荷荷三千三百三十二座大神兮聽我歌。荷荷天長地久兮無差訛。荷荷

余自去年始獲以文字因緣交蔣觀雲。往在美洲。見清議報文苑。有題因明子稿者。大心醉之。願以爲夏

穗卿作。蓋其理想魄力無一不肖穗卿也。爾後屢讀因明詩而認爲穗卿之心。益橫亘胸中。在奧洲作廣詩中八賢歌首頌因明而下注穗卿。及東還始知其誤改正之。故歌中竟闕穗卿也。於是乞交因明之心益熱。此吾腔子裏一段歷史。亦可爲藝林增一談柄也。初讀觀雲詩爲「時運」一首。至今常日三復之。不辭駢枝再寫一通。……鬱鬱思世理。多由無字書。初俗進農桑。震旦足菑畲。爾日號聖賢。倫理爲排梳。亦足致小康。井里安厥居。中間更衰亂。大致復相如。倏忽宙運變。茲理有乘除。昔者尙專制。今茲道猶醜。昔隆禮與法。今畫自由陞。孟普足競存。墨守喪其車。賢豪已奮變。頑靈乃齟齬。由來新舊交。殺氣滿員輿。軒隱雷電已。霏野始靚虛。羣大身則小。此言不可鋤。洵洵朕時艱。櫻救甯非予。吾有黨與徒。來者方徐徐。吾有日與月。萬古爲居諸。生民丁時異。四氣有慘舒。蒼然望六合。相要重瓊琚。兒座不苦搨。何由燎瘍疽。數敷不折毀。何由築室廬。綢繆聖所云。不遑事拮据。毋吟雲漢詩。傷哉泣周餘。

余與觀雲至今未識面。今春貽以一影像。媵一絕句云。是我相是衆生相。無明有愛難名狀。施波羅密證與君拈花笑。指靈山上觀雲報我一影像。亦媵一偈云。分明有眼耳鼻舌。一文不值何消說。如我自看猶自厭。暫留脫殼在人間。觀雲太撝謙生。

平子孝高。後訪余於箱根。月夜相與登塔峯絕頂。高歌南海先生舊作。「天龍作騎萬靈從。獨立飛來縹

縵峯。懷抱芳馨蘭一握。縱橫宙合霧千里。眼中戰國成爭鹿。海內人才孰臥龍。倚劍長號歸去也。千山雲雨嘯青鋒。一詩覺胸次浩然。大有舞雩三三兩兩之意。歸環翠樓。平子寫其近作雜詩十二絕見。一詩云。晚風初定晚雲生。忍把浮名與世爭。忽憶身前身後事。星球幾處現光明。一憶根有著成圓缺。眼識無端說暗明。最是良宵人去後。高樓望月更何人。二日之方中夜未央。是誰念念續微茫。公情私愛元黃媾。寸寸靈台總戰場。三忽然思想遍諸天。摘取奇情歷歷傳。吾舌猶存何所用。有權斯世創公言。四人間天上原無別。何處想思可渡河。星月紛紛惟見影。那邊相望又如何。五構成世界原兒女。俠骨柔腸一例才。莫渡如來寂滅海。不妨齊向愛河來。六器世微塵作麼生。山馳水湧尙難名。繁星如斗人如蟻。獨倚危樓看月明。七魂魂色色現靈台。一例人天大會開。我亦天公一分子。更何心事問天來。八流水柴門盡日關。鳥聲如夢落花閑。詩情畫意都忘卻。余欲無言對此山。九都思田里與妻兒。咫尺長安恨別離。四萬萬人皆地主。爲誰爭說客京師。十千家好夢初成候。我獨高歌也枉然。樓外繁星光悄寂。奇聲應隔萬重天。十一落照依微月上遲。共誰終古話相思。刹那悟了前生事。盈得今宵夢醒時。十二余讀竟洒然若有所得。茫然若有所恰。似昔與平子及兩瀏陽鐵樵同學佛日。輒以「爲一大事出世」之義相棒喝。比年以來。同學少年。死亡流落。余且飽經世態。沈汨外學。吾喪真吾久矣。平子相見。叩以近所得。且勗以毋忘舊業。

不覺冷水澆背。如南泉聞雁聲過去時也。

平子不以詩名。偶有所作。溫柔敦厚。芳馨悱惻。蓋平子性情中人也。余記其庚子秋東渡日本。舟中作四絕云。急雨渡春江。狂風入秋海。辛苦總爲君。可憐君不解。一山被白雲封。水把青山繞。一樣是多情。郎心道誰好。二宵坐紉春衣。晨興刈秋草。十指豈辭勞。寸寸終悄悄。三三更滿牕風。五更一樓雨。野渡斷人行。夢魂不知處。四吾酷愛之。謂其爲離騷之音也。平子又爲覺頓書篋。錄舊作一章云。不相菲薄不相羨。入世皇皇出世間。獨立中流喧日夜。萬山無語看焦山。蓋純乎學道有得之言。余昔記曾重伯詩。有一萬朵紅蓮禮白蓮」之語。余驚嘆以爲妙想妙語。得未曾有。平子萬山無語看焦山一句。警策相類。而意境猶似過之。可謂無獨有偶。

王紫詮之翻譯事業。無精神。無條理。毫無足稱道者。我國學界中亦久忘其人矣。雖然。其所譯普法戰紀中。有德國法國國歌各一篇。皆彼中名家之作。於兩國立國精神。大有關係者。王氏譯筆。亦尙能傳其神韻。是不可以人廢也。德國祖國歌一長篇。已見本報第十一號軍國民篇。今復錄其法國國歌四章如下。……法國榮光自民箸。爰舉義旗宏建樹。母號妻啼家不完。淚盡詞窮何處訴。吁王虐政猛於虎。烏合爪牙廣抵募。豈能復覩太平年。四出搜羅困奸蠹。奮勇興師一世豪。報仇寶劍已離鞘。進兵須結同心誓。不

勝捐軀義並高。^一惟今暴風已四播。屏王相繼民悲咤。荒郊犬吠戰聲哀。田野蒼涼城闕破。要物安能著
眼中。募兵來往同相佐。禍流遠近惡貫盈。罪參在上何從赦。奮勇舉師一世豪。報仇寶劍已離鞘。進兵須
結同心誓。不勝捐軀義並高。^二維王泰侈弗可說。貪婪不足爲殘賊。攬權怙勢谿壑張。如納象軀入鼠穴。
驅使我民若馬牛。瞻仰我王逾日月。維人含靈齒髮儔。詎可鞭笞日摧缺。奮勇興師一世豪。報仇寶劍已
離鞘。進兵須結同心誓。不勝捐軀義並高。^三我民秉政貴自主。相聯肢體結心膂。脫身束縛在斯時。奮發
英靈振威武。天下久已厭亂離。詐僞相承徒自苦。自主刀鋒正犀利。安得智驅而術取。奮勇興師一世豪。
報仇寶劍已離鞘。進兵須結同心誓。不勝捐軀義並高。^四吳季清先生一家之死難。寶我生朋友中最痛
怛之事。而戊戌北京庚子漢口諸烈以外。一大悲慘之紀念也。久欲爲一詩紀哀。至今未成。引爲疚焉。前
曾見黃公度所作三哀詩中數語。今復得其全編。我中心所欲言。殆盡於是。我其亦可以無作矣。亟錄入
詩話。……世界隨轉輪。成壞各有劫。適值傾覆時。萬法不必說。以君循吏才。三年官於越。無端桴鼓鳴。伏
寇莽竊法。山縣斗大城。城頭黑雲壓。紛紛彼狼心。躍躍欲豬突。君昔理常平。手曾治大猾。鴉音不能革。生
性成檣杪。到此播流言。官實通賊謀。作賊兼作官。滿城耳喧聒。城中西教徒。積惡鬼羅刹。閃閃蒼鷹眼。磨
刀咸欲殺。公知事不可。大聲作瞋喝。反激蚩蚩怒。一霎盡滅裂。非無防禦使。蠢蠢怯如鼈。噤不發一言。坐

視民劫奪。此客甫斷頭。彼奴復流血。亂刃白兩點。混殺到手猾。獠犬狂號跳。奔馬肆蹄齧。但是縣衙人。一見輒摧挫。卽當子若孫。衣破脚不襪。同寮不肯留。望門走托鉢。指名徧搜牢。牽髮互瓣結。驅羊入屠肆。執筆尙鞭撻。天堂變地獄。肉花碎片割。同時遭荼毒。彼此造何業。

原注君一家受戮。並尸於天主堂中。教士被害者共六人。少婦幼兒皆以刀割其肉。肉盡乃斃之。

君當就縛時。自知當永訣。上念我佛恩。如何得解脫。下傷戚母慈。如何保生活。可憐八十母。蕭條幾黃髮。追憶六年前。春酒壽筵設。君披宮錦袍。手執先朝笏。公瑾與伯符。同年小一月。我歌壽人曲。登堂來拜謁。孫曾六七枝。一一芝蘭茁。最小銀耳瑤。面自勝雪。誰料綵衣舞。回旋僅一瞥。覆巢無完卵。雛鳥鳴亦絕。聞君既半年。未悉子存歿。家人畏驚倒。相戒咸結舌。入則圍紅裙。出乃易墨經。母尙倚閭望。朝夕拜菩薩。

念子歸何遲。此別太契闊。原注家人詭以大府調往剿賊告其母豈知望子臺。早已堆白骨。以君精佛理。夙通一切法。明知入世

事。如露如泡沫。佛力猶有盡。何況身生滅。將頭臨刃前。悉知不驚怕。獨怪耶穌教。瓣香未曾爇。如何借教徒。一例受磨折。觀君遭萬變。已足空一切。只有黃鳥歌。哀吟代嗚咽。

原詩後復有補注敘述吳公死事事實頗詳並錄之以備後之作史者參攷焉：：君名德簫

字李清達。縣人都選西安縣知縣。光緒二十五年到任。庚子六月。拳團亂。自衢州土寇四起。江山常山被圍。西安土豪有虎而冠者。因積穀事侵公款甚鉅。君嚴治之。至是。賊新募勇反。廿五日晨。君方集衆議團練。聞鐘聲。問何爲。則以毀天主堂對君出呵禁之。反徒麇集。連倒戈相向。取官課而反接之。送金衢嚴道署。誣以通賊。道員鮑祖齡憐而愚。不能彈壓。賊復由道署縛出。至堂。簪下亂刃斬之。又闖入縣署。募兵丁役凡殺二十九人。子以啓以發。縛亂民請鮑處分。鮑言。汝輩懲治吾不敢庇護。罪人廿六日亦受戮。戮長孫恕昌。倉猝出逃。垂於城隍廟之懸匾中。搜出亦戮死所。贖幼兒二。賴乳者抱出。得逸。太夫人年八十。牽出將加刃爲人喝阻。乃搶擄簪釧而去。是役也。各官署俱獲免。鎮道府各員乃議以通賊之罪。坐縣令而爲亂民解免。派紀綱之僕二三人來搜檢一切文書。夫人冉氏君之繼配也已。

密遣人以絮被裹葬君父子尸。聞拘索之令堅持不可具贖。請於道必派委員二人監視。乃許行。各官不得已從之。詭計不得逞。乃以模稜之詞達大府。夫人復控訴之。卒得旨昭雪。復優恤焉。辛丑六月補記。

林暎谷烈士旭。少好爲詩。詩孤澀似楊誠齋。卻能戛戛獨造。無崇拜古人意。蓋肖其爲人也。都中有以晚翠軒集寫本見寄者。蓋皆其二十以前之作。晚歲所臻。尙不止此。顧亦可想見其人格矣。摘錄數章如下。

「病起漫書」云。「耳目與口鼻。不思何錄錄。苟能得其養。心亦卽快足。四者彼何如。惟心實有欲。」所以養心者。必先此四族。愚奢厚自奉。反以滋垢黷。一鳥能遺音。豈必奉絲竹。一花可慰眼。豈必陳綺縠。誦詩味芬芳。聞香氣清淑。領略信靡窮。我亦我能備。「效太夷丈」云。「松生依澗谷。上爲千霄枝。搖落尙不語。繁華豈嘗知。」「感秋」云。「清晨負手行。蟋蟀鳴我門。因知秋風厲。感此悲流年。病夫日掩戶。一月不窺園。頗聞梧桐枝。飄葉聚其根。歲寒皆黃落。而汝胡爲先。我將種長松。不與時推遷。小庭數盆花。清清亦堪憐。但覺淒清意。莫向西風前。」讀此諸篇。其孤高絕俗之氣。可見一斑矣。又「張園梅花」有句云。芳波照影知誰見。斜日攀條卻獨來。又「無題」云。思先清曉東輪轉。意共黃昏燭本闌。世界愁風復愁雨。肝脾爲苦亦爲酸。「雨夜醉歸」云。前世畫眉將半額。春寒呵手不成圍。雨聲月色和同好。馬足燈光一併飛。余皆酷愛之。

歲暮懷人。萬感交集。自念我入世以來。不過十二三年。而生平所最愛之親友。溘亡大半。讀杜少陵死別

已吞聲。生別常惻惻。魂來楓林青。魂返關塞黑。之句。不自知其涕之淋漓也。丙申間。曾語唐瀏陽曰。吾欲爲三亡友傳。以誌哀。三亡友者。一南海陳君通甫。秋一南海曹君著偉。泰一三達縣吳君鐵樵。樵也。傳至今未成。而當時所與語之人。墓木亦將拱矣。追思昔游。猶在心目。可勝悼哉。三君皆天才。至今眼中之人。未有其比。斯人之夭。一國之不幸也。陳曹皆萬木草草同學。吳則季清先生之長公子也。三君思想學詣。並卓絕時流。卽文學亦有開拓千古。推倒一時之概。壽皆不及顏氏子。著述未一成。事業未一就。三年之間。賚志並沒。嗚呼痛矣。余昔藏其來往論學箋。及時文零稿甚夥。戊戌去國。散佚無復片紙。並此區區者。而天亦妒之耶。三君皆不以詩名。然詩固有獨絕處。辛卯冬。余遊京師。通甫贈以五言長句二章。今僅記其四語云。一非無江湖志。跌宕恣遊遣。蒼生慘流血。敝席安得煖。一又通甫嘗爲余題筆數語云。伊川賞夢魂。慣得無拘檢。又逐楊花過謝橋。一通父賞。一蝴蝶上階飛。風簾自在垂。与二詞誰工。請問知者。一所記通甫之文。僅此而已。辛卯春。著偉突訪余。翌日答視之。見其壁間自著一楹云。一我輩耐十年寒。供斯民席煖。朝廷具一副淚。聞天下笑聲。一心大異之。時著偉僅二十二歲也。自此同學連輿接席者年餘。爾後余居京師。越三年而著偉遂死。著偉詩甚多。彼時余不好談詩。不記憶之。今印於腦中者。惟餘一首。又脫忘其三句。詩云。一而今已矣三十年。幾個英雄問九淵。胎化有靈觀間氣。帝王無力笑青天。口口口口

口口口。口口口。口口口。口口口。口口口。血書重認涕潛然。所記著偉之文。僅此而已。余初交鐵樵在京師。實乙未冬也。與譚瀏陽三人相衣如兄弟。鐵樵雅不好爲詩。嘗遊西山碧雲寺。瀏陽強之吟成一章。乃大佳絕。今惟能誦其一聯云。白雲白鳥相來去。青史青山自古今。所記鐵樵之文。僅此而已。通甫嘗爲「仁說」一書。其持論略與瀏陽之仁學相出入。又著「性論」「教宗平議」等書。皆未成而卒。患肺病年餘。枕中猶時時屬稿。易簀時以書之未完。不能盡達其意。悉燒棄之。通甫常居鄉。辦西樵鄉間事。甫一年。練民團五百人。興一小學校。建一藏書樓。治事嚴厲。以一新進小生摧抑豪猾。鄉中十餘萬人。令行禁止。賭盜之風頓息。蓋將以爲地方自治之基礎也。甫就緒。病遂劇。至今鄉中人擬爲立祠奉祀。志功德云。著偉最耽哲理。思想淵淵入微。嘗爲「儒教平等義」十餘篇未成。晚年欲窮魂學之精髓。以爲佛教密咒。必有特別妙諦。捐棄百學以冥索之。居羅浮歲餘。以暴病卒。其文豪放連犴。波譎雲詭。能肖其心思。鐵樵算學並世無兩。喜以算學談哲理。瀏陽「仁學」多採其說。晚年辦湖南礦事。在漢口得熱病。以誤藥卒。嗚呼。造時勢之英雄。豈在多耶。使今日諸君子者。猶在其勢力之影響於國民者。甯可思議耗矣哀哉。

唐詩中八賢歌

詩界革命誰歟豪。因明鉅子天所驕。驅役教典庖丁刀。何況歐學皮與毛。諸暨蔣智由觀雲○君遠於弗學尤好慈恩宗因自號因明子東甌

布衣識絕倫。梨洲以後一天民。我非狂生生自云。詩成獨泣問麒麟。平陽宋恕平子枚叔理文涵九流。五言直逼

漢魏逾。蹈海歸來天地秋。西狩吾道其悠悠。餘杭章炳麟太炎義甯公子壯且醇。每翻陳語逾清新。嚼墨嚙淚常苦

辛。竟作神州袖手人。議寧陳三立仙巖○君昔贈余詩有憑爛一片風雲氣來作神州袖手人之句哲學初祖天演嚴。遠販歐鉛攙亞槩。合與莎米謂莎比

亞及米兒頓皆歐洲近世大詩人也為鰈鷁。奪我曹席太不廉。侯官嚴復幾道放言玩世曾般庵。造物無計逃鑄鑿。曼歌花叢酒正醺。

說經何時詩道南。湘鄉曾廣鈞重伯○君昔為余畫扇作齊詩圖跋語云任公好余所治齊詩圖予之詩道南矣其狂率類此絕世少年丁令威。選字穠俊文深微。佯狂海

上胡不歸。故山猿鶴故飛飛。豐順丁惠康叔雅君遂之極如其才。呼天不膺歸去來。海枯石爛詩魂哀。吁嗟吾國其

無雷。淮南南保初彥復○君抗疏憂國事不得達棄官遠且凍餓厚祿故人書招之不出山也

遊春雜感

故鄉春色今若何。佳人天末怨微波。洛橋灞橋楊柳死。江戶長條空復多。

繁纓壓城鴛鴦亂飛。妬風剗地蠻雪霏。東園一夜顏色盡。無復倭孃鬪舞衣。

出郭凌雨馬無力。賭墅看花人未歸。一春流潦苦妨轂。自由車含秋扇悲。

雨餘塍塍薺麥滋。上有三五黃粟離。飛飛慎勿啄金屋。吾與爾曹俱苦飢。

自由車俗名腳踏車本約二三子關車為竟日游屢次阻雨行不得也哥哥

讀陸放翁集

詩界千年靡靡風。兵魂銷盡國魂空。集中什九從軍樂。亘古男兒一放翁。中國詩家無不言從軍苦者惟放翁則慕爲國殤至老不衰

辜負胸中十萬兵。百無聊賴以詩鳴。誰憐愛國千行淚。說到胡塵意不平。放翁集中胡塵等字凡數十見蓋南渡之音矣

歎老嗟卑却未曾。用放翁原句轉因貧病氣峻增。英雄學道當如此。笑爾儒冠怨杜陵。放翁集中只有誇老頌卑未嘗一歎嗟誠不愧其言也

朝朝起作桐江釣。昔昔夢隨遼海塵。恨煞南朝道學盛。縛將奇士作詩人。宋南渡後愛國之士欲以功名心提倡一世者亦不少如陳龍川葉水心等亦

人也然道學盛行掩襲天下士皆奄奄無生氣矣一二人豈足以振之

自題新中國未來記

無端忽作太平夢。放眼崑崙絕頂來。河嶽層層團錦繡。華嚴界界有樓臺。六洲牛耳無雙譽。百軸麟圖不

世才。掀髯正視羣龍笑。誰信晨鷄驀換回。

卻橫西海望中原。黃霧沈沈白日昏。萬壑豕蛇誰是主。千山魍魅寂無人。青年心死秋梧悴。老國魂

道難。道是天亡天不管。揭來予亦欲無言。

題東歐豪傑代羽衣女士

磊磊奇情一萬絲。爲誰吞恨到蛾眉。天心豈厭玄黃血。人事難平黑白旗。秋老寒雲盤健鶴。春深蕞莽瘞

神魑可憐博浪過來客。不到沙丘不自知。

天女天花悟後身。去來說果復談因。多情錦瑟應憐我。無量金針式度人。但有馬蹄懲往轍。無龍血灑前塵。勞勞歌哭誰能見。空對西風淚滿巾。

愛國歌四章

泱泱哉我中華。最大洲中最大國。廿二行省爲一家。物產腴沃甲大地。天府雄國言非誇。君不見英日區區三島尙崛起。况乃堂堂吾中華。結我團體。振我精神。二十世紀新世界。雄飛宇內疇與倫。可愛哉我國民。可愛哉我國民。

芸芸哉我種族。黃帝之胄盡神明。寢昌寢熾徧大陸。縱橫萬里皆兄弟。一脈同胞古相屬。君不見地球萬國戶口誰最多。四百兆衆吾種族。結我團體。振我精神。二十世紀新世界。雄飛宇內疇與倫。可愛哉我國民。可愛哉我國民。

彬彬哉我文明。五千餘歲歷史古。光燄相續何繩繩。聖作賢述代繼起。浸濯沈黑揚光晶。君不見揭來歐北天驕驟進化。甯谷久局吾文明。結我團體。振我精神。二十世紀新世界。雄飛宇內疇與倫。可愛哉我國民。可愛哉我國民。

轟轟哉。我英雄。漢唐鑿孔縣西域。歐亞搏陸地天通。每談黃禍讐且慄。百年噩夢駭西戎。君不見博望定
遠芳蹤已千古。時哉後起吾英雄。結我團體。振我精神。二十世紀新世界。雄飛宇內疇與倫。可愛哉。我國
民。可愛哉。我國民。

賀新郎

昨夜東風裏。忍回首。月明故國。淒涼到此。鶉首賜秦尋常夢。莫是均天沈醉。也不管人間憔悴。落日長煙
關塞黑。望陰山鐵騎縱橫地。漠幟拔。鼓聲死。物華依舊山河異。是誰家莊嚴。臥榻儘依鼾睡。不信千年神
明胄。一個更無男子問春水。干卿何事。我自傷心人不見。訪明夷別有英雄淚。鷄聲亂。劍光起。

正訂分類飲冰室文集全編 卷十六

小說

劫灰夢傳奇

楔子一齣

獨嘯

生巾幘倚劍囊書上

(繞地游)浮雲西下。來去無牽挂。別有奇愁難卸。欲哭還歌。是真和假。念悠悠天地。有淚如麻。國破山河在。城春草木深。感時花濺淚。恨別鳥驚心。小生姓杜名撰。表字如晦。浙江江山縣人也。早登翰苑。旅食京華。半生困高頭講章。十載飽軟紅塵味。自從甲午以後。驚心時局。大夢初醒。便已絕意仕進。僦屋於城西棗花寺傍。讀書自樂。不料去歲義和構釁。弄兵召戎。獎羣盜爲義兵。尸鄰使於朝市。卒使乘輿播蕩。神京陸沈。天壇爲芻牧之場。曹署充屯營之帳。咳。小生那時親在京師。目覩兩宮倉皇出走之形。羣

僚狼狽顛連之狀。以及外兵之蠻野暴掠。民間之狼藉顛連。至今思之。歷歷在目。自念眇軀。無關輕重。遽乃棄官南下。浪跡江湖。今值大難已平。回鑾已達。滿目熙熙融融。又是一反新氣象了。咳。看官啊。你看如今情形。果算得個新氣象麼。(嘯介)今日獨居岑寂。觸緒傷懷。不免嘯歌一回。聊自遣興則箇(梁州序)蒼天無語。江山如畫。一片斜陽西挂。舊時王謝燕。歸何處人家。陰山鐵騎。斗米黃巾。騰付漁樵話。神京有地。聘戎馬。中原無處起龍蛇。泱泱風安在也。

(嘯介)想起中國現在情形。真乃不勝今昔之感。看官啊。你道甲午庚子兩役。就算是中國第一大劫麼。只怕後來還有更甚的哩。你看那列強啊。

(前調)迴風碎擊。怒潮傾瀉。萬斛艤艫東下。誰家臥榻。儘伊肝睡紛拏。優勝劣敗。競立爭存。斯事疇憐借。百年龍戰歐和亞。夢覺黃梁日已斜。英雄淚。向誰洒。

(自語介)自古道。物恥可以振之。國恥可以雪之。若使我中國自今以後。上下一心。發憤爲強。則塞翁失馬。安知非福呢。(長嘯介)咳。你看今日的人心啊。

(皂羅袍)依然是歌舞太平如昨。叶作到今兒。便記不起昨日的雨橫風斜。游魚在釜。戲菱花。處堂燕雀。安傾廈。黃金暮夜。侯門路賒。青燈帖括。廉船鬢華。望天兒。更打落幾個糊塗卦。

這算是那一種守舊的咯。別有那叫做通洋務的呢。

(前調)更有那婢倏奴顏流亞。趁風潮。使我定他的飯碗根芽。官房繙譯大名家。洋行通事龍門價。領約卡拉。Collar。口啣雪茄。Cigar。見鬼唱喏。對人磨牙。笑罵來則索性由他罵。

咳。你看整日價熙熙攘攘。就只是這兩種類的人。想起中國前途。怎生是了。(嘯介)你這般的人啊。就是不想到日後。難道便不記得從前不成。

(北江梅令)俺曾見素衣豆粥陪鑾駕。俺曾見腥風血雨冬和夏。俺曾見列國屯營分占住官衙。俺曾見天壇滿篆著西來馬。卿也無家。我也無家。擔糞土命官似狗。掠胭脂童女如麻。這莫是泥犁霎現的吉祥花。這莫是國民償負的文明價。徧哭天涯。哭徧天涯。苦衷難話。這也算去年今日爛錦年華。

(南泣顏回)擔多少童號婦嗟。受多少魂驚夢怕。到如今頓變作風流畫。過得些些。樂得些些。不管他堂前燕子入誰家。只顧我落花流水春去也。(嘯介)咳。教我一腔熱血從何洒。又是想他。又是恨他。則索披髮長號。撫髀長吟。聲和淚。斜陽下。

(自語介)我想歌也無益。哭也無益。笑也無益。罵也無益。你看從前法國路易第十四的時候。那人心風俗。不是到中國今日一樣嗎。幸虧有一個文人。叫做福祿特爾。做了許多小說戲本。竟把一國的人。

從睡夢中喚起來了。想俺一介書生。無權無勇。又無學問。可以著書傳世。不如把俺眼中所看着那幾樁事情。俺心中所想着那幾片道理。編成一部小小傳奇。等那大人先生兒童走卒。茶前酒後。作一消遣。總比讀那西廂記。牡丹亭。強得些些。這就算盡我自己面分的國民責任罷了。

(尾聲)天荒地老情無那。上聲只贏得憂患餘生兩鬢華。抖擻着閒情。唱出興亡話。

長嘯下

新羅馬傳奇

楔子一齣

(副末古貌仙裝上)

(繞戀花)遼鶴千年再來處。城郭人民。花錦明如許。一笑掀髯聊爾爾。三生遺恨今償矣。

細數興亡還獨語。多少頭顱。換此莊嚴土。布地黃金教歌舞。謝他前度風和雨。

千年亡國淚。一曲太平歌。文字英雄少。風雲感慨多。俺乃意大利一箇詩家。但丁的靈魂是也。託生名

國。少抱天才。夙懷經世之心。粗解自由之義。叵耐我國。自羅馬解紐以後。羣雄割據。豆剖瓜分。縱有俾

尼士志。挪亞米亞藍佛羅靈比梭士。名都巨府。輝映歷史。都付與麥秀禾油。任那峨特狄阿刺伯西班

牙法蘭西奧大利。前虎後狼。更迭侵凌。好似目蝦腹蟹。咳。老夫生當數百年前。抱此一腔熱血。楚囚對泣。感事歎歎。念及立國根本。在振國民精神。因此著了幾部小說傳奇。佐以許多詩詞歌曲。庶幾市衢傳誦。婦孺知聞。將來民氣漸伸。或者國恥可雪。幸謝上天眷顧。後起有人。三傑齊生。一王崛起。（笑介）哈哈。今日我的意大利。依然成了一箇歐洲第一等完全自主的雄國了。你看十一萬方里之面積。三千萬同族之人民。有政府。有議院。何等堂皇。五十餘萬經鍊之陸兵。二百餘艘堅利之戰船。可以戰。可以和好。不體面。這都是我同胞國民。拿他的淚血。心血。頸血。千辛萬苦。換得來的呀。老夫優游天國。俯視塵寰。觀此情形。感極而泣。生前滿肚皮骯髒不平之氣。這也算消除淨盡了。今日閑暇無事。我望東方支那游歷一番。消遣情懷。（內問介）支那乃東方一箇病國。大仙爲何前去。（答）你們有所不知。我聞支那有一位青年。做叫甚麼飲冰室主人。編了一部新羅馬傳奇。現在上海愛國戲園開演。這套傳奇。就是把俺意大利建國事情。逐段摹寫。繪聲繪影。可泣可歌。四十齣詞腔科白。字字珠璣。五十年成敗興亡。言言藥石。因此老夫想著。拉了兩位忘年朋友。一箇係英國的索士比亞。一箇便是法國的福祿特爾。同去瞧瞧聽一回。（內）這位青年。爲何忽然做起這套戲本來呢。（答）人孰無情。士各有志。精禽填海。斥鷃笑其大愚。杜宇啼枝。行人聞而墮淚。我想這位青年。飄流異域。臨睨舊鄉。憂國如焚。回天無

術。借雕蟲之小技。寓逾鐸之微言。不過與老夫當日同病相憐罷了。（內復問介）既然如此。你老羅馬先覺歷史名家。何不將這套傳奇內所說事情。先敍一番。等我們略知梗概呢。（答）待我說來。

（念奴嬌）千年羅馬。被強鄰割據。四分五裂。絕代奸雄專制。手付與奧臣特涅。民族精神自由主義。烘起全歐熱。呼號奔走。一時多少流血。則有智勇一王。恢奇三俊。愛國心如月。或演縱橫外交策。或用戈矛口舌。革命未成。聯邦卒合。國恥從今雪。興亡何限。救時端賴豪傑。

（內）果然有趣。但係我們不熟歷史。未能領會。還求大仙總括大意。再說上遍。（答）使得。

梅特涅濫用專制權。

瑪志尼組織少年黨。

加將軍三率國民軍。

加富爾一統意大利。

（指介）你看索士比亞。福祿特爾兩位。駕雲冉冉。赴約而來。不免迎前會齊同去。願曲則箇。

（飄然下）

（捫虱談虎客批注）作者初爲刼灰夢傳奇。僅成楔子一齣。余亟賞之。日日促其續成。蹉跎至今。竟無嗣響。日者復見其所作意大利建國三傑傳。因語之曰。若演此作劇。誠於中國現今社會最有影響。作者猶豫未應。余促之甚。端午夕。同泛舟太平洋濱。歸夜向午。忽持此章相示。余受之狂喜。因約每齣爲

之評注。兼監督之。勿令其中途戛然而止也。從來劇本。演實人實事。毫無臆造者。惟孔云亭桃花扇一曲。在中國韻文中。可稱第一傑作。此本鎔鑄西史。捉紫髯碧眼兒。被以優孟衣冠。尤爲石破天驚。視云亭之氣魄意境。有過之無不及矣。尋常曲本。僅敏一二人一二年間事。故結構尙易。此編前後亘七十餘年。書中主人公凡四五人。意匠經營。真非易易。吾將拭目以觀其後。此齣全從桃花扇脫胎。然以中國戲演外國事。復以外國人看中國戲。作勢在千里之外。神龍天矯。不可思議。吾不得不服作者之天才。文中但丁者。意大利詩人 Dante 也。生一千二百六十五年。卒一千三百二十二年。其時意大利初爲日耳曼所兼并。故其詩多亡國之音。但科白中所載衰亡事實。多在但丁以後。蓋文家言與史家言異也。讀者不可不審。索士比亞者。英國名優兼詩家 Shakespeare 也。生一五六四年。卒一六一六年。福祿特爾者。法國哲學家兼戲曲家 Voltaire 也。生一六九四年。卒一七七八年。

第一齣

會議

(一千八百十四年)

(淨燕尾禮服胸間遍懸寶星驕容上)

(字字雙)區區帝國老中堂。官樣攬耀作勢儘橫行。肥胖說甚自由與平等。混帳堂堂大會俺主盟。誰抗一手掩盡天下目。兩朝專制老臣心。自家奧大利國大宰相公爵梅特涅的便是。現今世界第一雄州。

無過俺歐羅巴。倚羅巴第一強國。無過俺奧大利。奧大利第一大權。無過俺梅特涅。只可笑二十餘年前。法蘭西有一黨亂民。說甚麼天賦人權。甚麼自由平等。鬧起驚天動地的大革命來。按著那飛天夜叉拿破崙。單刀匹馬。將這如茶如錦的歐洲。殺得箇狗血淋漓。七脚八拳。把俺作威作福的名相。嚇得箇龜頭直縮。尤可惡者。那拿破崙任意妄爲。編了大大一部法典。竟把盧梭孟德斯鳩那一班荒謬學說。攙入許多在裏面。他征服一箇地方。便將那法典頒行。惹得通歐洲所有人民。個個都要自由自治起來。個個都要和我們貴族平等起來。這還了得嗎。幸虧天奪其魄。一敗於墨斯科。再敗於倭打盧。我們十幾國聯軍。將這老猴子拿住。流往大西洋南邊聖希彝拿荒島安置。從今以後。天下太平了。但係民氣囂張。毒燄未熄。卻是一樁後患。今日乃一千八百十四年六月廿一日。各國君相。在偌們京城維也納開大會議。推定俺當個議長。待俺抖擻精神。把那民權禍根。一刀兩段。斬除盡淨則箇。(雜扮列國使臣十餘人上) 信在大夫澶淵會。(雜扮諸小國君主十餘人上) 祭則寡人南面王。(同見淨作足恭態介) 老相公早到了。(淨欠伸回禮介) 列位有請。(從懷中取時表看介) 時候到了。等俄皇普皇兩陛下光臨。便好開議。怎麼還不見來呀。

(副淨扮俄羅斯皇亞歷山大丑扮普魯士王腓力特列同驕從上)(副淨)

(前調)祖傳專制大名邦。穩當燒城打退老拿皇。功狀小心防着虛無黨。博浪這回第一要排場。抬槓。
(丑)不是恁般說。怎麼還未會議。便抬起槓來呢。(副淨)好好待你說來。(丑)

(前調)中原赫赫一名王。有望目前一步儘他強。謙讓民權打破葫蘆樣。狂妄波蘭一案要提防。上當。

(副淨)你怕上誰的當呀。(丑)咄。俗們俄普奧三國。瓜分了波蘭。波蘭人民心懷不服。這回一定運動。想圖恢復呀。怎好不提防。(副淨)你提防即管提防。卻提防洒家不得。(丑)閑話少說。你看列國君相。都已到齊。俗們趕緊赴會罷。(同入介)(衆起坐迎接介)(互握手介)(分次坐定介)(開議介)(淨起立演說介)

(降黃龍)多謝戮力同心。拽到十餘年混世魔王。從今後粉飾太平。將相王侯得意揚揚。要將一切政體。恢復到舊時模樣。(自)我想今次會議第一問題。要將法國大革命以來。及拿破侖所有胡行妄動。一概翻轉過來。直回到一千七百八十九年以前的情狀。纔是還有那失國的列侯。失地的貴族。都要還他本來。(空腔)興滅國。巨族名門。裂土分疆。

(衆拍掌稱善介)(副淨)拿破侖從今略定。波蘭舊壤。已將俄普奧三國所得地方。合成一箇倭梭大侯國。波蘭人民亦願意復合。俗們何不仍其舊貫。再建一波蘭王國。採自由主義。制定憲法。朕願以公

平之心。兼王其地。(丑)你好會打算。想討起我們普奧兩國便宜來了。這卻上你當不得。(淨)自由憲法。係與我們專制國體最妨害的。如此辦法。非但於奧普兩國有損。亦俄皇陛下之不利也。但係今日會議。須要和衷共濟。也罷。只要將舊波蘭南境的炮臺。全行拆去。就讓與俄國管領罷。再將那撒遜王國。割了一半。讓與普王。也足抵過這駒吃虧了。但係倭奧大利。欲要那愛里利亞。及打麻梯亞這幾箇地方。抵償抵償。(丑副淨)這些地方。都是意大利舊壤。還須參詳。(淨)這意大利。只算個地理上的名詞罷了。那裏還算得個政治上的名詞。況且我們藉戰勝國的餘威。難道不要分占些便宜嗎。

(前調)這羅馬舊墟。千歲荒涼。衰草殘陽。儘戰勝餘威。分烹宰割。誰敢雌黃。高強攫金手段。清白人慣會算糊塗帳。休相問鷓蚌爭持。笑煞漁郎。

(衆)老相公果然說得有理。倭們遵依便是。(淨)那意大利之倫巴的俾尼士兩國。還交與奧大利大公之夫人馬利亞管領。其他士卡尼地方。封與我王族弗的南。其摩的拿地方。封與王子佛蘭西士。羅馬教皇皮阿士第七。仍復舊權。尙有撒的尼亞王國。算係意大利一箇正統。就把志挪亞舊壤。都還於他罷。列位看俺這辦法。可還公道麼。(衆)是是。公道得狠。(淨)正事已罷。倭們散會。同去跳舞作樂罷。

(衆譁下)

(捫虱談虎客批注)凡曲本第一齣。必以本書主人公登場。所謂正生正旦是也。惟此書則不能。因主人公未出世以前。已有許多事應敘也。於是乎曲本之慣技乃窮。既創新格。自不得依常例矣。此書雖曰遊戲之作。然十九世紀歐洲之大事。皆網羅其中矣。讀正史常使人沈悶。惟恐臥。此等稗史。寓事實於趣味之中。最能助記憶力。余謂此本宜作中學教科書讀之。著十九世紀史者。皆託始於維也納會議。蓋此會議實為百年來最大關鍵也。上接法國革命及拿破侖時代。為其反動力。下開各國立憲統一事。為其原動力。此編首敘之。結構最為嚴整。維也納會議。各國君相列座者。不下百餘人。可謂古今第一盛會。然其宗旨既悖謬。其精神自散漫無紀。名為公會。實則一切條件。皆由數大國私自決定而已。其後俄普奧三帝。結聖同盟。專以防厭民權為事。遂起全歐革命。焚亂數十年。僅有今日。自此會後。至千八百四十八年。凡三十四年間。史家稱為梅特涅時代。故此文注重俄普奧。而尤深誅梅特涅。皆春秋之筆也。維也納會議。爭論最多者。波蘭問題。日耳曼統一問題。意大利問題等也。故帶敘之。意大利經拿破侖征服。將前此無數小國。統而一之。施行法國民法。自由統一之精神。既已萌蘖矣。維也納會議。所謂牛羊而牧之也。故敘意大利史。尤當著眼此會。此會之結果。使奧國在意大利之權力。更加强盛。固也。然撒的尼亞國。實為他日統一全意之起點。此次合併志挪亞。其國勢漸

鞏固。亦最有關係之事實也。故前提之。維也納會議。爲鬼爲域。有類兒戲。此章以極輕薄之筆寫之。諛而非虐也。當時競奢鬥靡。宴會無虛日。會期將及一年。每日所費。在十萬圓內外。去時有跳舞大會之日。章末所謂同去跳舞作樂者。蓋實錄也。梅特涅者 Metternich 生一七七三年。卒一八五九年。時封公爵。後晉王爵。

第一齣

初革

(一千八百二十年)

(丑持劍騎馬上)手執金刀九十九。殺盡國仇方罷手。(小旦男裝騎馬上)與與直抵黃龍城。痛飲自由一杯酒。(丑)俺乃燒炭黨首領是也。(小旦)俺乃燒炭黨女首領是也。(向丑介)來此已是會所。等我請出兄弟們。聽哥哥演說一番則箇。(內向介)衆兄有請。(內)有請。(衆男女雜上)(互相見握手接吻介)(丑登壇演壇介)(衆拍掌介)(丑)兄弟們。僭們這箇燒炭黨。就奧大利政府的奴才視之。叫做一箇私黨。就意大利同胞的國民視之。叫做一箇公黨。我們的宗旨啊。不管他上等社會。中等社會。下等社會。九流三教。但使有愛國的熱血。只管前來。不論那一人政體。寡人政體。多人政體。立憲共和。但能除專制的魔王。何訪試辦。叫他是哥老會。三合會。大刀會。小刀會。些些不同。但起得革命軍。勤王軍。獨立軍。民國軍。件件皆可。(拍醒木介)兄弟們。須知奧大利是我公敵。梅特涅是我大仇。凡我黨中

同人。是與他不兩立的。

(勝如花) 背直裂。淚橫流。閑得英雄難受。沒來由。隴畔輟耕。甚情緒。豪門使酒。好一副健兒身手。雙肩上。公仇私仇。滿腔兒家憂國憂。禾黍油油。忍斜陽回首。拚著個頭顱似斗。小朝廷生活堪羞。小朝廷生活堪羞。

兄弟們。你真這裏尼布士王佛得男第一。當一千八百十五年卽位之時。本曾向人民宣誓。遵守千八百十二年所立之憲法。不料口血未乾。竟背前約。問他的緣故。卻是梅特涅挑撥禁止。恐怕他開起民權自由的先例來。(拍醒木介) 你想這樣做下去。你們意大利人。還有復見天日之望嗎。(衆搓手怒目介) (維持新聞紙號外急上) 報報報。西班牙國革命軍起。國王不得已。竟自頒行自由憲法了。(衆起座爭閱看介) (小旦取新聞紙朗讀介) (丑) 兄弟們。西班牙人也是箇人。意大利人也是箇人。難道我們就不如他麼。(衆拍掌頓足誼呼介) 機會機會。革命革命。(丑) 既然如此。事不宜遲。俾們卽刻預備。在這尼布士地方起事。還須奉勞幾位姊妹們。到撒的尼亞聯絡同志。一齊禦侮才好。

(小旦) 使得。(衆下) (小旦)

(前調) 身萬里。目千秋。颯颯碧鬢紅袖。厭照鸞逝水流年。學射鵬沙場。勝手。甚功名。設儂消受。趁今日人

謀鬼謀。把從前雲收霧收。鐵血關頭。問鬚眉媿否。漫公憤落他人後。望江山美人對愁。揮金戈美人散愁。
(看劍馳馬下)

(副淨淨扮二警官上)(副淨)身列丹墀與朱戶。(淨)衛護。(副淨)威風赫赫王侯署。(淨)紙虎。(副淨)開門點卯站班住。(淨)休誤。(副淨)若有人民來投訴。(淨)發富。(副淨)啐悄悄說。不要露出馬脚來。(同笑介)王宮們尼布士偕王宮警衛官。今日輪班上值。須得嚴肅。(丑)(率衆雜持長鎗短鎗刀斧木棍擁上)願爲民流血。先教衆一心。「衆鼓譟介」「淨」(副淨)(吹銀笳告警介)(護衛兵集齊介)(接鬪介)(護衛兵敗介)(淨副淨)你等百姓究爲何來。(丑)不是行同盜賊。亦非圖作王侯。(淨)既不作反。爲何持兵。(衆)只要人權與自由。鐵血助他成就。(副淨)既然如此。散去慢慢商量。(丑)無力便無憑藉。不成誓不干休。(淨)到底怎的你們纔心足。(衆)但求憲法別無求。却要我王賭咒。(淨副淨)這樣你們等著待我進報。(外扮尼布士王弗得南第一率王子上)(衆脫帽爲禮介)(外對衆以吻接新約全書指十字架發毒誓介)(王子隨誓介)(衆呼萬歲介)(外下)(雜急上)撒的尼亞人民。已預備起義。挾本國政府。以驅逐奧軍。帕特門倫巴的諸地。亦同時爆發了。俺奉女酋領之命。特來報告。(丑)我們須則預備接應。(合)

(餘文)破題兒初成就。最提防雨覆雪翻手。謾倚著今日豪氣元龍百尺樓。(同下)

(捫虱談虎客批注)燒炭黨者。卽加波拿里黨。Carpocisti 意大利之祕密結社也。其情形與中國之哥老會等大相類。燒炭黨人之志氣。非不可嘉。但學問不足以副之。故道心不足。條理疏略。一挫便難復振。此齣不以莊重之筆寫之。非以成敗論人。實留爲下文三傑地步也。俄羅斯之虛無黨。閨秀最多。其行荆聶之事者。大率皆妙齡絕色之女子也。燒炭黨中有此等人否。我不敢知。竊疑作者以本書且脚太少。不合戲本體例。故著此一段耳。然以情理度之。未必無其人也。燒炭黨本無一定之宗旨。大率以清君側爲主義。獨立精神。仍有所缺。此其所以不成也。尼布士王當民變後。以極莊嚴之儀。舉行宣誓大典。政府大臣皆列坐。王以熱誠之言。誓守善法。蓋亦出於真意。非受迫而姑以免禍也。亦非如本文所敘之草草也。若非有梅特涅。則意人於此時。已可享自由之福矣。小旦所唱一齣。神采活現。鐵血關頭問鬚眉否。二語。吾讀之。亦如冷水澆背。聲音之道。感人深矣。

第二齣

黨獄

(一千八百二十一年)

外扮尼布士國宰相。末扮撒的尼亞國宰相上。(外)還他笑罵總何妨。(末)換我南柯夢一場。(外)無量頭顱無量血。(末)爲他人作嫁衣裳。(同坐介)我等今日受梅特涅公相之命。會審燒炭黨逆徒。須

則早到伺候。(淨扮梅特涅上)熱燄薰天炙手。殺人如草不聞聲。老夫梅特涅自從維也納會議之後。與俄普兩皇結神聖同盟。合力壓制民權。藉以長保富貴。五年以來。內外安謐。巨耐意大利燒炭黨小醜。不安本分。攪亂波瀾。去年竟在尼布士帕特門倫巴的撒的尼亞各地方。同時蠶起。意欲從我與人手中奪回權利。發布憲法。做個自由自主的人民。(冷笑介)非是老夫誇口。你們意大利人。只算是生前注定。命裏帶來的奴才身分罷了。你們的祖宗做了我家奴才已幾百年。難道今日倒要不服勁嗎。況且你們那豪門貴族做官讀書的上等人物。個個都做了我家吮癰舐痔。一呼百諾的孝順孫兒。爾等螳臂當車。豈非飛蛾送死。(大笑介)你看老夫出小小手段。早已叫他們自己殺起自己來。一語指揮大局平定。前後拿到逆黨一千餘名。今日老夫要親自拷訊。並檄調尼布士撒的尼亞兩國宰相齊來會審。一來顯顯俺的威風。二來假手意大利本族人。叫他自已殺個干淨。正是任伊從前瞎說人權貴。要你今日真知獄吏尊。(外末迎見介)(淨中坐外末旁坐介)(外末)老公相到了。就此開審。警官那裏(雜)有。(外末)將那犯人十個一排。挨次帶上。(雜)曉得。

(雜帶丑小旦等十人蓬頭跣足披枷帶鎖上)

(秋夜月)(丑)是男兒自有男兒性。霹靂臨頭心魂靜。由來成敗非由命。將頭顱送定。把精神留定。

兄弟們。我們得做意大利第一次流血的人物。天公待我不薄。須是轟轟烈烈。不要垂頭縮尾。墮喪了國民志氣者。（小旦）正是。我們今日的言語舉動。都要替意大利人造下一個大大紀念。播下一個大大種子來。

（前調）（小旦）盪沈沈睡虎千年眼。教我羅袂生寒芳心警。一聲兒晨鐘吼。待人深省。將奸奴罵醒。把國民喚醒。

（同見淨外末直立怒視介）（淨拍警堂介）爾等不服國法。同造逆謀。今日被我拿到。有何話說。（丑）說是有說的。你且定了你的耳神來聽者。

（混江龍）我是爲民請命。將血兒洗出一國的大光明。便今日拚着個萇宏血。三年化盡。到將來總有那精衛冤東海填平。……只有你這老猾賊啊。……倚仗著千百年將絕未絕的民賊餘燼。結下了億萬人欲殺未殺的怨毒分明。你那外交政策。是要獻媚列強。演出一手遮天大本領。你那內治經綸。是要挫抑民氣。做到十層地獄老閻靈。你在匈加利。是一個殺人不眨眼的劊子手。你在日耳曼。是個兩頭兒搗鬼的妖魔星。……就是在你奧大利本國啊。……你便假假地與些教育。也是束縛言論自由。思想自由。出版自由。教那青年子弟。奄奄齷齷無生氣。你更狠狠地講求軍備。添出許多納稅義務。當兵義務。守法義

務。却把人民權利椿椿件件剝光精。政談會。是你三生九代的仇敵。新聞紙。是你鯁喉礙眼的刺釘。黃白金。是你棺材裏心兒肉兒的親眷。大小官。是你鋪子上高些低些的天秤。逆著你來。便玉石同燼。順著你來。又鷄犬不甯。你還把我祖國意大利當作乃翁傳下的遺產。十一萬方里。把我意大利同胞。認做拿錢買下的奴才。三千萬多名。你目下自然是熱烘烘的尊榮安富。你將來總有日黑魃魃的罪惡貫盈……到那時候啊……千刀王莽。剝盡你的臭皮袋。三家蚩尤。磔透你的惡魂靈。你的頭。便是千人共飲的智瑤器。你的腹。便是永明長明的董卓燈。則那全歐洲人民。懸綵旗。放花爆。誰呼着民權萬歲。便有耶和華天使。插雙翼。卜塵寰。高叫道。天下太平。我是播散自由的五瘟使。我是點明獨立的北辰星。今日裏盡了我的責任。驂鸞歸去。他日啊。飛下我的精神。搏虎功成。坦蕩蕩。橫刀向天笑。顛巍巍。旁人何用驚。

(淨)好毒罵。好毒罵。我其實聽不得了。左右快與我拿下這廝。砍了去罷。(雜扶丑下)(外末喚介)你們却有甚麼辯訴來。(小旦)辯訴是不辯訴。話卻多著呢。

(前調)我是工愁善病。算世間兒女第一多情。我看不過那蜣螂似的腐敗生涯。故此蹙梅額。顰蛾眉。捧心無恨啼紅怨。我受不慣那牛馬似的壓制痛苦。故此損腰圍。懶茶飯。疾首時間嬌喘聲……可恨你們這些狗奴才啊……將累代仇人。認做重生的父母。把一國同胞。當作上供的犧牲。任他踐你土。食你毛。

還說是深仁厚澤。你便舐他癰。吮他痔。圖博個頂戴身榮。（指梅特涅介）他本是異族兒。也難怪舞爪張牙。迫得我上國憤泉秋沸。（指陪審兩相介）虧你是箇神明冑。卻跟著燃其煮豆。煎得那同根瓦釜雷鳴。他是蛇。你便是豢蛇自噬的人妖。他是虎。你便是爲虎擇肉的佞靈。你的辣手段。靠着那厚面皮。天生惡煞。你的黑心肝。映着那白鬍子。異樣鮮明。你只要護得那一頂烏紗。怕甚麼呼牛應牛。呼馬應馬。你更使慣着那兩條火腿。少不免賊多從賊。兵多從兵。待與你講廉恥。叵耐你是慣倚門的楊花水性。待與你講利害。叵耐你是未鑿竅的頑石無靈。與你講天理人情。叵耐你是動物學上涼血部類的老龜鼈。與你說宗邦祖國。叵耐你是巫來由種。認人爲父的小螟蛉。你的毒種。好像疫蟲兒。傳染徧地。你的威風。好像瘦狗兒。恐嚇羣盲。惹得一國上人心死盡。便似冢中枯骨。弄得千年來國威墜落。變做井底銀瓶。我氣不過那百千萬沒臉兒郎。辱沒鬚眉受巾幗。我便冲起那三千丈無明業火。辜負香衾事血腥。我是個嬌滴滴的閨秀兒。生來不解道夫婿封侯。怨我貪着轟烈烈的從軍樂。夢裏顧不得爺娘喚女聲。我要將紅粉兒。砌成那國民基礎。我便把爆藥兒。炸開那世界文明。今日裏拚着個頸血兒。濺污桃花府。十年後少不免精魂兒。再生牡丹亭。坦蕩蕩橫刀向天笑。顛巍巍旁人何用驚。

（淨）我還有些公事。要先走一步了。（外末拱介）（淨下）（外向末介）罵是罵得狠。卻真說着我們心

坎的毛病。我聽着。由不得一陣陣間臉紅耳熱起來。(末)可不是嗎。却是我們廿載螢窗。十年手版。好容易捱到今日這個地位。難道任着這些人胡鬧。摔破了俗們飯碗不成。(外)少不免昧着良心。將他們定了死罪。回覆老公相罷了。(末)正是。(同吩咐介)左右將這廝們帶往死囚牢中。候明日陸續審定。一齊取決。(雜)是。(外末下)(小旦)兄弟們。我們抖擻精神。趕上首領哥哥的英魂。同赴天國。則個正是。

白馬胥潮夜夜聲。

人豪初死鬼雄生。

君看今夕瑤臺上。

風雨何曾敗月明。

(雜帶小旦等九人同下)

(捫虱談虎客批注)黨獄者。天下極哀慘之事也。讀此齣一過。毫不覺其哀慘。惟覺其壯快。才子之筆。能奪天工。信然。信然。金聖歎批西廂。謂讀拷豔一齣。紅娘罵老夫人語。算是天下第一件快心事。吾於此文亦云然。每讀一句。輒欲浮一大白。水滸傳中阮家三雄。罵何濤巡檢語。算是古今第一毒罵。以較此文。尙未能彷彿其什一。吾獨怪作者錦心繡口。爾雅溫文。何苦造此口孽。不畏扳舌地獄。留卿一席耶。指桑罵槐。絕似娣姒不睦的婦人。相詬寒口吻。作者有幾多化身。現此奇態罵人之筆。已奇。

極矣。最奇者。文中連篇累牘。堆滿香奩語。羅袂生寒。芳心自警。辜負香衾。封侯夫婿。皆是癡情兒女嬌態語。豈可以入革命史。更豈可以入黨獄記。乃經作者舞文鍛鍊。竟自生氣勃勃起來。才子之筆。可愛煞人。才子之筆。可畏煞人。梅特涅。當一千八百四十八年。奧大利革命軍起時。子身狼狽。亡命英國。後卒受千人指罵以死。惜哉。所謂磔蚩尤。剗王莽。智瑤器。董卓燈者。未得見諸實事也。雖然。不料五十年後。更遇著飲冰子的筆鋒舌劍。比那路易第十六的斷頭臺。還利害多著呢。梅特涅不足責。以意大利人而做梅特涅的奴才者。則無復人心矣。不知女豪傑一曲混江龍。能罵醒幾個奸奴。能喚醒幾個國民。昔嘗與作者讀龔定庵詩。有捲簾梳洗望黃河之句。作云者。捲簾梳洗下。豈容綴黃河二字。擇語可謂奇極。今此文於辜負香衾下。綴血腥二字。更復成何說話。作者爲文無他長。但胸中有一材料。無不捉之以入筆下耳。桃花扇牡丹亭。與本文相去。何啻萬里。亦竟被他捉去了。咄咄怪事。新羅馬傳奇。已演了四齣。書中正脚色。尙未出現。讀者請抖擻精神。再等半個月。好看桃花扇上侯公子登場了。

第四齣

俠感

(一千八百二十二年)

生扮瑪志尼墨衣學生裝上

〔臨江仙〕萬卷撐腸何用處。哀哀亡國遺民。江山寥寂鎖愁雲。斜陽看雁去。無語獨霑巾。（采桑子）……
十年悔學雕蟲技。有其情懷。有其情懷。掩卷故聞杜宇啼。問千年故國。今誰主。吟也淒迷。夢也淒迷。一
髮中原日已西。小生瑪志尼。表名金士披。意大利國志。挪亞府人也。系出清門。家承通德。不幸先君早
世。兄弟無人。怙恃萱堂。夙承教育。自從十三歲入市立大學。今年十七。卒業有成。精研哲理之科。篤信
唯心之論。屠龍伎倆。未還滄海之珠。倚馬文章。空貴洛陽之紙。每念我意大利。自羅馬失鹿以後。朝秦
暮楚。五裂四分。同種仇離。生民塗炭。痛雌風之不競。爲大國羞。入豚笠以誰憐。謂他人母。自古道。哀莫
哀於無國。病莫病於喪心。小生雖在髫齡。頗知國恥。撫今懷古。感物易哀。獨恨閱歷未深。補救無術。因
作國喪紀念。常著深墨衣冠。等春士之悲秋。向歡場而飲淚。少學同年。相言某是狂生。大人先生。僉曰
此子可惜。

〔歎介〕咳。你這朝菌蟪蛄一流。怎知道我傷心人。別有懷抱也。今日乃係來復休學之期。母親約定。攜
俺前往海濱游耍。以遣情懷。只得收拾奇愁。強爲歡笑。預備陪侍則個。

〔懶畫眉〕忍淚吞聲。做箇詞人。零落鄉關深閉門。要將心血洗乾坤。來日天難問。暫收拾雄心消好春。

〔作更衣修容介〕（老旦上）

（前調）婺緯淒涼。歷劫塵塵。臨睨宗周常苦辛。仲謀有子未全貧。……漆室憂宗國。名山畏後生。孩兒那裏。（生整衣迎介）（以吻接老旦額介）孩兒正此更衣。待往伺候母親。不知母親早出來了。（老旦）就此同往罷。……日遠長安近。且攜着乳虎。空山嘯暮雲。

（同循海濱行介）（老旦）你看這泱泱雄壯的地中海。偕們意會利也。大握過這海上大權來。（生點頭微歎介）（外扮巨人身長七尺。氣宇嚴整。冠服藍縷上）

（破齊陣）戴著頭顱且住。嘔餘血淚誰聞。乞食王孫吹簫公子。累得英雄才盡。都只言湖海無餘子。爭敢望陽關有故人。風塵辜此身。（迎面見老旦生脫帽爲禮介）可憐意大利亡命流民則箇。（老旦揮淚探懷中取出金錢給外介）（外點頭略謝納入破帽介）（生注視作勝胎狀介）（外昂然下）（生日送良久介）（向老旦介）母親。這是甚麼人呀。（老旦）我兒還不知道嗎。這都是爲意大利全國國民受罪的。

（折桂令）他甘心割慈忍愛。別井離羣。俠轟轟似荊卿入秦。氣昂昂似瞿義從軍。……孩兒啊。你該記得一千八百二十年。我們意大利人民。不堪專制虐政。因此南北諸省。同時並起。欲抗逐奧大利。奏自由統一之功。爭奈石卵不敵。民黨失利。那些志士們。或上絞臺。或幽犴狴。……恨皇天不仁。儘著伊暴昏雲的。

前程雨雲翻。東市上朝衣誰問。鐵窗裏雄鬼爲鄰……那滅等的就流竄到這志挪亞海濱地方。舉目無親。淒涼乞食……餓盡青春。愁盡行雲。撇了鄉關。賸了孤身。

（淚介）孩兒呵。方纔那位巨人。便是這樁案內。一個無名英雄了。（生淚介）不想借意大利。還有這種慷慨義俠的人。孩兒愧他多多矣。

（醉東江）惹得俺千百結迴腸不展。三萬斛潮血如焚。恨悠悠天道非。痛歷歷英才盡。望長空霜風淒緊。難道是往車有轍。來軫無人。自想我瑪志尼。亦是意大利三千萬人中之一人。豈可放棄責任……叫一聲我國民。哭一聲我國民。怕不怕英雄氣短。柳絲長。恨只恨自由人遠。天涯近。從今後誓做個男兒本分。愛國精神。

（向老旦介）母親呵。從今日以後。孩兒的身子。都要獻與意大利國民了。（老旦）這樣纔不辜負爲娘的教育。你十七年一番苦心哩。（合）

（尾聲）紛紛成敗無憑準。自古道皇天不負有心人。佇看起陸龍蛇。演出風雲陣。（同下）

（捫虱談虎客批注）瑪志尼爲三傑之首。至是始出現。方入本書正文。作者生平。於近世豪傑中。最崇拜瑪志尼。此齣極力描寫。語語皆有寄託。最宜領略。忍淚吞聲。做個詞人。要將心血洗乾坤。得非作

者自道耶。吾願與一國公民。共哀其志。且祝其貫此目的也。西廂記。繫春情柳短絲長。隔花人遠天涯。近二語。向稱名句。不意又被作者擄擄去了。別成妙語。舞文手段。可畏之至。

第五齣

弔古（一千八百二十三年）

（淨扮加里波的水手裝上）

（破齊陣）孤嶽千尋壁立。長風萬里橫行。冰雪聰明。雷霆精銳。天付與男兒本性。叵耐朝廷送客浮家。慣著甚夜夜驚人匣劍鳴。西風聞血腥。

（鷓鴣天）浩浩天風。輓耳過。醒時涕淚。醉時歌。伏波橫海。人才少。枯苑蕪城。入夢多。驚駒隙。感川波。年來無奈古愁何。誰將亡國無窮恨。說與秦淮舊日河。小生加里波的是也。門閥寒微。家計貧窶。父親德彌尼。航海爲業。小生未離襁褓。已涉波濤。慕哥倫布。通天鑿孔之風。懷納爾遜。爲國同仇之志。兼以性情孤憤。膂力剛強。苦無百里之才。願學萬人之敵。曲衣一醉。結奇士於風塵。磨劍十年。理不平於行路。行年七歲。承父母命。入教會學校。研究神學。叵耐俺粗莽情懷。不喜那陳腐教理。因習些天文算學。航海兵法等學科。雖非專門。却有心得。嗣因家貧廢學。仍尋海上生涯。今日隨船長皮津。航行羅馬。想這羅馬。乃我祖國首都。爲古今東西歷史上第一名譽之都府。今度儘俺游覽。好不壯快。（指介）你看前

面海岸。葱葱鬱鬱。綠楊城郭。煙雨樓臺。國大莊嚴。川原雄壯。正是東西波浪兼天湧。今古風雲接地陰。羅馬羅馬。你兀的不愛煞儂也。

(油葫蘆)一霎涼風吹酒醒。正到洛陽城。望朝霞起。午雲捲。夕陽明。十丈軟紅塵。玉宇涼樓迥。百戰舊山河。歷歷心頭影。一箇是遍舟天地無雙士。一箇是青史人間第一城。我便要整頓全神注定卿。

(作到介)呵呵。好羅馬。今日落到我手了。小生向讀國文。目注心營。今則未遂壯遊。却也已同身歷。今日不免將心中的羅馬。和目中的羅馬。逐一接圖索驥。比較分明則個。(上岸行介)(作驚訝狀介)怎麼一箇整齊嚴肅的羅馬。却這樣凌亂混雜起來呢。(再前行介)(驚介)噯呀。我記得歷史上的羅馬。何等般闐繁盛。怎麼今日却是哀鴻遍野。春燕無歸。滿眼淒涼。都只一片蒼涼氣象也。(嘆介)自古道百聞不如一見。自非親到名城。怎之今昔之感。

(皂羅袍)原來是喬木廢池如暝。甚黃昏。清角吹寒。賸有空城。陣雲黯沒漢家營。月華破碎秦時鏡。淒涼草樹。鶻啼有聲。尋常門巷。燕來無情。難免我夢兒錯認了黃梁境。

我想羅馬城內。名勝古蹟。所在多有。等俺順著路兒。訪覽起來。(行介)志士淒涼閑處老。名花零落雨中看。呀。這便是凱旋門了。呀。這便是議會場了。呀。這便是教會場了。呀。這便是十三大劇園之一了。你

看雄圖未沫。遺址儼然。我偉大國民的精神。好不令人深感。但係斷芳頽垣。磚苔砌草。却怎便零落到
這般田地呀。

(駐馬聽)金碧飄零。北斗星沈。天有恨。伽藍寂靜。南朝煙。鎖佛無靈。神鴉社。鼓斷腸聲。兌葵燕。麥斜陽影。
誰記省。觚棱夢冷。秋前病。

(沈醉東風)你記得昔日啊。定中原鏡歌健勁。你聽得今日啊。哀江南賦詞淒零。雨打了花月痕。浪淘盡
英雄影。望一片山殘水賸。都付與烏啼故國。人泣新亭。樓空夜永。把十年好夢。被風抖醒。

哎。羅馬羅馬。你兀的不痛殺儂也。(嘆介)我想古亦日月。今亦日月。古亦山川。今亦山川。我們這個偌
大羅馬。豈不是靠著從前那幾個豪傑的心血魂力造出來的嗎。天公啊。怎麼你昏昏沈沈了幾百年。
竟不肯替我們意大利。再降一個人才。

(五韻美)天無語。人如病。後來人。叫不出前人應。向那裏叫喚起國民魂性。似這山河破碎。待誰來擔荷
一身輕。(黑蝶令)便是俺無情有情。到這裏不由人魂驚目驚。猛回頭。紅淚飄零……俺的羅馬啊……
只怕你也黯銷魂。憐我憐卿……俺啊……悶着那滿腔兒歌聲哭聲。對著了大江心月明浪明。抵多少
棒喝兒。儒經佛經。則索打疊前程。誓恢復神京舊京。

(自語介)俺想英雄事業。天不限人。豪俠情懷。今當猶昔。我加里波的。生茲名國。方當盛年。難道古人能創立這羅馬。我們就不能再造這羅馬麼。但係天地悠悠。人心夢夢。正不知舉國中同茲感慨者。還有幾人。

(憶多嬌)是百年歌舞厭言兵。怕一木難支大廈傾。但祝到處天涯。春若有情。趁着那芳草初生。啼鴉未鳴。管領取這爛錦年華。魂清夢清。

羅馬啊。俺今日便久淹留。也增傷感。不若暫且作別。奔走江湖。訪尋同志。待到大業告成。再來和你厮守罷。

(尾聲)我是多情却是總無情。解道莫近彈碁恨不平。便揮手空濛。一瞥山河影。

下

(捫虱談虎客批注)敘瑪志尼起筆。於海濱一遊。敘加里波的起筆。於羅馬一遊。皆係胎孕二雄壯尼之心也。是歷史上實事。是劇曲上真景。二雄留此佳話。似為新羅馬傳奇地步。寫瑪志尼。便活畫出

一箇大學者。寫加里波的。便活畫出一箇大軍人。真是寫生妙手。前半齣未到羅馬以前。極意想望。描出如錦如荼世界。襯起後來失望。益增悵觸。所謂將軍欲以巧勝人。盤馬彎弓故不發也。作者生

平爲文。每喜自造新名詞。或雜引秦東泰西故事。獨此書入西人口氣。反全用中國典故。曲中不雜一譯語名詞。是亦其有意立異處。作者少年善爲綺語。故雖憂國之文。亦往往以美人芳草出之。不可不謂文人結習。然其所以哀感頑豔者。則亦以此。

第六齣

鑄黨（一千八百二十五年）

（生扮瑪志尼上）

（戀芳春）慘霧黏天。穢塵滾地。憑高怕望中原。偏是睡獅無賴。沈睡千年。便把奇愁拋遣。奈江山耐人留戀。雄心遠。待翻起滄海桑田。添段因緣。

小生瑪志尼。自從前年隨母親海濱一游。遭逢志士。哀聆慈訓。根觸迴腸。便以己身許國。誓爲同胞有所盡力。去年投入燒炭黨中。欲圖共事。不料該黨一挫之後。精神沮喪。志氣消沈。前輩既已彫零。後起不能爲繼。而且智識卑陋。道德衰頹。這樣看來。我意大利。靠著這班人。是不中用了。再看那舉國中熙熙攘攘的人。却大半在昏昏睡夢中。不知國恥爲何物。國仇爲何人。便有一二憂時之士。亦復離羣索處。消息不通。力薄勢分。何濟於事。（嘆介）小生每念物極必反。人定勝天。怯大敵者非丈夫。造時勢者爲俊傑。當仁不讓。舍我其誰。因想聯合同志。重新組織一箇全完民黨。仗茲團體。共濟艱難。今日約定

格里士比阿西尼兩位齊集舍下同議章程敢待來也。

（作翔步室內介）（末扮格里士比丑扮阿西尼同上）朝從屠沽游。夕拉騶卒飲。此意不可道。有若茹大鯁。傳聞智勇人。驚心自鞭影。蹉跎復蹉跎。黃金滿虛牝。匣中龍光劍。一鳴四壁靜。夜夜輒一鳴。負汝汝難忍。出門何茫茫。天心牖其逞。既窺豫讓橋。復瞰軹深井。長跼奠一卮。風雲撲人冷。（末）俺格里士比。正從昔昔里島北來。游歷內地。訪尋同志。今承瑪君約商大事。須速前往。（丑）俺阿西尼。自從瑪先生游。久聞微言大義。今日函丈見招。不免隨格公早到。（同見生握手爲禮介）辱承見招。不知有何賜教。（生）非爲別事。小生痛念我國同胞前途。不勝憂慮。今日特請兩君同商拯救之法。並講明我等應行之責任。以後好一同努力進行。（末丑）先請領教。（生）

（六奏宮詞）風雲無色。關河帶怨。付與斜陽。一片聲聲啼鴉。空教沈損華年。俺淚盡了獄三字。才枯了策萬言。天醉也。怕問天。天民那得受人憐。我待約精禽。馱石填冤海。我便學師子。談經吼舌蓮。天遙地遠。山河大千。風馳雲捲。國民少年。便泥犁也。應有光明綫。莫遷延。優勝劣敗。猛要著先鞭。

兩君啊。今日正是民族主義競爭時代。非全國人萬衆一心。結成一至大團體。不足以圖自立。而抗外敵。但合羣之義。言之似易。行之實難。我想天下事。必須定大處著想。從小處落脈。但使一國中能有數

人或數十人。真誠愛國。結成一團。死生不渝。憂樂相共。確認責任。奮力向前。則涓滴可以成江河。跬步可以致千里。將來逐漸推廣。或者同志徧於全國。大局藉此挽回。亦未可定。我等雖屬人微言輕。然亦國民一分子。應盡義務。責無可辭。意欲與諸君共商。組織一強固民黨。以爲同胞先導。未知兩君意下如何。(末丑)某等久有此心。恨才力棉薄。未能成就。今承指示。妙極妙極了。但這民黨宗旨若何。手段若何。還要請教呢。(生)待我說來。領教罷。

(北江梅令)你看這客星據座。天容變。你看這濁流飲恨。人權賤。你看這狐兔縱橫。占盡了中原。你看這虎狼擇肉。不住的把威權搨。冤也胡纏。孽也胡纏。文明敵橫行徧地。專制毒憔悴千年。遮莫要危樓打碎。奮空拳。遮莫要亂麻斬斷起一度玄黃戰。天也無言。佛也無言。只怕待劫灰飛盡。靈光纔現。

兩君啊。我想國中積弊既深。斷非彌縫補苴。可以救得轉來。破壞之事。無論遲早。終不可免。倒不如用些人力。去做那有意識的破壞。早一日。還得一日之福哩。(末)這議論是一點不錯。但看我意大利人心腐敗。到這般田地。莫說平和的福分不能穀享受。只怕連破壞的事業。也不能做成。這却怎麼好。(生)正是。但古語說得好。有志者事竟成。今日操練一國人。叫他成就一箇國民的資格。正是我輩責任哩。

(前調) 借要信。靈魂不共身流轉。借要信。英雄成敗尋常見。借要信。國民義務使天然。借要信。倚賴他人是一種奴才券。生也斯連。死也斯連。任把七尺頑軀散作灰。也教一國同胞團成片。今日啊。便是杜宇啼枝血淚鮮。他日啊。應有神龍起。蟄風雲變。若問因緣。此是因緣。只怕待劫灰飛盡。靈光纔現。

(末丑) 精理名言。佩服佩服。今日就請擬定章程。兼起一個會名。便好聯絡同志。推廣宗旨罷。(生) 想我意大利自羅馬解組以來。直至今日。都是奄奄無生氣。被那強鄰大敵。呼爲老大帝國。今日要救衆生。必須剷除暮氣。就起箇會名。叫做少年意大利。何如。(末丑) 妙極了。(合)

(尾聲) 望前途。隱隱羣龍戰。那許我。同學偷閑學少年。待要一髮千鈞。把乾坤扭轉。(生下)(末丑隨下)

(捫虱談虎客批注) 茲編闕如。經已兩月。海內詞壇。以監督之義務相責備者。書凡十數。至但著者既日罕暇晷。又此等鉤心鬥角之作。非咄嗟可成。乃公亦無如何也。今再三敦促。成此一齣。敬以謝讀者。

傳奇體例。第一折謂之正生家門。第二折謂之正旦家門。實爲全書頭角。但此編主人翁不止一人。萬難偏重偏輕。故不能照依常例。作者本擬以此折。令加富爾登場。鄙人嫌其三傑平排。未免板笨。且加富爾可表見之事跡。不妨稍後。故商略移置第八齣。「少年意大利」爲新羅馬成立加大根原。此折以韻文敘述。其宗旨方法。實屬至難之事。前此曲本。未嘗有此境界也。讀者當觀其苦心遣辭處。格

格里士比者。昔昔里島人。後此喚起南意大利之革命。佐加里波的成功者也。建國後。曾兩任首相。土年始卒。阿西尼者。後此行刺法帝拿破侖第三。以間接力成就意法同盟者也。二人皆「少年意大利」中緊要人物。有位置於本編者也。故先出之。

□ 俠情記傳奇

第一齣 緯憂

（破齊陣）（旦淡裝上）擾擾羣龍世界。亭亭似水流年。雨打斜陽。天黏芳草。那穀我儂消遣。望月華故國三千里。怨錦瑟無端五十絃。奇情除問天。

（卜算子）獨自下妝樓。有恨無人省。不是懷春不感秋。磊磊心頭病。獨自上妝樓。望斷山河影。昨夜雙龍匣劍鳴。負汝汝難忍。儂家馬尼他。原籍意大利國人。先世本累代將門。父親亦曾任少尉之職。只因本國主權久歸他族。養兵但防家賊。操戈動殺同胞。因此憤憤去官。挈家避地。僑寓這南美洲烏嘉伊國。耕獵爲業。不幸五年以前。癘疫時行。父母相繼溘逝。撇下儂家姊弟二人。好不孤苦。（嘆介）唉。家家運連遭。這也難講了。只是一件。我家家傳將種。系出清門。先君愛國如焚。回天無力。因把我姊弟二箇。從幼教育。最以國民責任。振以尙武精神。儂家雖屬蛾眉。頗嫻豹略。讀荷馬饒歌之行。母覺神移。賦木

蘭從軍之篇。惟憂句盡。可恨我祖國久沈苦海。長在樊籠。志士銷磨。人心腐敗。正不知何時始得復見天日哩。(長嘆介)咳。難道舉國中一千多萬人。竟無一箇男兒。還要靠我女孩兒們。爭這口氣不成。罷了罷了。今日兄弟出門游獵。獨坐無聊。不免取新聞紙閱看一回。聊自排遣則箇。

(懶畫眉)望海雲盡處是中原。那裏討匹馬縱橫畫裏傳。恨睡獅無賴睡年年。哎。這兒女情怎喚得風雲變。辜負了血淚絲絲託杜鵑。

(作讀新聞紙介)六月十九日。里阿格蘭共和國。起獨立軍。與巴西開戰。有意大利軍人一隊。突然相助。奪得巴西兵船一艘。大獲勝仗。(作驚介)噯。怎麼我意大利還有一羣恁般義俠的人。真算祖國之光了。(小生提鎗上)見獵輒心喜。聞歌也淚流。姐姐在家麼。(旦)兄弟你去射獵。爲何恁早回來。(小生)姐姐有所不知。兄弟剛纔在外頭。碰着一位本國人。聽着一件可喜可悲的事。故此回來告訴姐姐。(旦)甚麼事呀。(小生)聽見里阿格蘭國。和巴西開仗。有我本國一隊人。路見不平。拔刀相助。竟奪了巴西兵船。(旦)是呀。我剛纔看見新聞紙。也是怎麼說。但這是祖國名譽一件大喜事。兄弟爲何又說可悲呢。(小生)可惜到底衆寡不敵。被敵軍兵船全隊躡擊。竟殺傷我同胞許多人。我船僅得拚命脫逃。至今尙無下落。(旦)真箇嗎。(小生)誰哄姐姐來。(旦)淚介)

(前調)(旦)爲甚鈞天沈醉帝昏然。淘盡這有限人才不自憐。……兄弟啊。這此慷慨義烈的英雄。他原以流血救民自命。就是馬革裹屍。也不能算做不幸。只是他抱此熱腸。未能設替意大利祖國出一口氣。怎好便這般結局呀。……恨你國殤無血到家園。叫我傷心人。禁不住啼紅怨。望絕了江心慘暝煙。

兄弟啊。你可曾打聽出。那個首領是個甚麼名字。也還逃脫保全得不曾。(小生)我聽得這首領叫做加里波的。是箇久慣航海的人。一千八百三十二年。在本國革命不成。竄流到此。他年紀不過長姐姐兩年。今年纔二十五歲。那日這船被敵艦全隊追圍。竟能出險。諒來是虧得這個人還在著哩。(旦)

(山坡羊)忍不住淚珠兒飛濺。按不下柔腸兒愁顫。則爲他高義雲天。替國民放一道一道的光明線。甚因緣被天公妬得緊。他便有極情誰見。我待把奇愁拋遣。奈如此江山。怎放得那人兒天涯遠無言。念鄉關。淚暗懸。相憐夢。英雄非偶然。

兄弟。我想天公既肯替我們意大利生出這般一箇豪傑。也不該一事未成。奪之而去。只望他此番保全。將來還要返祖國。建一番驚天動地大事業呢。(小生)正是(旦)兄弟你出門半天。想也餓了。待我把午餐預備出來。同喫罷。

(尾聲)我一生兒愛才如命。是天然。敢則是憐我同胞非自憐。空想着那風雷豪邁月嬋娟。

(旦下)(小生弔場介)我想那加里波的血性熱情。奇才壯思。正和我姐姐天生成一對兒。怪不得姐姐恁般感動。怎得天假之緣。將來他們有日子。一塊兒同做國家大事才好。正是。

是誰精衛能填海。祝女鴛鴦不羨仙。(小生下)

此記本新羅馬傳奇中之數齣因新羅馬按次登載曠日持久故同人懇惠割出加將軍俠情韻事作為別篇先登於此○著者識

正訂分類飲冰室文集全編 卷十七

尺牘

尺素五十紙

某頓首。讀者諸君閣下。本報首事不過數月。而印刷之數。自二千增至五千。讀者之數。當自二萬增至五萬。予居海外。乃得借此文字因緣。與當世數萬賢士大夫。以精神相往來。榮幸何如。顧以覆瓿之資。承燕石之賞。良自赧耳。屢得來書相責備。以記事一門。簡陋爲病。雖微尊諭。固自知之。但僻在三島。涉海以求中原文獻。動費旬日。求得而齎之以東。又費旬日。著錄印布。反哺厥母。又費旬日。則甯止六日。蒲十日。菊而已。爲地限。爲時限。記者復見聞固陋。材力薄弱。實無術以答盛意。雖然。報館第一責任。在報新聞。固未敢全放棄此義務。今後每日有所聞。謹當飛函徧告。半月一付驛使。但無責以速且備。則免於罪戾矣。某謹復。五月十六日

讀者諸君鑑。日來國事。無善狀可告。所差強人意者。惟東來游學諸青年。日漸增加一事。今年正月。此間

有留學生會館之設。著藉同瀛錄者二百七十八人。距今未及正月。已增三倍有餘。其進步速率之比例。視本館尙有過之。以此測算。明年正月同瀛之統計。可望至二千七百。中國前途鬱鬱葱葱。敬爲諸君賀。

某白。五月十七日

某白。頃北京政府有電報。與日本外部。請飭諸留學生。毋得去辮髮。其已去者。勒令再蓄。否則無論官私。悉放逐出徑去。此事未免無理取鬧。聞日本政府。惟以此令下成城學校。他則置之。實不過勉強一應酬耳。政治學公例。凡一私人之言語舉動。不侵及他人自由。不傷及社會秩序者。政府不得干涉之。髮也鬚也。若何去留。若何裝飾。皆與他人無關礙。於社會無損害。政府官吏。無可以參預之之權。本朝入關。強行薙髮令。古今萬國。無論頭等文明。四等野蠻。皆無此政體。今乃更以這般恥辱之事。欲行治外法權於他邦。何苦爲外國報紙笑話一門。增一材料耶。

五月十七日

頃東京之中國公使館。有日本外務省。派一人爲監督。凡日本人往見公使者。非由外務省紹介書。不許接見。有耶穌教教士某。三度叩關。皆被拒絕云。蔡公使視自由爲仇敵。今與他仇敵日相遠。自當愉快。但據國際法。凡外交官皆代表一國神聖。不可侵犯。今日本待我公使如此。殆以代表不自由之國。當以不自由待之耶。請諸君下一轉語。某惶恐白。

五月十七日

某頓首。英國鴻哲斯賓塞爾先生。今年達於八十二齡之上壽。現代學界之耆宿。此巨擘矣。前陽歷四月二十七日。爲懸弧令辰。先生自著一書。名曰「事實與計注」。卽於是日出版。以爲紀念書。凡三十九章。內有論心意之表現。論音樂之墮落。論愛國心等章。最爲博深切明。其自序云。「今以此書公於世。吾敢信此書爲吾一生最後之著述矣。」云云。先生以進化論提倡一世。學說影響。徧及寰宇。今其思潮。猶不落青年新進之後。我輩展讀斯篇。能不起敬。願祝先生。更作此等紀念者數度。以惠後學。諸君想有同心。心歟。某頓首。五月十九日。

日本理學博士橫山又次郎。頃著一書。題曰「生物之過去與未來」。謂將來世界。當有一種動物。其聰明更過於人類者。其立論大旨。謂下等動物。腦在後而顎在前。腦小顎大。禽獸是也。中等動物。腦在上而顎在下。腦較小而顎較小。人類是也。高等動物。腦在前而顎在後。腦大而顎小。馴至無復牙齒。其徵据頗繁。持論頗新穎。大足供消暑之一助。但此後果有此等高品。得毋令我輩中人以上者。怖殺耶。孔子曰。後生可畏。然哉。然哉。某拾紙。五月二十日。

讀者足下。國民應有之權利。國民不可不自監督之。開平礦務局。爲我國人合股份所促之有限公司。資本一百五十萬兩。每年出煤約八十萬噸。利贏頗厚。公等當稔知之。義和變起。復借英國人名義。爲保護

計亦非得已。乃自英人接手以來。規模全變。而股東絕不得與聞。頃將百五十萬兩之資本。改爲一百萬磅。而收回舊股東所持一張一百兩之股票。另給以一磅之票。二十五枚。所餘五十二萬五千磅之股票。則由歐洲人領受去。日本報紙謂歐人實未交一文之資本。而日持儻來之股票。來售諸上海。獲利無算。云竊意現今開平礦務局之主事者。號稱得人。未必爲他人所愚至此。但股票變動之緣由。爲股東者。不可不質問。受股東之委任者。不可不宣明。權利思想。固當爾爾。公等以爲何如。某越俎奉白。五月二十

一日

連日陰雨。使人悶損。我國政界。亦霾噎不開。日接於耳目者。皆可爲氣結。率奉告一二。榮慶之爭。實現今北京政府一暗潮。其波瀾或日漲日劇。以致決裂。亦未可知。日前有御史某者。劾賈景仁依附慶邸。當聯軍入京時。設法欲擁戴攝政。希圖富貴。請革去道員。以保全賢王。又附片劾惲毓鼎與賈景仁勾結美武官戴麗生。立民政廳。以與五城爲難云云。二人皆慶王所愛也。慶聞此。摺甚怒。語其幕府云。某竟敢以叛逆誣我也。於是咸疑某京兆所嗾使。次日御史王乃徵。乃劾某京兆種種事。語極醜詆。欲下廷議。爲榮相所護。乃免。某京兆榮相所愛也。嗚乎。大廈將傾。而燕雀猶紛紛爭稻梁謀。鄙人不復責之。惟憐之耳。某再拜。

五月二十五日

榮慶相聞事。今據日本報紙。尙有醜聲不足爲外人道者。法商某許賂慶邸。而求包收土藥稅。每年可得三千萬元。此事若成。許每年送榮慶各五十萬。慶語榮曰。此事大裨國帑。盍亟行之。而隱五十萬之說不告也。榮頷焉。入告太后。太后頗喜增多金也。事垂成矣。姑下督撫一議。法商聞之。卽造榮府致謝。兼道及所謂五十萬者。榮怒慶之欲攘其利也。曰。萬事豈不在我。今各省復奏。亦多不謂然。榮遂止之。慶力爭不得。懊憤欲絕而已。敢問讀者諸君。榮與慶兩造孰直。某再白。五月二十六日。

據電報。昨日諸公使會議還津問題。俄使聲言。以後此事一任各國主張。吾俄不復與聞云云。俄人外交手段。實可驚絕。蓋明知此事。各國將有作難。不欲以此加怨於北京政府。而嫁其罪於他國也。是日之議。竟不決。某匆匆上。五月二十六日。

諸君足下。滿洲新條約所議定。俄人以西歷七月六日。卽中歷六月二日撤兵。距今僅一禮拜耳。然俄兵今尙無束裝之色。嗚呼。權力不相等之國。而相與結約。約直兒戲耳。某白。五月二十六日。

拜啓。今日乃美國獨立建國紀念日。(西歷七月四日)祝炮轟轟。不絕於耳。賀旗舒舒。不絕於目。真使我輩無限感動。本日非徒美國一國大紀念日。實可爲全世界人權之大紀念日。某等正容整衣。取出行篋。中華盛頓遺像。供養瞻拜一番。聊表祝意。匆匆不多具。某再拜。五月二十九日。

拜啓北京政府。最妙外交手段。莫如與人結密約。聞中俄又結西藏密約矣。其詳不可得而聞。其第一條。與光緒十年朝鮮之役。與日本所結天津條約大相彷彿。即西藏有事之時。俄國欲派兵往。先照會中國。中國欲派兵往。亦先照會俄國也。讀者試思我中國今日。安得有派兵往西藏之事。西藏竟是俄人囊中物了。聞主張其事者。榮中堂也。某白。六月二日。

讀者足下。今日

西歷七月十一日

英首相沙士勃雷侯辭職。國庫大臣巴科代之。沙侯可謂三島政治界申之張子房矣。候自始入議院。至今四十九年。凡三度組織內閣。位首揆者十四年。今年七十二歲。具思退隱。已非一日。徒以波亞戰事未了。身任其難。今和議已成。遂翩然挂冠。立憲政體之祖國。其政治家之風度。殊加人一等。可勝欽慕。某再拜。六月七日。

美國某華文報主筆。有自署太平洋客者。新著一書。名曰「新廣東」。登諸報中。凡三十一續。乃完。實可稱近日文界一奇作。鄙人自問胆量頗不小。讀之猶目瞪舌橋。頃將乞其版權。印數千紙。散諸內地。無裨獨以嚇老夫。一笑。某匆匆白。六月十一日。

炎熱鬱蒸。使人損悶。諸公想同感。某等避暑旅行。薄游松島。松島爲日本三景之第一。凡八百有八島。攢烈海岸。如初夜星。誠爲壯觀。數月以來。爲書卷筆墨文字之奴隸。不能自由。得此頗一洗塵俗。歸途汽車。

中見新聞紙。知學生與公使爭權利事。且憤且快。來日以來。有吳孫兩君見放之事。東京學生團體激昂。紛擾達於極點。某等亦尋消問息。心憧憧然。連日不復能成一字。報中之文。大草率減色。無以饜讀者諸君之望。主臣主臣。七月五日

學生事件。想爲讀者諸君所急欲聞。某等有所知。隨時詳告。本報之責任也。自吳孫兩君之見放。國恥觀念益湧起於學生人人之胸中。吳君出行之日。侵晨六點鐘。學生羣集新橋驛。東京之大車站相送者數百人。人心團結。蔡使當亦生畏。日本人當亦起敬。某匆匆白。同日

吳孫二君去後。神田鈴木町之留學生會館。日日集議。日本人深爲注目。其集議之詳情。某等局外無由悉知。但其大旨。以日本人狗一俗吏之請。蔑視我國民全體。毫無可指名之罪。而放逐吾同學。吾儕靦顏留此。實無面目。誓相率歸國。甯失學問。勿失名譽。萬喙一聲。洶洶不可壓抑。其中留學稍久。年稍老成者。調停善後。煞費苦心云。聞昨日最後集議之結果。擬暫停課。以待此事之著落。若無著落。退學未晚。遂以此決議。雖然閒學生之相率歸國者。旣已逾百人云。七月初七日

弘文學院。爲高等師範學校長。嘉納治五郎氏所辦。而外務省實主持之。其中有速成師範一科。實嘉納氏採吳君稚暉之意見以倡立者也。留學生中范君馨心。爲之通譯助教。會館決議後。范君亦以多病辭

斯席。速成師範生百餘人。失其耳。教授失其口。遂不得不停課。此事影響最重云。然范君固主平和主義。日勸同學勿悻悻還歸。某採訪白上。七月初八日。

留學生會館集議之日。鎮國將軍毓朗。向諸學生打躬作揖無數。請其息怒少安云。毓者宗室人。北京政府派來調查警察事務者也。有某生氣最盛。而受毓將軍之禮亦最多。某生竟始終不答一揖。亦太倔强矣。同日。

日本之有力者。集議於其華族會館。決議認蔡使之無禮。表同情於學生。特派人以其決議之條件。報告於留學生會館。並代表本國上流人士道歉意。頃東亞同文會人。居間調停。頗盡瘁云。亡羊補牢。東道主殆亦兢兢。某續報。七月初九日。

此次吳摯甫京卿。頗稜稜見風格。助學生張目。聞吳孫見放之次日。日本文部大臣菊池大麓訪京卿。京卿憤激不可言諭。謂日本只認得現時代表政府之公使。不認得將來代表國民之學生。實所大惑不解。以此感情。東京之我國學生數百人。皆將束裝歸去。一月以後。京卿當不留隻影矣云云。菊池遜謝。言此是內務省行政之事。文部省初不與聞。其後凡日本之教育家政治家。有往訪者。京卿皆峻詞厲色。不少假借云。京卿亦自束裝候船。即歸。數日來不拜一客。不赴一宴。此役以後。京卿崇拜日本念頭。減去十之

九云。某恐內地志士崇拜日本之念頭。亦減去十之九。某頓首。 同日

再者。聞使館爭議之次日。菊池大臣以萬壽聖節。赴我公使館見蔡使。調之曰。聞昨玉體受驚。是思親來問訊慰勞。嗣聞乃係小孩子們。要上學讀書。不能如願。遂來長者前撒嬌。孩子們喜歡讀書。乃是好事。請閣下放心。蔡赧然。 同日

吳孫見放以後。日本報紙皆阿其政府。莫肯主議公論。惟一日文報。名曰「日本泰晤士」者。大攻難政府。大意謂「我政府以吳孫二人妨害治安。但其所以妨害之實證。頗難索解。以鄙見論之。前者西人因不肯納家屋稅。聯衆以拒政府之命。其事視吳孫二人之關係輕重何如。對於日人未嘗一過問。而吳孫則放逐不稍貸。毋亦因白種人之強權。有不易侮者耶云云。」其言非無一理。某譯述以聞。 七月初十日

□學生不平之聲

吳孫事件以後。學生拂袖歸者踵相接。識者不能不爲東方時局浩歎焉。彼國新聞多盲從。政府不特不肯作持平論。又從而文之。學生屈鬱不得伸。乃紛紛投書本社。求揭載志。欲令天下知有眞黑白耳。來書盈篋。本報限于篇幅。未能悉載。唯擇錄一篇。以代表其餘。

「吳孫兩氏被放逐之故。果何在乎。」不平生投稿。

今回我留學生中吳孫二君被逐回國。其所以致是之故。實果何在。吾人甚難索解之。卽彼國之輿論。亦漠然無所歸宿。概言之約有三說。今略陳必于左。並發揮其謬。

(一) 侵害警察權之說。

(二) 妨害治安之說。

(三) 身分之說。

第一說曰。外國公使館駐在之國。有保護公使館不使侵害之義務。其權屬於警察。苟侵害公使館。卽直接侵犯警權。至若學生請求公使之事。其正當與否。非警察所問也。云云。此乃無端之說也。我留學生請見公使之當日。其舉動之安穩。秩序之正當。觀貴報第十三冊所錄。可見一斑。今設使爲此說者。立證。吾恐彼必無以應也。雖然。學生等請見公使之日。公使屢推不會面。學生猶苦苦請之不退。夫學生之不退。實有最苦心在。蓋恐一退之後。再難望其達目的也。學生之苦請不退。全依正當儀式哀懇。以冀公使之一晤耳。絕非以強力要迫恐嚇之也。夫如是。吾不知論者之說。果從何來。

第二說曰。吳孫之放逐。非爲犯法所禁。乃恐其妨害治安。故特爲此預防之策。乃行政上一手段也。夫

行政處分。不必要有犯法之實事。唯行政官認其行爲不穩當則可矣。苟既犯法。則已入於法律問題。非行政問題也云云。今日日本政府之放逐吳孫。標其名義曰「妨害治安」。實採此第二說。蓋此說範圍廣漠。立論最易。欲反駁之。實最難也。雖然。夫行政處分。果如其漠然耶。吾人不能無疑。苟如論者所云。吾人之自由權利。不能不爲行政者意思之犧牲。吾人苟知自由權利之可貴。則必知行政處分是有限也明矣。據日本刑法。唯害國家政治組織者。其處罰最嚴。不特準備行爲處罰。卽意思表示。亦作犯罪。學者解說之曰。此與刑法原則相反。乃一例外耳。實出於立法者不得已也云云。今謂吳孫妨害治安。不特無事實無準備。且並不見有表示妨害治安之意思。而行政者驟以妨害治安之名加之。其本於何意。吾人雖不知之。要之此名實非適當。則敢決言也。况此事與害政治組織。豈可同日而語哉。

第三說乃前二說之後援也。其說曰。吳孫之放逐。絕法律上之意味。亦非政治上之意味。唯是是強求面會公使。非學生身分內所應爲者耳云云。夫學生等之求見公使。苟非以暴力脅嚇。循儀式以求見。則此古老專制之說。不待余多辨之。而識者自明黑白。故余不反駁之。唯欲問之曰。信以子言。不法學生等不守身分。強求見神聖不可侵之公使。罪惡薰天。日本臣民。羞語此輩同履土。當屏逐之歸國。不

容猶豫。吾想文明國政府。斷不採此卑污之語。以宣言於天下也。

右三說之論點不同。要之爲蔡一人洗脫則一也。何故爲蔡洗脫。欲明文明政府。不袒私而庇不義也。其言柄可謂極得體矣。然細察之。奈未足以掩天下知者之目何。余於諸方面觀察。皆不能明孫吳被放之故。乃質問諸多人。皆曰別有緣故在。叩其說則曰。吳孫之放逐。實非因上三說之故。乃出於蔡公使之請耳。公使乃主權者之代表。公使之請卽主權者之請也。國家固有拒絕請求之權。然欲友誼之圓滑。則應亦外交手段之一端也云云。論者之說。固未嘗無一理。夫公使雖有代表主權者之資格。然其一動一作。非盡是代表主權者。於許多事件。可作一私人之資格觀之。國際公法。有其例也。年來明詔屢降。鼓勵學生出洋留學。其言昭昭。天下所共知之也。日本與我國情摯最通。豈當事者猶未之知耶。今蔡故意妨礙學生入學。明背聖旨。實出於一人私意。非代表主權者之意。雖孩提無不知之。今日本政府容認蔡之背旨行爲。屏斥彼一之正人義之敵。而曰圓滑兩國友誼。以吾人觀之。此乃日本政府與蔡一個人之友誼。非邦國之友誼也。吾更讓一步論之。設使果無鼓勵游學之明詔。我政府之意。亦與蔡雷同。然妨害入學之舉動。實正義所不容。日本政府聲大義於天下。日以開發我國爲主義。夫開發云者。決非求外國歡心之謂。乃啓勗其人民之謂耳。我政府之志在塞民。而日本政府之志在開

發我民。主意之大。眼目既異。豈容因小私而屈大公。今回之事。正此二大主義相爭之演劇。今日本政府助彼以鋤此。拋棄一國之大主義。以徇不正之私情。聲大義於天下。如彼其壯也。自實行如此其卑也。豈文明政府所爲耶。

吾疑堂堂日本政府。未必出此。吾人不敏。頭腦粗鈍。到底難索解其故。唯望知者教誨耳。或曰。國際法未發達之今日。放逐外人。不必求深遠緣故。不觀之俄國乎。彼迫逐猶太人。盡沒其財。或產。豈有故可主持乎。曰。處今日「權者權利說」盛行之世。吾不必與子爭。但所欲辨者。緣故與正義二者。不可不別。天下事雖多無正義。然天下事未嘗無緣故也。俄之逐猶太人。出於人種及宗教相嫉之故。乃事實上不可掩者也。故今吳孫之事。謂吾人難索解其故。猶可謂其無故。則決不可也。

■ 悲奴篇

頃得北京匿名投書。有自署中國四百兆民之一張氏者。題曰悲奴篇。所述郡中近事。實足令人髮豎。皆裂心顫肉麻者。勿曰區區小節。無關大計。社會風潮之所趨。轉瞬間至於此極。天墜之憂。豈惟杞人。吁嗟奴兮。吁嗟奴兮。世無林肯。孰從而拯之。世卽有林肯。亦孰從而拯之。亟錄以告乎不願爲奴者。悲乎悲乎。吾三千萬方里之土地。今得猶傲然自命曰國乎。奴而已。吾四萬萬之人民。今猶得忝然自

居曰人乎。奴而已。國烏乎奴。政權侵于人。利權奪于人。土地圈限之權。隸于人。國脈存絕之權。操于人。一事也。人嗾之。人利之。奔走恐後。奉命惟謹。非是則漠然矣。是之謂國奴。人烏乎奴。無自漲之力。無愛羣之心。無競爭之能。營營戢戢。蜷伏蝟縮。櫻滅亡而不懼。甘魚肉其如飴。砧而嬉焉。釜而游焉。猶冀人之哀而存之也。是之謂人奴。

等國也。吾烏爲奴之人。奴之也。等人也。吾胡爲奴之心。奴之也。莊子曰。哀莫大於心死。吾得而易之曰。悲莫大於心奴。國奴於人。國之奴。奴於國。奴於國者。且奴於人之奴。以自保其奴。以自奴其奴之奴。於是乎有奴於奴之奴。

雖然。吾聞古今中外之爲奴者。服賤役已耳。操苦工已耳。衣服飲食。居處言語。一切自由權利。不得與平民等已耳。苟時而鞭笞之。奴必忿於心。苟時而汗辱之。奴必羞於色。苟時而逼其妻女而淫之。奴必突然暴怒而不可制。果若是而不忿不羞不怒者。世必謂之奴。非奴。而今所聞於吾之奴。何如也。吾爲吾奴恥。吾爲吾奴悲。吾不忍爲吾奴言。吾奴不忍不爲吾奴言也。反袂掩面。爲吾奴含淚言之。

新簡奧使吳德璋之出都也。乘火車至天津。倉卒登車。偶躡某西兵之足。西兵不知爲欽使也。揮之以鞭。吳固能西語。立與之辯。且自白爲新簡欽使。西兵曰。旣爲欽使。尤宜知禮。復鞭之。吳無如何。含忍而

已。

崇文門城樓高而闊。人跡不常至。近有西兵數人。招土娼聚樂其中。金墉石甃。竟化陽臺。某牧師過而
知之。走告步軍統領。謂西兵無禮。貴國胡勿驅禁。當事以事關交涉。慮啓爭辯。亦遂置之。

東交民巷口。有街道官廳。日前某甲經過其處。時已黃昏。西兵數人交劫之。剝其衣服而去。某意官廳
有看街兵居之。方窘急時。大聲呼救。寂無應者。翌日詣職街道者。問官廳何以無人。職街道者謂初固
有人居之。旋以往者輒被西兵雞姦。故人莫敢往。

陳京兆璧之眷屬。由閩來京。行至塘沽。登岸詣客棧。有少婦姍姍行遲。猝遇一西人。酒氣濃醺。挾之而
去。洵多人說項。始得索歸。

新捐主事王某。湘人也。其夫人夙饒風度。兼擅詩名。因其藁砧入都。固請偕行。冀一窮渤海之壯觀。攬
燕台之勝景。船甫入口。西人過來驗病者。見其丰采異人。遽與調笑。幸主政力爲排解。得免於辱。則同
船婦女之驗病者。莫不赤其上體云。

伶人韻芳者。名娼賽金花之義子也。近爲西人某所睽。韻芳藉以示重。頗侮貴官之舊相識者。日前西
人復往尋歡。脫陽而死。韻芳恐甚。稔知西人之父。爲馬洋人。急招之至。哀之以臂。馬洋人謂吾子既不

自愛。死所應耳。但汝須以中國極尊貴之喪儀。殯送吾子。且當命汝素識之達官。爲之執紼。方與于休。韻芳念此甚不難。立即應允。而韻芳之名。因此乃如雷貫西人之耳。其素相識之貴官。事之加謹云。前門外某娼窰。二西人往游。迫妓行淫。妓家索錢。西人不予。撞毀器物而出。至街道局。大肆咆哮。執一六品頂戴之耳。勒令究辦。該員遽令巡捕前往封禁。始得無事。

悲乎悲乎。此非吾四萬萬萬數中之一分子乎。其橫受凌辱。固如是。且爲是凌辱者。不必果西人也。華而然。洋裝華身。而洋役者。方且爲虎俵焉。爲城狐焉。旌之曰西人。則吾奴視爲應受之凌辱。不能抗也。奴吾奴者。亦視爲應受之凌辱。不敢言也。誰無身。誰無妻女。長此悠悠。吾悲乎奴吾奴者之終不能以苟免也。

吾奴其有知乎。無知也。吾奴之受鞭笞。甘汗辱。忍妻女之淫。其性根也。其習慣也。非是則貧且賤矣。非是則竄且殺矣。本平日之所習以奉客。我國家禮亦宜之。熙熙然攘攘然。爭先恐後。惟恐不及。悲乎悲乎。吾恐其終焉已乎。奴吾奴者。其亦知二十世紀之奴。固有不自奴不能奴者乎。消極必長。晦極必明。吾爲吾奴悲。吾爲奴吾奴者危。

拜啓。今日路透電報言俄皇下詔書。將本年二月歷西墨斯科之俄舊京。鬧事之學生。當時竄謫西伯利亞者。

今悉一一賜還云。其用意何在乎。稍有識者當能見之。世界民權風潮。遂終非一二獨夫民賊所可敵。雖有悍狠陰鷲者。竟無奈此進化自然之運何也。今日全地球中。以個人之威力而論。孰有過於俄皇者乎。今且不能不豎白旛以降於民黨之轅門矣。嘻。獨夫民賊看者。雖然。非有俄學生堅志不拔百折不回之勇氣。亦安克此。彼其前此瀝血於絞台。瘦斃於鐵獄。暴屍於漠野之學生。不知幾千百人。而始有今日也。聞俄皇有引用虛無黨人參議國政。共圖維新之議。皇后及其餘貴族力諫。皇不爲動云。嘻。尼古刺第二。亦識時務之俊傑哉。某頓首。七月十八日。

東京學生事。前號奉聞各節。頃得復學生某君來書云。間有失實之處。据云。毓氏並無向學生打恭作揖之事。彼非到會館之人。亦無如此待學生之禮。又吳京卿之對菊池。並非如投書者所云云。惟一日文部省某往謁京卿。叩以留學生事。先生有何意見。京卿答以公使失職。放棄權利。學生等深明國家權限。值此自覺無顏。大半作歸計云云。謹更正奉聞。此事乃以一無權無勇之團體。與兩政府相交涉。不特中國前此所無。卽在外國亦所僅見。其善後結果何如。專視內力。旁觀之爲友爲敵。似皆無足重輕。諸公以爲何如。某白。七月二十二日。

與日本政府交涉之方面。頃傳留學生會館公函。知將已就緒。照錄原函如下。七月二十四日。

拜啓。留學善後事宜。前由長岡子爵柏原文太郎君等。出爲轉圜。互商數次。旋於陽歷八月二十五日。得復書。茲錄其條件譯如左。

一 設學生總監督事。俟貴國政府決定後。日本應無異議。

一 入文部省直轄學校者。由左計之三校。保請外務省咨送。

一 東京同文書院。一 弘文學院。一 清華學校。

一 志望軍事教育者。俟福島少將歸國後。再行商議。因第二條未定在學時限。而當時面晤。有在學至少以六月爲度之約。翌日又往詢問。茲于二十七日。又得復書。譯條約如左。

一 保送入文部省直轄學校者。須備左記二項。

(甲) 在校六個月以上者。

(甲) 由成年之留學生二名保證。並納保證金三十元以上者。

一 在前記之三校中。有不得已之事。而令之退校。或拒絕其保送者。不能再由各該校咨請入文部省直轄學校。

其他書中。未經敘明。而當時曾得面許者。(一) 軍事教育。已允俟福島少將回京。許爲從旁竭力斡旋。

(二)吳孫二君歸國將來有機再來。可無阻礙。(三)保證金由在學之學校或由會館存置銀行俟卒業後仍還本人。(四)所有三校以外之學生於總監督未來之前由中日士紳設法保送。謹以報告。即請公鑒。八月二十九日。留學生會館幹事同啓。

與本國政府交涉之方面。聞北京已有電諭令振貝子查辦。振已於昨日入東京。學生擬上一書陳其原委。已由吳君止欺。張君星五等十人代表往見云。振貝子約以八月初四日應學生之招待。往神田鈴木町會館云。不知向後作麼生。八月初一日。

頃得陝西匿名投書。題曰「醜泉宋芝洞被陷實錄」。屬登本報。惟查上海天津各報館皆已將全文揭載。本報續登。未免明日黃花。故從闕如。此事全由陝臬樊增祥一人搗鬼。樊乃榮相門下最得力之鷹犬。榮爲西安將軍時。樊以知縣入其幕下。極力納交。榮識字無多。樊稍解一二。卑靡猥屑之詞章。在腐敗學界中。薄有才名。因此互相狼狽。及神京淪陷。兩宮蒙塵。便是樊增祥時來運來之候。儘數月間。由大令超升。秦臬氣燄薰天。秦中上自撫軍。下至輿隸。無不悚仄。仰其鼻息。其作福作威也亦宜。獨惜宋芝洞遜居海上以來。歛跡不問世事。海上所謂新黨者。方共笑其蠅縮。以爲詬病。而樊增祥乃以各報痛詆頑固。皆宋喉使也。試問我海上同業諸君。肯承認否耶。往讀明史見馬士英阮大鍼。當燕京淪陷。思皇殉國之後。

猶著蝗蝻錄。逮捕復社君子。竊歎人之冥頑不靈。何乃至是。今觀此而知古人之洵非不可及也。聞某廉訪最嫻音律。錦囊中燕子箋。料不久當出世。但何苦爲將來著桃花扇者。增一副淨脚色耶。七月廿六日

昨得都中來書。述榮相國三大盛德。(一)醇邸本既有妻。而榮強以已女妻之。請聖母主婚。是奪婚之盛德。(二)濤公不願向榮請雙腿安。榮以襲王爵取其歡心。濤已過繼承襲某長房之公爵。例不得奪移。而榮毅然爲之。是奪爵之盛德。(三)榮於數日前。將其愛妾扶正。賀客迎門。其妾尙無子。今竟以爲妻。是奪嫡之盛德。說者謂醇王濤公。皆今上胞弟。榮知聖母風燭之年。故結此以自固云。雖然。唐高宗所謂此朕家事。卿勿預知。吾儕小民。正不必過問也。某頓首。七月廿七日

近日有復興海軍之議。袁慰帥請每歲籌常款百萬兩以從事。掃從前南北洋閩廣等界限。全國爲一分。常備預備二艦隊。於芝罘上海南京江陰廣州五處。分設海軍軍務所云。此計畫視李合肥前案。頗高一籌。但今日中國之力。能及此否。是一難決之問題也。且凡興作一事。必有目的。今日列國汲汲擴張海軍。皆爲實行帝國主義。不得不爭海權。以軍艦保衛商務。實經濟競爭之結果也。而我當道之效顰者。何爲。吾非反對此意。吾信我國將來必有持進取方針之一日。但於今日之治此者。不能無疑耳。又聞俄國許

借旅順口。爲我海軍屯船所。俄人外交手段。真加人一等。某再拜。七月廿八日

增稅免釐之上諭。既已發布。釐金屬商之政。一舉掃之。固大快事。但關稅之權。既爲債主所握。財權自今益移於外國。將我國民當革新之任者。益困難耳。一嘆。同日

俄人於滿洲撤兵後。尙以保護爲名。擬召集中國人應兵。以充其任。於是吉林省千五百名。黑龍江一千三百名。合二千八百名云。英之滅印度。非用英兵也。用印兵也。聞英人在威海衛。募集中國以來。華人之得入英伍者。其威燄雖一大鄉紳不如也。嗚乎。將來此等現象。通國皆是。豈值威海衛。豈直吉林黑龍江哉。同上

某白。近日西人經營長江上游。不遺餘力。德法兩國。皆在宜昌新設領事。聞德人日間並設領事於四川云。英國之印度支那輪船公司。已開通湖南航路。前月昌和號輪船。初次航行漢口岳州長沙。虧損二千餘萬云。然西人不屈不撓。將來內河航利。終盡歸其手耳。又自礦務章程頒行以後。湖南各山地。西人足跡無日無之。如此江山坐付人。誰之罪歟。誰之罪歟。某罪言。七月二十九日

某再白。今年歐美學界。特色之大著作頗少。惟四月間。英人顏德氏新著一書。名曰「西洋文明之原理」。一可謂進化論之革命者。蓋英國學派。向主實利主義。自霍布士洛克邊沁以來。雖互有出入。其大旨總

不出於此。達爾文斯賓塞興。以生物進化之公例。推論之于政治道德學界。壁壘一新。然實利主義亦益光大。頡德氏亦汲此主義之流者也。但其大旨。謂當犧牲個人以顧團體。當犧牲現在以顧將來。實爲前此言實利進化者。痛下一鍼砭。頡氏自謂此書必爲二十世紀學界生一大影響。吾亦望頡氏此書爲我中國學界生一大影響。某頓首。七月二十九日

本日之日本報知新聞有一條。題曰「外交界之三夫人」者。言日本現今有三夫人。握外交界之實權。一曰德國公使井上勝之助之夫人。二曰暹羅公使稻垣滿次郎之夫人。三曰中國公使內田康哉之夫人。其評內田夫人曰「今日在北京政界。而生擒西太后者。誰乎。內田夫人也。西太后日日宴會各公使夫人。其所以獻媚之者無不至。而其中最能深知北京朝廷性質。玩之於股掌之上。而操縱之者。莫如我內田夫人。今西太后之一舉一動。殆無不恃內田夫人之顏色。內田夫人實北京政界中最有實力者也。云云。吁。生擒西太后一語。何其對於友邦主權者不敬之甚乎。雖然。吾中國女權之昌。而使列國之巾幗亦得有英雄用武之地。使斯賓塞約翰彌勒諸女權論。鉅子聞之。當生如何之感乎。抑他人之欲生擒我者多矣。我國民之被人生擒者亦多矣。豈直一內田夫人哉。豈直一皇太后哉。八月十七日

一年以來。中國報界大添活氣。真是差強人意之一事。頃者日報中。光芒萬丈。咄咄逼人者。莫如美國舊

金山之「文興日報」每論說一篇動五六萬言。登報至二三十續。誠前此日報所未有也。又如汕頭之「嶺東日報」天津之「大公報」皆有特色。有新論。實可稱日報進化之一級。上海各報向優於他地。則靡然不振。除「蘇報」屹然砥柱中流。有一定之主義外。餘皆次第墮落。可勝慨歎。惟叢報體則視數年前大有進步。去年發行之選報。最稱錚錚。自廿一期以後。雖頓減色。然新出之新世界學報。魄力亦有大驚人者。雖其中間多有影響之語。然文章之銳達。理想之爛斑。實本社記者所深佩。其中主持論壇者。似多得力於瀏陽譚先生之學。尤使我起敬。又有「政藝通報」亦不失爲上海報界第二流之位置。每月二冊。似皆成於一人之手。其精力亦可驚矣。言論爲實事之母。我國今日言論界一綫曙光。杲杲出。其或者事論之良結果。殆將不遠。吾欲爲中國前途賀。 八月十八日

回鑾以後。忽已年餘。政府媚外手段。操之極熟。謂此便可以得外人歡心。此著敷衍得去。便可太平歌舞。儘他快活。雖然。外人不如是其易得也。據連日電報。英公使以湖南辰州教案相切責。勒令政府處其地武員以死罪。其餘百官按糾有差。又有貴政府若不能了結。吾英當代爲平之等語。聞已派砲艦沂江而上。渡湖而南矣。噫。小題大做。何至如是。豈又將效德人據膠故事耶。英人以揚子江流域爲勢力範圍。欲借端以鞏固其權力也久矣。恨無詞耳。此正其利用之時機也。當局者何以待之。 九月十五日

再者北京英公使。本以月之廿九日。饗各王大臣于其使署。已發帖矣。因湖南教案。一變其政略。西后頤和園之宴。諸公使皆赴。惟英使獨否。至今日忽將各王大臣之請帖索回。謂我不赴頤和。想諸公亦不肯賜臨。因此收回前約云云。天下有如此請客之禮耶。外人之視我當局者。實玩弄之於股掌之上。以視戲猴者之耍其猴。亦不過若是焉耳。然當局者。顧猶意氣揚揚。甚自得也。一嘆。九月二十八日。旗人之禮。凡長輩見客。晚輩必侍立不敢就坐。向例然也。西太后回鑾後。屢宴各國公使夫人。每宴皇上必從。從必侍立于後。而公使夫人及其兒女。乃至參贊隨員之夫人。亦皆昂昂然高坐也。嗚乎。以堂堂大國之主權者。乃使之在外人前。執斲養之役乎。此而不恥。其必爲無血性者矣。此而不憤。其必爲無人心者矣。請后黨諸公。爲下一轉語。同日

振貝子游歷各國歸。條陳改革事宜。其目已見本報前號。內有民間子弟十歲以上者。均令入學肄業。否則罪其父母一條。此事誠各文明國最美之意。最良之法。然若欲以行諸今日之中國。恐將全國廬舍。改爲囹圄。猶不足以容此輩之父母矣。各國此行之制也。名曰義務教育。義務教育何以能行。蓋其官立公立各小學校。徧於陬邑。國家爲之補助。可以不收學費。而學校能支持。一地學校之額。與一地兒童之額相應。而無人滿之患。于此而猶有溺愛其子弟。而不使就學者。則可以罰之。故曰義務也。今中國動輒一

府數縣。無一鄉鬻。國家曾不爲之設法獎助。而小民主計憔悴。饕殮且不給。而曰必令。而子就學。否則有罪。民將曰。吾不敢犯罪。請政府諸公。示我以學校所在。而導我來。不知諸公何以應之。嗚乎。豈想此一事。今日當局之言變法者。皆此類而已。一條陳。一諭旨。而變法之能事畢矣。同日
民族主義之在今日。豈不磅礴而鬱積哉。愛爾蘭之併于英國。非愛人所欲也。故雖併之數百年。而未能偶俱無猜。前皇域多利亞。卽位六十年祝典。舉地球日所出入處。無不張燈結綵。以致慶賀。獨愛爾蘭則偏樹黃旗。示國喪之意。怨毒之於人甚矣。前宰相格蘭斯頓。深觀時勢。知衆怒難犯。因提愛爾蘭大學改革案。宗教改革案。自治法案等。其時自由黨格公者自由黨首領也同志悉反對此政策。全黨分裂。昨日股肱。今日仇敵。而格公堅持主義不少變。雖然。卒未能全達其目的。及格公去位。沙侯代之。愛爾派激昂益甚。殆生大變。值英度戰起。國人注全力以敵愾。而內鬩之波瀾少息焉。及戰事定。和議成。識者知愛爾之事。必將復燃矣。果也。昨日今日路透電。連報愛爾蘭土地同盟黨員。騷動之狀。且言兵器藥彈之輸入愛爾蘭者。非常之多。英政府今日曰戒嚴云。嗚乎。民族自治之精神。不可壓抑也久矣。不知英人何以待之。安得起格蘭斯頓於九原。而一籌善後之策也。 九月廿八日

問答

一問讀貴報第一號。介紹新著一門原富條下。於英數之 Political Economy 欲譯爲政術理財學。比之日本所譯經濟學。嚴氏所譯計學。雖似稍確稍賅。然用四字之名。未免太冗。稱述往往不便。如日本書中。有所謂經濟界經濟社會經濟問題等文。以計字易之固不通。以政術理財字易之亦不通也。此學者在中國雖無顯門。但其事爲人生此必需。隨文明而發達。吾中國開化數千年。古籍之中。豈竟無一名詞足以當此義者。貴撰述博通羣典。必有此見。乞悉心研究。定一雅馴之名。以惠未學。幸甚幸甚。

(東京愛讀生)

一答政術理財學之名。冗而不適。誠如尊諭。惟此名求之古籍。昭合無間者。實覺甚難。洪範八政。一曰食。二曰貨。班書因採之爲食貨志。食貨二字。頗賅此學之材料。然但有其客體。不有其主體。未能滿意。筦子有輕重篇。篇云。一桓公曰。輕重有數乎。筦子曰。輕重無數。物發而應之。聞聲而乘之。故爲國不能來天下之財。致天下之民。則國不可成。一輕重凡十八篇。皆言所謂經濟學之理法者也。必求諸古名。則輕重二字最適。然其語不通用。驟出之亂人耳目。殆未可也。論語賜不受命而貨殖焉。太史公用之以作貨殖列傳。此二字亦頗近。但所謂 Political Economy 者。合公團之富。與私人之富言之。而其注重實在公富。貨殖則偏於私富。不合政術之意。亦非盡富。史託有平準書。所言皆朝廷理財之事。索隱

曰「大司農屬官。有平準令丞者。以均天下郡國輸歛。貴則糶之。賤則買之。平賦以相率。故命曰平準也。」按漢代平準之制。本所以吸集天下財富於京師。其事非爲人羣全體之利益。本不足以當「*Iticai Economy*」之義。雖然。單舉平準二字。尙不失爲均利宜民之意。且此二字。出於史記。人人一望而解。而又不至與他種名詞相混。然則徑譯之爲平準學。似尙不謬。由是日本所謂經濟家。則名爲平準家。經濟學者。則名爲平準學者。經濟界。則名爲平準界。經濟社會。則爲平準社會。經濟問題。則爲平準問題。施諸各種附屬名詞。似尙無窒礙。聊臚此諸義。以酬明問。並以質當世之深通此學者。並望通儒碩學。更駁詰之。而垂教焉。

二問貴報學說與學術。其界限似不甚分明。敢問其分類之命意所在。（同上）

二答就論理之原則言之。則學說可包於學術之中。以之分類並列。頗不合論法。但本報之意。唯以介紹各種新學。開通我圖民智爲主。非欲藏諸名山以傳不朽也。故因便宜以分類。其不合論法者正多。非特此兩門耳。至所以分此兩者之故。學說則專取中外大儒一家之言。有左右世界之力者。攝其要領。學術則泛論各種學問。或總論。或分論。或有形學。或無形學。以使人知學界之大勢。及其概略。故不得不另爲一門也。

三問日本書中金融二字其意云何。中國以何譯之。（東京愛讀生）

三答金融者指金銀行情之變動漲落。嚴氏原富譯爲金銀本值。省稱銀值。惟值字僅言其性質。不言其形態。於變動漲落之象。不甚著。且省稱銀值。尤不適用於金貨本位之國。日本言金融。取金錢融通之義。如吾古者以泉名幣意也。沿用之似亦可乎。

四問中國近日多倡民權之論。其說大率宗法儒盧梭。然日本人譯盧梭之說多名爲天賦人權說。民權與人權有以異乎。此兩名詞果孰當。（東京愛讀生）

四答民權之說。實非倡自盧梭。如希臘古賢柏拉圖。阿里士多德亦多言之。但至十八世紀而大昌明耳。民權二字。其義實不賅括。乃中國人對於專制政治。一時未確定之名詞耳。天賦人權之原字。拉丁文

爲 *Jura innata Jura connata*

法蘭西文爲

Droits de Homme Droits humains 英文爲

Right of man 德文爲 *Urrecht* 法文 *dameutalrecht* 英 *borene Mensch nrecht* 其

意謂人人生而固有之自由自治的權利。及平等均一的權利。實天之所以與我。而他人所不可犯。不可奪者也。然則其意以爲此權者。凡號稱人類。莫不有之。無論其爲君爲民也。其語意範圍。不專用於政治上也。故以日本譯語爲當。

五問貴報第四號論說第七葉載白沙先生崖山弔古詩二句。讀之令人愛國之心油然而生。極欲受其全文以資諷誦。又奇石二字出典若何。幸希示教。（上海衝冠子）

五答。奇石者崖山江海交匯處。有浮石二。高各數丈。形勢突兀。狀類門闕。故居民字之曰上奇石。下奇石。亦稱崖門。崖門者以石形得名也。宋帝及張陸諸烈殉國於此。賊臣張弘範實尸其功。因勒奇石爲銘。曰。一張弘範滅宋於此。一陳白沙居近崖海。常臨憑弔。乃爲冠一字刻於其上。曰。一宋張弘範滅宋於此。一更題一詩於石陰云。一忍奪中華與外夷。乾坤回首重堪悲。鑄功奇石張弘範。不是胡兒是漢兒。一此石粵中多有。搗本。而新會尤夥。碑旁又附一詩。則前明逸民南海陳獨漉恭尹之作也。詩曰。一山木蕭蕭風更吹。兩崖風浪至今悲。一聲望帝啼荒殿。十載愁人拜古祠。海水有門分上下。江山無界限。華夷停舟我亦艱。難日愧向蒼苔讀舊碑。一文中荒殿古祠云云者。附近居民爲殉國帝后立殿。並附三忠祠。以爲亡國紀念也。白沙之言怒而嚴。獨漉之言哀而苦。嗚乎。獨漉之遇。瘞慘而感瘞深矣。六問。貴報中有要素二字。不得其解。譯書彙編中亦恆用之。本當向彼處請質。今卽向尊處請質。若以瑣屑不答亦無妨。（蘇州華之范）

六答。要素二字。本物理學化學上用語。素猶質也。中國人譯化學語。所用原質二字。日人譯爲原素。其移

用於他種科學。所含意義亦同。如云土地人民爲立國之要素。猶云輕氣養氣。爲成水之原質也。要字與原字有別。望文自明。

七問。經濟學原名 Political Economy 直譯之爲政治節用學。迨 Morstadt 氏而始名爲 Economy。Bills 日本人譯之爲經濟學。不求其理而驟觀之。則經濟似與政治混而無別。夫經者含政治之義。濟者寓泉流之旨。其與斯學本義已極相符。日本當時之定爲此名。蓋已斟酌審慎。而無遺義者矣。貴報第三號。乃欲易爲平準學。夫平準者。誠如嚴氏所謂西京一令。以名官職。不足以副斯學。乃如嚴氏之譯爲計學。其名則誠雅馴矣。若謂用之處處而無扞格。則恐爲賢者自許之太過也。案 Statisticians 者。亦財政之中。而獨立一學者。日本人則譯爲統計學。又曰計學。今中國之方輿人民。出產國用。皆渺無定稽。是此學爲中國所以急講者矣。今欲竟從嚴氏之名。則不知此後而欲譯 Statistics 其又將以何而易之。貴報第七號。而又名之曰生計學。雖生計二字。其較嚴氏爲稍善。然終嫌範圍大小。而不能以政治理財之意。包括於其中。竊謂泰西近世所新發明事理。爲我中國亘古所未有者。不一而足。若必一一而冠以我中國所固有名詞。是誠許子之不憚煩矣。亦恐未必有此昭合者。且舉國草創。禮部尙乏檢定之例。文人結習。好尙新異。誤而用之。必至沿襲數十載。而後始能改。與其遺誦後賢。不如仍

舊貫以俟商榷。如其不然。則財政學。日本亦有用之者。且包舉斯學之旨。而義界亦自清也。用以質之。以爲何如。想貴撰述。亦必有說者矣。（駒場紅柳生）

七答。平準二字之不安。鄙人亦自知之。故既棄去。計學與 *Statistics* 相混。且單一名詞。不便於用。如日本所謂經濟問題。經濟世界。經濟革命等語。若易以計問題。計世界。計革命等。便覺不詞。鄙人亦既以此質問於侯官嚴氏。尙未得其覆答也。尊論謂近日世界發明事理。不能一一冠以我國固有名詞。此論誠偉。唯經濟二字。襲用日本。終覺不安。以此名中國大通行。易混學者之目。而謂其確切。當於西文原義。鄙意究未敢附和也。故終願海內大雅。悉心商榷。而重定之。至謂財政二字。可以包括斯學之旨。而義界亦清云云。鄙意殊不謂然。財政者。不過經濟學之一部分耳。指財政爲經濟。無異指朝廷爲國家。攷德國近世學者。於此學分類定名。最爲精密。其所謂 *Wirtschaftslehre* 者。經濟學之總名也。或

稱爲 *Volkswirtschaftslehre* 及 *National Economy* 則國民經濟學之義也。又稱爲 *Politik*

Economy 則政治經濟學之義也。而又分爲家政經濟學 *Domestic Economy* 及營業經濟學

Industrial Economy 等門。至其專屬於行政者。則謂之 *Wirtschaftspflege* 而其中又分兩門。一

曰 *Wirtschaftspolitik* 日人譯爲經濟政策學。二曰 *Finanzwissenschaft* 日人譯爲財政學。然

則財政學不足以包舉經濟學之全部明矣。試以日本人所通定經濟學部門列表示之。

經濟學

純正經濟學

應用經濟學

經濟政策學（狹義之應用經濟學）

財政學

由是言之。財政學決不可用也。嚴氏又謂苟欲適俗。莫如徑用理財。是亦不可。蓋此等專用名詞。萬不可以動詞冠其上。若用理財。則其于用之于複雜名詞時。窒礙亦滋多矣。故鄙見仍欲存生計二字。以待後賢也。日本所譯諸學之名。多可仍用。唯經濟學社會學二者。竊以為必當更求新名。更望哲達有以誨之。

八問達爾文約翰彌勒赫胥黎斯賓塞等所著書。除天演論名學外。其餘諸書。日本均有譯本。否。乞示復。（上海南洋公學邵聞泰）

八答諸書多有譯本。但求其說理之明達。文筆之淵懿。能如嚴譯天演論者希矣。茲列其目奉答。

達爾文著一種

原名

譯名

譯者

Origin of species

生物始源

經濟雜誌社

約翰彌勒著五種

原名

譯名

譯者

Liberty

自由之理

中村敬太郎

Utilitarianism

利用論

澀谷啓藏

Representative government

代議政體

前橋存義

System of logic

論理學綱要

天野爲之

Political Economy

經濟原論

天野爲之

斯賓塞著六種

原名

譯名

譯者

Social statics

社會平權論

松島剛

Principia of sociology

社會學之原理

乘竹孝太郎

First principles

代議政體論
倫理原論 未全

田中登作
藤井宇平

Trin ihles of morality

綜全哲學原理

濱野四郎

抽譯社會學原理之第二章政法哲學

渡邊治

赫胥黎著 無

九問。貴報第四號學術第二葉小注。『歐洲十四五世紀時。學權由教會。散諸民間。情形正與此同。』不知學權何由自教會而散。其情形若何。乞全錄其事實。（高郵夏夏）

九答。歐洲中世以前。教育學問之權。皆爲教會所壟斷。羅馬教皇備極專制。卽耶穌經典。亦不許人讀。他可知矣。其時哲學。惟有所謂士哥拉學派者。亦經由教士所傳授。當時國民教育之義未興。所有公衆教育事業。皆在教會之手。欲求學者。舍教會幾無所得途徑。此實束縛思想之根由也。及亞刺伯人西漸。十字軍東征。歐亞交通日頻繁。東方文明。似如潮之勢而輸入。自土耳其人陷君士但丁奴不耳今土城也。其中博學之士。皆西走意大利。故意大利爲古學復興之中心點。未幾遂將希臘前哲。拍拉圖亞里士多德畢達哥拉諸賢之書。譯成羅馬文者三十八種。而馬丁路得之宗教革命。亦應時並起。自此以往。教會不復壟斷學權矣。其事略如右。此實歐洲開化第一之關鍵。其詳具專史。若欲述之。雖累萬

言不能盡也。

十問。第四號學術第二頁云。獨至獲麟之後。迄於秦始。實爲中國社會變動最劇之時代。按中國當時未有社會。面貴報云最劇之時代。意卽坑儒焚書之禍歟。或當時有如今日社會之舉。與社會相暗合歟。

(同上)

十答。社會者日人翻譯英文 Society 之語。中國或譯之爲羣。此處所謂社會。卽人羣之義耳。此故近日譯日本書者多用之。已經數見不鮮矣。本報或用羣字。或用社會字。隨筆所之。不能劃一。致淆耳目。記者當任其咎。然社會二字。他日亦必通行於中國無疑矣。恐讀者尙多誤以爲立會之意。故贅答於此。

十一問。第八號論語第七頁。日本維新之役。其倡之成之者。非有得於王學。卽有得於禪宗。不知王學何派。禪宗何派。主王學禪宗者何人。日本近日。若伊藤井上輩。曾主王學及禪宗否。望明示之。

十一答。日本維新之先導。最有力者。如梁川星巖。大監中齋。橫井小楠。佐久間象山。吉田松陰。高杉東行等。皆王學大師也。成功最盛者。爲西鄉南洲。亦王學鉅子也。若伊藤井上等。後輩之乘時者耳。然伊藤及前首相山縣有朋。現首相桂太郎等。皆吉田松陰之門人。其學固自有淵源也。王學與禪宗本相出入。故當時諸學者。亦得力於禪宗。而日本佛學最盛。維新之功。方外人助力者固不少。

十二問。讀書報第八號。於英文之 Political Economy 又有譯爲財政學。財政二字。較之日本所譯經

濟學。嚴氏所譯計學。貴撰述所譯之平準學。生計學。似稍切實。賅括。然尙嫌範圍太小。不能以政治理財之意。包括其中。誠如貴撰述所云。財政者。不過經濟學之一部分。指財政爲經濟。無異指朝廷爲國家。是則財政學。決不可用明矣。然則終無一名詞。足以定之乎。鄙意殊爲不然。夫我中國。卽無固有之名詞。以冠之。亦不妨創一新名詞。如泰西近今有新達明之事理。卽創一新字。以名之也。苟必欲以我國古名詞。名泰西今事理。恐亦不能確切無遺憾。貴撰述學術博通。苟悉心商榷。豈不能定一雅馴之名詞。以釋羣疑。而惠末學。如不得已。則國計學。似足賅此學。朝廷理財之事。由是日本所謂經濟學。則名爲國計家。經濟學者。則名爲國計學者。經濟界。則名爲國計界。經濟社會。爲國計社會。經濟問題。爲國計問題。加之各種名詞之上。似尙少窒礙之處。且此國計二字。義界卽清。吾國文中。亦嘗用之。人人一望而解。必無亂人耳目之弊。用以質之貴撰述。並當世之高明。尙祈互答。而指正焉。（無錫孫開圻）

十二答。經濟不專屬諸於國計。只能賅括財政。不能及其他。至如所謂「個人經濟」與「家事經濟者」。皆經濟學中一部分。以國計統之。似不合論理。嚴氏專用一計字。正以其可兼國計家計等而言耳。本報微嫌其詞單。不便於用。故易以生計。不得已耳。

十三問。地輿一學。所係最大。僕於此學。雖未深究。然每見異說。嘗竊誌之。以備參攷。今以貴報第六號中。

國地理大勢論。首揭曰。中國面積十五倍於日本云云。因以所知之說。錄呈高明。俾賜辨晰爲望。按中國面積十五倍于日本之說。亦僕所夙聞。而不知其所本。會見龔古愚地輿圖攷云。皇朝一統。雖藩封不計。而幅員之廣。已南北相距五千六百九十五里。東西九千二百八十里。截長補短。約得三十兆一十五萬八千有奇方里。天津日日新聞云。十八省言地一千三百十二萬萬三千餘方里。又同新聞載林氏擲閩中女學會述略曰。一百五十三萬四千九百五十三方里。僕聞之于日本一友人。據西洋某地輿書云。支那東部得一百三十五萬三千三百五十方英里。而日本通行本之世界新地圖云。支那本部一百三十三萬六千八百四十方哩。按此亦以英里計者合滿蒙西藏準噶爾東土爾基斯坦計四百二十一萬八千四百一方哩。以上諸說。言人人殊。而與貴報十五倍于日本之說。亦無一合者。貴主筆博極羣書。遨游徧天下。當必有確說以折衷之也。（笨庵）

十三答鄙著所述。亦偶依舊籍。未經深考。今承糾正。惶謝何如。日本地誌之作。以山上萬次郎所著爲最名家。頃覆查其大地誌。据云中國大於日本二十七倍。復列一比例表。則日本面積二十七萬方里。中國面積七十萬方里。中國本部則二十萬方里也。皆計日本里日本一里當中國七里有奇前人屢稱十五倍者。殆專指本部言歟。鄙人晚學。於普通學。悉未經按規則以從事。見笑大方者不少。望海內君子更辱教之。

十四問。貴報第九號言讀東書有簡便之法。慧者一句。魯者兩月。無不可以手一卷。而味津津矣。其法若何。乞賜還答。幸甚。（山陰孫廊齋）

十四答。真通東文。固非易易。至讀東書能自索解。則殊不難。鄙人初徂東時。從同學羅君學讀東籍。羅君爲簡法相指授。其後續有自故鄉來者。復以此相質。則爲草和文漢讀法以語之。此已亥夏五六月間事也。其書僅以一日夜之力成之。漏略草率殊多。且其時不解日本文法。譌謬可笑者亦不少。想以示一二親友。不敢問世也。後鄙人西游。學生諸君。竟以災梨棗。今重數版矣。而一覆讀。尙覺汗顏。頃乞羅君及一二同學。重爲增補改定。卷末復用此法譯東籍十數章。以爲讀例。旣將脫稿矣。將與鄙著東籍月旦及羅君新著和文奇字解。合印之。操曰東學津逮。種竊謂苟依此法。不求能文。而求能讀。則慧者一句。魯者兩月之語。決非夸言。印成後更當乞教。今恕不具。

十五問。盛丞堂近日奏有云。一德意志自畢士麥以來。尊崇帝國。裁抑民權。劃然有整齊嚴肅之風。日本法之成。以明治二十年以後之政績。日德國體。與我相同。亟宜取法。一其說然否。且所謂尊崇裁抑之實若何。乞登報示復。以祛疑竇。（贅儂）

十五答。此誠我國今日第一重要之問題。亟宜研究者也。雖靡盛公之奏。雖無足下之疑。固應發摘其底

蘊以與我國民共示商榷。今承明問。其敢有所隱。請竭所聞以對焉。雖然。鄙人今在旅行中。經月未讀內地報紙。於盛奏原文未獲見。未知其全體命意如何。僅就足下所徵引數言。晰駁之耳。抑鄙人聞之。凡論事理者。不可挾意見。苟挾意見。則其論雖是。而人不樂聞。鄙人論此。不欲專持吾累昔所持之宗旨。爲一筆抹煞之言。惟平心觀察。德日兩國政體所由來。及其國政之實狀。以與我中國國體相比較。想盛丞堂此摺。主稿之人。必曾稍讀他國歷史者。鄙人此文所徵引。無一字無來歷。在彼當能知之。則請平心一靜察。倘鄙言亦有可採者乎。如不謂然。請賜駁義。若有一二可採也。則請其以後慎於立言。勿徒執偏端。爲模稜疑似之語。以語國計也。且吾尤望盛丞堂。及當道中。與丞堂同地位同意見者。一讀此焉。苟其無愛國心。徒借此以保位固寵也。則吾亦何責焉。苟真欲於國家前途有所布置也。則芻蕘之言。固不可以不留意也。

論德國之政治。不可不先明德國國體之特色。德意志者。聯邦之帝國也。故向論德國政治者。必分爲帝國政治。聯邦政治二項。聯邦二十餘。而普魯士最大。今以普代表聯邦以下。請分德意志帝國政治。普魯士王國政治兩種而論之。

德意志帝國之皇帝。語其實際。雖謂今世列國中。元首之權之強盛者。以彼爲最可也。何也。彼非如英

國皇帝之徒擁虛位。彼非如美法各國之大統領。對於議會而負責任。彼實掌握全帝國大小政務一切實權者也。雖然此權何自而來。及其權限之有無。不可不證諸彼國之憲法。德意志憲法首證明其為聯邦國。Federal State。所以示別於合衆國 Unitary State。也。故德意志帝國之主權。非在皇帝。而在其聯邦之諸王侯。及三自由市府。皇帝不過其政治團體之長官。此德國憲法精神所明示也。故其君權。非無限而有限也。限之者何。即其憲法之意。明言德意志帝國。非以皇帝之特權而統治之。實以法律之力而統治之也。

鄙人今在旅行中。篋中無各國憲法之正文。故不能具引原文加以解釋。惟就所記憶而略述之耳。他日更當據正文而補論。讀者諒焉。

法律何自始。即

各聯邦之公意是也。然則德國固亦有限君權之國。而其皇帝之權。實由各聯邦賦畀之明也。然則其皇權。以何因緣而能得如此之強大。曰是有頗奇妙不可思議者。德國之主權。全在其聯邦參議院。

Bundesrath 而皇帝實以普魯士王之資格。

德國皇帝由普王世襲。讀史者當能知之。不必贅述。

為此參議院之議長。

皇帝非親為議長。實委大宰相

為之。而因以行用此主權者也。聯邦參議院者何。由各聯邦政府派出代表人。以粘成此團體也。其議員共五十七人。內普魯士十七人。巴巴里亞六人。索遜及華丁比爾各四人。巴典及黑遜各三人。迷克靈卜梭威靈布蘭士域各二人。其餘十七邦各一人。凡議事時之投票。不論其邦議員之數。為一人是多人。但一邦之投票。皆須同一樣。蓋以其合體以代表本邦政府也。以此之故。故普魯士邦之意見。常得

制限於參議院。何以故。聯邦參議院之議長。必以普魯士王國之宰相即德意志帝國宰相充之。議事時。若可否投

票。兩兩相等。則取決於議長。而議長一人之意見。即普魯士代表員十七人之意見也。故議長即帝國宰相兼普魯士宰相

所發議。不待開議時。而贊成之者。已定有十七人。此普魯士所以能握大權。於此參議院。而亦即

德皇皇權所以獨鞏固之由也。一國之主權。在聯邦參議院。聯邦參議院之權。在帝國大宰相。所兼任

之議長。而任免此大宰相之權。在皇帝。故德國皇帝。得以此間接力。而握一國之實權也。但觀於此。亦

可知其權之有所受之。而非如古代所謂天賦神權者之無理取鬧亦明矣。德國大宰相之職權。與其

餘各立憲國之宰相。大有所異。其名雖為「責任大臣」Responsible Minister。其實非如英法等

國。有所謂「對國會之責任」Parliamentary Responsibility者存也。英法之政府大臣。其所建

政策。必須求協贊於國會。若國會反對者居多數。則大臣不可不引責而辭職。德國不然。政府之政策。

雖不可不報告於國會。然國會雖反對。而宰相可以不去其位。質而論之。則德國宰相。乃對於法律而

負責任。非對於議院而負責任也。世人所謂德國君權特強者。即在此點。然德國何以如是。何以不得

不如是。則亦有故。德意志帝國者。新造之國也。前此固未嘗有此國存也。前此日耳曼皇帝之位。屢為

異族所據。而十九世紀上半紀。奧大利猶握其實權。至畢士麥起。始屏奧大利於日耳曼國即德意志以外。

而新造此雄邦。德意志帝國之所以能立。皆普魯士王國之力也。故普魯士人常欲占大權於此國之中。苟其皇與宰相對於國會而負責任。則爲宰相者。安能保其必爲普魯士人。如是則普魯士之威權將漸墜矣。故德國之所以獨尊君權。爲普魯士計也。然則普人私乎。曰以正理論。不得不謂之私。吾意年或一二百年之後德國主權必有變動但今非其時也以今日國勢論之。義固不可不出此。何也。無普魯士。則無德意志也。其餘各國。若非藉普魯士之餘蔭。則至今仍爲他族所軛制。終不能爲一獨立國。又安能坐享「世界第一等國國民」之資格也。故諸聯邦之所以得有今日也。諸聯邦之公民所以得有今日也。皆食普魯士之賜也。故普魯士宜握帝國之大權者一也。又使今日普魯士而將此特權拋棄。讓與他小邦。則他小邦無可以保持此龐大帝國之力量。則帝國將被侵削。而仍復千八百六十六年以前之舊觀。固非普之利。亦豈他邦之利也。故普魯士宜握帝國之大權者二也。由此觀之。則德國君權此自來。可以見矣。盛奏謂德國尊崇帝國。斯固然矣。至謂其裁抑民權。則吾不知何據也。凡其國苟無國會者。則民權必裁抑。其有完全之國會者。則民權未有不能伸者也。今且勿論其聯邦。仍論其帝國。德意志之立法部。以聯邦參議院及代議院 Reichstag 兩者組織而成。卽所謂國會者也。據其憲法所規定。則代議院者。實代表德意志全國人民以監督政府者也。監督之道奈何。凡帝國大臣不可不對於法律而負責任。而

法律之頒定。不可不仰代議院之贊成。是即監督權之最大者也。一國民但能有此權。則他權之得與不得。猶無害也。吾聞德意志之民權。可以裁抑政府矣。未聞政府可以裁抑民權也。至宰相之去就。非議院所能左右。此其權固稍遜於英國。然彼有特別原因。而出於此。前節言之詳矣。而豈畢士麥以裁抑民權爲治國之策也。

至語其聯邦政治。則雖謂德國民權。不讓英國焉可也。據其帝國憲法言。德意志帝國。有立法上之主權。聯邦各洲。惟有自治 *Autonomy* 之權而已。雖然。徵諸實際。其帝國雖承各聯邦。賦與此重大無上之權。然其實行之者。不過一小部分耳。小部分者何。即監督諸邦是也。帝國所布之法律。諸聯邦所以實行之者。其範圍如何。其方法如何。一仍聽聯邦之自爲也。據憲法則凡民法刑法皆由帝國頒立實則今者私法上立法之大權仍由各邦自掌之 聯邦

之自爲奈何。一皆取決於其本邦之議意。實則德意志帝國。除外交軍事郵運財政專指帝國政府之財政 數大端外。其餘政權。仍皆在各聯邦政府之手。各聯邦政府之權。又在各聯邦公民之手。於此而猶謂德意志公民之權被裁抑也。吾不得不駭此摺捉刀人之固陋。而疾其武斷矣。

抑民權之有無。不徒在議院參政也。而尤在地方自治。地方自治之力強者。則其民權必盛。否則必衰。法國號稱民主。而其民權反遠遜英國者。以其地方自治之力微也。至於德國。則今日全世界上號稱

地方制度最完備之國也。餘邦勿徧論。請專論普魯士。日耳曼人。素以自由種子著聞。西人常言自由種子從日耳曼森林

中勞榮滋長出來 其歷史上之成跡。既歷歷不可掩。及士達因 *Daton von Stein* 相普。十九世紀初葉 而制度

益鞏固。及一千八百七十二年之改革。而權力亦擴張。令請言其略。普國地方機關。分爲五種。一曰「

普羅濫士」 *Provincia* 假名 二曰「的士得列提」 *District* 假名 三曰「梭克里」 *Circle* 假名

四曰「倫治米因德」 *Landgemeinde* 假名 五曰「士他治米因德」 *Stadtgemeinde* 假名 案此府

縣鄉市之名非確譯也。但假以爲名。下文便于措詞耳。讀者勿泥。 此五者之中。惟府非自治體。其餘皆自治體。而縣實統於省。鄉市實統於縣。

一省之中。其政治機關有二。一曰專掌行政。代表國家及其監督權者。巡撫 原名 superior President 今亦假中國之名以名之耳。讀者勿

泥。主之。二曰專掌立法。代表本省及其自治權者。省長及省立法院 *Provincial Rnday* 主之二

者。權限劃然。絲毫不能侵越。普魯士憲法云。「省也者。一省之人相結合。而凡關涉於本省之事務。皆

得有自治權利者也。」其語意可謂分明。一省之立法院 即議 自其省中各縣之人。分區選出議員。而

組織之。又由此立法院公舉省長 一省 及省行政會會員 此專理自治諸國內之行政者。其民權之完備如此。其餘縣鄉

市之制度。亦大略相同。特有大小之殊耳。由此言之。普國地方自治之權。與英國殆不相上下矣。其餘

邦亦大 略相似。夫地方自治者。民權之第一基礎也。今德國之自治權也。如彼。而盛摺乃謂其裁抑民權。吾誠

不知其所指者何事。而所據者何史也。

至於日本。其文明程度。殊屬幼稚。遠下於歐洲數等。但今且勿具論。日本之崇拜德國。固也。雖然亦未見如盛摺所云云也。謂日本尊崇君主則可。謂日本尊崇君權。有語病矣。至謂其裁抑民權。又夢囈之言也。日本之君權。稍優於英國。而遠遜於德國。何以言之。君權之輕重。一視其政府大臣對於議院所負之責任何如。英國政府大臣。對於議會而負完全之責任。苟不能制多數者。決不得尸其位。大臣去就之權。一在議院。故英之君權幾於無。德國反是。故德之君權。為各立憲國君主之冠。若普王之權則已不如德皇矣。同一

人也其所表表者異故其權限亦異

若日本憲法。則英國之類。而非德國之類也。日本之況。凡政府政策。如在議院被反對

者。則可以請天皇解散議會。命在選舉。再選舉而再被多數之反對。則可為政府大臣。不孚輿望之證。

必引責辭職。此英國之先例。而各國所踵行。而日本亦無以易者也。

英國舊例必待再選舉開院後果遇反對然後大臣辭職自格蘭斯頓的士黎里兩

大政治家抗爭時代每于解散議會後待其再舉時視議員中屬于我黨者幾何人苟察其不能制多數則有俟再開院便先行辭職此後以為常日本當明治三十一年伊藤博文為宰相時以選遼之舉大為議院所反對伊藤乃解散之及再選舉時而民間自由進步兩黨合而為一以抗政府改名憲政黨伊藤察其必再被反對遂引責去而憲政黨首領繼為宰相即行英法格的兩相之成例也宰相及各部大臣。為一國行政之長官。而黜陟

此長官之權。一在代表民意之議院。於此而猶謂之裁抑民權。吾不知其如何而始為伸也。但日本民智尚狹。民德未醇。故其民間所立之政黨。殊未完備。不能與藩閥老輩代興。此其所以下於英國一

等也。雖然此由其自力不足使然。優勝劣敗之公例。不得不爾。而非在上者從而裁抑之也。彼其自開國會以來。至今凡爲政黨內閣者兩次。一曰明治三十一年。憲政黨之大隈內閣。一爲明治三十三年。立憲政友會之伊藤內閣。然皆不過半年。遽爾崩潰。其崩潰也。皆非由反對黨推倒之也。其黨內自訂使然也。如可以爲日本政黨內力不完之明證矣。政黨不完。亦卽民智民德不完之表記也。故日本民權之不逮歐美也。非有裁抑之者也。初萌始達。而未能一蹴以臻於全備之域也。然其民日斯邁而月斯征焉。吾信其此後必有能如英國之一日也。彼爲盛捉刀者。徒見日本憲法有「天皇無責任」「天皇神聖不可侵犯」。天皇有種種特權之文。而遽曰日本尊崇君權。裁抑民權。抑何不考其立法之精神。察其現行之情實也。一又彼有「以成明治二十年以後之政績」一語。吾不知其所指者爲何。一推其意。殆以明治二十年以前。法國學派極盛。二十年以前。德國學派代興也。果爾。則此公必嘗稍讀日本書。略知其情者也。則吾更欲與彼一言。公所謂明治二十年以後之政績者。則就有過於二十三年之開國會者乎。開國會爲伸民權者。爲抑民權乎。公當能自辨。無待余喋喋者。公必以爲二十年以前。則民氣囂張。以後則民氣馴靖。以是爲德國學派之明效也。不知前此之囂張爲求民權耳。求而旣得之。更何囂張之與有。雖無德國學代興。猶之馴靖也。抑前此之囂張。其爲益於日本乎。其爲害於日本

乎。吾則曰其益無量也。苟非有此。則日本至今猶未開國會焉。未可知也。自板垣退助副島種臣等請立議院。不報。旅行無書可查不能確記其年份大約在明治十年前後全國議論洶湧。盧梭民約等類之書。幾於家絃戶誦。政府至將民

黨中錚錚者十餘人放逐於外。而明治十三四年間。其風潮正達最高點。政府亦不得不從民欲。遂於十四年下詔。許以二十三年開國會。自是以後。舉國晏然矣。故明治二十年以後之政績。實由明治七八年至十三四年間。所鼓吹之孕育之而得此者也。而要其最大關目。則不過定君權使有限。伸民權得同治而已。而盛摺之爲此言。抑何其得情實正相反背也。

盛摺又謂日德國體與我相同。吾滋惑焉。德爲聯邦之國。我爲大一統之國。德爲新造之國。我爲四千年古國。是則正相反對者。其相同之點在何處。吾苦不能得也。日本宜稍相近者。然日本之王室。自二千五百年來。未嘗易姓。吾昔嘗戲號爲地球第一大世家彼都人士。日沾沾焉翹以示人。自謂皇統萬世一系。其國體爲

地球萬國所無。而我國則四千年來。征誅篡禪。自秦以後。未有五百年無新王興者。謂其與日本國體正同。誰能信之。推盛摺之意。必以爲同爲君主國。故曰相同。然世界中君主國亦多矣。何必偏舉此絕相反對之德日。以爲比例。且公之意欲尊君權耳。然則何不舉俄羅斯。俄羅斯國土之大。與我同。王統之屢易與我同。專制之久與我同。誠哉其同也。然公殆知俄羅斯政體之野蠻。不敢舉不忍舉也。是則

盛丞堂之差強人意也。然則何不舉英吉利。吾以爲君主之尊榮者。莫如英吉利。君位之鞏固者。莫如英吉利。故欲尊其君者。不可不學英吉利。欲安其國者。不可不學英吉利。吾國國民程度。雖與英吉利大相遠。至如公之所謂國體者。則與德日大異。而與英吉利不甚相遠。公胡不舉英吉利。至所引盛摺末一語。謂亟宜取法德國日本。則富哉言矣。羣公如皆同此心。我后而肯採此言。斯真中國之福也。雖然。苟其法之必當似之。法其一二。而遺其十百。法其小節。而遺其大端。而曰我法日本。我法德國。日德不任受也。法日德奈何。亦曰法其伸民權以護君權而已。盛摺之不言法俄羅斯也。蓋猶知俄羅斯之君權。非可高枕爲樂之君權也。言國體而知日德之當法。不可不謂思想之一進步。炙手可熱之當道。而有此思想。此吾所欣喜無量者也。雖然。其必標明裁抑民權四字。則何也。得毋以民權與君主不兩立耶。今且勿論英國。卽以前所舉之日本德國論。證以鄙人所徵引。其兩立耶。其不兩立耶。是亦可以鑒矣。平心論之。謂民權興。而君權必無所損。此自太過之論。在專制政體之國。而興民權。則必不可不將前此固有之君權。割出一部分以讓之於下。雖鄙人亦無容爲諱者也。然究其實。則所損者。果爲君權乎。是亦不然。專制國之君主。實非能有完全之大權也。其權或在朝臣。或在外戚。或在宦寺。我國數千年歷史。如貉一邱矣。卽在今日君權之蝕於官者幾何。君權之蝕於胥吏者幾何。質而言之。則一國

主權。君主所能有者。不過十分之二三耳。苟開國會舉民權之後。而君主所能有之主權。斷不止二三

也。大抵今日德國君主有一國主權十之六。日本君主有一國主權十之四五。所割出之一部分。不過自朝官胥吏之手。而移諸民。非自君之手而

移諸民也。然則雖謂民權。而君權反增可也。雖然。其所異者。在一有限。一無限。君權而無限也。則有英

明仁武雄才大略之主出焉。而善用之。可以驟進其國於富強。雖然。此等君主間世而不一遇者也。苟

易葉焉。傳諸其子孫。則必有濫用此權。而致一國之民不聊生者。雖然。此又豈君主之利也。既以一身

攬其全權。則不可不以身負其責任。雖法律上無責任之明文。而一國人民心目中。固不得不以此

責任科君主。此事所必至。理所固有。欲避而不能避者也。責任既集于一身矣。其有失政。則怨毒歸之。

此革命之禍。所以不絕於四千來史冊上也。而君主究何利焉。故人臣之愛其君者。苟能保其君之子

孫。人人皆放勳重華。代代皆漢文唐太。則雖不言君權之有限可也。而不然者。則惟其限之。乃所以保

之。爲君者亦然。苟欲自愛護其大位。以傳諸無窮也。舍伸民權以自限。而限其子孫。其奚術哉。其奚術

哉。且人亦奚必以無限之權爲樂。若今日英國之君主。日本之君主。豈非享盡天地間第一奇福者耶。

以視俄羅斯皇之朝避猛虎。夕避長蛇。何如哉。此義今在我國青年學界中。稍知外事者。皆能言焉。而

當道有力者。猶夢夢然。語及民權二字。則畏之如蝎如蛇。是真可歎可憐者也。至如盛承堂此摺之主

稿者。謂其絕不知外事焉。不可也。度其人必嘗游日本。或嘗讀日本書數種。而乃爲此影響失實之言。以惑人心。而阻一國之進步。吾不知其誠何心也。其不知而誤會耶。是可恕也。讀鄙人茲篇。請君改之。其不肯服耶。請君駁之。而不然者。則必昧良心。造謠言。媚當道。以取富貴者也。是則可誅也。吾且更爲當道諸公一言。公等而有一二分之忠君愛國心也。則宜速擲棄其裁抑民權一語。勿使置之念頭。不然。民權之大勢。終非公等之所能敵也。昔魯仲連亦一匹夫耳。猶言吾甯蹈東海而死。吾不忍爲之民。今國中四萬萬人。甯無魯仲連其人者。公等其熟思善處之。

辱承下問。本擬略復數語。以釋尊疑。但一執筆。則如有鯁在喉。非吐之不快。故不覺縷縷數千言矣。想不厭其詞費也。十月初三夜九點鐘。屬稿寫至此。已子正兩點。尙未盡言。姑止於斯。

再者。盛摺又有「劃然有整齊嚴肅之風」一語。甚然甚然。非整齊嚴肅。則無以爲國也。然整齊嚴肅。豈俟裁抑民權而後得此乎。吾中國現今無民權。所謂整齊嚴肅安者在乎。英國民權最盛。其整齊嚴肅。又豈讓德日乎。唯法治國。爲能整齊嚴肅。法治國者。一國之人各有權。一國之人之權。各有限之謂也。故無立憲之國。斷不能整齊嚴肅。有法焉。則自由固可也。專制亦可也。人民行其自由於法律之下。則自由而非暴。政府行專制於法律之下。則專制而非苛。專制而非苛者。有諸乎。曰有。古代之斯巴達。

是已。斯巴達專制若彼。而民無怨者。上下有權限。而政府一切舉動。皆在法律範圍內也。中國如能有法乎。有權限乎。則雖學斯巴達可也。豈唯日本。豈唯德意志。十月四日晨起。綴此數言。

十六問。貴報第十三號。斯巴達小志末段云。吾昨夜無寐而夢。何夢。夢啜黑羹。啜黑羹三字何義。乞教。

(潮洲李溶)

十六答。來喀瓦士之制。導民以節儉。導民以刻苦。故其飲食極粗惡。每飯供黑羹一皿。以爲最上品。老人特嗜之。其他食品。以委諸少壯者。有某國王聞此羹之名。特召一斯巴達人。使製而供之。則味怪不能入口。王駭然。庖人曰。君欲知此味乎。非曾浴于歐羅打士 *Eurotas* 河者。不知其美也。蓋斯巴達人初生。必浴于此河。故庖人云然。

十七問。貴報十六號。邊沁學說第十葉十行中。要之邊氏著書。雖數十種云云。究竟邊氏之書。日本譯出者。共得若干種。乞示。(亞俠青年)

十七答。鄙人所知者。祇四種。其餘尚有碎篇。不能記憶。此四種其精善者也。(飲冰)

一立法論綱

田口卯吉譯

二利學正宗

陸奧宗光譯

三政治真論

一名主權辨妄

藤田四郎譯

四民治論綱

何禮之譯

十八問。貴報中國專制政體進化史論。泰西專制政治。已得聞矣。若日本明治以前。亦有非人穢多等稱號。此外尙有專制政體乎。(同上)

十八答。凡國不經一次文明革命。則前此必爲專制政體。日本昔日之專制亦甚矣。上有大將軍。其下諸藩並立。各私其民。當時海禁綦嚴。民不得出海外。不甯惟是。乃至此藩之民。與彼藩之民。不許相往來。吉田松陰。卽曾以此得罪者也。卽此一端。可以推見。其他不能枚舉。

十九問。譚瀏陽先生所著仁學一書。有謂其仿美有某士書而作者。此語信乎。 同上

十九答。所謂某士者。不知誰指。惟瀏陽先生未知西文。其讀西籍。皆據譯本。前此中國譯本之書。無一可以備瀏陽先生取仿之資格者。鄙人所敢斷言也。惟其中以太兩字之名詞。出於傅蘭雅所著治心免病法中。當時先生亦頗好此書。以一本太寒儉。聞足音。蹙然而喜也。然此等書。何足以望先生之一指趾。稍有眼力者。當能辨之。先生當時宗教之思想極盛。欲會通孔佛耶而爲一。而所得力者。尤在佛學。智者慈恩圭峯以後。一人而已。先生不喜禪宗先生又深於算。且好研究質化學。以當時一無憑藉。而能爲此。

等言。質天縱也。使今日先生猶在。其鼓鑄天下之力。更當何如耶。念此慨然。鄙人行將有潭瀏陽之著。當更揭先生之真面目。以告天下。

二十問。英克林威爾振臂一呼。國會軍聲勢大振。卒以議院之議。斬查爾斯。此等人物。此等事業。誠國民所當膜拜。所當歌頌者。其後獨攬大權。解散議院。頗似蹈查爾斯覆轍。然史稱英國強盛。人民安樂。果何故與。克將軍之行爲。與查爾斯輩有異歟。願貴撰述有以教我。（無錫自由室主）

二十答。克將軍乃英國清教徒中之最志芳行潔者。其嗜自由如性命。非與拿破崙輩懷抱野心者可同日語也。將軍生平毀譽最雜。雖蓋棺後二百餘年。而至今尙似未論定。蓋由當時王黨及腐敗教士嫉之已甚。于其死後。著書詆之者汗牛充棟。而將軍亦獨斷獨行。率其心之所安。旁若無人。往往授人以可議之迹。如征愛蘭之役。解散議員之役。其尤著者也。要之苟平心以讀英國史。則知當時之議院。萬不可以不散。蓋長期國會。已歷五年前。此代表一國民意者。今一國民意。已非彼等所能代表矣。而彼等欲藉此以行議院專制。立法行政機關。合而爲一。危國家莫甚焉。將軍之解散。豈爲己哉。爲國而已。鄙人生平最崇拜克將軍。見日本人所著歷史。率皆以狂吠之口。羅織以攻將軍者。蒙竊憤焉。行將繼徵諸書。草一將軍傳。以伸義憤於我國也。

答飛生

「浙江潮」第八期有自署飛生者著「近時二大學說之評論」一篇於鄙人之持論時加正焉。大率以打果爲因一語爲本論之總批評。一年以來海內之以筆墨相非難者。往往而有。願其言如村嫗之角口。不能有相商權之價值。飛生之文。則真吾所樂聞而樂與語者也。乃錄其原文。更爲答辨之如下。

原文新民氏之言曰。苟有新民。何患無新制。又新政府。新國家。而問其何若。而可得新民。則曰。新民云者。非新者一人。而新之者又一人也。則在吾民之各自新而已。豈言也。則吾之所最不敢贊同者也。夫論民族興亡之原。而歸乎其性質。則性質云者。有秉之自天然者。有受之于地理歷史之遺傳影響者。遠者且在。不可窮詰之。種性近者。亦積自千年百年之前。亦既習之成性矣。一旦而欲改革之。固非一議論之所能奏功。亦斷非十年數十年之所能見效。獨不見歐洲之改革乎。夫社會者。國家之母也。則社會改良。國家自能變易面目。而何以百年來政治之改革。痕跡顯然。而社會改良。則至今尙百口沸騰。而莫得其端倪也。故自理論上言。則有新民。固何患無新政府。而自事實上言。則必有新政府。而後可得新民也。何者。政府者。民之代表也。代表其羣者。必有賢智之過于其羣者也。賢者。教不肖。智者。教愚。則政府者。固有新民之天職在也。夫使政府而果賢且智。焉則政府之教民也。固當如新民氏之言矣。若曰。爾其自助。爾其自新。今政府既不能担任其天職。而乃不思易而置之。而仍教之以自新。不教之以變。少數短年。易變之政府。而教之以新。多數積重之民俗。吾知其事之萬不可期。而又不得代此蚩蚩者。向新民氏一訴冤也。夫治治國。則當用繁曠之法。治亂國。則當用單簡之法。教文明強悍之國民。則當平心靜氣。以立其遠大之基。教野蠻柔弱之國民。則當單易直捷。以鼓其前進之氣。反其道而用之。未

有能濟於事者也。

新民氏曰。今之動輒責政府者。抑何不智。又曰。責人不責己。此中國所以不能維新之大原。又曰。各委棄其責任。而一望諸家長。吾以謂國民者。對於國家。而負其監督政府之責任者也。舍此之外。吾未見有責任之更大於此者矣。吾正患其不能責政府耳。苟其能也。則中國何至于今日也。且夫吾中國之政府。則又與外國異。譬之甲乙二人。有二事焉。甲以事委諸丙。而從而指導之。爲監督之。爲乙以事委諸丁。悉與之構。而不顧問也。苟二事悉敗。則丙之責任。爲重乎中國之政府。丁之類也。四萬萬人。悉舉此權。而委之其責任。愈重。則責之宜愈嚴。理勢之必然也。

夫變俗之事亦未始不可期雖然有其道也則有一震撼雷霆之舉足以使沈睡之腦一震而耳目日能一新是也善夫嚴子原強之言也歸其長于智德力而救急則歸于一震蓋深知智德力之進之有道而救時之要當在是也新民氏之宗旨與嚴氏同而于篇末一節未有留意焉所以言焉而不免有病焉(中略)要之新民說者史論也非政論也教育之言非新聞記者之言也勿以政論視新民說則新民說固近今有數之文字也新民氏說我言其果以爲何如乎

答曰。飛生謂當教以變少數短年易變之政府。而不當教以新多數積重之民俗。此其言似也。曾亦思歐美民族。皆能自變置其惡政府。而吾民獨不能者。其原因何在。彼非有所倖。而我非有所不遭也。大抵有新政府而後有新民。歟。抑有新民而後有新政府。歟。此二說者。殆與「時勢造英雄。英雄造時勢」之語同一理論。互相爲因。互相爲果。強畸於一焉。均之非篤論也。飛生欲直捷以新彼政府。我之欲此。誰不如飛生。雖然。飛生何以能作此想。能作此言。則以飛生固已自新者也。使飛生而爲十年以前之飛生。則政府之惡縱十倍。今日而烏能新之。使四萬萬人而皆如十年以前之飛生。則政府之惡雖百倍。今日亦誰與新之。然則新民之爲緩爲急。可以見矣。飛生又言使戊戌變法。能如前日本之所謂大幾維新。則今日新民說。一與夫立憲說。一誠可爲根本之理論云云。見原文前簡不全引以鄙人所見。則正反是。使戊戌變法而收全功也。則利用數千年來莫大之政權。舉一國而鼓鑄之。民之能自新者下也。其不能。則干涉以新之而已。雖不能新其全。猶新其半。不能半。猶新其半之半也。國如是。固不能專以責任委諸民。彼時而專爲教民自新之言。是反爲政府卸其責也。惟今之政府。則固不足以受責者。乃始不得不還責望於吾民之自

身鄙人之爲新民說。豈徒欲吾民讀之。成一如歐美現今之善良市民而已。其意亦將以爲階梯而有所變置。此必當爲飛生所能知而公認者也。而飛生必曰。無須新民。而爲變置政府。試問非從新民處下一番工夫。而孰從而變置之。且所以必須變置之理由。謂其爲舊政府耶。謂其爲惡政府耶。如欲變惡者以置於良也。而曰無須新民。此吾所未解也。飛生謂吾新民說倒果爲因。吾亦欲以此語還贈飛生爾。且言固不可以若是其幾也。有新民而後有政府者。豈其取四萬萬人爲前提而盡新之。而乃希望此黃金世界之政府湧於其後也。夫孰不知新民說之所能灌注者。萬人中不得其一也。而飛生必強以新民與社會改良問題同一視。亦已過矣。

吾讀飛生引嚴氏一震之語。吾知飛生之意所存矣。此亦可謂近來最有力之一學說也。若謂鄙人於此一節未留意焉。則固非所敢受。去年一年之新民叢報。其與「震」主義之關係。深淺若何。讀者皆能言之。今勿具論。但吾儕今日所同禱祝同歡迎者「震」也。而「震」之實行。常從何塗。望得獨一無二之豪傑以自震之乎。抑望得多數無名之豪傑以共震之乎。如望彼多數者。則新民之論。烏可以已。如望彼獨一者。則其人之智力。必遠在吾與飛生之上。而又何勞吾輩以區區之筆舌震彼。而彼乃始有所藉以震他也。飛生謂新民說。爲非新聞記者之言。以爲言與行固異物也。語與實行。何取於言。微時吾言以已。

卽飛生亦可以已也。以云言也。則爲一般人說法也。吾以爲新聞記者之責任。其必在於新民也已。至其所駁「責已不責政府」一言。則言各有當而已。使之自責。正乃使之自認天職。豈有以飛生而猶不解此義者。吾知其本意非相駁。直假此爲捧喝而已。抑曾思新民說者。非與政府言。與國民言也。不知國民。則嘵嘵多言胡爲者。

吾非欲強護吾前說與飛生競口舌也。飛生之論。本無一不與吾同。但其歸宿。在「單易直接以鼓其前進之氣」。此實飛生全論之主腦。亦近時報界之趨向也。吾嚮者固亦最主張「鼓氣」主義。乃最近數月間。幾經試驗。而覺氣之未盡可以恃。氣雖揚上。而智德力三者。不能與之相應。則不旋踵而瀾矣。或者又以爲吾之「震」主義。只以用之於一時。乘氣之忽揚而使用之。旣震之後。雖瀾何害。庸詎知震雖簡單。而震之前提。却有不得不複雜者存。飛生知改良社會。非一議論所能奏功。豈謂變置政府。促僅一議論所能奏功耶。短時間之客氣。其必不足以濟大事明甚矣。然則鼓氣主義。竟不可用乎。曰可。偶用而不可常用。而用之又必以其時。曷爲不可常用。曰有二義。其一則用之多。而力量反醇。司空見慣。變爲口頭禪。而將不足以動人心也。大黃附子。劇劑也。日日而服之。失其效矣。驪山烽燧。失其時。而或反喪其用。是不可不謹也。其二則今日欲改造我國家。終不得不於民智民德民力三者有所培養。苟非爾者。非惟建

設不可期。卽破壞亦不可得也。而偏持鼓氣主義。其結果也。則往往養成智德力三者之事業。無端而生。出許多魔障。口君口口爲余言。自蘇報學界風潮一門。力不能破壞一書院。而惟破壞許多學堂。自東京學生運動之義倡。不能損滿洲政府一分毫。而惟耽閣自己功課。或鼓其高志。棄學而歸。歸而運動。運動而無效。無效而懼喪。懼喪而墮落。問所贏者幾何。曰廢學而已。此雖青年諸君逆耳之言乎。願亦安可以不深察也。甚矣立言之難也。朱子曰。教學者如扶醉人。扶得東來西又倒。如數千年無動爲大之中國。稍有志者。疾心痛首。恨不得日旋雷霆於其頂上以撼之。吾去年爲「敬告同業諸君」一文。意亦有在矣。願氣衰者。不得不激之使揚。而氣大盛者。又不可不斂之使靜。何也。欲民之有氣者。非欲其囂然塵上而已。將以各任一二實事也。乃一語於任事。則徒氣不足以自行矣。馬鼓氣主義者。藥也。而非粟也。藥也者。當適其時而用之。日日而藥焉。治而已矣。何謂適時。夏間蘇報之僞造上諭。彼其意欲激動學生及一般國民也。使其時國民之實力既已充。預備既已足。如六軍秣馬。待將令而行。如爆藥成陵。待火線而迸。則蘇報之藥。爲適時矣。奈誤認時勢。故其藥力全消耗於無用之地。而反以生他病。則不適之爲害也。孟子曰。予豈好辯哉。予不得已也。一年以來。東京學界之雜誌。彬彬輩起。突飛進步。然跡其趣旨。似專以鼓氣爲唯一治門。此傾向日甚一日。其發論之太軼於常軌者。往往有焉矣。夫以此對於社會一部分之人以立

言豈曰無益。然鄙人所陳二流弊。亦不可不深長念也。因答飛生難。牽引冗沓。下筆不能不能自休。讀者平心以察其意之所存。庶不以我慢見罪。還質飛生以爲何如。

合和事人

頃有自署和事人者。頗以近日新民叢報主義相詰責。茲錄而答之。

閱新民叢報卅八九號得讀大作。知從美洲回來宗旨頗良。標明保王力闢革命。且諱言當與異己者宣戰。吾知足下素來強辯未易與言。但不言而仍不能止者。正以心有所不安耳。中略足下力闢革命亦自成其說。吾不能與之深辯。但試問命則不能革。而王則可以保乎。大抵保王與革命兩黨之手段不同。其目的未嘗有異也。今日新學中人由革命而生。出排滿蓬蓬勃勃一發而不可制。推原其始亦由救國來也。痛宗國之淪衰而在上者仍不振。於是思所以革命。革命之說一起而思滿人平日待我之寡恩而排滿之念又起焉。事本相因而又相成。何者一朝起事。勢必有謂爲無父無君之邪說。以搖惑人心。中立者必將解體。蓋排滿者所以補革命之不足也。故排滿有二義。以民族主義感動上流社會以復仇主義感動下流社會。庶使舊政府解散而新政府易於建立也。而足下力闢其非。天下之人將盡信其非矣。于足下有濟乎。抑無濟乎。古來英雄辦事未有強人使與己意相同。更無有別人之非而成己之名也。况爾黨之人互相水火互相唾罵互相攻訐。則舊人得所藉口而天下大事何日能成乎。今日禍機愈迫矣。瓜分荐至矣。命固不能革。而王亦不能保矣。他日白人主我中原。制我死命。兩黨中合方而思挽回之術。亦不可得矣。必有傍徨瞻顧痛哭流涕歸咎於今日輿論者。悔之無及矣。子其思之。思以天下爲兒戲耶。

答曰。和事人不知其爲何許人。讀其言。則必爲一熱誠愛國之士。無可疑也。其所謂命則不能革。而王亦非易保。此誠今日我四萬萬人最盤根錯節之大問題也。此問題甚長。非此短篇所能畢其詞。願以異日至其末節所云云。謂強人使與己意相同。謂別人之非以成己之名。此實非鄙人之所敢受也。凡言論者。發表一己之意見者。也。言者與聽者。各有其自由。斷未有能強之使與己同者。吾便論中國人之性質。最

易爲一議論所轉移。有百犬吠聲之觀。有水母目蝦之性。雖其論如何高尚。如何磅礴。而所謂奴隸之本質。終不免。吾方以是爲一大缺點。而深疚之。而豈有強人使與己意相同之理。至其謂別人之非。是固然也。顧所剔者。不特人之非也。卽我之非。亦豈敢隱。夫鄙人之與破壞主義。其非無絲毫之關係。當亦天下所認同矣。然則吾豈與異己者爲敵哉。至謂以成己之名。則更失之遠矣。反抗於輿論之最高潮。其必受多數之唾罵。此真意中事。使鄙人而好名也。則更安肯出此。吾向年鼓吹破壞主義。而師友多謂爲好名。今者反對破壞主義。而論者或又謂爲好名。顧吾行吾心之所安而已。吾生性之長短。吾最自知之。吾亦與天下人共見之。要之鄙人之言。其心中之所懷抱。而不能一毫有所自隱蔽。非直不欲實不能也此則其一貫者也。辛壬之間。師友所以督責之者。甚至。而吾終不能改。及一旦霍然自見其非。雖欲自無言焉。亦不可得。吾亦不知其何以如是也。故自認爲真理者。則舍己以利。自認爲謬誤者。則不遠而復。如惡惡臭。如好好色。此吾生之所長也。若見其理不定。屢變屢遷。此吾生之所最短也。南海先生十年前。卽以流質相戒。諸畏友中。亦頗以爲規焉。此性質實爲吾生進德修業之大魔障。吾之所以不能抗希古人。弊皆坐是。此決不敢自諱。且日思自克。而竟無一進者。生平遺憾。莫此爲甚。若云好名。則鄙人自信。此關尙看得破也。至立言者。必思以其言易天下。不然。則言之奚爲者。故鄙人每一意見。輒欲淋漓盡致。以發揮之。使無餘蘊。則

亦受性然也。以是對於社會之一責任而已。至云兩黨之人互相水火。互相唾罵。互相攻訐云云。此誠最可痛心之事。若鄙人之尙知自重。而不肯蹈此惡習。此亦當爲一國所共諒者。試觀去年春夏間。報界之所以相誣攻者若何。吾黨曾一置辯否。又如香港某報。每三日照例必有相攻之文一篇。認列強爲第三敵。認滿洲政府爲第二敵。認民間異己之黨派爲第一敵。其所以相唾罵相攻訐者。亦云至矣。夫使以筆墨挑戰也。則吾輩亦何患無辭。試觀鄙人及我親友。曾爲一應敵之師否。非直不屑爲。亦以義固不可也。且如頃者章鄒最後之供詞。各報館之嘖有言者。亦衆矣。而本報並其原語。亦不肯錄入。誠以敬其初志也。吾謂「和事人」以此相慮。則可慮者。其必不在吾輩矣。若夫吾發表吾現在之所信而不能自己。則吾旣言之矣。吾今後更將大有所發表焉。然此非唾罵之謂也。非攻訐之謂也。吾所謂與輿論挑戰者。自今以往。有以主義相辨難者。苟持之有故。言之成理。吾樂相與賞之析之。若夫軋轢嫚罵之言。吾固斷不以加諸人。其有加諸我者。亦直受之而受。寄語和事人。可無慮此。抑吾亦欲徧國中志士。皆和和事人之教也。至吾之所以不能已於言者。則本報前號中鄙著「論俄羅斯虛無黨」答飛生「兩篇。亦可略見其用意之所存。毋亦如「和事人」所謂欲兩黨合力以思挽回之術云爾。願和事人平心靜氣。一省覽焉。而更有以辱教。固所望也。匆匆不具。

分類飲冰室文集全編

卷十七

尺牘



六二

正訂 分類飲冰室文集目錄 卷十八

雜著一

▲▲飲冰室自由書

■輿論之母與輿論之僕

凡欲爲國民有所盡力者。苟反抗於輿論。必不足以成事。雖然。輿論之所在。未必爲公益之所在。輿論者。尋常人所見及者也。而世界貴有豪傑。貴其能見尋常人所不及見。行尋常人所不敢行也。然則豪傑與輿論。常不相容。若是豪傑不其殆乎。然古今爾許之豪傑。能爛然留功名於歷史上者。踵相接。則何以故。赫胥黎嘗論格蘭斯頓曰。格公誠歐洲最大智力之人。雖然。公不過從國民多數之意見。利用輿論以展其智力而已。約翰摩禮英國自由黨名士格公生平第一親交也駁之曰。不然。格公者。非輿論之僕。而輿論之母也。格公嘗言大政治家。不可不洞察時勢之真相。喚起應時之輿論。而指導之。以實行我政策。此實格公一生立功成業之不二法門也。蓋格公每欲建一策。行一事。必先造輿論。其事事假借輿論之力。固不誣也。但其所假之

輿論。卽其所創造者而已。

飲冰子曰。謂格公爲輿論之母也可。謂格公爲輿論之僕也亦可。彼其造輿論也。非有所私利也。爲國民而已。苟非以此心爲鵠。則輿論必不能造成。彼母之所以能母其子者。以其有母之眞愛存也。母之眞愛其子也。恆願以身爲子之僕。惟其盡爲僕之義務。故能享爲母之權利。二者相應。不容假借。豪傑之成功。豈有僥倖耶。

古來之豪傑有二種。其一以己身爲犧牲。以圖人民之利益者。其二以人民爲芻狗。所遂一己之功名者。雖然。乙種之豪傑。非豪傑而民賊也。二十世紀以後。此種虎皮蒙馬之豪傑。行將絕跡於天壤。故世界愈文明。則豪傑與輿論愈不能相離。然則欲爲豪傑者如之何。曰其始也。當爲輿論之敵。其繼也。當爲輿論之母。其終也。當爲輿論之僕。敵輿論者。破壞時代之事業也。母輿論者。過渡時代之事業也。僕輿論者。成立時代之事業也。非大勇不能爲敵。非大智不能爲母。非大仁不能爲僕。具此三德。斯爲完人。

文明與英雄之比例

世界果藉英雄而始成立乎。信也。吾讀數千年中外之歷史。不惡以百數十英雄之傳記。磅礴充塞之。使除出此百數十之英雄。則歷史殆黯然無色也。雖然。使其信也。則當十九世紀之末葉。舊英雄已去。新英

雄未來。其母乃二十世紀之文明。將隨十九世紀之英雄以墜於地。此中消息。有智慧者欲一參之。試觀英國格蘭斯頓去矣。自由黨名士中。可以繼起代興者誰乎。康拔乎。班拿曼乎。羅士勃雷乎。殆非能也。試觀德國俾士麥去矣。能步其武者。今宰相祕羅乎。抑阿肯羅乎。抑亞那特乎。殆非能也。試觀俄國俄查及去矣。能與比肩者。謨拉比挨乎。謨拉士德乎。殆非能也。然則今日歐洲之政界。殆冷清清地。求如數十年前之大英雄者。渺不可覩。而各國之外交愈敏活。兵制愈整練。財政愈充溢。國勢愈進步。則何以故。吾敢下一轉語曰。英雄者。不祥之物也。人羣未開化之時代。則有之。文明愈開。則英雄將絕跡於天壤。故愈在上古。則英雄愈不世出。而愈見重於時。上古之人之視英雄。如天如神。崇拜之。以爲終非人類之所能及。中國此風亦不少如。關羽岳飛之類皆是。若此者。謂之英雄。專制時代。卽世界者。英雄所專有物而已。降及近世。此風稍息。英雄固亦猶人人能知之。雖然。常秀出於萬人之上。鳳毛麟角。爲世所珍。夫其所以見珍者。亦豈有僥倖耶。萬人愚而一人智。萬人不肖而一人賢。夫安得不珍之。後世讀史者。嘖嘖於一英雄之豐功偉烈。殊才奇識。而不知其沈埋於蚩蚩蠕蠕。渾濁黑暗之世界者。不知幾何人也。

廿世紀以後。將無英雄。何以故。人人皆英雄。故英雄云者。常人所以奉於非常人之徽號也。疇昔所謂非常者。今則常人皆能之。於是乎彼此皆英雄。彼此互消。而英雄之名詞。遂可以不出現。夫今之常人。所以

能爲昔之非常人。而昔之非常人。只能爲今之常人者。何也。其一由於教育之普及。昔者教法不整。其所教者。不足以盡高才人腦筋之用。故往往逸去。奔軼絕塵。今則諸學大備。智慧日平等。平等之英雄多。而獨秀之英雄自少。其二由於分業之精繁。昔者一人而兼任數事。兼治數學。中才之人。力有不及。不得不讓能者以獨步焉。今則無論藝術。無論學問。無論政治。皆分勞赴功。其分之日細。則專之者。自各出其長。而兼之者。自有所不逮。而古來全知全能之英雄。自不可復見。若是乎世界之無英雄。實世界進步之徵驗也。一切衆生皆成佛。則無所爲佛。一切衆人皆爲英雄。則無所謂英雄。古之天下。所以一治一亂。如循環者。何也。恃英雄也。其人存則其政舉。其人亡則其政息。卽世界藉英雄而始成立之說也。故必到人民不倚賴英雄之境界。然後爲真文明。然後以之立國。而國可立。以之平天下。而天下可平。

雖然。此在歐洲則然耳。若今日之中國。則其思想發達。文物開化之度。不惡與四百年前之歐洲相等。不有非常人起。橫大刀闊斧。以闢榛莽。而開新天地。吾恐其終古如長夜也。英雄乎。英雄乎。吾夙昔夢之。吾頂禮祝之。

□ 憂國與愛國

有憂國者。有愛國者。愛國者語憂國者曰。汝曷爲好言國民之所短。曰。吾惟憂之之故。憂國者語愛國者

此憂曷爲好言國民之所長。曰：吾惟愛之之故。憂國之言使人作憤激之氣。愛國之言使人厲進設之心。人其所長也。憂國之言使人墮頹放之志。愛國之言使人生保守之思。此其所短也。朱子曰：教學如扶醉人。其得東來西又倒。用之不得其當。雖善言亦足以誤天下。爲報館主筆者。於此中消息。不可不留意焉。今天下之可憂者。莫中國若。天下之可愛者。亦莫中國若。吾愈益憂之。則愈益愛之。愈益愛之。則愈益憂人。既欲哭之。又欲歌之。吾哭矣。誰與踊者。吾歌矣。誰與和者。

日本青年有問於飲冰子曰：支那人皆視歐人如蛇蝎。雖有識之士亦不免。雖公亦不免。何也。飲冰子曰：視歐人如蛇蝎。惟昔爲然耳。今則反是。視歐人如神明。崇之拜之。獻媚之。乞憐之。若是者。比比皆然。而號稱有識之士者。益甚。昔者人人以爲蛇蝎。吾故不敢不言其可愛。今皆人人以爲神明。吾故不敢不言其可嫉。若語其實。則歐人非神明。非蛇蝎。亦神明。亦蛇蝎。卽神明。卽蛇蝎。雖然。此不過就客觀的言之耳。若自主觀的言之。則我中國苟能自立也。神明將奈何。蛇蝎又將奈何。苟不能自立也。非神明將奈何。非蛇蝎又將奈何。

干涉與放任

古今言治術者。不外兩大主義。一曰干涉。二曰放任。干涉主義者。謂當集權於中央。凡百皆以政府之力。

監督之。助長之。其所重者在秩序。放任主義者。謂當散權於箇人。凡百皆聽民間自擇焉。自治焉。自進焉。其所重者在自由。此兩派之學者。各是其所是。非其所非。皆有顛撲不破之學理。以自神明其說。泰西數千年歷史。實不過此兩主義之迭爲勝負而已。於政治界有然。於生計界亦有然。大抵中世史。純爲干涉主義之時代。十六七世紀。爲放任主義與干涉主義爭競時代。十八世紀及十九世紀之上半。爲放任主義全盛時代。十九世紀之下半。爲干涉主義與放任主義競爭時代。二十世紀。又將爲干涉主義全盛時代。

請言政治界中世史之時。無所謂政治上之自由也。及南歐市府勃興。獨立自治之風略起。爾後霍布士陸克諸哲。漸倡民約之論。然霍氏猶主張君權。及盧梭興。而所以掊擊干涉主義者。不遺餘力。全世界靡然應之。演成十九世紀之局。而近儒如約翰彌勒。如斯賓塞。猶以干涉主義爲進化之敵焉。而伯倫知理之國家全權論。亦起於放任主義極盛之際。不數十年。已有取而代之之勢。疇昔謂國家恃人民而存立。甯犧牲凡百之利益。以爲人民者。今則謂人民恃國家而存立。甯犧牲凡百之利益。以爲國家矣。自今以往。帝國主義益大行。有斷然也。帝國主義者。干涉主義之別名也。

請言生計界。十六七世紀。重商學派盛行。所謂哥巴政略者。披靡全歐。各國相率仿效之。此爲干涉主義

之極點。及十八世紀。重農學派興。其立論根據地。與盧梭等天賦人權說。同出一源。斯密亞丹出。更出自由政策。發揮而光大之。此後有門治斯達派者。益爲放任論之本營矣。而自由競爭之趨勢。乃至兼并盛行。富者益富。貧者益貧。於是近世所謂社會主義者。出而代之。社會主義者。其外形若純主放任。其內質則實主干涉者也。將合人羣使如一機器。然有總機以紐結而旋掣之。而於不平等中求平等。社會主義。其必將磅礴於二十世紀也明矣。故曰二十世紀爲干涉主義全勝時代也。

然則此兩主義者。果孰是而孰非耶。孰優而孰劣耶。曰皆是也。各隨其地。各隨其時。而異其用。用之而適於其時。與其地者。則爲優。反是則爲劣。曰今日之中國。於此兩主義者。當何擇乎。曰今日中國之弊。在宜干涉者而放任。宜放任者而干涉。竊計治今日之中國。其當操干涉主義者十之七。當操放任主義者十之三。至其部分條理。則非片言所能盡也。

不婚之偉人

老子曰。人不婚宦。情欲失半。此其言殆有至理焉。頃讀某報。列舉近世不婚之偉人。如史學家之吉朋。謙謨。伯格兒。哲學家之笛卡兒。巴士卡爾。斯賓挪莎。康德。霍布士。陸克。盧梭。邊沁。斯賓塞。科學家之奈端。斯密亞丹。文學家之福祿特爾。格黎。政治家之維廉。鼈特。加富爾。梭馬。皆終身獨居之人也。

此外尙多不能枚舉。舉其最知名者。

耳。文豪索士比亞。擺郎。皆有妻。而極言有妻之害。謂天才與妻不能兩立者也。而近世大政治家。若格蘭斯頓。若俾士麥。若的士黎里。則自謂生平之成功。得於賢內助者居多云。兩者孰爲正理。吾以爲欲以不婚率天下。非可行也。而早婚與多婚。二者之陋俗不除。則國民之聰明才力。消阻於是者。不知幾許。有志改良羣治者。其勿以爲一私人之事而忽之。

嗜報國民

今世文明國國民。皆嗜讀報紙。如食色然。而發達最速者。莫如美國。美國當五十年前。卽西歷一千八百五十年。全國報館。僅有二百五十四種。讀報者七十五萬八千人。至今年一千九百二年。有報一萬一千二百二十六種。讀報者一千五百十萬人。五十年前。全國報館。印出報紙總數。四萬萬零二千六百四十萬部。今年增至八十一萬萬零六千八百五十萬部。今年統計全國報館。平均支出費用。美銀一萬萬零九千二百四十四萬元。內主筆訪事及司理人等。共二萬七千五百餘名。支出薪俸美銀二千七百萬元。職工共九萬四千人。支出薪俸美銀五千萬元。其餘機器紙費雜料等。支出美銀五千萬元。全國報館。平均收入金。美銀二萬萬零二千三百萬元。收支相消。實每年贏餘總額美銀三千萬元。

據美國最近人口統計。凡七千六百五十餘萬人。以此比例。是六人中。必有一人讀報者也。中國民數。五

倍美國。以此比例。應有讀報八八千萬有奇。每年印出報紙總數。當在四百五十三萬萬零四千萬有奇。嗚呼。吾中國何日始能有此盛況乎。不禁慨歎。然美國五十年中。增率二十萬有奇。安知中國五十年後。其盛大不有更驚人耳目者乎。是在造時勢之英雄焉矣。以今日金值計之。美銀一元。當中國口岸通用銀二元。是美國全國報館。每年總支出數。將近四萬萬元。其總收入處。將近四萬萬零五千萬元。視今日中國國幣。出入總數。且三倍矣。嗚呼。人之度量相越。乃至如是耶。

□ 奴隸學

偶讀顏氏家訓有云。「齊朝士夫嘗謂吾曰。我有一兒。年已十七。頗曉書疏。教其鮮卑語。及彈琵琶。稍欲通解。以此伏事公卿。無不寵愛。吾時俯而不答。」嗚呼。今之學英語法語者。其得毋鮮卑語之類耶。今之學普通學。專門學者。其得毋彈琵琶之類耶。吾欲操此業者。一自省焉。毋爲顏之推所笑。

□ 希望與失望

希望者。靈魂之糧也。而希望常與失望相乘。失望者。希望之魔也。

今日我國民全陷落於失望時代。希望政府。政府失望。希望疆吏。疆吏失望。希望民黨。民黨失望。希望漸

進。漸進失望。希望暴動。暴動失望。希望自力。自力失望。希望他力。他力失望。憂國之士。溢其熱血。絞其腦漿。於彼乎。於此乎。皇皇求索者有年。而無一路之可通。而心血爲之倒行。而腦筋爲之替亂。今日青年界中。多少連犸俶詭之現象。其起因殆皆在失望。失望之惡果有二。其希望而不甚誠者。及其失望也。則退轉。其希望而甚誠者。及其失望也。則發狂。今之志士。由前之說者十而七。由後之說者十而三。

國民之自殺

發狂之極。其結果乃至於自殺。自殺之種類不一。而要之皆以生命殉希望者也。故凡能自殺者。必至誠之人也。

一私人有自殺。一國民亦有自殺。何謂國民之自殺。明知其道之足以亡國。而必欲由之是也。夫人苟非有愛國心。則胡不飽食而嬉焉。而何必日以國事與我腦相縈。故凡自殺之國民。必其愛國之度。達於極點者也。既愛之。則曷爲殺之。彼私人之自殺者。固未有不愛其身者。惟所愛之目的不得達。故發憤而殉之。痛哉自殺。苦哉自殺。

一私人之自殺。於道德上。法律上。皆謂之有罪。私人且然。况乃一國。死者不可復生。斷者不可復續。嗚呼。

我國民。其毋自殺。

有無意識之自殺。有有意識之自殺。今舉國行尸走肉。皆冥冥中日操刃以殺吾國者也。故惟恃彼輩以外之人。庶幾拯之。浸假別出一途。以實行自殺主義焉。是我與彼輩同罪也。嗚呼。我有意識之國民。其毋自殺。

成敗

吾於五年前。始爲自由書。而以成敗章託始焉。今吾將復論成敗。

天下無必成之事。而有必敗之事。治事者。量其事之必成而後爲之。則終無一事之可滄也。若量其事之必敗。而故爲之。則治事亦更何取也。孔子曰。必也臨事而懼。好謀而成。嗚呼。閱歷稍久之後。其必有感於斯言矣。吾昔持無成無敗之理想。以謂造一因必有一果。而其結果之遲速遠近。非淺見者所得論定。由今思之。吾爲一事。而誠能造出一因。以冀百數十年以後。若數千萬里以外之結果者。則固謂之成。不謂之敗焉矣。而天下事。固有糜多少之日力。絞多少之腦漿。及其一敗塗地。乃如煙消雲散。渺然無復微痕。薄跡之可尋。問於將來世界。有絲毫影響乎。共事一二人。和血吞而已。而他更何有也。傷哉。失敗。且持雖敗不敗之理想者。少年初入世。初任事之人。類多能之。雖然。此不過客氣耳。失敗者。最易墮人志。

氣也。一敗再敗之後。而最初一往無前之概。而已萎喪無復存。吾見此者數矣。非其人之中變。而根器實有所不任也。上等根器。固非磨涅之所能懼。其奈芸芸衆生。具中等以下之根器者。十而七八也。嗚呼。此其所以往而不返也歟。

問者曰。予爲此言。其阻人辦事之心。不亦甚乎。答之曰。不然。辦事者。有成有敗者也。而不辦事則全敗者也。知成敗之義者。其必知所擇矣。惟當其辦事也。雖不能要以必成。而必盡其智力所及。以期於可成。雖不能保其不敗。而必謀定後動。而毋或立於必敗。此豈徒爲達救世之目的而已。抑亦自養其氣。忽使天絕之一法門也。曾文正曰。『多條理而少大言。』又曰。『紮硬寨。打死仗。』善哉。吾師夫。吾師夫。雖然。天下豈有終身不經失敗之人哉。粵諺有之。『做過不如錯過。錯過不如錯得多。』失敗者。實天惠之學梭也。能受此天惠與否。則亦視其人也已矣。

▲飲冰室讀書記

□讀通鑑論通

王莽之後。合天下士民頌公德。勸成篡奪者。再見於武氏傳。游藝一授顯秩。而上表謂改唐爲周者六萬

人功若漢唐。德若湯武。未聞有此也。孟子曰。得乎邱民爲天子。其三代之餘。風教尙存。人心猶樸。而直道不枉之世乎。若後世教衰行薄。私利乘權。無不可爵餌之士。無不可利囿之民。邱民亦惡足恃哉。盜賊可君。君之矣。婦人可君。君之矣。夷狄可君。君之矣。孔子曰。天下有道。則庶人不議。後世庶人之議。大亂之歸也。且與之食。而且謳歌之。夕奪之衣。而夕咀呪之。恩不必深。怨不在大。激之則以興。盡迷其故。利在目睫。而禍在信宿。則見利而忘禍。陽制其欲。而陰圖其安。則奔欲而棄安。贅壻得妻。而謂他人爲父母。猾民受賄。而訟廉吏之貧污。上無與懲之益。進而聽之。不肖者利其易。或而蠱之。邱民之違天。常拂天性也。無所不至。而可云得之爲天子哉。以賢治不肖。以貴治賤。上天下澤。而民志定。澤者下流之委也。天固無待於其推崇也。斯則萬世不易之大經也。卷二
十一

案法儒孟德斯鳩言共和政體之國。以道德心爲立國之元氣。豈不然哉。今日中國民權固不伸也。使其伸矣。而今日之人心風俗。果能有以異於船山之所云乎。吾見其滋甚而已。昔聞澳大利亞洲之黑蠻。有白人取其一小女。自乳哺時。而卽養之於家。撫養之若己出。衣服飲食。華麗瞻都者十餘年。及將及笄。忽有數黑蠻過其門。此女與交數語。輒從而遁去。甘復入於深山。以衣木葉。食生鼠。棄其前此之尊榮安富。如敝屣然。蓋天性不可移也。人甘梁豢。而螂蛆甘糞。以梁豢飼蛆。且蛆而逃。不則死矣。然則

歐美人嗜自由。而支那人嗜爲奴。強奴而使之自由。其無異強蛆以鑿鼎烹也。然則其數千年跼蹐於至暗黑至猥賤之境地。彼實樂之。而復何尤。雖然。蛆生於糞而嗜糞。其性然也。人生於自由而嗜爲奴。未必其性然也。性不爾爾。而竟爾爾者。則有習焉而成第二之性者也。夫所謂習者何也。則數千年之民賊。桎之梏之。箝之灼之。而衣冠禽獸之賤儒。復緣飾所謂人倫。所謂道德。所謂經義。所謂史裁者。爲之文其奸。而濟其惡。夫安得不胥斯人而失其本性也。婦人之躔足也。躔之數十年。雖解之而不能行矣。甯得謂足之天性本如是也。然則欲民之有恥也。欲民之去奴隸而爲完人也。欲民之去禽獸而成人格也。其必自復其自主之權。返其獨立之性。使民知其所立於天地者。固當如是如是。庶幾乎有瘳焉矣。船山未審于此。徒憤民之無狀也。而欲嚴上天下澤之義。是所謂揚湯止沸。而不知去薪而沸自銷也。

罷兵必有所歸。兵罷而無所歸。則爲盜爲亂。張說平麟州叛胡。奏罷邊兵二十萬人。而天下帖然。蓋其所罷者府兵也。府兵故農人也。歸而田其田。廬其廬。父子夫婦。相保于穹窒粟薪之間。故帖然也。于是而知府兵之徒以毒天下。而無救于國之危亂。審矣。說之言曰。臣久在疆場。其知其情。將帥苟以自衛。及役使營私而已。夫民之任爲兵者。必佻宕不戢。輕於死而憚于勞之徒。然後貪醢酒椎牛之利。而可任之以效。

死。夫府兵之初。利租庸之免。而自樂爲兵。或亦其材勇之可堪也。迨其後。著藉而不可委卸。則視爲不獲已之役。而柔弱愿樸者。皆垂涕就道。以赴行伍。若此者。其鈍懦之材。旣任爲役。而不任爲兵。畏死而不憚勞。則樂爲役。以避鋒鏑。役之而無不受命。驕貪之將領。何所恤而不役。以營私耶。團隊之長。役之矣。偏裨役之矣。大將役之矣。行邊之大臣。役之矣。乃至紈袴之子弟。元戎之僕妾。役之矣。幕府之墨客。惡從之游士。彈筆擊筑。六博投瓊。調鷹飼犬之徒。皆得而役之。爲兵者亦欣然願爲奴隸。以偷一日之生。嗚呼。府兵者。惡得有兵哉。舉百萬井疆耕耨之丁壯。爲奴隸而已矣。卷二十一

案此論唐府兵之制。與今日之募兵者。其外形稍異。要其論兵與役之不相容。任國防之事者。不可待之以奴隸。有奴隸之性者。不可託之以國防。則其識遠矣。夫今日中國之兵。則何一而非奴隸也。吾見夫長江一帶之兵船。舍送迎督撫眷屬之外。無他事矣。吾見夫各營之兵丁。勇弁。舍伺候將帥。執唾壺。虎子。裝烟。倒茶之外。無他能矣。此猶其舊焉者。若今所謂洋操者。其游學外國陸軍學校卒業之學生。猶且非仰候補道府總辦之鼻息。不能得一差遣。而兵丁更何論也。夫兵也者。一國之公衛也。爲一國人保其生命財產。故一國人皆宜致敬焉。而又非徒虛文之敬禮。而可以高其資格也。必使一國之權利。爲一國人所公有。而一國之義務。爲一國人所公任。然後任是者。知所以自重。而他人亦從而重之。

其戰也。自爲其性命財產而戰也。非有所奴隸于他人也。如是。然後有兵之精神。不然。則雖千萬變其兵制。而奴隸之資格如故也。而兵之徒毒天下。而無救于國之危亂如故也。船山先生概乎其言之矣。自唐以上。財賦所自出。皆取之豫兗冀。雖而已足。未嘗求足於江淮也。特江淮以爲資。自第五琦始。當其時。賊據幽冀。陷兩都。山東雖未盡失。而隔絕不通。蜀賦旣寡。又限以劍門棧道之險。所可資以贍軍者。唯江淮。故琦請督租庸。自漢水達洋州。以輸于扶風。一時不獲已之計也。乃自是以後。人視江淮爲腴土。劉宴因之。輦東南以供西北。東南之民力殫焉。垂及千年。而未得稍舒。嗚呼。朝廷旣以爲外府。垂腴朵頤之官吏。以視之羶場。耕夫紅女。有宵匪日。以應密詔之誅求。乃至衣蓋之靡麗。口實之珍奇。苛細煩勞。以聽貪人之侈濫。匪舌是出。不敢告勞。亦將孰與念之哉。自漢以上。吳越楚閩。皆荒服也。自晉東遷。而江淮之力始盡。然唐以前。姚秦拓拔宇文。唐以後。自朱溫以及宋初。江南割據。而河雒關中。未嘗不足以立國。九州之廣。豈必江濱海澨之可漁獵乎。祖第五琦劉晏之術者。因其人守廉隅。畏鞭笞。易於弋取。而見爲無盡之藏。竭三吳以奉西北。而西北坐食之。三吳之人。不給饘粥之食。抑待哺于上游。而上游無三年之積。一罹水旱。死徙相望。乃西北蒙坐食之休。而民抑不爲之加富者。豈徒天道之虧盈哉。坐食而驕。驕而佚。月倍三釜之餐。工無再易之力。陂堰不修。桑蠶不事。與先王盡力溝洫之良田。聽命于旱蝗。而不思捍救。

游飢相迫。則夫削妻骸。弟烹兄肉。其強者彎弓馳馬。以殺奪行旅。而猶睥睨東南。妬勞人之采芎。剝蟹也。誰使之然。非偏困東南。以驕西北者。縱之。而誰咎耶。驕之使橫。佚之使情。貪欲可遂。則笑傲以忘所自來。供億不遑。則伎忿而狂興以逞。其野人惡舌暗啞。以脅羸懦之馴民。其士大夫氣涌胆張。恫喝以凌衣冠之雅士。於是國家無事。則依中涓。附戚里。而不惜廉隅。天下有虞。則降賊戴羶虜。而不知君父。何一而非坐食東南者之教。孫豢虎。以使農非農。士非士。日漸月靡。俾波逝而無迴瀾哉。冀士者唐堯勤儉之餘澤也。三河者商家六百載奠安之樂土也。長安者周漢之所久安而長治者也。生於此。遂教於此。敷一移其儲俯之權于江介。而中原幾爲無實之土。第五琦不得已而偶用之。害遂移於千載。秉國之均。不平謂何。非均。平方正之君子。以大公宰六合。未易以齊五方。而綏四海。邵康節猶抑南以伸北。亦不審民情天化之變矣。卷二
十三

案。吾向者亦襲千年之謬論。狃於外著之現象。以爲西北地力果私。不能不有待於東南者。地運然也。乃讀船山此論。而歎其識之過人遠矣。進化學之公例。凡物之廢置不用者。則其能力將漸銷失。有耳也。久不用之。則必聾。有口也。久不用之。則必瘖。於人體有然。於地力亦如是矣。不然。以地理學通例言之。凡氣候稍寒。地味稍瘠之土。其文明之發達。常視沃土之民爲尤進焉。條頓民族與拉丁民族之比。

較。是其例也。况關中河內幽燕之地。猶在溫帶。而非北歐瘠壤之所能幾耶。漢京之盛。見於兩都賦者。所謂鄭白之沃。衣食之原。竹林果園。芳草甘木。夫非同是土耶。何以千數百年而彫落若此。乃知驕之使橫。佚之使惰。以人事而災及地利。天下事未有有果而無因者。船山此論。實可以抉西北彫敝之原。因而無餘蘊矣。專制民賊之毒天下。其禍乃至於此極。東南則敝於供億。西北則敝於怠荒。水旱蝗蝻。飢饉疾拘。每歲死者以數百萬計。饑孳纍纍。相屬於道。何一非大民賊小民賊之搯其吭而致其命也。以五洲第一天府上腴之國。而數千年常被一二民賊扼之。遂使吾民欲求一飽而不可得。嗚呼。吾甚怪夫吾民之何以受之若固也。船山云。其人畏鞭笞。易弋取。夫既畏鞭笞。則人鞭笞之矣。既易弋取。則人弋取之矣。然則又豈特民賊之罪也。吾派聞已亥年剛毅之下江南。下嶺南矣。民南僻壤之民。幾於易子食而析骸爨。而剛毅之行囊。固纍纍然千餘萬。捆載牛腰也。近者建一學堂。而云無費。派一學生。而云無費。而回鑾費數千萬。取於東南焉。賠款數萬萬。取於東南焉。方且有修頤和園以娛暮年矣。亞美利加因祖國關稅之不平。遂起而獨立。而彼之戢戢然於羶種之脚底。竭吾膏血以伺其嘖笑。而恬不爲怪者。吾又安從而與之言也。

中國史上人口之統計

自瑪兒梭士人口論出世。謂人口之蕃殖。以幾何級數加增。每二十五年。輒增一倍。達爾文因之以悟物競天擇之原理。迨十九世紀。舉地球萬國。幾無不以人滿爲患。而瑪氏達氏之學說。益占勢力於學界。推原各國兵事之所由起。殆皆由民族與民族之相接觸而有爭競。其所以相接觸之故。大率由於人滿而移住。此天演自然之理。卽中國當亦不能外也。顧吾讀古籍。孔子言不患寡而患不均。又言天下之民。襁負其子而至矣。梁惠王問孟子。鄰國之民不加少。寡人之民不加多。何也。孟子又言天下耕耨。皆願耕於王之野。凡此皆當時諸國爭欲吸集客民之徵也。竊疑自黃帝至春秋戰國間。已二千餘年。何故其現象仍復如彼。且其時戰爭日烈之原因。抑何在耶。深所不解。偶檢文獻通考。續通考。皇朝通考之戶口門讀之。觀其歷代統計之比較。有令人大失驚者。明知吾國調查之學不精。且更有種種原因使版籍之數。勢必失實。雖然。不實之中。亦有研究之一值也。

中國歷代戶口比較表 據三通考撮錄其失載者不杜撰其舛誤者不臆改

(年) (代) (戶) (數) (口) (數)

夏禹時 一三三·五五三·九二二三

周初 一三三·七〇四·九二二二

周東遷時

一一·九四一·九二二

周末

漢初

西漢末

一二·二三三·〇六二

五九·五九四·九七八

漢光武時

四·二七九·六三四

二一·〇〇七·八二〇

明帝時

五·八六〇·一七三

三四·一二五·〇二一

章帝時

七·四五六·七八四

四三·三五六·三六七

和帝時

九·二三七·一一二

五三·二五六·二二九

東漢末

一六·〇七〇·九〇六

五〇·〇六六·八五六

三國時

七·六七二·八八一

晉武帝時

二·四五九·八〇四

一六·一六三·八六三

南北朝全盛時

四八·〇〇〇·〇〇〇

南北朝之末

一一·〇〇九·六〇四

隋全盛時

八·九〇七·五三六

四六·〇一九·九五六

唐太宗時

三〇〇·〇〇〇(不滿)

武后時

六·三五六·一四一

玄宗天寶時

九·六一九·二五四

五二·九〇九·三〇六

肅宗至德二年

八·〇一八·七〇一

乾元二年

一·九三三·一二五

德宗時

三·八〇五·〇七六

憲宗時

二·四七三·九六三

武宗時

四·九五五·一五一

宋藝祖時

三·〇九〇·五〇四

真宗時

八·六七七·六七七

一九·九三〇·三二〇

神宗時

一五·六八四·五二九

二三·八〇七·一六五

徽宗時

二〇·〇一九·〇五〇

四三·八二〇·七六九

南宋高宗時(金在外)

一一·三七五·七三三

一九·二二九·〇〇八

光宗時(並金合計)

一九·二四一·八七三

七三·二九二·九八五

元初

一一·八四〇·八〇〇

五八·八三四·七一

元末

明成祖時

一一·四一五·八二九

六六·五九八·三三九

英宗時

九·四六六·二八八

五四·三三八·四七六

武宗時

九·一五一·七七三

四六·八〇二·〇〇五

神宗時

九·八二五·四二六

五一·六五五·四五九

清順治十八年

二一·〇六八·六〇九

康熙五十年

二四·六二一·三三四

乾隆十四年

一七七·四九五·〇三九

四十八年

二八四·〇三三·七五五

(表例附)

(一) 周末漢初元末諸時代。極關緊要。然原書不能言其數。今別證他書。附表於後。惟表中則空之。
 (二) 原書於唐著戶不著口。其他或著口不著戶。今悉依以為存闕。
 (三) 原書於東漢唐宋元明列表甚詳。每帝皆有。今惟取其比較之率。有大漲落者乃列。
 (四) 當數主分立時代。必須合觀各主所屬之戶口。乃為全國總數。古表所列者。惟南宋高宗時代。未將金所屬列入。其時金之戶數三百萬。合諸宋之數。共一千四百餘萬戶也。口數則原書不載。無從攙入。故闕之。其餘如三國時。六朝時。及南宋光宗時。皆綜合其總數列表。所據者如下。

(一) 三國時

(戶)

(口)

魏

六六三四二二三

四四三二八八一

蜀(亡時)

二八〇〇〇〇〇

九四〇〇〇〇〇

吳(亡時)

五三〇〇〇〇〇

二三〇〇〇〇〇〇

合計

一四七三四二二三

七六七二八八一

(二) 南北朝全盛時

南朝所可考者。惟宋書載孝武時戶九十萬六千八百七十。口四百六十八萬五千五百一。北朝所可考者。惟魏書載孝文遷都河洛時。為全盛戶口之數。比晉太康。倍而有餘。馬氏原案云。太康平吳後。戶二百四十五萬餘。口千六百十六萬餘云。倍而有餘。則是戶五百餘萬。口三千二百餘萬以上也。故略列如前表。

(二)南宋時

(戶)

(口)

宋(光宗時)

一二三〇一八七三

二七八四五〇八五

金(章宗時)

六九二九〇〇〇

四五四四七九〇〇

合之即前表之數也

(表補附)

(一)周末人口略算

蘇秦說六國於燕趙韓齊皆言帶甲數十萬於楚則言帶甲百萬於魏則言武士蒼頭奮擊各二十萬張儀言秦虎賁之士百餘萬又蘇秦言齊有趙皆車千乘騎萬匹言燕車六百騎六千言魏車六百騎五千張儀言秦車千乘騎萬匹以秦楚兩國推例之大抵當時兵制有車一乘騎十四者則配卒千人故秦楚千乘而卒百萬趙六百乘而卒六十萬然則蘇秦雖不確言齊趙燕韓之卒數然亦可比例以得其概大約齊趙皆當白萬燕韓皆當六十萬蓋

當時特秦齊楚工力悉敵而蘇秦亦言山東之國莫強於趙。合縱連橫時秦趙齊楚皆一等國而魏韓燕二等國也。以此計之七雄所養兵當合七百萬內外也。

由兵數以算戶數。據蘇秦說齊王云：臨淄七萬戶，戶三男子，則臨淄之卒可得二十一萬。是當時之制大率每一戶出卒三人，則七國之衆當合二百餘萬戶也。

由戶數以算人數。據孟子十餘萬應，屢言八口之家，以每戶以八人爲中數，則二百五得二千餘萬人也。

此專以七雄算者。當時尙有宋衛中山東西周泗上小侯及蜀閩粵等不在此數。以此約之，當周末時人口應不下三千萬。

(二) 漢初人口略算

據史記秦本紀及六國表，則自秦孝公至始皇之十三年，其破六國兵所斬首虜共百二十餘萬（余別有表）而秦兵之被殺於六國者尙不計六國自相攻伐所殺人尙不計。然則七雄交關所損士卒當共二百萬有奇矣。而始皇

一天下之後，猶以四十餘萬使蒙恬擊胡，以五十萬守五領，以七十萬作驪山馳道。三十年間百姓死亡相踵於路，陳項又恣其酷烈，新安之坑二十餘萬，彭城之戰，睢水不流，漢高定天下人之死傷亦數百萬。及平城之圍，史稱其

悉中國兵而爲數不過三十萬耳。方之六國不及二十分之一矣。（參用馬氏原案語略加考證）漢既定天下，用民服兵役者當不至如六國之甚。然以比擬計之，當亦無逾五六百萬者。（南越東越等不計）

由前表觀之，則中國自清乾隆以前，民數未有逾百兆者。其最盛爲南宋，宋金合七十三兆餘。次則明成祖時，六十六兆餘。又次則西漢孝平時，五十九兆餘。最少者爲三國，乃僅爲七兆餘。嗚呼！孰謂吾先民而僅有此。今姑據此不實不盡之統計，一研究之。

上古邈矣，不有考。但據原案，周東遷時得十一兆餘。今所揣度，則至戰國而進爲三十兆。其間以衛生之

不備。戰爭之頻數。進率祇於如是。其於理論殆不相遠。及自漢初而六去其五矣。則暴秦陳項之亂爲之也。漢休養生息二百年。自文景迄孝平。由五兆進爲五十九兆。殆加十倍。乃建武中興。復銳減至二十一兆。幾去三之二矣。則王莽赤眉以來之亂爲之也。東漢二百年稍蘇。復進至五十兆。然猶不及西京之盛。曾幾何時。而三國時代。僅餘七兆。比盛漢時。南陽汝南兩郡之數。竊疑三國時戶口最確實。蓋史所載者。並其將士若干人。吏若干人。後宮若干人。而一一備列之也。蓋七而餘一矣。馬貴輿謂與平建安之際。海內荒廢。白骨盈野。三十餘年。及文帝受禪。人衆之損。萬有一存。此皆言甚之詞。然生民之不遭。亦至是極矣。隋之極盛。可比漢代。其所以致此者。下節論之。隋與唐之比較。原書於唐記戶而略口。故民數無稽焉。然隋大業間。有戶八百九十萬餘。唐貞觀間。乃不滿三百萬。亦去三之二矣。其有戶無民者。尙不在此數。馮氏謂經亂離之後。十存不能一二。則豪傑共逐隋鹿之爲之也。至武后時而增一倍。爲六百萬戶。至玄宗天寶時而增二倍。爲九百餘萬戶。則唐之極盛也。蓋其休養者凡百三十餘年。而始得此。肅宗至德二年。卽玄宗幸蜀之次年也。猶八百餘萬。再越三年。爲乾元二年。以至德三年。年改元曰乾元。乃僅有百餘萬戶。視天寶時。相距之。過五年。十去其八矣。則安史之亂爲之也。其後終唐之世。以及宋藝祖之定天下。雖時有進退。然僅如貞觀時耳。則藩鎮迭擾。十國交鬪之爲之也。元明之交。章弗可深考。而元初與明初之比較。殆相若。今無置論焉。明代民籍。大率上下於五六十兆間。天啓中。猶有五十餘

兆。及順治十八年。僅二十兆。又五去其三矣。則流寇恣虐。滿洲入篡。三藩繼亂之爲之也。綜覽二千年來。我先民之宅於斯土者。稍得置田廬。長子孫。度數十寒暑。輒復一度草薶禽獮。使靡孑遺。如佳期將至。風雨便來。如萌孽方生。牛羊滋牧。嗚呼。舉天下含生負氣之儔。其遭遇之大不幸者。孰有中國人若哉。孰有中國人若哉。瑪爾梭士人口論之公例。獨不行於我中國也。亦宜抑以如此之遭際。而成責其文明發達。與他國享平和幸福者。並轡而馳。亦何望矣。

雖然。右表所列。國絕不足爲信據也。不足信據而復列之。則以其於中國國情之考證。固別有稗也。宋李心傳所著建炎以來朝野雜記云。一西漢戶口至盛之時。率以十戶爲四十八口。有奇。東漢率以十戶爲五十二口。唐人率以十戶爲五十八口。按由此略可推算唐時公報之人數。大率天寶最盛時六百兆矣。自本朝元豐至紹興。率以十戶爲二

十一口。以一家止於兩口。則無是理。蓋詭名子戶。漏口者衆也。然今浙中戶口。率以十戶爲十五口。有奇。蜀中戶口。率以十戶爲二十口。弱。蜀人生齒。非盛於東南。意者蜀中無丁賦。於漏口少爾。一吾證以南宋時之統計。而再觀夫宋光宗間。爲戶千二百餘萬。爲口僅二千七百餘萬。金章宗間。爲戶六百九十餘萬。爲口乃四千五百餘萬。宋之戶倍於金。而口乃僅乃金之半。甯有是理耶。以金例宋。則當光宗時。宋民八九千萬。乃始與其戶相應矣。宋金合計。則彼時之民。已應在百二三十兆以上矣。且吾以爲此數不至宋

而始然也。自唐時而當已然。宋之所隱匿者在口。而唐之所隱匿者在戶。實則戶口兩者俱匿。特唐宋更各有所偏重耳。杜君卿云。

「我朝自武德初至天寶末。凡百三十八年。有以比崇漢宣。而人戶纔比於隋氏。蓋法令不行。所在隱漏

之甚也。」考隋文帝初年。有戶三百六十萬。平陳所得。又五萬十耳。乃至大業之始。不及二百年。而增至

八百九十餘萬。其增進之率。適與瑪氏二十五年加一倍者相合。夫唐貞觀以後之治。過隋遠也。吾先民

之樂居安業者。在歷史中實以彼時為最長。人口烏有不蕃殖之理。以隋例唐。隋初據四百萬戶之業。閱

二十年而得八百餘萬者。唐初據三百萬戶之業。閱百三十餘年。最少亦應至千八百萬有奇矣。此尚非以

遞算。以當時每戶五口有奇之比例算之。則盛唐時代。應有民百四五十兆以上。顧統計表上。隋唐之相違

如彼其遠者。則史稱隋文帝恭儉為治。不加賦於人。而唐代行租庸調之法。以調稅戶。以庸稅口。陸宣公奏

則有租有戶。則有庸。調有身。則有庸。瑪氏所謂庸調之征愈增。則戶口之數愈減。誠哉然也。唐制戶口有課者。有不課者。凡鰥寡孤獨廢

課。天寶十四年。戶數共八百九十一萬有奇。課者五三百四十四萬有奇。不課者三百五十六萬有奇。口數共五千二百九十萬有奇。課者

八百二十萬有奇。不課者四千四百七十萬有奇。以全國之戶而窮而無告者。居三之二。以全國之民而鰥寡孤獨廢疾奴婢居六之五

天下有是理乎。此雖當立法不善。然官吏之不能綜覈與國民之不解納稅。義務皆可見矣。中國官牘之統計。皆此等類。何足怪訝。特附記以資一藥云爾。明史食貨志云。太祖當兵燹之後。戶口

顧極盛。其後承平日久。反不及焉。靖難兵起。淮以北鞠為茂草。其時民數反增於前後。乃遞減。至天順間。為最衰。成私繼盛。正德以後。又減戶口。所以減者。周忱謂投倚於豪門。或冒匠竄兩京。或冒引賈四方。或

舉家舟居。莫可蹤跡也。然則明時民數不進之所由。亦可以見矣。清順治十八年。人數二十一兆有奇。康熙五十年。二十四兆有奇。乾隆十四年。一百七十七兆有奇。前此五十年間。所增僅三兆。不過遞加十分之一。後此二十餘年間。陡增一百五十兆。遞加八倍有餘。使前表而爲信史也。則是吾中國數千年來。濡滯不進之民數。常往來於四五十兆之間者。至彼二十七年間。乃改其度。而爲一大飛躍也。使前表而爲信史也。則瑪爾梭士之徒聞之。當更增數倍之悲觀也。而豈知自唐以來。我民族既早有此數。徒以避賦役而自匿蔽。自康熙五十一年。下滋生人丁。永不加賦之諭。取漢唐以來。口算庸調之法。而掃除之。然後千餘年間。人口之實數。始漸發現也。康熙五十二年以後。曾兩次編審人丁。而數仍不進者。法令新行。未信於民也。故至乾隆十四年第三次編審。始得此數。迨乾隆四十八年。所增復逾半倍。爲二百八十餘兆。則依瑪氏所算之率。秩序而進矣。東坡嘗云。自漢以來。丁口之蕃息。與倉廩府庫之盛。莫如隋。其貢賦輸籍之法。必有可觀者。孔子曰。不以人廢言。而况可以廢一代之良法乎。三代之制。既不可考。信。炎漢以還。計口課稅之法。騷擾民間者。垂二千年。其餘毒。乃至使吾儕今日。欲求一徵信之統計表。而不可得。及康熙間。一舉而廓清之。不謂爲中國財政史上。一新紀元。不得也。若是者。亦安可以民族主義之餘憤。而抹煞之。

夫前表之不足徵信。固也。雖然。其累朝鼎革時代。與其全盛時之比較。率皆原書所記。雖不中亦當不遠。

如東漢初。視西漢全盛。得三之一。三國視西漢全盛。得七之一。唐初視隋全盛。得三之一。宋初視唐全盛。得四之一。清初視明全盛。得三之一。此其大較也。蓋擾亂既亘二三十年。則壯者塗膏血於原野。舉凡有生殖力者。而一空之。無以爲繼。一也。壯者既去。老弱婦女。勢不能自存。二也。血肉滿地。癘疫緣生。三也。田棄不治。飢饉相隨。四也。故每一次革命後。則當代之人。未有能存其半者也。唐盛時。已得百餘兆。此著者下度之數推而宋初。僅數十兆。宋盛時。已得百餘兆。而明初。僅數十兆。明初。已得百餘兆。而清初。復僅數十兆。皆此同之由。泰西歷史爲進化。我國歷史爲循環。豈必論他事。卽戶口一端而已然矣。不然。豈有九十年前。指前表所宋記南時。擁二千萬戶。一百三四十兆人之國。而至今。僅以四百兆稱者哉。

西人之稱我者。動曰四百八兆。此道光二十二年料民之數也。其年凡四百十三兆有二萬人云吾中國官牘上文字。多不足措信。雖康熙改革以後。視前代徵實數倍。猶未敢謂其爲實錄也。顧舍此亦無可援據。卽以道光廿四年此數論之。後此經洪楊之難。兩軍死者。殆七八百萬。合以流竄。殃及癘疫飢饉。及生殖力所損亡。可除出五千萬。以所餘三百六十兆爲本位。計道光廿四年。迄今凡六十年。以乾隆十四年。至四十八年間之比例。則約四十五年而增一倍。然則光緒十五年時。固應有七百二十兆人矣。今日其或當在八百兆之間耶。以今者行政機關之混亂如此。誰與正之。懸此數以俟將來新政府之調查而已。

中國之社會主義

社會主義者。近百年來世界之特產物也。樂括其最要之義。不過曰土地歸公。資本歸公。專以勞力爲百物價值之原泉。麥喀士曰。現今之經濟社會。實少數人掠奪多數人之土地。而組成之者也。拉士梭爾曰。凡田主與資本家。皆竊也。盜也。此等言論。頗聳聽聞。雖然。吾中國固夙有之。王莽始建國元年下令曰。漢氏減輕田租。三十而稅一。而豪民侵凌。分田劫假。厥名三十稅一。實十劃五也。父子夫婦。終年耕芸。所得不足以自存。故富者犬馬餘菽粟。驕而爲邪。貧者不厭糟糠。窮而爲姦。所謂分田劫假者。注云。分田。謂貧者無田。取富人之田耕種。共分其所收。假者。如貧人賃富人之田也。劫者。富人劫奪其稅。欺凌之也。此卽以田主資本家爲劫盜之義也。又宋蘇洵曰。自井田廢。田非耕者之所有。而有田者不耕也。耕者之田。資於富民。富民之家。地大業廣。阡陌連接。募召浮客。分耕其中。鞭笞驅役。視以奴僕。安坐四顧。指麾於其間。而役屬之民。夏耨秋穫。無有一人遼其節度以嬉。而田之所入。已得其半。耕者得其半。有田者一人。而耕者十人。是以田主日累其半。以至於富強。耕者日食其半。以至於窮餓而無告。此等言論。與千八百六十六年。萬國努力黨同盟之宣言書。何其口吻之逼肖耶。

中國古代井田制度。正與近世之社會主義。同一立腳點。近人多能言之矣。此不縷縷。

△小慧解頤錄

□孔子訟冤

有懷疑子與尊聖子二人論學。懷疑子每喜撫拾孔孟之言。不合公理者。以爲詆謾。尊聖子一一糾正之。懷疑子卒莫能難也。大哉孔子。

懷疑子曰。論語曰。民可使由之。不可使知之。此語與老子所謂法令者。非以明民。將以愚之。有何異哉。是孔子懼後世民賊之不能罔民。而激我升木也。夫文明國者。立法之權。皆在於民。日日謀政治思想。法律思想之普及。而孔子願以窒民智爲事。何也。尊聖子曰。此子誤斷句讀也。經意本云。民可使由之。不可使知之。言民之文明程度。已可者。則使之自由。其未可者。則先使之開其智也。夫民未知而使之自由。必不能善其後矣。使知之者。正使其由不可而進於可也。懷疑子無以應。

懷疑子曰。論語曰。事君盡禮。人以爲諂也。夫至尋常人而猶以爲諂。則其諂態之不堪入目。可想矣。何怪乎後世誦法孔子者。只以爲干祿之具也。尊聖子曰。此亦句讀之誤也。經意云。事君盡禮。人以爲諂也。言號稱事君盡禮之人。大率以爲諂諛之具耳。懷疑子無以應。

懷疑子曰。論語曰。拜下禮也。今拜乎上。泰也。雖遼衆。吾從下。夫古者。君臣坐而論道。漢制猶有天子爲丞相起。天子爲丞相下輿。蓋君不堪尊。臣不堪卑焉。何也。君之與臣。皆受民之委託而治事者耳。而僕僕亟拜胡爲也。時制拜上。已嫌其過。孔子猶以爲未足。復等而下之。無乃大貶損人格耶。何怪乎人以爲諂也。尊聖子曰。下字當訓。不恥下問之下。指國民也。孔子以爲崇拜國民禮也。今乃崇拜君主。則驕泰矣。故孔子必從國民也。今世歐美大政治家。皆拜下。從下者也。故專制國媚於一人。立憲國媚於庶人。孔子示政治家以運動之方耳。懷疑子無以應。

懷疑子曰。論語曰。攻乎異端。斯害也已。夫言論思想之自由。此世界所以進文明之具也。泰西近世異端愈多。而學界愈放大光明。今孔子乃以治異端爲害。何其不廣乎。是所謂教主之專制也。尊聖子曰。此語本文極爲明白。孔子只教人不可攻擊異端而已。而朱子不解事。乃強訓攻爲治。是朱學非孔學也。後儒或有訓己爲止者。言攻異端。則其害止。尤爲無禮。皆以小儒之識。測聖人者也。懷疑子無以應。

懷疑子曰。論語曰。天下有道則見。無道則隱。夫當太平時代。則雍容歌舞。拖紫紆青。至亂世。則避其難。潔身以自藏。袖手坐視天下之陸沈。而不思拯之。然則天之生聖人何爲哉。尊聖子曰。然。天下有道則見者。謂當太平之時。則彰明較著。以組織政黨也。無道則隱者。謂當朝政焚亂之時。則當堅忍慎密。組織祕密。

社會以圖匡救也。蓋聖人用世之心苦矣。懷疑子無以應。

懷疑子曰。論語曰。天下有道。則庶人不議。夫今世所稱第一等文明之國。何一不有議院。庶人之議政。天下之公理也。孔子爲此言。是永陷我國於專制地獄。使之千萬億劫而莫能救也。尊聖子曰。子未通古訓耳。子不讀爾雅乎。爾雅云。不顯。顯也。不承。承也。古書多有以不字足句者。其例不可勝數。孔子此言。正謂天下有道。則庶人議耳。不顯不承。亦作不顯不承。故不議亦可作不議。不者大也。言天下有道。則庶人大開議會耳。懷疑子無以應。

懷疑子曰。論語曰。夷狄之有君。不如諸夏之亡也。太息於諸夏之無君。曾夷狄之不若。夫君主固可以立國。民主亦何嘗不可以立國。而孔子立言。無一不惟君是賴。是使民喪其獨立自治之性質也。故孟子稱其三月無君。則皇皇如也。然則使孔子而生於今日之美國法國。將終身旁皇無措矣。尊聖子曰。論語此文。本甚明了。所謂夷狄者。卽野蠻之別號也。諸夏者。卽文明之別號也。言野蠻專制國之有君。不如文明立憲國之無君耳。懷疑子無以應。

俗語文體之流行。文學進化之一徵也。兩粵言語。與中原殊塗。珠江女兒所常諷之粵謳一篇。知文者常歎爲神品。尙矣十年前有某學究。以談諧著名者。嘗以粵語作詩二首。誦之令人絕倒。今錄以供茶前酒

後一談柄焉。但非解粵語者。不知其趣。又俗字多不可書。不能如口誦之神妙也。

賦得椎秦博浪沙 得秦字五言八韻 試帖一首

話說椎皇帝。如何膽咀真。果然渠好漢。怕也你強秦。幾十多斤鐵。孤單一箇人。攔腰搬過去。錯眼打唔親。野仔真行運。衰君白替身。險些都變鬼。快的去還神。兇手當堂趨。讀叶笛走也 差頭到處尋。亞良真本笨。爲咁散清銀。

坡下弔古 七律一首

又高又大又嵯峨。臨死唔知重唱歌。三尺多長鋒利劍。八千靚溜後生哥。既然廩秤爭皇帝。何必頻輪殺老婆。若使烏江唔割頸。漢兵追到屎難屙。

蘇東坡黃山谷佛印三人。在杭州日日酒食徵逐。惟佛印食量之大。尙過於魯智深。每次飲宴。酒殺輒爲所先盡。坡谷苦之。一日相與謀曰。我們何不瞞着這老禿。樂一天呢。乃惜躡一舟。背佛印。備小酌。以游西湖。不料佛印神通廣大。早偵知之。矚二人之未登舟也。先登而自匿於船板下。囑舟子勿洩焉。旣而坡谷至。泛舟容與。放乎中流。時月夕也。坡謂谷曰。老禿不在座。使人整暇。我輩何不淺斟緩酌。行一雅令。以消永夕。谷請坡出令。坡曰。首二句卽景。末二句以四書中有哉字者貼切之。且須叶韻。谷沈吟一響曰。浮萍

撥開游魚出來。得其所哉。得其所哉。坡擊節歎賞。旋應令曰。浮雲撥開。明月出來。天何言哉。天何言哉。谷方欲擊節。詎佛印已搔著心癢。按捺不住。卽在艙下一面開口。一面昂頭大聲喊道。浮板撥開。佛印出來。人焉瘦哉。人焉瘦哉。遂復抹髯搖舌。據觴奪箸。風馳雲捲。頃刻之間。盤盂四大皆空。

東坡苦佛印大食。一日有饋生魚者。坡方烹而獨饗之。忽印復施施而來。坡遙見之。則倉皇匿其魚於承塵上。冀印之旋去而後食也。印已窺其狼狽狀。故絮絮不肯行。既而問坡曰。學士之姓蘇字。作何寫法。坡曰。異哉。和尚甯不識印曰。非也。吾見有寫禾字於左。魚字於右者。是亦蘇字乎。坡曰。然。特俗體耳。印曰。又近見有寫魚字於艸頭之上者。亦可乎。坡曰。這却不能了。印曰。既是不能。拿下來同喫罷。

有某學政按試某縣。縣中童生無一能成一八股文者。勉強依學額取錄三名。其第一名批語。爲「放狗屁」第二名批語。爲「狗放屁」第三名批語。爲「放屁狗」。有問者曰。同用此三字。而有一二三等之。差何也。學政曰。是在文法。顧諸君不解耳。試一讀馬氏文通。當知其用。夫第一名者是人也。不過偶施一狗屁耳。第二名著是狗也。其他種能力或尙多。不過偶放一屁耳。至第三名則是狗也。舍放屁外。無他長技矣。請以英文文法之例演之。如

有某甲旅於外。託其鄉人某乙帶食物歸。以給其子。乙曰。子之子。其名維何。其狀貌如何。甲曰。子不必問。

但歸視諸兒童中最佳者。卽我子矣。乙領之去。旣而甲歸。詢其子。曾否領物。子曰。未也。甲以詰諸乙。乙曰。已給之矣。甲曰。我子云未也。何居。乙曰。君告我曰。視諸兒童中最佳者。卽君之子也。吾熟察之再三。最佳者莫我子若也。旣承君賜。以給之矣。甲乃廢然而返。君子曰。今世民族主義之盛行。彼言愛國者。亦若是已耳。嗚呼。言愛國者。亦當若是已耳。



分類飲冰室文集全編

卷十八

雜著一



三八

正訂分類飲冰室文集全編 卷十九

雜著二

東籍月旦

敘論

新習得一外國語言文字。如新尋得一殖民地。雖然得新地而不移民以墾闢之。則由石田耳。通語言文字而不讀其書。則不過一鸚鵡耳。我中國英文英語之見重既數十年。學而通之者。不下數千輩。而除嚴又陵外。曾無一人能以其學術思想輸入中國者。此非特由其學術之缺乏而已。得毋西學亦有未足者耶。直至通商數十年後之今日。而此事尚不得不有待於讀東籍之人。是中國之不幸也。然猶有東籍以爲之前驅。使今之治東學者。得以幹前此治西學者之蠱。是又不幸中之幸也。

東學之不如西學。夫人而知之矣。何也。東之有學。無一不從西來也。與其學元遺山之詩。何如直學杜少陵。與其學桐城派古文。何如學唐宋八家。然概計我學界現在之結果。治西學者之收效。轉若不能及治

東學者何也。其故有二。一由治西學者。大率幼而就學。於本國之學問。一無所知。甚者或並文字而不解。具其見識未定。不能知所別擇。其初學之本心。固已非欲求學理爲通儒矣。而所從之師。又率皆市井閭閻之流。所以導之者。非學問之途。而衣食之途也。雖其中能自拔流俗者。未始無人。然已鱗角鳳毛矣。若治東學者。大率皆在弱冠成童以上。其腦力之自治力。別擇力。漸以發達。故嚮學之心頗切。而所獲較多也。二由欲讀西文政治經濟哲學等書。而一一銓解之。最速非五六年之功不能。若幼童腦力未開。循小學校一定之學級以上進。則尤非十餘年不可。向來治西學者。既無遠志。又或困於境遇。不能卒業。故吾國尋常學西文之徒。其最高等者。不過有中學校卒業之資格爲已。何怪乎於精深之學問。一無所聞也。若治東學者。苟於中國文學。既已深通。則一年之功。可以盡讀其書。而無隔閡。卽高等專門諸科。苟好學深思者。亦常不待求師而能識其崖略。故其效甚速也。然則以求學之正格論之。必當於西而不於東。而急就之法。東固有未可厚非者矣。

治東學者。不可不通東語。此亦正格也。蓋通其語。則能入其學校。受其講義。接其通人。上下其議論。且讀書常能正確。無或釐毫千里。以失其本意。誠不可少之具矣。雖然。學東語雖較易於西語。然亦非居其地。接其人。以歲餘之功。習之不能。若用簡便之法。以求能讀其書。則慧者一句。魯者兩月。無不可以手一卷。

而味津津矣。故未能學語而專學文。不學作文而專學讀書。一一急就之法。殊未可厚非也。今我國士大夫。學東文能讀書者。既漸多矣。願恨不得其途徑。如某科當先。某科當後。欲學某科。必不可不先治某科。一科之中。某書宜先。某書宜後。某書爲良。某書爲劣。能有識擇抉者。蓋寡焉。同學諸子。憇息草一書以餉來者。自念淺學如余。未嘗能通其語。入其學校。非惟專門之學。一無所得。卽普通之學。亦未偏習。以門外人而語宗廟百官之美富。適爲知者嗤笑耳。雖然。其留學斯邦諸君子。或功課繁劇。不暇從事。或謙讓自持。率不操觚。今我不述。則恐更閱數年。而此種書尙不能現於我學界。斯甯非一恨事歟。是用不揣固陋。就所見及者。草爲是篇。雖無大裨於時彥。抑不至貽誤於後生。是所差堪自信者耳。

第一篇 普通學

凡治學者。必須先求普通學。入學校受教育者。固當如是。卽獨學自修者。亦何莫不然。吾中國人。疇昔既未一受普通教育。於彼中常兒所通有之學識。猶未能具。而欲驟求政治經濟法律哲學等專門之業。未有不勞而無功者也。往昔留學生。亦多犯此弊。今皆知之而革之矣。學者卽不能入其中學校。循次而進。亦當取其中學課程相等之書。抉擇參攷而自讀之。今將日本現行中學校普通科目列示之。

一 倫理

二國語及漢文

三外國語

四歷史

五地理

六數學

七博物

八物理及化學

九法制

十經濟

尚而習字圖畫唱歌體操等科。以不關於讀書故省之。

其法制經濟兩科。乃近年新增者。前此無之。

以上諸學。皆凡學者所必由之路。盡人皆當從前者也。除國語漢文一科。我國學者可勿從事外。自餘各門。皆不可缺者也。大抵欲治政治學經濟學法律學等者。則以歷史地理爲尤要。欲治工藝醫學等者。則

以博物理化為尤要。然非謂治甲者便可廢乙。治乙者便可廢甲也。不過比較之間。稍有輕重而已。

第一章 倫理學

中國自詡為禮義之邦。宜若倫理之學無所求於外。其實不然。中國之所謂倫理者。其範圍甚狹。未足以盡此學之蘊也。今請列日本文部省最近所發之訓令。關於中學所教倫理道德之要領。列其知如下。此

屬中學第四
第五年級者

一對於自己之倫理

健康 生命 知情意 職業 財產

二對於家族之倫理

父母 兄弟 姊妹 子女 夫婦 親族 祖先 婢僕

三對於社會之倫理

他人之人格 他人之身體財產名譽秘密約束等
恩誼朋友長幼貴賤主從等女性協同社會之秩序社會之進步

四對於國家之倫理

國憲國法 愛國 兵役 租稅 教育 公務
公權國際

八對於萬有之倫理

動物 天然物 真 善 美

由是觀之。以比於吾中國所謂倫理者。其廣狹偏全。相去奚異霄壤耶。故外國倫理學之書。其不可不讀也明矣。

或曰。吾所欲求學問也。知識學。道德之學。雖高矣美矣。而不切於急用。子何必斷斷言之。不知學問所以能救世者。以其有精神也。苟無精神。則愈博學而心術愈以腐敗。志氣愈以衰頹。品行愈以詖邪。將安取之。今者中國舊有之道德。既不足以範圍天下之人心。將有挾而去之之勢。苟無新道德以補助之。則將並舊此之美善者。亦不能自存。而橫流之禍。不忍言矣。故今日有志救世者。正不可不研究此學。斟酌中外。發明出一完全之倫理學。以無國民倡也。倫理之書。顧可忽乎。

今請擇其最適於研究之書一二種。前列之。而其餘可供參攷者附錄焉。下各節皆仿此

又以下所列各參攷書。有非習普通學時所必讀者。蓋不論何學。皆進而愈深。其學科常貫澈於小學中學高等學大學也。今因著錄之便。於論普通學時。並及之而已。下仿此。

中等 教育倫理講話 二冊 文學博士元良勇次郎著 定價一元四角半

此書簡明賅括。最適於初學之用。凡分前後二編。前編第一章至第六章為緒論。內分倫理學之範圍。及定議自己之觀念。即對自己之倫理。等課。第七八九章為家族倫理。內分家族組織。親子之道。婚姻論等課。第十章至二十三章為社會倫理。內分概論。公益論。禮儀論。信義論。慈善論。名譽論。訴訟論。娛樂論。獻身論。生命論。財產論。品格論等課。第二十四章至三十四章為國家倫理。內分國家組織論。一斑臣民相互之關係。納稅之義務。兵役之義務。權利義務之解釋。責任論。國際倫理。一般人類與國家之關係。政府與人民之

關係。國民名義之觀念等課。後編自三十五章至五十四章。皆思想倫理。內分生存競爭與德義之關係。自家保存之理法及其制限。勤勞與安息。自愛與愛他之關係。職業之選擇。知與行之關係。欲望論。恭儉與奢侈。殘忍論。安心與懷疑心。反省論。嗜好論。自由及其制限。改心論。道德之裁制。思想與實行之關係。宗教與倫理之關係。善惡之標準。常道論等課。一課不過千餘字。言簡而意備。一課之後。皆附以問答。能濬發人思想。誠斯學最善之本也。此書上海廣智書局已譯成

倫理通論

二冊

文學博士井上圓了著

定價一元二角

此書以明治二十年出版。距今十有五年。就日本人讀之。覺其已成芻狗。然適合於我國今日之用。全書共九篇。第一篇緒論。凡二十三章。第二篇論人生之目的。凡十七章。第三篇論善惡之標準。凡十八章。第四篇論道德本心。凡十八章。第五第六篇。皆論人事進化。凡三十一章。第七第八篇。條舉各家異說。凡三十六章。第九篇諸說分類。凡十三章。末附倫理學者年代攷。此書就本學各種問題分類。與元良氏之著體例不同。其敘諸家學說。極爲簡明。讀之可以見源流派別。而知今日所攷定諸新道德。非漫無依據也。故學者若無暇博涉。則專讀此二書。可以知此學之梗概矣。參攷書列後。

中等
教育倫理學教科書

法國查利著
岡田良平譯

四冊

定價一元四角

新編倫理教科書

文學博士
井上哲次郎
高山林次郎
合著

五冊

定價一元二角五

岡田氏之書。日本諸學校通用為教科書者最久。井上高山皆著名大家。其書亦精心結撰。但專為日本
人說法。日本團體民俗。有與我國大相反者。故在彼雖為極良之書。在我則祇足供參攷而已。

修身原論

法國福林著
河津祐之譯

一冊

定價六角二

倍因氏倫理學

英國倍因著
法國博士添田壽一譯

五冊

定價一元五角

珂氏倫理學

英國卡的活著
中村清彥譯

一冊

定價一元

斯氏倫理原論

英國斯賓塞爾著
田中登作譯

一冊

定價七角

倫理學新書

德國羅埃著
立花銑郎譯

一冊

定價七角

倫理學 文學博士元良勇次郎著

一冊

定價一元二角

越氏倫理新篇

美國越布列著
渡邊又次郎譯

一冊

定價五角

河津氏之書。乃奉文部省命所譯。倍因氏主張實利主義者也。其書上篇論道德之意義性質。下篇詳論
希臘以來諸大家之說。珂氏則主張直覺說。而抑實利說。兩書對照。頗有可觀。斯賓塞之名。久為我國人

所知。其論倫理道德。主張幸福主義。而歸本於進化。但譯本頗不能達其意。羅哲埃之書。專務調和諸說。立論不倚於一偏。在歐西號稱佳本。然譯文亦若艱澀。元良氏之書。力其早年之作。繁博雖過於倫理講話。而精要不逮之。越氏之書。乃撮譯大意。說明實行應用之原則。故亦頗便初學焉。

近育成會新出一叢書。名曰「倫理學書解說」。凡十二冊。全部定價四元六角 每冊定價四角取歐美古今斯學名家之書。譯其意而解釋之。書皆鴻作。而解釋者亦著名之人。讀之亦較尋常譯本爲易。茲將其目列後。

- 一 厄エ井一倫理學綱要
- 二 スト一ナン倫理學
- 三 ミエル人少ト倫理學
- 四 ルツルヒソ倫理學
- 五 シアワルト倫理學
- 六 ワリスト一トル倫理學即阿里士多德
- 七 カント倫理學即康德
- 八 マツワンツ一倫理學

九 シル井ツワ倫理學

十 ミエンステルハルヒ倫理學序論

十一 シント倫理學

十二 ワリオン倫理學

此外尙有

主樂派之倫理學說

網島榮一郎講

七ス氏倫理學綱要

田中達
渡邊龍聖共述

皆專門學校之書。可供參攷。

其尤爲浩瀚博大者。則有

倫理學精義 英國麥懇治著

野口援太郎譯 一冊

定價一元四角

倫理學批判 英國士焦域著

山邊如春
太田秀穗同譯 一冊


定價兩元五角

倫理學 英國格里安著

西晉一郎譯 一冊

定價二元

格氏麥氏皆英國近世最著名倫理學家。其書精深博大。可稱斯學之淵海。倫理學說批判。網羅諸派之



學說面加以論斷。全書分四篇。第一篇爲敘論。以下三篇。則取自利直覺功利大三派。各爲一篇而論之。一一述其立論之根柢。而下以公平之評論。若能卒業一過。則於斯學之源流派別。大綱細目。長短得失。皆瞭然矣。然此乃哲學科專門之業。非治普通學時所能問津也。若欲知本學沿革之大概。則

倫理學說十回講義

中島力造著

一冊

定價九角

最爲簡明括要。而

倫理學史

山本良吉著

一冊

定價一元

西洋倫理學史

本村鷹太郎著

一冊

定價三十五錢

此兩種亦可參攷也。

第一章 歷史

歷史者。普通學中之最要者也。無論欲治何學。苟不通歷史。則觸處窒礙。俛俛然不解其云何。故有志學問者。當篋發之始。必須擇一佳本歷史而熟讀之。務通澈數千年來列國重要之事實。文明之進步。知其原因。及其結果。然後討論諸學。乃有所憑藉。不然者。是猶無基址而欲起樓臺。雖勞而無功矣。欲治政治經濟法律諸學者。則歷史爲尤要。必當取詳博之本讀之。

綜日本歷史之書。可分爲八類論之。一曰世界史。西洋史附焉。二曰東洋史。中國史附焉。三曰日本史。四曰泰西國別史。五曰雜史。六曰史論。七曰史學。八曰傳記。

第一節 世界史 西洋史附焉

日本人所謂世界萬國史者。實皆西洋史耳。泰西人自尊自大。常覺世界爲彼等所獨有者。然故往往敘述阿利安西渡之一種族。興廢存亡之事。而謬冠以世界之名。甚者歐洲中部人所著世界史。或併美國俄國而亦不載。他更無論矣。日本人十年前。大率翻譯西籍。襲用其體例名義。天野爲之所著萬國歷史。其自序乃至謂東方民族。無可以廁入於世界史中之價值。此在日本。或猶可西。若吾中國。則安能忍此。近年以來。知其謬者漸多。大率別立一西洋史之名以待之。而著真世界史者。亦有一二矣。欲求最簡明適於初學之用者。莫如

新體 西洋歷史教科書 文學士本多淺治郎著 一冊 定價一元

附參照圖畫 同 一冊 定價八角

附參攷書 同 一冊 定價一元八角

此書之所以優於他作者無他。其序事條分縷晰。眉目最清。以若干乾燥無味之事實。而有一線索以貫

之誦之不令人厭。每序一事。不過兩三行而止。而必敘述其原因結果。毫無遺漏。此其所特長也。然以求簡之故。或言之而不能盡。此又無可如何者也。故別著一參攷書以補之。大抵日本人所著西洋史。可充吾國教科之用者。莫良於此書矣。其參攷書則可以供教師之用也。獨修之學者。宜二書皆誦之。此書上洋廣智局已有譯本。題曰泰西史教科書。

雖然。此書不過臚舉實事。簡明有法耳。至於言文明進步之象。嫌其不詳。其與之相補者。則

萬國史綱

元良勇次郎
家永豐吉

合著

二冊

定價一元二角

西洋史綱

箕作元八
峯岸米造

合著

二冊

定價一元七角五

此二書皆據歷史上之事實。敘萬國文明之變遷。以明歷史發展之由來。故最重事實之原因結果。而不拘拘於其陳跡。元良家永之書。凡分三編。上古編三章。曰古代東洋。曰希臘。曰羅馬。中古編二章。曰閣黑時代。曰復興時代。近世編二章。曰宗教改革時代。曰政治改革時代。每章分政治史。宗教史。工藝技術史。文學哲學科學史。社會史等門。誠簡要賅備之作也。箕作峯岸之書。上洋某局有譯本。題曰歐羅巴通史。

世界通史

德國布列著

和田萬吉譯

一冊

定價一元七角

此書在歐西極有盛名。德國文既重十餘版。美國人某譯為英文。亦已重六版。聞英德諸國之學生。每上

堂受講義之時。恆攜帶之。以便記憶云。此書所長。在以極簡潔之筆。敘述極多數之事實。於少數紙片之中。學生取備遺忘。莫良於此。但其史事之關聯因果。少所論及。初學者讀之。未免厭厭欲睡。惟既讀他書。有心得者。得此則裨益不淺耳。

其餘參攷書

世界歷史

磯田良編

一冊

定價一元

新編萬國歷史

長澤市藏著

三冊

定價一元六角五

萬國歷史

天野爲之著

一冊

定價一元三角

萬國政治歷史

下山寬一郎著

此書頗佳。惜未成而著者已卒

萬國史要

辰巳小次郎著
小川銀次郎著

一冊

定價八角

以上諸書。皆視本多等三書較爲詳悉。各有所長。可供參攷。

萬國史

金井恆郎編

一冊

定價一元

此書比於他書。雖無特別優勝之處。但其每人名地名之下。必備注其西文原字。便於參攷。日人以和文假名譯西音。詰屈幾不可讀。置此本於側。以備檢查。亦頗便也。

以上諸本。皆以歐羅巴史。而冒世界史萬國史之名者也。其真可稱爲世界史者。惟有最新出之一種。

世界史上卷

坂本健一編

一冊

定價一元六角

此書東西洋合編。材料宏富。文章亦流暢有姿態。現僅成上卷。其西洋史不過敘至阿刺伯人西漸。其東洋史不過敘至南北朝。然已褻然一巨帙。冠絕此類同名之羣著矣。學者苟專讀此本。亦可識全球民族榮悴之大勢也。見上洋各報告
白已有譯之者

萬國史綱目

重野安繹著

上綱四冊

定價一元

著者爲文章博士大學教授。日本漢學家第一流也。其書全用漢文。所用人名地名。亦依瀛寰志略等舊籍所常用者。蓋專爲中國人而著也。其體例仿朱子綱目。用編年體。每檢皆列一綱。其目則低一格。敘事頗爲簡潔。宜於中國人腦質。但近今西史之佳構。無不用紀事本末體。舊裁之作。萬不及新著矣。重野氏以漢學著名。至其新學之學力。或不逮後人遠甚。學者苟讀東文。則正不必乞靈於此編耳。現僅出上編。其下編須本年八九月可以出版云。未通東文者。得此亦勝於誦岡本監輔之萬國史記。且勝於坊間尋常譯本也。

以一書而通上下數千年。其勢萬不能詳。固也。然則欲求詳者。宜讀斷代史。泰西史家。率分全史爲上古、

中古、近世、最近世、四時代。今請擇四時代史之佳者論之。

西洋上古史

浮田和氏著

專門今校講義錄本

古上史

坪內確藏著

同

二書皆佳。而浮田氏之作。尤為宏博。僅敘上古。而其卷帙之浩繁。舉諸家全史之著。無有能及之者。而其敘事。非好為漫冗長。蓋於民族之變遷。社會之情狀。政治之同異得失。必如是乃能言之詳盡焉。希臘羅馬之文明。為近世全世界之文明所自出。學者欲知泰西民族立國之大原。不可不注意於此。必如浮田新編。始稍足以饜吾儕之求矣。有志政治學者。所尤不可不讀。

中古史

坪內確藏著

專門學校講義錄本

中古史者。黑暗時代居其大半。其中於文明之迹。其無甚可紀者。故著述家亦希。佳本殆無之焉。無已必取其書。

世界近世史

松平庚國著

一冊

定價一元二角

近世史出版者亦頗少。此編實專門學校講義錄也。題為世界近世史。蓋真屬於世界。東西洋並載者也。體例謹嚴。文章條達。學者不可不讀之書。

近世泰西通鑑 美國棣亞著

全二十七冊

此書乃明治十六年至二十三年陸續出版。距今十九年至十二年前係島田三郡波多野傳三郎肥塚龍鈴木良輔青木匡沼間守一等六人同譯。皆學界中錚錚人物也。其書自土耳其人陷君士坦丁奴不起。至日耳曼意大利建國統一止。凡二十七卷七十三篇。比松坪氏之書。其卷帙約過十四倍。東文近世史之詳博。無過是者。然頗不見重於當今學界。日人至今殆無過問者。或病其稍繁蕪歟。然苟欲專門名家於史。則固不可以不讀矣。原本初出時。定價極昂。每冊售值一元。今則二十七冊。以二元五角。可以得之矣。日本人著譯最近世界史。所謂最近世界者。凡有四種。今全列其目。即十九世紀也。

歐洲新政史

法家米天黎著

東邦協會譯

二冊

定價一元

最近世界史上卷

坪井九馬三著

一冊

定價一元三角

十九世紀史

英國馬懇西著

幸田成友譯

一冊

定價五毫

十九世紀列國史

美國扎遜著

福井安岡譯

一冊

定價三毫

歐洲十九世紀史

同

大內暢三譯

一冊

定價一元二角五

最近世史

松坪康國著

專門學校講義錄本

以上諸本。其幸田氏所譯。卽上海廣學會所曾譯。名爲泰西新史攬要之本也。福井與大內所譯。同一原書。然因文字之優劣。幾使人截然不知其爲雷同。讀大內所譯。覺其精神結撰。躍躍欲飛。而福井之本。乃厭厭無生焉。可知率爾操觚。輒欲取前人最著名之作。以點竄塗改者。誠所謂蒙不潔於西子。新學小生。亦可以知所戒矣。

坪井氏之書。非不佳。惜其未成。松坪之作。必爲良構。無可疑者。然始見於今年講義錄。亦未覩全豹也。據現有之書。則歐洲新政史。歐洲十九世紀史。兩者最良矣。新政史卷帙稍繁。敘事自較詳悉。然扎遜氏書最晚出。參酌前此諸家之著述。而別創新裁。蓋其所重者。不專在事實。而著眼於其大處要處。以最簡明之筆。而發揮時局之趨勢。其自序云。以上棄之興味。銳敏之眼光。觀察事實之裏面。而寫出時代之精神。非夸言也。故欲研究近世史。以此書爲最有趣味。凡他家著最近世史者。皆託於維也納會議。惟此書獨溯諸法國大革命以前。是亦其特點也。惟其事實不甚詳。故宜以歐洲新政史夾輔讀之。此外尙有二佳書。足供參攷者。

近世外交史

有賀長雄著

一冊

定價一元五角

今世歐洲外交史

法國比緇兒著

酒井雄三郎譯

二冊

定價三元五角

此二書雖以外交爲重。然十九世紀列國之事跡。幾無不與國際有關係者。故不獨專學外交者所必讀。卽尋常學者亦宜研究也。

惟著最近世史者。往往專敘其民族爭競變遷。政策之煩擾雜錯。已屬應接不暇。故於學術工藝教育等。文明進化之跡。勢不得不別爲書以述之。頃日本人於此類書。尙未有佳文。惟有

十九紀世

太陽報臨時增刊

一冊

定價四角

此書乃由十數人分門編輯。內分東洋西洋政治史。及產業史。學術史。文藝史。教育史。宗教史等篇。雖非能如諸大家之精心結撰。然且書固日本現時所獨一無二也。與大內氏歐洲十九世紀史合讀。於百年來大勢。可以瞭如矣。比兩書上海廣智書局皆已譯成付刊

文明史者。史之中最高尙者也。然著頗不易。蓋必能將數千年之事實。網羅於胸中。食而化之。而以特別之眼光。超象以下論決。然後爲完全之文明史。日本今日尙無一焉。惟有

文明志

家永豐吉著

專門學校講義錄

家永氏專研文明史者也。其與元良氏合著之萬國史綱。頗有此意。惜未能大成此書。僅有第一章。乃敘述文明史之沿革者。偉論精思。必當一讀。然不可謂之史也。此之外則

歐羅巴文明史

法國基梭著

永峯秀樹譯

十六冊

基氏爲文明史學家第一人。此書在歐洲。其聲價幾與孟德斯鳩之「萬法精理」。盧梭之「民約論」相埒。近世作者。大率取材於彼者居多。此本乃由英文重譯。間有詰屈不能盡達其意。出版在明治九年。距今幾三十載矣。用漢式釘裝。格式頗陳舊。現坊間頗難得。學者寶之。

世界文明史

高山林次郎著

一冊

定價三角五

此書敘述全世界民族文明發達之狀況。自宗教、哲學、文學、美術等。一一具載。可以增學人讀史之識。惟僅至十八世紀。戛然而止。自序言別有十九世紀文明史一書。數月之後。便當殺青。然及今已三年有餘。尙未出版。良可惜也。

族：第二章。滿洲之興起。第三章。歐人通商之第二期。條頓民族第四章。俄國東方侵掠之初期。第五章。印度之蒙古帝國勃興。及其瓦解。第六章。英人侵略印度。第七章。滿洲朝之侵略西方。第八章。緬越諸國侵略之初期。並南洋諸島。第九章。中亞英俄衝突之初期。第十章。鴉片爭戰。及洪楊之難。其搜羅事實。而連貫之。能發明東西民族權力消長之趨勢。蓋東洋史中最佳本也。上海廣智書局近已譯要之東洋史之不完全。比西洋史更甚。蓋材料之不足。欲成一偉大之作。斷非一手一足之力所能致矣。

中國史至今迄無佳本。蓋以中國人著中國史。常苦於學識之局而不達。以外國人著中國史。又苦於事實之略而不具。要之此事終非可以望之他山也。而不得已而求其次。則現時日本所著最良者。爲

支那史

市村贊次郎
龍川龜太郎

合著

定價一元三角

此書係爲中國教科之書。故極從簡略。分爲六卷。第一卷編爲三。曰總敘。曰太古史。曰三代史。第二卷爲秦漢史。第三卷爲兩晉南北朝史。第四卷爲隋唐五代史。第五卷爲宋元史。第六卷爲明清史。不過順時代敘下。無有特別結構。但頗能提要鉤玄。且稍注意於民間文明之進步。亦中國舊注所無也。若我國學校。據爲教育書。則有所不可。蓋日人以此爲外國史之一科。則其簡略。似此已定。本國人於本國歷史。則所以養國民精神。發揚其愛國心者。胥於是乎在。不能以此等隔河觀火之言充數也。

支那通史

那珂通世著

已出五冊

定價二元五角

此書全用漢文。前在上海已有重刻本。但僅及宋代而止。其近世史。尙闕如也。此書與古村氏之著。體裁略同。而完善尙不逮之。蓋前書頗近新體。此書全仍舊體也。此外著者雖多。更等諸自鄙矣。

清史攬要

六冊

敘述二百年來事。頗有爲中國史家所諱者。亦可以供參考也。

支那開化小史

田口卯吉著

一冊

定價六角五

此書實史論體也。所重者在論斷而不在事實。故其所載紀。惟擇其有關於議論也。而錄之。至其論則目光如炬。善能以歐美之大勢。挾中國之病源。誠非吾邦詹詹小儒所能夢也。漢以前尤爲精絕。又眉端有評騭者數家。皆用漢文。其議論頗足與原書相補云。此書上海廣智書局已有譯本而譯筆頗劣

支那文明史

白河次郎
國府種德同著

一冊

定價三角

中國爲地球上文明五祖國之一。且其文明接續數千年未嘗間斷。此真可以自豪者也。惟其文明進步變遷之跡。從未有敘述成史者。蓋由中國人之腦質。知有朝廷。不知有社會。知有權力。而不知有文明也。此書乃草創之作。雖非完美。然大輅椎輪。厥意亦良善矣。內分十一章。第一章世界文明之源泉。及支那民族。第二章原始時代之神話。及古代史之展開。第三章支那民族自西亞細亞來之說。第四章學術宗教之變遷概說。第五章政治思想及君主政體之發展。第六章歷數地理之發達及變遷。第七章建築土木之發達及變遷。第八章文字書法繪畫之發達及變遷。第九章支那人用歐洲印刷術之源流。第十章樂音發達之變遷。第十一章金屬之使用及舟車。其第三章第五章最有獨到之論。此外則門外漢語亦不少。別有

支那文明史論

中西牛郎著

一冊

定價三角五

亦足供參考。上海普通室有譯本。

此外言中國近世事者甚多。分屬史論及傳記兩門論之。其學術亦別從其類。

第五節 日本史

國民教育之精神。莫急於本國歷史。日本人之以日本歷史爲第一重要學科。自無待言。但以華人而讀東籍。則此科甚爲間著。因其與數千年來世界之大勢。毫無關係也。故我輩讀日本史。第一義欲求知其近今之進步。則明治史爲最要。第二義欲求知其所以得此進步之由。則幕木氏史亦在所當讀。若前乎此者。雖闕之可也。今著錄其最有名者數種。

帝國史略

有賀長雄著

一冊

定價一元五角

著者爲當世名士。最留意於制度文物之變遷。議論常有特識。其區分時代處。尤能見國民發達之次第。東人以爲名著。

二千五百年史

竹越與三郎著

一冊

定價一元五角

此史在日本史中。卷帙最稱浩博。著者以能文名。其史筆明暢飛動。學界最寶。要之西史之書。雖復汗牛

充棟。求其真完全美滿毫髮無憾者。今尙不得一焉。鄙人不揣樸昧。近有泰西通史之著。擬以浮田之上古史。坪內之中古史。松平之近世史。輿論社之近世泰西通鑑。大內之歐洲十九世紀史。酒井之今世外交史。數書爲底本。而更以參攷羣書以補助之。欲以三年之功。成一絕大之史。此志若酬。雖不能良。亦省學人披吟之功不少耳。

第二節 東洋史 中國史附焉

日本所謂東洋者。對於泰西而言也。卽專指亞細亞洲是也。東洋史之主人翁。實爲中國。故凡以此名所著一書。率十之八九。載中國耳。故今兩者合論之。現行東洋史之最良者。推

中等東洋史

桑原隲藏著

二冊

定價一元

此乃爲最晚出之書。頗能包羅諸家之所長。專爲中學校教科用。條理頗整。凡分全爲四期。第一上古期。漢族膨脹時代。第二中古期。漢族優勢時代。第三近古期。蒙古最盛時代。第四近世期。歐人東漸時代。繁簡得宜。論斷有識。

其餘參考書

東洋史綱

兒島獻吉郎著

二冊

定價各三角

東洋史要

市村瓊次郎著

二冊

定價七角五

中等
教育東洋歷史

本寺柳次郎著

定價八角

中等
教育東洋史

藤田豐八著

二冊

定價各三角五

兒島氏初著東洋史之人也。市村氏在帝國大學中以東洋史名家者也。但諸書雖為東洋史。實不過中國史。其他有論及者。皆附庸耳。此未足以稱其名也。今年專門學校新設學史一科。其講義錄中有

東洋史

高桑駒吉著

此書以中國印度為主。而他國亦不忽略。今尙未出完。待其完成。或可為東洋史中第一位乎。

東邦近世史

田中萃一郎著

上卷一冊

定價一元

東洋之斷代史。舍是書更無他本。此書凡分十章。第一章歐人通商之初期。拉丁民之初期。

日本開化小史

田口卯吉著

六冊

定價七角半

與支那開化小史同出一人之手。其議論常多獨到處。雖我邦人誦之。亦不至生厭。若欲略知日本數千年無進化之。毋甯此史為良。

開國始末

島田三郎著

一冊

定價一元五角

開國起原

勝安房著

三冊

定價三元

懷往事談

福地源一郎著

一冊

定價二角

三書皆述敍德川莫葉之事實。蓋日本之過渡時代也。日本所以能成爲今日之日本者。皆彼時代諸豪傑之賜也。誦之乃可以發揚精神。於我學界尤爲要品。本讀日本史莫急於明治歷史。而明治歷史。竟少佳本。吾人所不解也。惟有

明治歷史

坪谷善四郎著

二冊

定價六角

用此名著述者。惟此一本耳。然非其佳者。無已。則惟太陽臨時增刊有奠都三十年一書。其中有一種。題爲

明治三十年史

者。內分學術思想史。政治史。軍政史。外交史。財政史。司法史。宗教史。教育史。文學史。交通史。產業史。風俗史等十二編。由一時名士。分門纂輯。實近史中之最適於我學界者也。上海廣智書局有譯本。改題日本維新三十年史。

加藤博士天則百話

日本文學博士加藤弘之。德國學派之泰斗也。專主進化論。以愛己心爲德道法律之標準。其言固多偏激有流弊。然持之有故。言之成理。故其影響及於日本學界者甚大焉。余夙愛讀其書。故不欲紹介其學術於中國。蓋慮所益不足償所損也。雖然。今日學術思想勃興之時代。終非可以人力阻止某種學派。不使輸入我國。苟強阻止之。是又與頑固之甚者也。况能成一家之言者。必自有其根柢條理。苟其能理會其全體。而不藉口其一端。則不論何學派。而皆有裨於羣治。且天下之方術多矣。擇而從焉。陶而棄焉。豈不在我。故今取其天則百話。謹譯以諗同學焉。雖東鱗西爪。而博士學術之大概。亦在是矣。

實學空理之辨

原話一

論者或以直接有效用於實業之學。稱謂之實學。反此者。謂之空理空論。如機器製造礦學電學工程等。應用科學。最有益於實業者。謂之實學。其他物理學化學者。雖純正科學。然以其爲應用學之根柢。故亦謂之實學。至如哲學心理學羣學等。專主理論。不依物質者。則動謂爲空理空論。此實謬見也。學科之虛實真僞。不在其所研究之客體。而在其能研究之主體。

按主客能所等字。乃佛典通用語。日人亦常用之。此處原文不如此。特因其措詞複雜。故以此二語譯意代之。

况哲學心學羣學者。並所研究之客體。而亦非空也。雖然。此等無形之學科。其發明真理。固自不易。以故前此之治此業者。其所持論。自往往類於空漠無朕。然其中含真理者。亦已不尠矣。况在今日思想勃興。治此等學科者。必非空構揣測而自滿足。往往依嚴格的科學法式。以求其是。然則論者之妄生分別。其陋亦甚矣。羣治開化。決非徒恃有形之物質也。而更賴無形之精神。無形有形。相需爲用。而始得完全圓滿之真文明。徵諸今日之歐洲。有彰明較著者矣。

自由研究

原話十三

人羣一切之事物。與天然界一切之事物同。皆緣物競天擇優勝劣敗之作用。逐漸進化。雖學問宗教。亦循此天則。而不可逃避者也。故無論言學言教。皆宜一聽研究者之自由。毫無他界以爲之束縛。然後教學乃可以發達。釋迦脫婆羅門之束縛而興佛教。耶穌脫猶太教之束縛而興景教。歐洲近世諸碩學。脫景泰之束縛而興新學問。皆其朋效大驗矣。惟其研究之自由也。故能排其舊者。以興其新者。一興一廢之間。皆天演學所謂自然淘汰之作用也。苟無此作用。則學問宗教。終不得作用進步。乃或既用自由研究之力。排他人以自立矣。及其既立之後。又怙自己之勢力。轉以妨害他人之自由。是所不可解也。若耶穌教徒是也。耶氏之所以能立新政。豈不賴此自由力乎哉。迨勢既成。又用世俗的權

力以侵來者之自由。何其不思也。雖然。耶教之迂腐虛妄。固終不可抵抗新學問。至於今日。勢力漸墜。固已不得不豎降幡。新學界之轅門矣。夫彼迷信宗教之徒。固執法誠。惟其教祖之忠樸。猶可言也。若乃教門以外之人。猶或設種種口實。以壓制思想自由。識見之陋劣。實可驚矣。如倫理道德一科。蓋最受其毒者也。俗論者流。動謂古昔相傳之倫理道德。必非容後人之擬議其得失。雌黃其是非者也。苟其有此。則害名教也。壞風俗也。設此等種種虛漠之口實。而曾不能依學理以相辨難。嗚呼。持論不依於學理。而欲學問之進步。亦難矣。

我輩九百九十年前之祖宗

原話十四

人莫不有父母。是曰雙親。父亦有其父母。母亦有其父母。是爲吾之祖父母者。其數四人。祖父母亦有其父母。祖母亦有其父母。是爲吾之曾祖父母者。其數八人。曾祖父亦各有其父母。是爲吾之高祖父母者。其數十六人。如是遞推之。而三十二人。六十四人。百二十八人。祖先之數。逐漸增加。至不可思議。今試以三十年爲一代計之。積三十三代。九百九十年。則其祖宗祖之多。有令人失驚者。其表如下。

父母二

祖父母四

曾祖父母八

高祖父母十六

第五祖三十二

第六祖六十四

第七祖一百二十八

第八祖二百五十六

第九祖五百十二

第十祖千〇二十四

以上凡三百年

第十一祖二千〇四十八

第十二祖四千〇九十六

第十三祖八千九十二

第十四祖一萬六千三百八十四

第十五祖三萬二千七百六十八

第十六祖六萬五千五百三十六

第十七祖十萬一千〇七十二

第十八祖二十六萬二千四百四十四

第十九祖五十二萬四千二百八十八

第二十祖百〇四萬八千五百七十六

以上凡六百年

第二十一祖二千〇九萬七千五百五十二

第二十二祖四百十九萬四千五百〇四

第二十三祖八千三十萬八千六百〇八

第二十四祖千六百七十七萬七千二百十六

第二十五祖三千二百五十五
萬四千四百卅二

第二十六祖六千五百十萬八千八百六十四

第二十七祖 一億三千〇三十一萬七千七百廿八

第二十九祖 五億二千〇八十七萬〇九百一十二

以上凡九百年

第三十一祖 二十億八千三百四十八萬三千六百四十八

第三十三祖 八十億三千三百九十二萬四千五百九十二

以上九百九十年

然則十代三百年間祖先之數。應有千〇二十四人。二十代六百年間。應有一百〇四萬八千五百七十六人。三十代九百年間。應有十萬萬〇四千一百七十四萬一千八百二十四人。再加三代。共三十三代九百九十年間。應有八百三十萬萬三千三百九十三萬四千五百九十二人。表而出之。實有令人可驚可笑者。雖然。此就親族血統不相婚嫁者言耳。然古來親族間婚嫁。實繁有徒。故其實數。並不若是其夥也。

按此條無關實學。不過以其有趣。譯之資談助耳。

利己心之三種

原話九十四

第二十八祖 二億六千〇四十三萬五千四百五十六

第三十祖 十億四千七百七十四萬千八百二十四

第三十二祖 四十億六千六百九十六萬七千二百九十六

自昔學者皆謂人類有利己利人兩心同立並存。吾以爲爲此說者皆由其眼光局促。未能及於人類以外者也。自昔學者皆以人爲一種特別之生物。本爲萬物之靈。故其研究種種性質眼界。全限於人類範圍之內。而不能及於其外。至於今日進化之學理大明。人類由動物進變之說。既已若鉄案之不可動。故研究人類身心之現象。皆不可不並下等動物而研究之。此近世學者所同認矣。故吾今日論利己利人兩心。亦不得不推本於是。

試觀下等動物之心性。則惟見其有利己心耳。無更所謂利他心者。存舍己之欲。以爲他謀。概乎未有聞也。其漸進步而爲高等動物。稍帶羣性。則於自利之外。亦微有利他之意。但不能真爲他謀也。不過不妄害他而已。蓋既相聚以爲生存。則專謀自己之利者。終不可保自己之安全。故不利他。而亦不敢妄害他。此卽利他心之發端也。

進化以至人類。則無論若何野蠻種族。其合羣之性。綜比諸高等動物。愈加確固。故利他之行爲。亦隨而進步。及至大文明大開化之社會。而他利心亦更盛大矣。此實天演大圈轉移變化之情狀也。夫論一人身心之現象。不可不徵其遺傳於父母。然則論人羣身心之現象。亦不可不徵其遺傳於遠祖之動物明矣。而自昔學者。未嘗能依此例以爲論據焉。此所以誤認後起之利他心。以爲固有利己心並存而俱來。

也。

由是言之。則利他心。不過為利己心之一變體明矣。吾今得區利己心為三利類。第一「無限純全之利己心」。第二「有限純全之利己心」。第三「變形之利己心」。所謂無限純全之利己心者。即下等動物之利己心。惟盡己力所及以謀自利。毫不顧其他者也。所謂有限純全之利己心者。即稍帶羣性之高等動物。雖謀自利而稍有限制。不妄害其他者也。所謂變形之利己心者。即尋常人所稱為利他心者也。此種利己心。高等動物雖稍有之。然至人類界而始進步。蓋其目的本非他人計。但欲自謀真實之利。或利于身。或利于心。則非先謀他人之利不可。其利他也。不過其一利己之手段也。故謂之變形之利己心。

此三種之利己心。自有高下之別。顯而易見者也。即第一種行於普通動物界。第二種行於高等動物界。第三種行於人類界也。雖然。人類者。又兼此三種而有之也。大抵第二種其最通行。人人同具者也。至於第一第三兩種。則因各人特別之性質而有所偏。而偏於第一種者甚多。第三種之利己心。即利他心。其別亦有二。一曰唯物的。二曰唯心的。謀他人之利。而我因得物質上實益之報償。所謂唯物的也。謀他人之利。而我之本心。因以愉快焉。順適焉。所謂唯心的也。此二者。其利害竟歸於我。故名為利他心。而實則為利己心。無可疑矣。凡人於其所親愛之人。視之每如與己之同體。若父子兄弟夫婦朋友之間。往往形異體

同。幾無復彼我之別。故相互視其幸福。而憂其災害。以尋常論之。此可謂利他心。全非由利己心而出者也。雖然。實乃不然。彼以其一體同情之故。見彼之幸福。而我已不勝愉快。見彼之災害。而我已不堪其痛苦。此其中殆有莫之爲而爲。莫之致而至者焉。故其利他也。畢竟自爲心上之利益謀也。然此等心在本。人亦並不見其利己計也者。故以意識論。可謂之利他。以本源論。實仍爲利己也。夫利益之高等者。不在軀壳之樂。而在心魂之樂。故此種心。實利己心中之最高尙。最優美者也。譯者案。唯物之利己心。本文未有明說。博士別有所著道德法律進化之理一

書言之最詳也。日常擇譯之參觀。本報邊沁學說之案語亦見其概。

宗教家言。道德家言。常教人以利他之爲務。此乃利用吾人心性上之快樂。以使人勉爲善人。爲君子。爲孝子。爲名婦者也。吾人但從其教。則可以得此美名。而吾心亦以大快。此實普渡衆生之妙法門也。而溯其本源。乃不出於利己心之外。苟無利己之心。則雖聖賢。亦無從施其教也。然則利他心。亦非能離利己心。而自發生也明矣。雖然。此種高尙之利己心。自吾人之意識自觀之。則己爲利他而非利己也。故此種意識。漸遺傳於子孫。而日以發達。久而久之。則若與生俱來者。然學者所以誤認利他心爲離利己心。而能獨立者。皆坐此焉耳。由此觀之。則利己心。必非可惡可賤者。若其第三種第二種。實人類生存所不缺乏之具也。惟第一種之利己心。則害羣莫大焉。苟僅有此一。而無彼二者。是則非人而禽獸也。

譯者案此加藤博士學說之要點也。其他種著述發明此義動累萬言。反覆詳盡。盛水不漏。日人推尊之者。以爲發泰西學者未發之蘊。其反對之者。則以爲正義之公敵。人道蝨賊。蓋日本學界諸先輩中。其受毀譽最劇烈者。未有若加藤氏之甚者也。平心論之。則所謂愛他心者。乃人羣所以成立之大原。日培植而滋長之。猶懼其不殖。而何必抹而殺之。使並爲利己心之附庸。倡此說者。是不啻恐人類之不知自私自利。而復教揉升木也。故此等學理。最不宜行於今日之中國。雖然。加藤氏之意。則亦有在焉。彼見夫今日之人類。其於利他之事業。終不能安而行之也。故與其逆而節焉。不如順而道焉。大發明欲利己不可不先利他之義。以爲卿等所謂利非真利也。苟其真欲自利。則請求之於自利之外。此加藤氏所以雖蒙一國之非難。而卒堅持其說不少變也。吾於日本各報中見他人攻難加藤及加藤答客難之論文已不下百數十通夫人苟能將其「唯心的變形愛己心」而擴充光大之。則始焉視一家所親爲一體者。浸假而視一鄉爲一體矣。浸假而視一國爲一體焉可矣。浸假而視天下爲一體焉可矣。浸假而視一切衆生爲一體焉可矣。此特視其以太之感覺力何如耳。此其義劉陽仁學發之最透夫既視一鄉一國天下衆生皆爲一體。則見其苦。則吾無端而忽生大苦。見其樂。則吾無端而忽生大樂。易所謂吉凶與民同患。維摩經所謂衆生病。是故我病審如是也。則吾不欲利己則已。苟欲利己。則勢不可不爲一鄉一國天下衆生。思所以去其苦而生其

樂。蓋不如是。則吾將痛苦而無極也。審如是也。雖利己何病。加藤氏立論之本意。雖未必有得於是。然吾人讀其書者。不可不作如是觀也。大抵凡成一家之言者。其中必含有真理者存。苟善讀之。無不可以爲進德之助。孔子不云乎。三人行。必有我師焉。而何以加藤氏之言之爲病也。若夫耳食其一二面。因以其自恣焉。抱持彼第一種禽獸利己心。而自託于加藤之徒。卽加藤亦有不任受者矣。

記斯賓塞論日本憲法語

日本近出之雜誌「太陽」有一文。題曰「故斯賓塞氏與日本憲法」者。博士金子堅太郎所撰。自述其十五年前斯氏對話之語。斯氏曾與彼約。謂當生前不許宣布。故金子氏之筆記。藏之篋中者十五年。今斯氏既逝。乃發表云。此亦有一讀之價值也。

金子氏記初見斯氏時。以伊藤博文所撰日本憲法義解贈彼。乞其批評。

斯氏未讀其書。先發問曰。余有所最疑者一事。憲法之爲物。始自英國。美國繼之。其後各國又繼之。大率皆由國民要求逼迫。或購之以血。而始得制定。獨日本者。建國以來。一系相承。爲專制獨裁之國體。民樂其化。未聞有要挾強逼之事。今乃平地湧現。生出此憲法。其故何由。金子氏乃詳告以日本建國以來之歷史。更及明治維新以後之事。若何而廢積年沿習之封建制。若何而採輿論爲改制之方針。以定開國

之國是。若何而於太政官之下置三職八局。若何而設待詔院諸機關。若何而置元老院大審院。以劃行政司法之範圍。若何而開地方官會議。以啓自治之端緒。如是者既二十年。而乃憲法之成立。決非突然而生者云云。斯氏乃曰。得之矣。得之矣。吾向以此問題質諸貴國多人。莫能答也。今聞吾子言。吾知其與進化公例不謬矣。越數日。斯氏讀憲法義解。卒業。乃函招金子氏於其家。有所語。其言如下。

余以爲一國之憲法。及其附屬法律。必須與本國之歷史及國體。有同一之精神。同一之性質。苟不爾者。則當其憲法法律實施之時。其困難必不可思議。終不能達立憲之目的而已。余懷此意見既久。故曩者曾與駐英之日本公使森有禮氏有所語。謂日本若欲制定憲法。必當採漸進保守主義。以本國之歷史習慣爲基礎。而旁採歐美各國之所長。使日本遺傳之政體與歐美立憲主義相調和。此其最要也。若破壞舊體。而創設新制。則殊非我之所望。何則。以物質界論之。凡齋外國之草木。以移殖於本國者。勢不能與外國結同一之花實。此植物學之原理也。惟憲法亦然。歐美諸國之憲法。各各因其國體歷史及習慣而成立。決非取他國之論文。翻譯之而執行之也。余當時所以語森氏者若此。今見足下所示之日本憲法。讀其註解。知一本於日本古來歷史之習慣。以漸進保守主義爲宗。此余之所最贊成也。願吾更有一言。欲爲日本政府告者。則將來實行此憲法。比於制定憲法時。尤爲困難。此不可

不深察也。制定憲法者。不過以少數人士之精勤。而可以成就。若實行憲法。則國民全體之大事業。其難有什伯倍於其初者。試以美國之實例證明之。美國憲法之精神。在人民平等。上下皆有同一之權利。乃行之數十年。而美之憲法政治。漸集於政黨之掌握中。其政黨多由於政治家之利己主義。良民不勝其苦。質而言之。美國人於憲法之空文上。得有平等之權利。其在實事上。乃不得享之也。以政治學之原理論之。政府之事業。當漸次輕減。使人民各以箇人自營之。故政府最終之目的。則放任主義也。此論爲余生平所最主張。君之所知也。雖然。以今日社會之實際未足語。於是放任主義者。不過立乎今日。以指將來。謂具足圓滿之世界。當如是耳。故論政府權力範圍之廣狹。必使國民人人皆養成自立自勵之精神。無需政府之誘導。而自能各守其義務。又無須政府之禁遏。而自能不侵他人之權利。不害社會之安甯。夫如是。則政府之事業。可以縮至極狹隘之區域。於是乎政治學之原理。乃可實行。試以埃及金字塔譬之。則未開化國之政府。猶塔之初階也。余所主張放任主義之政府。猶塔之絕頂也。政治之進路。由初階漸次以達絕頂。其進步之程度。一依其國民智德力之程度以爲定。欲不經初級二級三級之順序。一躍而達於絕頂。勢固不可得達。卽達矣。現隨而躡耳。故吾所望於貴國政府者。依此學理而熟察日本國現時之地位。在金字塔之第幾級。據民在所立之地而漸升焉。苟

欲爲躐等之進步。不特於憲法之實行諸多窒礙。而其不利於國家及國民者。更遠且大也。(下略)

見雜誌上海第十卷第
四號第七十八九頁

案斯氏所論。可謂博深切明。昔天演學者通用語。皆曰物競天擇。優勝劣敗。而斯氏則好用一適者生存。一語。誠以天下事。無所爲優。無所爲劣。其不適於我也。雖優亦劣。其適的我也。雖劣亦優。夏之裘。冬之葛。美非不美。而服之皆足以生病。則不適以爲害也。不解此義。而以之掌持議論國家事。其危亦甚矣。斯氏所忠告於日本政府者。自審其國民地位。在第幾級。吾以爲凡自愛其國者。皆不可不三復斯言矣。斯氏又斷斷然以本國之歷史習慣爲言。毋亦以進化之公例。從無突然發生之物。皆循其遺傳而遞變焉。經若干年。而其狀態乃大異耶。然則吾國民之所以愛吾國者。其亦有道矣。苟不審吾之歷史。若何。習慣若何。而曰是物者。現時各國行之。而最優者也。吾攫而取之。夫如是。則吾亦可以自廁於優勝之林。豈知一切事物。固有在彼爲優。而在我反爲劣者耶。乃知不健全之理想。非徒無益。而又害之。吾願我政論家。平心靜氣。以一聽前賢之遺訓也。

分類飲冰室文集全編

卷十九

雜著二



正訂 分類飲冰室文集全編 卷二十

雜著三

短評

四十九則

顧問大臣勉旃

回鑾後。第一新政。卽置顧問大臣是也。據日本報章所說。置顧問議長一人。副議長一人。顧問大臣十人。議長慶親王。副議長肅親王。大臣則榮祿也。王文韶也。袁世凱也。崑崗也。敬信也。崇禮也。鹿傳霖也。那桐也。瞿鴻機也。孫家鼐也。凡滿員七人。漢員五人。西人所疑爲團匪元兇者三人。屢掌文衡者人曾。任封望疆者五人。他日中國所謂維新之政者。皆將於此是賴矣。袞袞諸公。其有以解宵旰厲精之三。憂慰國民之心乎。

北京掠奪事件

聯軍之役。各國兵隊。野蠻暴虐。無所不至。凡北來者。皆能言之。其中俄兵最甚。法次之。日本兵紀律最嚴。

此天下之公評也。乃近者日本各報。歷載當時其軍隊在北京掠奪情形。千口一詞。其中有萬朝報者。言之尤詳。自兩月以前起。用小說章回體。日載一回。至今已六十餘回。尙未完畢。其中所言。皆鑿鑿有據。歷歷如繪。其牽引達官身上者。亦甚多焉。聞將提出議院。議其處分云。此中消息真贋。外人雖未知其詳。然必非憑空結撰。有斷然者。果爾。則所謂紀律。所謂文明。亦安在耶。西哲常言。兩不平等者相遇。無所謂道理。權力卽道理也。日本人能不自諱其短。而羣起匡正之。猶不失爲國民自重之概。若我國人。倚賴甲國。崇拜乙國之癡想。斯亦不可以已乎。

奧國人種之爭

奧大利國以數種宗教不同。語言不同之民族。聯結而成。其中最有力者。爲斯拉夫種。卽奧國主權者匈牙利種。波埃米亞種。德意志種之四者。是以其國內軋轢紛爭。旣數十年。自匈牙利別立政府以後。風潮稍平。而德意志種。波埃米亞種之爭。近年益甚。現當開議會時。兩種人各爭其國語之獨立。閔鬧殊甚。開議六禮拜。尙未移於第二議會。政府大臣。焦慮萬狀云。十九世紀以後。民族主義。磅礴於全世界。各民族自求獨立。殆勢所必至。理有固然。奧國之前途。有識者頗爲寒心也。

富者好行其德

美國前既將彼軍士在北京所掠奪之銀三百餘萬兩。交還中國。近日復將賠款額內應得之一千八百萬美金。卽三千六百萬元。一律豁免。或疑美政府。前者何以要求如許之多。後此何以豁免如此之易。紐約某新聞紙。曾辨明之云。吾美政府。初時見列國所需索之軍費。實溢出於其所損害之外。驚其不廉。當時我政府。欲調停其間。使以二萬萬美金了結。然列國不肯讓。初索四萬萬美金。卒減至三萬萬一千五百萬。（卽中國四萬萬五千萬兩）當時吾美持之無益。不如亦隨之橫索。然後以返之中國。以輕其負擔云云。美國之出此手段者。殆以國富之故。能有餘力以好行其德云。抑亦有所大利於後。將欲取而必先與歟。雖然。就事論事。則美國誠不愧爲東方君子國矣。

勿返客爲主

中國今日欲行新政。而人才不足。則其始不得不借用客卿。此亦不得已之計也。近日袁世凱奏請於政務處。置外國顧問員。吾亦無以易其說。獨可怪者。其建議於數強國中。每國聘一人。此中方略。吾輩百思而不得其解也。夫聘客卿之權操自我。我欲用某國某人。我之自由也。今而曰一國一人。然則所以聘之者。非因其人。因其國也。卽其主動力者。非我國而彼國也。浸假將如聶士成軍中之洋操教習。非有俄皇之命不能易矣。浸假將如稅務司嚇德。由英國立約擔保。永不許換他國人矣。埃及前事。可爲殷鑒。將以

此媚列強耶。吾未見以主權媚人者也。建議者其三思之。

殆非所以防家賊乎

中國欲實行內治。莫要於設警察。此議近時多能言之者。前陳寶箴撫湘時。黃遵憲首建此議。行之於長沙。名曰保衛局。民甚便之。後李鴻章督粵。黃遵憲復陳此事。爲弭盜第一義。行之於廣州。業未竟而鴻章去。遂中止。自聯軍入京。畫地分治。布行民政。於是都中人始覺警察之政。法良意美。慶親王乃議行之於全國。聘請日本人川島浪速經理此事。先開一警務學堂。招學生五百人。其學期則初等科三箇月。中等科一個月。高等科兩箇月。共半年卒業云。其經費則每年六萬元也。聞學生中旗人居大半云。又兩月前。由北京特派二十七人。往日本東京學警察。皆旗人也。警察一端。本爲最急之政務。然苟用之不得其當。亦常有擾民滋亂者。十九世紀前期。歐洲各國之革命。半起於是。今慶王既知此舉爲當務之急矣。其專重旗人。度亦不過舉爾所知之事。非必有意於其間乎。而日本報章已竊竊議之曰。是防家賊手段。吾望慶王一雪此言也。

將備學堂緣起

湖北於去歲杪。設立將備學堂。欲仿日本士官學校之制。其用意不可謂不善。惟其緣起。或有未能深知

者。茲略記之。初湖北設武備學堂。其時與日本人之交涉尙淺也。故請德人任爲教習。夫教授與學校管理法。在教育學中。本爲分科。教習之不能兼管校事。理勢然也。吾國當道。向不知此。故一委諸德弁。其辦不能有效。亦固其所。其後鄂督崇拜日本之心日盛。漸厭德弁。三年合同滿。卽欲辭退之。權操自我。本無所難也。而當道不敢。輒援田舍翁請學究之例。雖來年不欲送關聘。仍虛言挽留者。一面別聘日本尉官二三人。使居學堂中。雖然。德教習未去。本無席位以容日教習也。於是號稱爲請來譯兵書者也。夫使其目的在譯兵書。則武昌之地亦大矣。何至無會館之所。豈必爲武備學堂之是擇者。蓋其意欲以風示德弁。若曰瓜代者將至。汝可見機而作矣。無奈紅髯碧眼者流。不通人情。前弁合同雖滿。而德領事又薦新矣。外國之命重於天語。當道者豈敢不受。於是武備學堂之皋比。仍爲德人所擁。鄂督如舍利佛之天花著身。拂之不去也。乃大窘。而所聘拱候瓜代之日弁。不得不仍以譯書之名分。贅疣於武漢者。兩年有奇。去秋日本參謀本部之有力者。曰福島安正。游歷至鄂。詰鄂督曰。君聘吾國將官來。而無職以授之。何也。此非我大日本帝國保全支那。卯翼支那之本心也。宜速位置之。日本亦外國也。其命亦重於天語。又安敢不受。於是鄂督益窘無已。乃別設一將備學堂。而訂日弁爲教習。且全權皆屬之焉。今者湖北一省。武備學堂。重規疊矩。相得益彰焉。噫。嘻。盛矣。

媚外奇聞

中國人最恭順者也。察勢力之所在。而崇拜之。以固全己之勢力。中國人之特長也。自甲午一創。庚子再創。而崇拜日本之熱度驟漲。昔之以北京爲勢利要津者。今則移於東京矣。下自民間。上迄政府。莫不皆然。吾固無暇深怪。雖然。崇拜之則亦有術矣。能獻殷勤於其政府上。也。否則參謀本部。亦其次也。等而下之。能通聲氣於其民間之大黨派。雖無大效。猶可得其言論之助力也。乃近所聞某疆吏之事。有足使人發一大噓者。某疆吏以黨俄聞者也。述者不欲道其名。故無從知爲誰何。惟傳其因黨俄之故。懼爲日本所排。不得安其位。曲思解免。而無由自達。乃夤緣轉託日本最著名某女史者。爲善辭以達於日本皇后。云。其意蓋以日后。必能道其事於日皇。必能行其權於日政府。日政府必能容其喙於中國政府。於是吾之地位。可以高枕無憂矣。其用心可謂曲折周到。視太后召見各國公使夫人。而並及其子女。其手段有過之無不及。惜立憲文明國。無有如李大叔其人者耳。

異哉所謂支那教育權者

吾嘗讀泰西各報紙。日日宣言曰。必如何如何。乃能握支那之商務權。必如何如何。乃能握支那之交通權。鐵路輪船等練兵權。吾甚怪之。甚厭聞之。吾近讀日本各報紙。日日宣言曰。必如何如何。而後能握支那之

教育權。吾愈益怪之。愈益厭聞之。

今日欲救中國。不可不首從事於教育。欲從事於教育。不可不取所長於最近最易之日本。此義人多能知之。吾亦稱謂然者也。雖然。當知今日世界爲國家主義之世界。則教育亦不可不爲國家主義之教育。國家主意之教育。非他國人所得而代也。日本欲握我教育權者。日本人之國家主義也。夫何足怪。可怪者我國人。不自由其教育權。不自由其國家主義也。

日本各報之論此者多矣。吾今擇譯其一。以告我國民。卽教育時論第五百九十九號中。有題就於支那教育調查會一篇。其略曰。

今日之支那渴望教育。機運殆盡發展。我國先事而制其權。是不可失之機也。我國教育家。苟趁此時。容喙於支那教育問題。握其實權。則我他日之在支那。爲教育上之主動者。爲智識上之母國。此種子一播。確立地步。則將來萬種之權。皆由是起焉。不見泰西諸國乎。彼自十五世紀以來。卽實行殖民政略。務以扶植勢力於他國。其狡滑之手段。實有可驚者。彼等垂涎於其地。則不顧德義之如何。先驅本國無賴之徒移住之。不加以制裁。任其掠奪欺騙。此輩雖道德無成效。而富有成效。卽富無成效。而徒衆之孳殖有成效。孳殖既多。本國乃派才德兼備之人往。名爲保護旅民。於是布法律。施民政。使該地

之士民。不知不覺。慕本國（指泰西之風）遂於曖昧模糊之中。使其地隸屬於本國。此等實例。於印度見之。於澳洲見之。於南洋羣島見之。今於支那。又將見之。

彼等於種種方面。實行此政策。往往經營在數百年以前。結果在數百年以後。即教育之事。亦其一端也。彼等自殖民之始。即派傳教士。以布耶穌教。冥冥之中。換其人民之腦筋。使同化於己。今英語之教育權。在支那者。實有許多潛勢力。近者聯合軍之戰役既終。彼等於香港。於長江一帶。大張此幟。欲興多少無關係之學校。彼其事事。着先鞭。務實際。實有可爲吾日本人他山之石者。

各國之鷹瞵虎視。既如此矣。今日我日本。不可不競時制。先以教育爲扶植勢力之源。以支那爲可取也。則速取之。以支那爲可教化也。則速教化之。既悟斯義。則刻不容緩。宜速遣教育家於支那國家。設法保護補助之。雖當帑藏窘絀之時。不可惜此小費。失此機會。以貽我等子孫無窮之悔也。噫。北清之野。漠漠千里。渴望日本人之來前。漸醒之清廷。呼將伯於東方。盡吐哺握髮之禮。似此時機。空前絕後。苟遲疑不決。曰姑待之。恐他日我欲有事於清國之時。不知今日之清國。尙有存焉否也。

嘻。此雖日人一報一人之言。實不啻其一國之言也。中國人之熱心於教育。中國之福也。日本之熱心助我教育。尤中國之福也。至其所謂教育權者。日本果能得之否乎。此屬於未定之問題。要之吾國民若不

自有之。則無論何國。皆可以得之。法律之公例。凡無主權之物。人人皆得而取也。卽人不取之。而我亦終不能有。然則於人何尤哉。

似此遂足以破種界乎

本朝起遼瀋。入主中夏。故於滿漢交涉。抵抗調和之事。實爲二百餘年第一大問題。當攝政睿親王初入關也。甫一月。卽下教國中。使滿漢互通婚姻。其規模實爲宏遠。使能行之。則種界今早破滅矣。雖然。當時滿人乘勝驕橫之氣。與其初來嫉妒之心。必不能從者也。當時漢人排外自尊之念。與其含憤積怨之餘。亦必不能從者也。故此制卒未嘗一行。而後反懸爲禁。二百年來。雖漢軍旗人。亦未嘗與漢軍一通姻。無論漢人也。今則外憂日迫。民智日開。政府竊竊然憂漢滿水火。終釀大患。頗思所以調和之策。頃乃以懿旨。詔互相通婚。其用心良善。雖然。婚姻者。人各有自由權者也。滿漢之溝絕。數百年矣。其俗不相習。其性不相同。雖日下一詔。以敦迫之。吾知其不過一紙空文耳。古文云。應天以實。不以文。豈惟應天。應人亦然。政府若真欲除漢滿之界也。則當自大本大原之地行之。以實利實益示之。雖無通婚。必相安焉矣。不然。雖通何益。歐洲各國王室。皆互有葭莩。然其猜忌自若也。况民間之一二家乎。子曰。禮云禮云。玉帛云乎哉。樂云樂云。鐘鼓云乎哉。

英日同盟論

日本自甲午戰勝以後。赫然列於世界大國之林。近年以來。全球之競爭點。皆集於中國。而日本之位置。乃益重要。前歲義和團之役。英國首電請其就近發師。是其證也。英人久執五洲之牛耳。而於東方利害。所關尤重。故今不得不求友助於遠東。亦勢使之然也。英人百年以來。以名譽的獨立自誇。未嘗一與他國聯盟。其間如德奧意之合縱。如俄法之連橫。震動一世。而英國常翛然立於兩造之外。其所恃者厚也。今乃忽然納交於不同洲。不同種。不同文之日本。日人之榮亦極矣。陽歷二月十二日。日本政府大臣。布其密約之文於兩議院。舉國歡聲雷動。幾於若狂。頻日以來。紛紛開祝宴。志慶賀。殆視得台灣時之氣象。猶有加焉。嗚呼。吾國人之僑居此土者。旁觀冷眼。感慨如何。

其同盟約章凡六款。大率以保全中國高麗之獨立主權。及其土地。而英日兩國相提攜。以謀工商業之利害。是也。其用意亦良不惡。於中國目前之局面。或多賴焉。約成之次日。其外交官照會中國朝鮮兩政府。皆感激涕零云。嗚呼。不惟政府。吾恐兩國人民之所感。亦當如是。以爲吾今者。乃幸得託餘生於歐洲兩強國肘翼之下。吾高枕無憂焉。嗚呼。吾非謂英日兩國之不當有此約。吾固信此約之基於公法。合於人道。爲全球各國所無異議。願吾特不願聞我國人之歌此約。舞此約。崇拜此約也。

飲冰室自由書有一條。題曰保全支那者。其言曰。一歐人日本人。動曰保全支那。吾生平最不喜聞此言。支那而須藉他人之保全也。則必不能保全支那而可保全也。則必不藉他人之保全。言保全人者。是謂侵人自由。望人之保全我者。是於放棄自由。一彼歌舞英日同盟者。盍一思之。

此約法布後數日。日本之時事新報。繪一畫圖。爲英日兩女神之像。倚輪持戟。而保護中韓兩孫童於其膝下。嗚呼。吾國人見此圖者。當有如何之感慨乎。吾遂爲英日膝下一弄兒。以自足乎。

崇拜外國者流看者

於戲盛哉。吾中國近日之洋務家也。洋務家之伎倆何如。見一外國人則崇之拜之。視之如無所不知。無所不能之上帝。雖外國一流氓。其入中國也。其聲價可以埒周孔。官吏士夫與交接者。得其一顧盼。登龍門不如也。嗚呼。外國人果有如此之價值否。吾所交者少。吾不敢言。惟以所聞。則去秋有日本人某。到北京。勸人東來游學。從之游者六人。備資斧八百金。並行李付之。而與之偕。該日人自乘一等艙。而置六人者於三等艙。猶可言也。及到門司。又宴飲若干日。到西京。又留連花叢若干日。開一清單以示六人者。而八百之金。僅餘二百有奇矣。猶可言也。卽到東京。則置此六人者於一客寓中。室之小。與維摩詰臥病之處相等。六人膝相促。乃能容焉。猶可言也。詎知安歇甫定。而日本某者。竟去如黃鶴。并金與行李皆無蹤。

影如是者十餘日後。乃由他學生之久旅斯國者。爲之招呼追索云。嘻。日本之高人達士。當亦不少。吾非敢以此人爲全國之代表也。雖然。以外國人爲全知全能者。亦可以鑒矣。此一事也。

更有類於此者一事。美國教士傅蘭雅。嘗受傭於上海製造局有年。譯格致書甚多。此稍治西學者所能知也。吾輩昔亦深敬其爲人。去年盛杏蓀派北洋大學堂卒業生九人。游學美國。以傅爲監督。吾輩方慶得人焉。乃近日得該處學生某君來一書。讀之。真有使人怒髮衝冠者。並錄其原文如下。

敬啓者。辱受國民厚顧。得預游學之列。分科學習。欲盡一藝一能。或可報國民於萬一。雖某爲四萬萬中之一人。有何能爲。然某亦衆人之一也。不敢有厚望於他人。而於己則責之綦嚴。今到美已三越月。此處風俗人情。未暇細查。故無以奉告。惟我等留學之苦。恐外人知而未詳。故謹將詳細情形。以達尊聽。幸其有辱教焉。初入卜忌利大學校。以爲此學校。是美洲有名學校。繼而細查美國通都大邑。學校教師。凡負高名者。俱在東邊城邑。有如伍君所謂。美國東西學校費用略同。而東方則遠勝西方。今卜忌利在美國西方。開墾以來。不過二十餘年。窮鄉僻壤。止能習礦學一門。其餘學問。皆以東方爲美。美國學生。非不得已。無在此肄業者。傅蘭雅之子家立。則遣之東方游學。而我等則羅致於此。蓋亦有故焉。傅氏身爲卜忌利大學校漢語教習。常誇于人前。謂己有大勢力於中國。中國官員悉樂聽命。中國

國派學生來美。又爲傅氏照料。竟實其言。故盡置我等於此。以顯其能也。而我等在此之有無裨益。則所不遑顧。其設計可知。且我等初來此國。人地生疎。殊形不便。傅氏月受我國百金。膺監督重任。自當妥爲垂顧。以免我等有礙于功課。不圖言過其實。多方爽約。入學之初。既不藉其先容。功課之餘。亦未聞其善誘。竟月不來。置身事外。飲食起居之事。皆我等自爲操持。視我等如路人。棄約言如弁髦。初尙以所居相隔十餘里。不便往來。近數日來。相居較近。而更形隔膜。因何以故。則非所知焉。現我等所居之屋。長約三丈。廣二丈。一樓一底。傅氏以三千金購得之。月以五十金租與我等。實則不值三十金。據人言計四年之租與息。卽可以償其屋價。而傅氏則四年後。自得一屋。故其必欲我等同居。多方阻撓。佈散流言。傷我等體面者。以此三千金起見矣。且以同國之人。聚處一室。則觀感無人。與在北洋大學校無以異也。雖欲與美人交接。而家徒四壁。殊足爲外人冷齒。故外國之俗尙。西人之意志。絕無所知焉。傅氏亦自知我等同居之弊。自認不諱。但辭以無人租屋與中國人。故不得不使我等同居云云。此語謊也。此處凡初入校者。須居校一年。若居離校較近者。可以免稟。今我等居近校。分居校內。亦其宜也。乃傅氏於校內佈散謠言。謂中國人最不潔。而風俗又甚不好。與之相處。必受其弊。故我等欲自行分居。試問各處有餘房否。則答以傅教習管你們。未見其言。不能納子。由是可知傅氏必早已運動有素。

矣。見利忘義之人。何勝浩嘆。彼既能在。此散流言。惑衆聽。亦必能在。中國散流言。惑衆聽也。美國人且爲所惑。中國人亦必能爲所惑也。又如購書一事。我等已憊于奔命。學堂常十數日。盡書一卷。欲購新書。先列一清單。託傅氏簽字。然後挾單往書坊取書。但傅氏常不暇。屢訪之。多不遇。既遇。乃令簽字。購書。又待數十日。而書始到。時則又更易一新書矣。前數日。忽向書坊言。謂近日已簽字者。一概不作準。使我等遑遑焉。如假冒簽字向書坊騙書無異。外人亦有以我等爲棍騙者流。其傷我等名聲體面者。真莫斯若。而傷我國體。亦莫斯若。即使我無傅氏之事。亦多爲土人歧視。不名之曰支那賤種。卽號之爲顏色之人。今更有此一番真無顏。久居於此。衆同視。因此皆爲之大怒。於是欲離傅氏之軛束。而自工自食。傅氏恐我等之舉動。有傷其名聲。并又無辭以對中國政府。故不得已。低首下心。任我等辱罵一輪。并又致書我等處認罪。現已爭回購書之款。并得分居之條。傅氏對陳君言。余七十多歲。未有遇過如是之人。且未受過如是之氣。此事本擬早告。但考期在卽。故遲之又遲。此請大安。某某頓首。

嗚呼。此身受者言之歷歷。必非以無根之談。污衊傅某明矣。審如是也。則傅氏號稱美國博士。號稱耶穌教牧師。何其所行之似螻似鼠。又似蛆也。傅某猶如此。而類於傅某者何限。而下於傅某又何限。是皆洋務家所視爲全知全能之上帝者也。嘻。洋務家聽者。洋務家看者。

行人失辭

一月前各報紛傳駐日公使蔡某致書江鄂粵各督。阻止派留學生於日本一事。聞者且駭且怪。將信將疑。昨日東京萬朝報。乃得其致北京外務部一書。全文錄於報上。日本各報館。攻議紛起。政府及政黨人員。詰責麇集。蔡使之狼狽極矣。本報宗旨。專務提倡理想。發明大義。例不屑於一人一事之微。浪費筆墨。特以此事。關於現在之國體。及將來之民智。其影響至重且大。因抄錄該報所登原文。併爲鞠讞之如下。

蔡星使鈞致外務部書 正月初一日

查各省遣派生徒。例給咨文。由使臣送學。及查察照料。殊不知照料自屬應爲。查察殊難越俎。諸生徒不受範圍。猶屬細事。溯自康梁毒燄銷息以來。其逋逃潛匿日邦。爲所包庇者。指不勝屈。類皆竊其餘唾。巧肆簧鼓。借合羣之義。而自由之議日橫。醉民主之風。而革命之議愈肆。各省聰俊子弟。來茲肄業。熟聞邪說。沾染日邦惡習。遂入歧途。竟有流蕩忘返之勢。譬諸螟寄羸生。楚書郢說。父兄之教訓莫能及。官長之督率無所施也。伏思朝廷歲費巨資。分遣生徒。寄學異國。原冀培植人材。周知外事。增益所能。以爲他日干城之選。詎料學業未成。而根本已失。宗旨一變。則心術全乖。加以日邦民德久衰。風俗淫亂。政府腐敗。天皇徒擁虛名於上。庇我逆臣。袒我匪徒。且暗中引誘學生。以作亂之謀。以便從而取

利。故於匪黨之倡言革命者。反多方以獎勸之。將來學生等卒業回華。散佈各省。倚爲心腹。假以事權。其中或亦有天良未喪之徒。能爲國家効力。然莠多良寡。煽惑已深。則何難揚彼頹波。徼幸於死灰重熾。竊恐曩歲湖北之變。難免不復見於南北各省。此不得不爲之深思熟慮者也。鈞本擬將此等情形。密陳天聽。及榮相慈鑒。獨以此事關係日本體面。旣重且大。彼方窮乏已極。常冀我派學生。藉其膏火。聊助學校經費。而外則以同文之說。欲使文明輸入中國。若真心相助者。反覆躊躇。投鼠實有忌器之思。且慮事機不密。一洩春光。將招日人嫉忌。不特使者有履虎之危。轉大與邦交有礙。職是再三慎重。審顧而徬徨。耳聞各省。仍須添派學生。恐將來愈聚愈多。流品愈雜。逆勢日熾。日人利有中國之亂。常肆言誣謗。宮闈污毀。榮相希冀皇上親政。從此轉相煽誘。墮其術中。不啻爲虎添翼。現計諸生來者。數已逾四五百人。綜核所費巨款。卽各省自設學堂可敷用。但能延聘泰西著名教習。主講於學堂。慎選清白子弟。分門肄業。再由使臣多譯東西書籍。無民權平等諸邪說者。咨送貴衙門核印。頒行各省學堂。亦足資借鏡。從長之益。將見成材轉易。樂育尤多。奚至有入主出奴之患。舍己從人之虞也哉。鈞未至日東以前。曾立論各省宜多派生徒。游學觀摩。藉開風氣。乃至此細加考察。而後知日本之號稱維新者。有名無實。其政府多樹黨援。各分門戶。不顧分義。每嘆所聞。不符所見。又不料康梁以逋逃之藪。

爲邪說之叢。敗壞人心。一至於此。尤不敢自護片言前失。而勿爲國家大局久遠計也。至康梁餘孽。現聚於橫濱一埠爲多。在東京者。則深藏固匿。不敢與使署人相一面也。橫埠商民。受愚已久。所以有借中華會館原屋。爲彼逆黨開設大同學校之舉。鈞自蒞此邦。密圖解散其黨。借會館請宴。親與諸紳商。几席周旋。初諷以微言。次曉以大義。藉捐廉提倡。勸會館自立學堂。以教育其子弟。開導再三。諸人乃頓悟前非。咸願改邪歸正。合議收回會館學房。重建商民公學。求鈞作主。予以自新之路。計自今以後。凡彼自由革命逆黨。一旦頓失衆商扶助經費。無可爲固結團聚之資。徐以俟之。勢將解體而渙散矣。若各省更能永停添派游學。使卒業者有去無來。則根株悉拔。流毒有時而盡。至於商民自開公學。好名畏罪。勢必與彼黨分馳。自當由官長提倡主持。曉以忠君愛上之忱。與以上進出身之路。夫而後人心一正。學術自端。邪說不禁而自止。逆黨不驅而自遠矣。區區禱昧之見。知無不言。言無不盡。係爲顧全大局。仰承樞意。籌畫久遠之計。是否有當。務求密回堂憲。請示周行。俾有遵循。而無隕越。不勝禱切屏營之至。

此書既出現後。各報紛紛攻難。有謂其邪言熒聽者。有謂其見識卑怯者。有謂其污讟日本國民。有傷邦交。宜撤令回國者。有謂其語侵日本天皇。大不敬。宜照會中國政府嚴治其罪者。衆口嗷嗷。不能盡錄。今

但錄四月三日^陽日本報中評林一門之漢文詩三百章。亦可見日人之衆怒難犯矣。其詩云。

是誰氏

嘲罵我風俗。不知是誰氏。密書偽乎真。公揭新聞紙。兩國全交情。其任在公使。公使而無禮。國交可以止。

來此邦

禹域與神州。咫尺隔一水。古來兩相賴。形勢如唇齒。乘槎來此邦。駐劄為公使。至誠應盡職。暴慢何無恥。

何無禮

妨礙留學生。不解國交體。暴言無所憚。極口逞醜詆。保全竭友情。我意固存此。兩國正尋盟。彼獨何無禮。

評曰。蔡使以此書故。將至不能見容於日本。自作自受。亦復誰尤。願最可憤者。外交官為一國之代表。其自辱而國體即與之俱辱。中國方當荆天棘地之時。更何堪復蒙此奇醜耶。篇中滿紙狂瞽之言。駁不勝駁。至其中最可笑者。莫如謂日本窮乏已極。常冀我派學生。藉其膏伙。聊助學生經費云云。夫日本雖財

政困難。何至恃外國學生。以助國帑。信如蔡言。則數年前中國未有一學生來東。則日本全國之學校。豈不皆以經費無出。而全行倒蹋耶。又謂日本利有中國之亂。常肆言誣謗宮闈。污毀榮相。希冀皇上親政。從此轉相煽誘。墮其術中。不啻爲虎添翼云云。夫謗宮闈。可謂之罪也。毀榮相。未必可謂之罪也。日本以伊藤山縣大隈等。赫赫元勳。功在社稷。而報紙日日唾罵之。侮弄之。繪圖畫以揶揄之。作詩歌以嘲笑之者。尙無日無之。言論自由。不能禁也。而况外國之大臣耶。蔡使謂日本希冀皇上親政。轉相煽誘。然則蔡必恐懼皇上親政。咒咀皇上之永不親政明矣。彼盈廷頑鋼。雖視皇上如眼中釘。如喉中鱗。然猶必致美於其詞曰。母子一心也。曰兩宮慈孝也。而蔡使乃敢明目張胆。謂希冀親政。卽爲利中國之亂。彼其居心。視言自由。言革命者何如。卽以守舊黨之律治之。恐罪亦不容於死也。至其謂橫濱大同學校爲康梁逆黨所設等語。本報開設橫濱。最知其詳。查大同學校。創於光緒二十三年。由閣埠紳商。在中華會館集議建設。而康梁來東。乃在光緒二十四年九月十月之交。學校與康梁何與。蔡氏以爲外埠商民。一如內地之柔弱而易魚肉也。乃欲欺凌之。舉其所公立事業歸之康梁。因撲滅而自以爲功。其所以爲康梁計者。則誠忠矣。奈犯衆怒。何。至其謂重建商民公學。由官長提倡主持。此事濱中久有所聞。若誠能如是。則以橫濱區區一隅。而有兩公學。教育日盛。豈不可賀。居斯土者。日日翹足望之。而惜其至今數月。寂然未有聞。

也。要之中國他日之存亡絕續。皆將惟日本留學生是賴。多得一人。卽多收一人之益。中國今日大事。未
有過於此者。吾敢倡言曰。阻止派留學生之人。卽我國文明之公敵也。雖然。今日中國新機已動。懸崖轉
石。欲罷不能。蔡氏何人。乃欲阻之。毋亦古詩所謂蚍蜉撼大樹。可笑不自量耳。蔡謂各省若能永停派添
游學。俾卒業者有去無來。則根株悉絕。流毒有時而盡云云。無論各省大吏。未必皆惟蔡言是聽也。無論
日本政府與蔡反對。強之使派。而當道者不敢不從也。卽使果如蔡言。而東京現時留學生數百人。由
官費者不過強半耳。其餘則皆自備資斧。茹根嘗胆而來。而近數月來陸續渡航者。幾於無船無之。又可
盡乎。凡國民文明程度愈高者。則其仰庇於他人之事愈少。豈必官派哉。彼日本之伊藤井上何人也。蔡
氏盍多服滋補藥物。保養此尸居餘氣之身。勿遽就木。佇看十年以後。日本留學生之成就何如矣。雖然。
蔡氏亦云智矣。彼其自忖斗筲碌碌。無計可留其姓氏於十餘年數十年以後。乃特爲此一書。故以抗文
明之盛潮。他日有著中國思想發達史者。則蔡氏一書。勢不得不採之以備一重公案。則蔡鈞盛名。將得
附於奧國梅特涅。俄國波比德挪士夫之末簡。而並以不朽矣。豈不幸哉。豈不壯哉。或曰。蔡氏近贊助留
學生會館事。又捐助東亞學校經費。其有悔過自新之意歟。或曰。是藉此以解免於日本人。以求保其三
年一任也。或曰。無口蜜腹刀也。記者此得而斷焉。

又按蔡氏函中。謂勸諭橫濱商人。收回大同學校房屋一事。略記如下。蔡甫到任。卽立意與大同學校爲敵。以自徼功。乃謀嗾紳商爲其鷹犬。屢次到中華會館。挑釁滋事。奈諸紳商不墮其術中。莫之肯助。久之乃得一盧某者。嗾令出名興訟。謂大同學校佔據中華會館房屋。日本審判所審論數次。卒於陽曆四月五日。卽華曆二月二十七日。斷定盧某無可以訟學校之資格。遂將原稟擲還。計此事蔡盧所得之結果。惟消耗數百金之律師費。數十金之裁判堂費而已。嘻。是亦不可以已乎。記者附識。

奴隸與盜賊

自回鑾後。保護外人之懿旨。不下二三十次。視於無形。聽於無聲。誠如孝子之事父母矣。公使夫人偶遭兒童指目。輒欲挈拷治罪。一教士之受辱。輒下罪己之詔。何其恭順。一至此甚也。民間如順朝旨乎。則奴隸而已矣。奴隸猶可。兩重奴隸。何以堪之。如稍有不屈乎。則盜賊而已矣。盜賊猶可。兩重盜賊。何以堪之。今日爲中國百姓者。奴隸盜賊。二者必居於一。於是嗚呼。何爲使我民至於此極也。悲夫。

西報偉論

一月前。天津有一西字報著論一篇。極言教士在內地專橫之狀。且斥言中國他日亂階。必起於是。其言可謂深切著明。西士如猶不悟乎。弗戢自焚。今日廣宗鉅鹿之事。猶其小焉者耳。

吾國公使獨非人乎

駐俄公使楊儒暴卒。世人固稍已疑之。未幾而其子復自縊。瀕死時有極痛心之言。世人益疑之。近者日本報乃詳言楊儒之死。實被俄人從樓上踢下致命。蓋因滿洲條約。爲各國所制。不能得其志。故以此洩忿云。其言確否未可知。然諒非無因矣。嗚呼。德公使之死。遂至八國聯兵。神京陸沈。意國公使夫人途中遇羣兒譁笑。遂勞明詔惶恐謝罪。鉅鹿之亂。法教士受傷。政府弔慰之電稍緩至。天津法領士卽相責言。吾國公使獨非人乎。語曰。甯爲太平犬。莫作亂離人。吾欲易之曰。甯爲外國狗。莫作中朝官。

濟濟多士

據京鈔月來入京引見人員。不可指屈。約略算之。帶領高見者。已有五六百人。其驗看者。已及千人。其不及驗而待下月者。尙有千餘人。嗚呼盛矣。往聞安南將亡時。其士子應試者。全國不過三千餘人。及丁酉年。越之亡二十載矣。而是科鄉試。乃有一萬二千餘人。然則官吏士子之多寡。殆與國之盛衰。成反比例歟。桃花扇傳奇有云。一報長江鎖開。報長江鎖開。石頭將壞。高官賤賣。沒人買。今日官場股份行情。猶逐日增長。是亦國家億萬年有道之徵矣。聞之破涕爲笑。

又將防家賊耶

中國第一次官費派出留學日本諸生。卒業於士官學校。以前月歸國。其中以湖北派出者最多。北洋次之。南洋又次之。北洋歸國之學生。袁制軍皆派爲參謀部。信任逾恆。惟湖北學生。則僅派充教習。張制軍待之殊冷落。其薪俸最厚者。不過月數十金。其薄者僅每月十六元。飯食一概自備。又恐學生怨懟。派人監守之。出入言語。皆不得自由。來往信函。皆須拆視。殆與囚虜無異云。嗚呼。旣已疑之。若此。嫉之。若此。然則何苦復派留學哉。或曰。將以媚日本人。示其有文明舉動也。是或然歟。

大學得人

回鑾後所辦新政。惟京師大學堂差強人意。自管學以下諸職司。皆稱得人。聞欲設一哲學科。雖有反對者。而管學大臣之意甚決也。總教習吳君摯甫。譯書處總辦嚴君又陵。聞皆力辭。雖然。今日足繫中外之望者。只此一局。吾深望兩君之稍自貶抑。翩然出山。以副多士之望也。

粵學端倪

陶子方制軍督粵以來。銳意振興庶務。而年來設施。表見甚希。粵人不勝雲霓之望。頃者廣雅書院改爲省學堂之議。經已就緒。頒出圖表六紙。其第一表。爲表明設學等級。及其課程。見我國所定新制。頗與日本現行制度相似。附第一表。爲表學級層進。及比較學問。第二表。爲表明現擬課程。尙合各國公定學章。

並就擬定課程附表教習人數於末附第二表。為論普通課程及教育之要。第三表為表明改葺廣雅書院。以為省學各種堂舍。第四表為表明全學人數及久暫款項。綱舉目張。條分縷析。誠現時各省學務之冠也。今擇錄其一二。

第二表所擬課程及教習人數。案此係專就備齋第一年列表即與日本中學第一年相當之學級也

定日課為講授

定夜課為溫習

日課講授以七小時半一小時即俗稱之一句鐘為至多。合六日計之。得四十五小時。各國功課。設有禁令。六日間不得過三十小時。其令必不能行於需才孔急。艱難創學之時。故四十五小時者。離絕萬國之通則定之。不可再以功課過簡而訾之。

四十五小時之功課。按各項課程分表如左。

擬考選學生百六十人。四十人為一班。分為甲乙丙丁四班。合功課時刻。應聘教習幾人。同列表下。

綱常大義講義

甲二
乙二
丙二
丁二

合八小時

教習一人

六日間

本國文
 甲九小時
 乙九小時
 丙九小時
 丁九小時

 教習一人
 教習一人
 教習一人
 教習一人

英文
 甲九小時
 乙九小時
 丙九小時
 丁九小時

 教習一人
 教習一人
 教習一人
 教習一人

史要講義
 甲三小時
 乙三小時
 丙三小時
 丁三小時

 教習一人

地理講義
 甲三小時
 乙三小時
 丙三小時
 丁三小時

 教習一人

數學
 甲六小時
 乙六小時
 丙六小時
 丁六小時

 教習一人
 教習一人

博物總論
 甲四小時
 乙四小時
 丙四小時
 丁四小時

 教習一人

每教習講授功課皆在十小時左右然講授前繙檢豫備至少需兩倍之力講授後校核批改至少又需兩倍之力每六日當任五六十小時之勞荷欲力副委託亦頗困瘁矣

政法講義

甲三
乙三
丙三
丁三

合十二小時

教習一人

圖畫

甲二
乙二
丙二
丁二

合四小時

算學教習或英文教習

合四小時

算學教習或英文教習

樂歌

甲一
乙一
丙一
丁一

合四小時

格化教習兼

體操

甲三
乙三
丙三
丁三

同時並習

教習一人

共

甲
乙
丙
丁

各四十五小時

教習十六人

第四表學校經費

逐年豫計表

改葺舍宇及置器費八千兩

支出 備齋第一年生百六十人歲費三萬兩

〔學生考取十五六至三十歲文理明通者〕

壬寅 第一年

校士館生及西學生歲費一萬兩

校士館生習經史讀日文至曉文法能觀書西學留英文已能譯解者本年又加深其文義

計款

舊有常年款約三萬兩

新籌 常年款一萬兩 現銷款八千兩

適用盡

備齋

改葺舍宇及置器費四千兩 添招學生之故

備齋第二年生八十八人歲費四萬五千兩

計廣雅房舍足容五百人異日家辦專齋通省中學生皆當升入專齋至少有五百人之額始能相容然則本學堂必備有五百人之常年費自不待言擬就試辦齋正齋時逐年籌增期至專辦專齋五百人經費早經籌定可備臨時之擴張

癸卯 第二年

支出

校士館生及西學校士館生課如第一年

生歲費一萬兩西學生研究西籍期令能譯淺近西書即卒業

十之四博觀日文教育書 並令能十之三博觀日文政法書 任譯述十之三博觀日文實業書 即卒業

計款

舊籌常年款四萬兩

新籌 常年款一萬五千兩 現銷款四千兩 適用盡

改葺舍宇及置器費四千兩

備齋第二年生八十八人歲費三萬兩

正齋第一年生二百六十八人歲費三萬兩

合六萬兩

甲 第三年 展

支出

遊學日本十六人三千兩 校士館生十人 西學生四人 〔不派遊學不充 譯校之人另派充〕

附屬譯輯局資本五千兩 局章臨一校士館 時別定西學生 為譯校者學生教習或另選用

提存遊學費二千兩

舊籌常年款五萬五千兩

計數

新籌 常年款一萬五千兩 現銷款四千兩 適用盡 外存 譯輯局資本五千兩 遊學費二千兩

改葺房舍及置器費四千兩 本年不消此數將存備 專齋置重要學具之用

備齋第二年生 八十人 歲費三萬兩

正齋第二年生 八十八人 歲費四萬五千兩 合七萬五千兩

遊學日本繼續費三千兩

乙 第四年 正齋

附屬 譯輯局資本五千兩 連前共一萬兩永遠以之周轉不再增添生堂附屬譯輯局者以可置備活版並便學堂之用不但出譯輯書以惠士林也惟附屬之局究非專局故局面不必過大

附辦 齋

計款

舊籌常年款七萬兩

適用盡

外存 譯書局新齊資本一萬兩 新舊提存遊學費四千兩

新籌 常年款一萬五千兩 現銷款四千兩

丙午 第五年

改葺房舍及置器費四千兩 本年愈不消此數亦存 備專齋置辦學具之用學生四百八十人

備齋第一年生 八十人 歲費三萬兩

豫立專齋之額明年即 合九萬兩 可將正齋第三年生作

支出

正齋第二年生 八十人 歲費六萬兩

為卒業升作專齋學生

遊學日本繼續費三千兩

提存遊學費七千兩

計款

舊籌常年款八萬五千兩

適用盡 外存

新籌現消款四萬五千兩

譯輯局資本一萬兩新舊 提存遊學費一萬一千兩

備齋第二年生八十人歲費一萬五千兩 第一年生止不招

正齋第二年生 八十人 歲費四萬五千兩

辦專齋時或當添聘外國 專門教習三萬兩亦足教

專齋第一年生百六十人歲費三萬兩

專齋生百六十人 本堂正齋生 選升百二十人 餘四十人就外 府中學生選升

支出 遊學日本繼續費三千兩

誠派正齋生遊學日本十人二千兩

提存遊學費五千兩

丁未 第六年

計款

常年款十萬兩 適用盡

外存 譯輯局資本一萬兩 新舊提存遊學費一萬六千兩

專齋 戊申 第七年

正齋 備齋 附辦

支出

正齋生二百四十人歲費五萬兩

專齋第二一年一百六十人歲費五萬兩

遊學日本繼續費五千兩 校士館生十六人 正齋生十人

續派正齋生遊學日本十人二千兩

提存遊學費三千兩

計數

常年款十萬兩

適用盡

外存

譯輯局資本一萬兩 新舊提存遊學費一萬九千兩

正齋生一百六十人歲費二萬五千兩

專齋第二一年生 百二十人 歲費六萬五千兩

遊學日本繼續費七千兩

續派正齋生遊學日本十人二千兩

支出

八年內共派出遊學日本生四十六人此四十六人者作為額外遊學生皆令留學日本六年有入大學校通英法或英德兩國語文者校士館生十六人再挑四人二人派往德國二人派往法國正齋生十人挑八人亦分往德法留學各六年每年每人計學費七百兩內外四十五人學費除本外以後尚需五萬兩以舊提存之款及第九年以後逐漸提存之款

第三年生本年年終卒業餘送遊學外擇尤升入京師大學堂餘分別選用

費皆較少于原定之數一則閱辦已久俱可奏省二則款有定額無可隨便籌增本年專齋生應招百六十人今止百二十人者一則限經費二則本年本堂應升之正齋生止有八十人恐又不足數外府之中學生彼時必亦不多增足百六十人本不易也俟第九年止招足百六十人則經費適敷外府學風既盛學生之應升者亦多矣

已第八年

充之適可敷用從第九年起年派專齋生五人至日本至第十四年滿三十人年款四十兩
作為額派從第十五年起批留學日本生三人改派歐西至第十七年滿九人年款六十
兩作為額派合歐西六千兩日本四千兩適以合辦校士館歲費一萬兩抵之如其間有議
挑專齋生再派歐西遊學者其經費俟臨時另籌

提存遊學費一千兩

計款

常年款十人萬兩

適用盡

存外

編輯局資本一萬兩

新舊提存游學費二萬兩

難哉使絕域之才

自交涉既開。近二十年來。以出使員缺為優差。每當瓜代時。暮夜鑽營者。無所不至。乃近者意大利奧大
利比利時三國。皆向外部求特派公使駐其國都。政府亦既許之矣。而定章每一使館。每年經費只給三
萬兩。公使俸廉一切在內。奏帶參隨不得過四人。於是外務部之官吏。無一人願赴任者。政府大困。不得
已。以道員某某等充之。云告身一醉。在盛唐時已然。今使費雖薄。然尚有二萬。且可為將來不次遷擢之
階。衰衰諸公。亦何必視為畏途哉。

自治！非律賓自治！！

西六月一日。四月二十五日倫敦電云。美國大總統領盧斯福演說。謂非律賓他日。若能有自治力之時。美國當許

其自治。聽者大感動云。美國如果有是心乎。庶不愧為大國民。不愧為自由國民。果能踐是言乎。庶不為
華盛頓羞。不為林肯羞。

古巴隸美後。於今四年。今美已許其獨立。西五月二十一日。美總督解任歸。而古巴共和國之大統領麻兒瑪。宣誓就任矣。善哉善哉。己立立人。己達達人。大國民自由國民。固當如是。

菲律賓敗軍之將。愛國之士。夫流寓於日本者數十。吾往往從之游。且哀且敬焉。吾聞近年以西班牙文著錄之書籍。其成於菲律賓人之手者。十四五。其醫師律師等。赫赫有名於歐洲者。不乏其人。其布告獨立時。所頒憲法十四章。百有一條。正當詳密。視歐美最文明國之憲法。一無所讓。烏在今日之非人。其力不足以自治也。美國而果有是心乎。果踐是言乎。吾視其古巴之日不遠也。

嗚呼。我國民試一自省。其自治力。視菲律賓何如矣。

革命！俄羅斯革命！！

咄。俄羅斯革命！吁。俄羅斯遂不免於革命！嘻。俄羅斯殆不可以不革命！

俄羅斯革命之機。動之已數十年。其主動者不過學生耳。理想耳。今則工役思革命。軍人思革命。舉國之民。除宮中及最少數之高等貴族外。幾無一人不思革命。革命之機。殆將熟矣。

女學生者。俄國革命黨中最有勢力者也。近日以革命之報紙書籍。密贈於聖彼得堡之海軍將校。及全國之航海家。皆已得其同情。全國之工役。相約要求增加庸率。減縮操作時刻。期以五月同盟罷工。今於

聖彼得堡莫斯科兩大都會。已爆發流血矣。其餘各地蠢動者。所在皆是。迦遜省巡撫和波林忌。已公言無術以制境內之暴發。加哥福省現已成恐怖時代。官吏悉逃難他去。嘻。岌岌不可終日矣。或言俄今皇知勢不可遏。不得不改圖以求自免。將踵前皇亞歷山大第三未竟之志。改行立憲政體云。其信與否。吾不敢知。卽信矣。而能救與否。吾不敢知。要之十年之內。俄國於革命立憲二者。必居一焉。吾敢知之。夫使俄國或迫於革命而立憲乎。或求立憲不得。而卒收功於革命乎。則自今以往。地球上完全專制之大國。惟餘一支那矣。

張南皮之商務政策

鄂督欲以湖北紡織局。售與日本人。有安田氏者。往鄂交涉。今未就議。他日能就議與否。吾不敢知。要之此紡織局。終非鄂督所能有矣。終非中國人所能有矣。

上海織布局。前由中國官督商辦。折閱幾盡。售與英人。至今獲贏無算。湖北織布局。亦由中國官督商辦。折閱幾盡。安田氏若得之。必獲贏無算。

上海招商局。前年曾議售與日本人。今湖北織布局。復議售於日本人。

前蘆漢粵漢鐵路。華商屢欲自開公司承辦者。擬兼入洋股。鄂督不許。卒乃一歸華俄銀行。一歸美國公

司鄂督欣然矣。此次紡織局之出售。聞亦有粵商欲承辦者。擬兼入洋股。鄂督不許。卒沿門求市於他國。華商之力。未必不能獨任。然必欲躡入洋股者。畏官之督之也。洋股未必有損於權利。然官不欲者。惡己之不得督之也。夫官不鄙商。而躬自督之。豈非盛德大業。而商畏之也。如虎。官之爲官。可想矣。官之欲得而督之也。如蟻慕羶。官之爲官。又可想矣。

鐵路礦務。則人紛紛而奪詣我。官督商局。則我拱手而贈諸人。鄂督於東三省俄約路礦之權。抗電爭之。義形於色。使全權大臣還以相詰。鄂督將辭何以對。

官途冷眼觀

前月廣西亂警正熾時。兩廣總督在病假中。廣西巡撫在病假中。廣西藩司亦在病假中。何病之巧耶。豈真西人所謂東方病夫國耶。雖然。彼草澤人物。視之病與不病。假與不假。恐無擇耳。滇無李經羲以請入覲。面陳機務。獲譴去官。其所欲陳者。未知如何。然以一封疆不能言事。而猶言求達民隱耶。

直督屢被參劾。日人之言。謂必有大力者。嗾使之。殆非無因。李文忠與伊藤博文語。謂外國之議院。似吾國之都察院。六郎似蓮花耶。蓮花似六郎耶。

廣宗鉅鹿之亂。耗漸告平復。而前次傳言袁軍所至。輒遭挫敗。其爲報紙之張大其詞耶。抑袁軍久練之。

師。竟與尋常諸軍伯仲耶。袁軍形色上之可觀。人人皆知。使傳言而信。豈其所缺者在精神上耶。以今日之國體。今日之朝局。今日之官吏。欲求有精神之軍隊。可得耶。不可得耶。

英杜和議遂成

英杜戰爭。新聞紙中。報其媾和期近者。已屢見不一見。卒蹉荏苒。直至西六月一日。四月二十五日以和約既定。議畫押聞。此役自一八九九年十月下宣戰書。以迄今日。凡亘二年零七個月。英國所耗軍費。共計二千萬磅。發兵三十萬人。馬三十萬匹。自英國立國以來。戰事未有烈於此者也。而和議成後。則英國所得者。阿連治殖民地四萬八千三百二十六英方里。杜蘭斯哇殖民地十一萬九千三百三十九英方里。其所獲亦不可謂不豐矣。當兵衅將開時。杜國大統領古魯家。寄書於美國一友人曰。英人欲取兩共和國爲屬地。吾知其終必不能如願。但不可不擲非常可驚之代價以易之耳。噫嘻。壯哉此言。萬里之外。聞者猶爲動色。以全數不滿二十五萬之波亞人。而與世界中第一強盛之英帝國爲敵。相持至兩年七箇月之久。婦女荷戈。老弱奇馬。矢盡援絕。人無退志。嗚呼。可不謂豪傑之國民哉。普天下血性男子。誰不臨睨南雲。而洒一掬同情之淚也。

朝旨深意

四月初十日。有賞給御前大臣。軍機大臣。總管內務府大臣。南書房。上書房大學士。各部院尙書。左都御史。及各省將軍督撫。平定粵匪。擒匪回匪。方略各一部之上諭。當此國步迍遭之日。忽舉前此武功懿鑠之盛。而宣示之。表彰之。其有意耶。其無意耶。諸臣讀此者。亦可見龍興異域之大清。其威力如此。其巍巍高拱深宮之太后。其功烈如此。其赫赫其孰敢不悚息。讐慄。軒轅而歌舞之者乎。抑大清之入主中夏。二百五十年矣。其間所經大難。以粵捻回爲最劇。彼等以區區揭竿之衆。羣起一呼。蹂躪半天下。颺標輕忽。所向破碎。當是之時。清祚岌岌不可終日。而皇太后猶能指揮若定。草薙而禽獮之。自茲以降。海內肅清。感慨風雲。奮袂扼腕之士。唏其微矣。今日之天子。今日之執政。夫亦可以高枕鼾睡。般樂佚游。睥睨此四萬萬奴隸。視同無物焉矣。而汲汲講求方略。胡爲者。藉曰內憂不足懼。而猶懼外患。故以是相惕焉。吾甚惜焉。甲午一役。無平定日本方略。庚子一役。無平定八國聯軍方略。而後此之所以對付外患者。非可膠柱刻舟。以平粵平捻平回之前事爲師也。然則朝旨之意可見矣。若曰爾四萬萬漢族。當知雖以粵捻回之猖獗。不能訖我大清之天命。此後猶有陳涉輟耕。石勒倚嘯者。其亦可以戒矣。設其有之。則軍機大臣。各部院尙書。各省將軍督撫。持此方略。以摧枯拉朽焉。云爾。嗚呼。四萬萬漢人聽者。各部院各省之大清社稷。臣聽者。

調停良苦

胡侍郎燾。袁制軍世凱。與英公使訂約交還鐵路事宜。許英人運兵等種種權。而仍用英人金達管路。事各國聞之。嘖有煩言。外部乃託詞云。二人並未知會外部。任意自專。當即奏請將胡袁交部議處。以謝各國。議處之命下。英使仍向外部轉圜。不用金達管路。其餘權利仍舊。並請豁免處分。外部調停其間良苦。嘻。權限不定。何以治事。我自兒戲。人亦兒戲我矣。

賠款財源

政府自開罪外國敗衄後。其賠款則使民間擔負之。甚矣民之可哀也。今將此次賠款。各省財源所出。列表如下。

湖北	加鹽稅	加印紙稅	加阿片稅	派捐
湖南	同	同	同	同
廣東	同	同	同	同
四川	同	同	同	同
浙江	絲落地稅	酒稅	同	同
		肉稅	同	同
		加釐金	房捐	同
		煙酒糖稅		同
		增地稅		

江蘇

同

同

同

安徽

同

同

酒肉稅

同

江西

同

同

同

福建

紙稅

同

同

密果稅

同

山東

同

烟酒稅

同

河南

鹽稅

同

同

廣西

賭博稅

同

中俄之內亂外患

中國之內亂。可以生外患。俄國之外患。可以止內亂。中國所最畏者外患也。然欲免外患。不可不汲汲防

內亂。俄國反是。所最畏者內亂也。然欲免內亂。則必不可絕外患。今不幸而外患絕。此其內亂所以游至

也。彼俄之軍人。常因外患以爲衣食之資。今其來滿洲以蒐薙支那人者。固屬賞心樂事。然其在本國爲

防禦歐洲之役者。則腓肉生久矣。悒悒不平之心。因之以起。今也大學生之革命運動。勞役者之罷工同

盟。紛然於各處。而軍人之不平者。亦從而和之。俄廷之前途。可爲寒心。

西五月五日倫敦報紙。言俄內務大臣之被刺死也。其刺客受鞠之際。不肯告發同謀者一人之姓名。惟言同謀者多至不可紀極。且言我輩無所憾於今上皇帝。惟與滿洲官吏爲仇耳。又曰。吾不願被赦。吾願吾一死之後。繼我而起者。十百千萬而未已也。云云。此言一布。舉國人心愈感動。政府諸員頗憂懼。俄廷所恃以爲專制之護符者。軍隊也。然軍隊不用命。則政府之術乃窮。今已開其端矣。西五月二日報云。俄政府現逮捕墨斯科舊京之軍士八百人。擬流之於絕域。爲其當鎮壓亂民時。不肯放銃也。又聖彼得堡海軍步兵分隊。亦同受此處分。又聞有陸軍將士五十七人。亦不日就逮云。嗚呼。俄國之內情。岌岌不可終日如此。聞其政府積憂之極。謂其挑撥外患。導蠢蠢之人心。以向外界。則前途遂不可救。果爾。則俄國之興妖作怪於東方。其又不遠乎。

列國之東方商務政策

列國今在東方實行商業政策。著著進步。俄羅斯之於航海業。非常保護獎勵。其根據遼東之東。支那輪船公司。現將大飛躍。將使由旅順口至英國德勿港。法國對岸之港。僅以兩禮拜得達云。荷蘭政府亦獎勵東方航海業。將由其南洋屬地渣華島。開設輪船公司。來往日本。此後十五年間。政府以三十萬磅金補助之。且與德國政府協商。設海底電線。由日裏島經布黎島。菲律賓濱島而通上海云。法蘭西亦經營揚子江航

路。集資本五百萬佛郎。而政府以六百萬補助之。英國之印度支那輪船公司。亦以西六月一日起。通航於湖南。美國則擬開一商品陳列場於上海。頃擬由政府撥支建築費二百五十萬美銀。一合五百萬元。已提出於上議院云。日增月盛。吁可界也。

西藏密約問題

北京朝廷。最喜與他國結密約。尤喜與俄羅斯結密約。咄咄怪事。

丙申庚子。兩度滿洲之密約。既舉其所謂祖宗發祥之地。置諸虎狼俄卵翼之下。猶以爲未足。近日復有蒙古密約。西藏密約之事。其約文大略具載前號本報中。日本報章與上海報章。登約文互異。未知孰實。如上海報章所言。西藏固非中國之西藏。卽如日本報所言。西藏亦非復中國之西藏矣。

俄人自去年西歷十月以來。先後派探險隊於西藏者數次。名爲探險隊。實則哥薩克兵也。計其總數。已有八千五百人之多。其中騎兵工兵砲兵最多云。此等探險隊。徧覽西藏之地形民情風俗。及中國政府對於西藏之統治力。一一詳細報於本國政府。故數月以來。俄人所以經略此地者。既胸有成竹。至是遂有密約之事。

第一次之滿洲密約。曰爲還遼之酬報也。第二次滿洲密約。曰爲平亂之酬報也。而此次之西藏密約。却

爲何來。是舉地球之政論家。百思不得其解者也。雖然。此豈難明哉。中國一切內治外交之所以變動。非原本於一國人利害之問題。實原本於當局者一二人利害之問題。以本國一私人。懷挾數萬金。乃至數十萬金。以謁王公大人。皆可得一府一道。乃至一省之統治權。况以地球堂堂一大國政府之力。其所懷挾者。數十倍數百倍於此而未已已也。得此術以行之。雖盡攬十八行省之統治權可也。而何有於區區一西藏。

此密約當交涉之衝者。俄公使與軍機大臣大學士榮祿二人也。而此次俄親王之入京。於運動最有力云。其運動力所及。上有最尊貴之榮中堂。下及最下賤之李蓮英。而密約之起稿。則出龔鴻禩手云。日本人之論此事。不如滿洲密約之注意。蓋其利害與日本相遠也。至於英俄交涉事件。則此約實行以後。而波斯問題。阿富汗問題。乃至印度問題。皆生影響矣。不知英人何以待之。

蔡鈞巖辱國權問題

蔡鈞何人也。其名豈足屢污我新民叢報。然而竟相污至再至三。是亦蔡鈞之好手段也。

六月二十五六七等日。有蔡鈞與留學生紛爭一事。其詳別見本號餘錄門中。茲不贅述。此事之起。由蔡鈞不肯答送留學生入學也。日本例。凡入學校者。無論本國人外國人。皆須有人爲之保證。若官立學校。

則與官交涉。須公使爲保證。亦屬情理之常。蔡鈞者。文明之敵也。恨不舉。凡留東京諸生。一旦而驅之出境。其餘官費生。固已視之如眼中釘。其咨送也。不得已耳。至私費生。則其仇之愈甚。故出全力以阻之。抵死不肯咨送。蓋懼吾國之多才。而欲牧其萌蘖也。其罪一也。不送則不送耳。不過得罪學生團體已耳。然而蔡鈞乃縮頭曳尾。一種類。無此膽量也。乃由其官場枕中祕之手段。曰模稜。曰掩飾。曰推宕。僞許以五人互保。便允咨送。彼其時固本無欲送之心也。無欲送之心。而以爲學生之可欺。其罪二也。已則不送。而欲嫁其責於日本人。謂參謀本部不肯收納。夫參謀本部盜覆之文具在也。學生非如蔡鈞之胸無點墨。何至並文中之意而不能解。蔡鈞食言而肥。而猶欲掩耳盜鈴以欺人。其計之拙。亦不可思議矣。其罪三也。學生求見不見。所問不答。豈不思汝所處之地位。爲一國人之公耶。何物同臭。無禮乃爾。其罪四也。以上四罪。顧猶可恕。其罪不可忍者。則最後讎辱國權一大問題也。夫公使館者。治外法權之地也。公法上視之。如本國。非所在國之權力所能及也。乃蔡鈞一則使日本警吏拘吳孫二君。再則使日本警吏拘來謁學生五十餘人。夫蔡鈞仇學生。則自仇之耳矣。而奈何其不能自了。而假手於他人也。嗚呼。我國民其知之否耶。蔡鈞者。全國政府官吏之縮本也。此案者。將來中國前途之倒影也。現政府統治一國之能力。早已掃地以盡矣。雖然。彼有所恃。以其楯焉。何恃。曰恃外人。國民之言論舉動。有不不愜於己者。則以太

阿之柄。授諸外人。使草薙而禽獮之。使館可以揖警察而使入。則境內何不可以招軍隊而使來。二百年前僅有一吳三桂。今則爲吳三桂者。舉國皆是也。夫縮頭曳尾之蔡鈞。則何足責。然此中消息。有識者不得不寒心也。

日本各報紙。數日來衆口沸騰。議論此事。公論尙未盡泯沒。今則所見之報。列其左右袒及中立者如下。

時事新報

袒蔡鈞

中央新報

袒學生

東京朝日新聞

袒學生

日本新聞

袒學生

東京日日新聞

中立

國民新聞

中立

每日新聞

袒學生

萬朝報

袒學生

二六新聞

袒學生

大版朝日新聞 袒學生

每日新聞 袒學生

都新聞 袒學生

讀賣新聞 袒學生

日本有一西文報曰。『日本恭晤士 *Japan Times* 者。其訪事人以此案質問於蔡鈞。蔡鈞曰。是康有爲所嗾使也。』云云。嘻異哉。康南海久旅英屬。與東京學生曾無一面緣。何從嗾使耶。學生皆知自由獨立之大義。豈爲人所嗾使者耶。蔡鈞豈以爲我一國青年子弟。皆似受人嗾使之蔡鈞耶。蔡鈞常欲舉泰西數百年大賢所發明之公理。地球數十文明國所施行之舉動。盡取而納諸康黨。其愛康黨也至矣。然康黨則烏敢當此。〔日本泰晤士〕亦袒留學生。

留學生以國權問題。所關重大也。乃集議於會館。以滿場一致。決議蔡使放棄國權之罪。乃以電報彈劾之於北京朝廷。且飛檄各督撫。請蔡使之解任。此舉也。不過爲蔡使增一保案耳。雖然。是烏可以已。一國公僕。而濫用其權。以損害主人權利者。主人例得放逐之。雖其力未能。是固不可以已也。孔子之齋戒沐浴。以請討陳恆。何爲也。夫蔡鈞乃公僕中之輿臺么麼小醜焉耳。且主人不自知其爲主人之資格。則亦

已耳。苟其知之。則以多數之主人。斷無不能勝少數之悍僕之理。吾嘗讀歐西百餘年來之歷史。其革千載之積弊。建回天之偉業者。何一不從學生團結而來。遠徵諸法蘭西之巴黎。奧大利之維也納。近徵諸俄羅斯之聖彼得堡。葱葱哉。鬱鬱哉。學生之氣概。轟轟哉。烈烈哉。學生之事業。嗚呼噫嘻。何渠不若漢以暴制暴。非所貴也。故有文明思想者。常善以文明之手段。恢復其固有之權利。今次之舉。其近之矣。自立於無可訾議之地。以溫和之法。而請願於使署。以溫和之法。而集議於會館。以溫和之法。而要求於朝廷。此歐西人民所經由之路也。我中國國民運動之歷史。一見於乙未年日本議和時之公車上書。再見於庚子年立大阿哥時海外之飛電。並此而三矣。而此次之舉動。有次第。有法度。是國民運動力進化之明證也。吾欲爲中國前途賀。

檀香山賠款問題

庚子春。檀香山以治疫之故。焚燒人民財產數百萬。而吾華商居大半焉。初焚時。檀政府擔認賠償。乃至今年。毫無影響。蓋檀政府之力。實不足以辨此。故請求諸美國華盛頓政府。乞以國庫支辦云。今年美國議會。此案殆將通過。全檀僑民。鵠立以待涸轍之救。乃最後爲某議員所沮。尼竟於豫算案內。除去此項。今欲得賠款。不可不再望諸三年後之第五十八次議會。然五十七會議。可以否決。五十八會議。又安

係其不否決耶。且否決之數。十八九在意計中耳。若是乎。吾華商之數百萬血本。其遂已矣。

號稱第一等文明國。號稱自由政體之祖國。而其所行如是。直棍騙耳。直盜賊耳。先哲有言。兩不平等者。相遇。無所謂道理。權力卽道理也。斯言諒哉。吾聞南美洲之各地。數十年來。屢次革命。其革命軍。無論大小。無論成不成。而每暴動一次。則吾華商財產損害者。必以數百萬計。今已不知其幾千萬矣。而何有區區之檀島。雖然。我政府豈惟不問而已。並不知有此事。豈惟不問有此事而已。且並不知其地有中國人。豈有不知其地有中國人而已。恐並地球上。有此地而亦不知也。

檀香山之役。日本人所損失者。不過區區十數萬耳。然頃者。據所報告。則旅檀之日人。開大集議於領事館。決議特派二員。歸懇於政府。由日本政府與美國政府直接交涉。雖其果能有效與否。不可知。然爲一國公僕。受國民委託者。不當如是耶。若我華民。則何所呼籲。何所伸訴乎。無父而母之孤兒。在途中受他人之鞭笞呵斥。忍氣吞聲。並哭不敢。而何有爭辯。哀哉無國之民。哀哉無國之民。

民選領事問題

中國駐劄檀香山領事楊蔚彬。貪污殘暴。閹埠僑商。久欲得其肉以爲食。但顧全國體。不欲與爲難也。乃

楊黷貨無厭。竟串同奸僧。偷走鴉片私烟。計購稅值美銀五萬元。約墨銀十萬元又欲並其合夥之奸僧。所得一

部分之利益而奪之。夥忿忿洩其事。於是美政府根究全案。水落石出。並查有私帶不合例之人上岸之案多件。美政府乃照會北京政府。解其任。訊其罪。楊已去矣。

美政府知中國官場。爲魍魎魍魎之窟也。乃告檀島華商曰。吾願與商交涉。不願與官交涉。請爾等於闔埠中有望者。公舉一人焉。爲領事。若貴政府不認。吾國能必使認之。華商之有文明思想者。提及官之一字。輒鄙之。不以人類齒。故至今尙未肯徑諾云。雖然。此事殆非可以已。聞美政府之意。欲舉金山紐約馬尼刺諸地領事。皆一律照此法辦理云。

我政府所不欲派之人。而他政府強之使派。是國恥也。雖然。美人心目中。信用我國民。不信用我政府。是亦大國之風度也。夫政府既自取其侮。而國民又烏可役棄其責也。嗚呼。美國之舉動。視彼戢戢然媚腐敗官吏。越俎以代人壓制民權者。何如矣。

俄皇遜位之風說

近日各國報紙。屢言俄皇將有遜位之舉。其出於英報日本報者。或由於惡感情。殆不足聽。惟法國與俄聯盟。邦交最篤。當無誣詆之言。而月前巴黎某大報館。亦著論論此事。故關心時局者。深注目焉。此風說所自起。或言俄皇有革新之志。欲舉行立憲政體。開議會。與民更始。引用民間祕密黨。共參政事。使消內

患而俄太后及盈廷大臣皆大反對之。俄皇鬱鬱不能行其志。故欲遜位云。果爾則亦可謂天下事無獨必有偶矣。專制國之君權大率類是。可嘆。

俄羅斯與高麗

高麗今王自中日戰爭以後。託日本之宇下。而自加尊號曰皇帝。意氣揚揚。甚自得也。今年舉行卽位四十年大祝典。曾不自量。而欲妄比前英皇城多利亞六十年祝典之盛舉。照會各國。請派頭等公使來賀。各國無一應者。唯命駐使屆時致賀而已。惟俄國則慨然諾之。特派王爵某爲頭等全權賀使。不日可到。韓京云。噫。俄國外交政策之巧妙。乃至如此。可畏哉。

嗚呼劉坤一 嗚呼陶模

前後數日間。而兩江總督劉坤一逝。前兩廣總督陶模逝。朝廷失兩老臣。於現今政界。不免有多少影響。雖然。老臣有三種。一曰老鍊者。二曰老猾者。三曰老朽者。若英國之格蘭斯頓。德國之俾士麥。可謂老鍊者也。若中國之李鴻章。可謂老猾者也。若其人物之價值。於此兩資格。一無所合。皆謂之老朽。老鍊之人。以一身係一國之安危。苟失一焉。則誠可爲國家痛惜。老猾之人。雖未必能爲國家福。然其一舉一動。皆大有關係於政治界。故其死也。亦常於國中之現象。有所變動。若老朽之人。則有之不爲多。無之不爲少。

失一人焉。失十人焉。失百千萬人焉。論時局者。勿措意焉可也。

論人貴平心。不可有所過譽。有所過毀。今請略論兩人。

劉坤一之功名。得自平髮一役。其實彼當時在湘軍中。第三四等人物耳。以後進晚起高壽。值前輩彫謝之後。故獨尸大位。中東一役。其狼狽顛沛之狀。聞者噴飯。然以江南爲湘軍根據地。故江督爲湘人世襲權。劉之得以久踞要津者。以此。拳匪之亂。立東南保護之約。不無小功。然自此以往。外國在南方之權力範圍。亦愈益確立矣。近年以來。惟爲外人所謳歌者。則能有大權於國中。劉近日所以保得其位置。隆隆日上者。由其媚外政策之日爛熟也。

陶模昔在邊陲。無所表見。及移節兩廣後。曾數上奏議。言人所不敢言。士論頗許之。雖然。陶也者。無氣力之士也。其所見。或有以加於諸老朽之上。而實行力之薄弱。亦與彼等相類。觀一年來廣東之政界。可見也。聞其死因。蓋有數端。爲大學堂總教習事。張之洞有信切責。梁鼎芬有電辱罵。羞憤之極。一也。又聞曾有南洋某商。願自捐八萬金。辦武備學堂。陶已許之。已收之矣。及乞骸骨後。德壽受代。竟以其款入私囊。陶詰責德。德以庫帑支絀爲辭。某商詰責陶。陶不能應。遂嘔血云。二也。此雖小事。亦速其死之原因也。要之陶無氣力之人也。使其稍有氣力。其末路所成就。當不至若是。

吾謂劉陶之逝。朝廷失兩老臣。不足爲朝廷惜。而張之洞失兩傀儡。最足爲張之洞惜。然以張之洞之才。略居今日之地位。又安所往而不得傀儡。然則亦可無惜也。

獎勵歐美游學

日者有懿旨。獎勵游學歐美。大哉王言。如絲如綸矣。然日本時事新報北京特電。乃云皇太后以日本游學生。好言民權自由。此風不可長。故欲移諸歐美以易之也。吾以爲我政府雖愚。當亦不出此下策。夫日本之學風。皆自歐美來也。日本未受歐美學以前。無解民權自由之義者。及歐美學日盛。而此義亦日盛。雖然。日本猶未能得民權自由之真相也。學於人者。必不能如其所學者。事理然也。今我國若能廣派學生於民權自由之發祥地乎。深可爲吾國前途賀矣。

匈加利國父百年紀念祭

西歷九月十九日。匈加利人舉行獨立「國父」誕生百年紀念祭。於其布打彼斯得京城。實匈加利獨立以來。最大之祝典。其日全部國民。上自官署及銀行各公司。下至負販騶卒婦孺。莫不歇業休沐。共赴盛會。全國近都遠鄙之民。扶老攜幼以至者。不下十數萬。到處旌旗飄揚。照耀天日。全國新聞紙。皆吮筆伸紙。謳歌其國父之事業。以爲獨立自由祝。卽前此反對之報館。至是亦竭誠贊嘆。靡有異詞。於戲盛矣。

國父爲誰。則五十三年前。亡命於突厥。八年前。卒於意大利之路易噶蘇士也。

其日上午九點鐘。舉行祝典於波羅的士丹教會堂。噶公遺族二人。及全國有名望諸人物。各團體之代表者。各府州縣之委員咸集。禮畢。復同詣噶公遺墓。舉行紀念碑開工之典。現任首相伯爵阿菩尼爲先導。其餘議院議員。市長及市會員。各團體之代表。各地方之委員等。絡繹相繼。車馬凡亘數里。直達墓所。先獻花環。誦讚美之歌。首相繼起演說。親置二巨石以爲碑礎。乃復齊唱讚美歌。懽聲雷動。禮畢。同見噶公老友狄埃兒將軍。及公子遺族。爲國民深表感謝云。

其日全都街衢。安靜無譁。學生之自遠近來集者。各執國旗及花環。列成隊伍。誦愛國之歌。和以軍樂。時有童顏鶴髮之父老。扶杖來觀。感極而掩泣者。則曾目擊千八百四十八年往事之遺民也。入夜。市民復列炬火。結樂隊。游行市中。以表祝意。金吾不禁。玉漏莫催。全市皆醉人云。於戲盛矣。

嗚呼。匈加利而僅爲今日之匈加利。殆非噶公之志也。故奧匈合併後。而公遯跡於外國。不入政界者。猶二十餘年。夫以愛國熱誠若公者。豈其忍惘然於故山猿鶴焉。故爾爾者。毋亦猶有魯仲連陷海之餘痛也。雖然。匈加利雖不能爲千八百四十八年之匈加利。而猶得爲千八百六十七年以後之匈加利。公亦可以瞑矣。彼國民之愛公念公也如是。他日必有能繼公之志。百尺竿頭。更進一步者。大亦可以瞑矣。

南洋公學學生退學事件

十月十七日。上海南洋公學特班。政治班。頭班。二班。三班。四班。五班。六班。學生二百餘人。同時退學。實中國國民前途關係第一重要事件也。其始末及善後事宜。略見本號餘錄門。茲不具列。本社記者聞此。且憤且憂。且喜且懼。不嫌越俎。略陳蠡見。爲國中辦學堂者告。且爲國中學生團體告。

人羣之所以進步。有二要素。一曰秩序。二曰自由。斯二者相反而相成。學校者最能代表此二要素之精神者也。騷擾衝突。最足以破壞秩序。全國學校。而屢有此等警報。必非現象之良者也。雖以鄙人之好動好競。亦必非樂聞有此等事。且不願國中今後屢有此等事。雖然。今茲之役。吾不能不敬服南洋公學學生之志節氣魄。而深爲公學辦事諸人羞也。凡一團體之有破壞舉動也。必非一二人之所能爲。亦非一二事之所可致。必有遠因總因。伏之許久。彼其所含破壞之種子。既多且熟。如滿屋爆藥。待火星而陡發焉。偶有一二至微至小之近因分因。爲之一點一撥。而其末流。雖橫決而不可制。不知者以爲是區區小節。豈值小題大做。無端而爲此平地風波之舉。以爲是其人之囂張而桀驁也。曾亦思美國所以獨立。豈其因區區之印稅條例。日本之所以討幕。豈其因區區之攘夷遠勅也。此事雖微。而其獨立討幕之變。固始終不可免。通覽古今萬國破壞之歷史。無論大而一國。小而一初級之團體。其革命風潮之進播。皆若

是焉耳。今茲之變。以區區一墨水壺事件。而波瀾乃至於是。使除墨水壺事件外。而無他原因也。則吾不能不責備諸學生之無忍耐無秩序。雖然。吾信此區區事件。必不足以動第五班全班生之公憤。且動公學全學生之公憤也。彼其辦學堂之意。若曰。今日科舉之制漸廢矣。學校之論漸昌矣。吾此學堂。爲子祿之階梯。爲終南之捷徑。吾安往而不得學生。以此一念。而其待學生也。固已犬馬畜之。娼優視之。以爲彼輩皆搖尾乞憐於我而來也。以此一念。固已與國民教育主義不並容。以此一念。則其他萬物束縛馳驟。今學生萬不能堪之事。固已日積月進。而不知所極。使學生而終無半點國民思想也。亦何難靦然而安焉。而今日世界摩激之風潮。固不許爾爾。今日我國民進步之程度。固不許爾爾。以此相持。其何一日之能安也。嗚呼。此風潮日烈一日。此程度日進一日。吾恐數年以後。豈惟南洋公學舉國之學校。亦將如是焉矣。又豈惟舉國之學校。凡國中一切團體。亦皆如是焉矣。

當道者每以此爲不過二百餘少年之浮躁舉動也。以吾所聞。兩年以來。若杭州。若廣州。若其他諸省。此等小小騷動。既已屢見不一見。雖其間團體不堅。輒被挫折失敗。而其機固已大動矣。在辦學校者之意。豈不以學生不遵規則。萬方同慨。非我等之責任也。夫學校以規則秩序爲貴。使學生而事事與本校之主權爲敵。與本校之成規爲敵。則甯可謂學生之本分焉。雖然。亦視其成規爲何如耳。歐美人待黑奴之

規則亦不可不謂之規則。人類待牛馬之規則亦不可不謂之規則。以此而相梏焉。其誰能堪也。學生之智識程度。視總辦教習已高數級。總辦教習不自揣。靦然擁臬比以臨之。不甯惟是。反媚嫉焉。而思弄卑劣之手段以犄之。有所挾焉。而以呼爾蹴爾之聲色臨之。此而能受。其爲無人心者矣。故吾非欲盡爲學生迴護也。使辦學校者而能自省焉。改良焉。其規則悉根於公理。悉參酌於現今各文明國所通行之大理。其教習皆略通常世之務。有相當之學力。於此而其學生猶囂張焉。浮動焉。事事相與爲難焉。則雖移郊移遂。而豈爲過也。而無如今日之辦學堂者。殊不足以問執人口也。嗚呼。豈惟一校。卽一國亦如是矣。同一無政府黨也。在美國人皆厭之惡之。在俄國則人皆憐之慕之。以其所對待者不同也。嗚呼。履霜而惕堅冰。月暈而思颭颺。吾爲南洋公學悲。吾爲南洋公學懼。吾尤慮可悲可懼之事。什伯於南洋公學者。更在其後也。任教育事業之人其念之。任更重大於教育事業之人其念之。頗聞繼任之人。懲於前事。欲更張一二小小規則。以籠絡學生。或置規則於可有可無之列。貌爲癡聾。一任所至。以是爲善後之政策云。嘻。誤矣。吾固言此次之風波。非由最近一二之小原因而起。苟不從精神上大加洗刷。雖東補西苴。日日取小節而改之。何益也。且團體者。必非以其規則而可存立者也。苟有規則而不行。則與無規則等。而學堂已非復學堂矣。立學之意。所以訓練國民。國民之要素不一。而守規則

重秩序。實爲其要點。如之何其可以置之。若有若無也。彼持此政策者。豈不以爲學生囂張不靖。頑梗不化。終非可以規則範圍之。吾不如任之焉。毋以身爲怨府也。顧吾信我國之少年。必非有蔑規則好破壞之性質。苟規則而良焉。而適應於文明程度焉。則正宜以嚴厲行之。絲毫無所假借。吾知其未有不能受者也。苟如是而猶有不受者焉。則必其爲秩序之蝨賊者也。其力固斷不能動全體。而與辦事人爲敵。而又何足爲慮也。而不然者。初旣以惡規則。生出少年不平抗爭之心。繼乃以無規則。而養成少年蔑視秩序之習。則少年之墮落。真不可救。而吾國之前途。更不可問矣。

抑吾更欲爲學生讀君進一言。西哲有言。惡規則固惡也。而猶勝於無規則。今諸君以不忍於壓制。犧牲其種種利益。以演此活劇。誠可欽慕。願吾望諸君以此精神。以此魄力。必別造一新團體。而使之由惡規則。變爲良規則。無使之由惡規則。變爲無規則。頃見滬上各報。知諸君有共和學校之設置。其前途若何。非局外所得揣測。要之勿爲同情者所痛。而爲反對者所快。此則鄙人所以爲諸君勸。兼爲一國之青年勸者也。竊嘗論之。教育與政治。其性質大異。其在政治。則人人皆治人者。人人皆受治於人者。故治者與受治者同權。而治者應受受治者之監督。其在教育。則教者爲一級。受教者爲一級。故教者與受教者不能同權。而受教者應服教者之監督。今諸君之以共和名新校也。不知共和其教育之主義歟。抑共和

其教育之法式歟。共和其教育之結果歟。抑共和其教育之現象歟。由前之說。吾爲新校之前途賀。由後之說。吾爲新校之前途弔。且豈惟弔新校而已。吾中國教育之事業。且於此生頓挫。吾中國少年之性質。且於此生影響。嗚呼。諸君之責任。亦其重哉。諸君之地位。亦其艱哉。

又聞公學當局者。今頗以柔滑手段。欲籠絡諸君歸學。以解嘲於萬一。吾知諸君中。必無有受其愚者也。苟其有之。則是此一段民權萌芽之歷史。被點污於此輩之手。非直同學之罪人。又一國之罪人也。拿破崙言用兵之術曰。兵之勝敗。全在最後之五分鐘而已。今諸君以最文明之舉動。以與文明之敵相抗。吾知諸君之初志。非爲一己計。實爲一國教育之前途計也。使諸君而堅忍焉。持久焉。始以破壞。而終以建設焉。則一國之學生團體。皆將有所瞻仰。有所踵繼。使學生之資格地位。進而益上。而彼所謂腐敗之教育家。亦將知所畏。而稍有一二之自省之諸君。今日之事。其必爲將來中國教育史上。一最大之紀念。無可疑也。而不然者。彼文明之敵。將快言曰。此少年氣盛輩。有文明思想者。不過如是如是。任其跳擲。少選。且將帖然矣。於是益無所憚。以自恣。豈惟南洋公學不能改良。且恐他校之腐敗者。益更腐敗。而其影響。又不徒在教育事業而已。嗚呼。吾聞俄皇近者。悉召回西伯利亞遣戍之青年矣。俄國大學中。昔由警察部監督者。今則改歸校中團體自監督矣。天下之可敬可愛可崇拜者。孰有過於俄羅斯學生者乎。

吾意我黃族摯誠強毅之男兒。其必不讓後進之斯拉夫族以獨步矣。

海外志士之義舉

頃者。廣東旱潦。疾疫饑饉厲行。民間生計界之現象。慘不忍觀。一月前由。各善堂飛電海外告急。吾國民旅居北美洲者。不下十餘萬人。電至。領事及所謂紳董者。遲回莫應。惟金山大埠保皇會中志士。卽夕集議。立捐二千餘金。仍復由有力者先墊千餘。卽日電匯返國。頃尙日日勸捐。心力俱瘁云。又美洲英屬加拿大域多利溫哥華咸水等處。亦卽日捐集三千餘金。立即電歸。復由各埠總理。徧傳各支會。使急祖國之難。聞現計美洲各保皇會。已捐集萬餘。此後尙源源籌捐云。此可見有團體則事易集。而海外諸國民愛國之心。誠加人一等矣。

咄！袁世凱劾張之洞！！

頃日本朝日新聞電報。記有袁世凱嚴劾張之洞事。雖未知確否。然殆可信。果爾。則袁世凱真好男兒。袁世凱真好男兒。

據傳其所劾者。有好大喜功。志高才疏等語。此天下之公論。人人同知者也。惟其所重。在其濫借外債。損傷國權一事。可謂特識。此事爲亡中國一大罪案。而前此政論家。熟視無覩焉。不特政府未一慮及。言官

未一言及。卽報館亦未一論及也。吾昔深痛之。深憂之。去年曾著滅國新法論一篇。直揭其罪。今節錄以供參考。

（前略）中國厯然大物。精華未竭。西人固未遽肯以前此之待埃及者相待。而要之債主之權。日重一日。則中央財政之事業。必至盡移於其手。然後快。是埃及覆轍之無可逃避者也。而庸腐奸險。貌託維新之強臣如張之洞者。猶復以去年開督撫自借國債之例。借五十萬於英國。置兵備以殘同胞。又以鐵政局之名。借外債於日本。使其意豈不以但求外人之我信。驟得此額外之巨款。以供目前之揮霍。及吾之死也。或去官也。則其責任非復在我云爾。而豈知其貽禍於將來。有不可收拾者耶。使各省督撫皆效尤張之洞。各濫用其現任之職權。私稱貸於外國。彼外國豈有所憚而不敢應之哉。雖政府之官吏百變。而民間之脂膏固在。彼噬我吭。而搥我胸。甯慮本息之不能歸趙。此樂貸之。彼樂與之一省五十萬。二十行省不旣千萬乎。一年千萬。十年以後。不旣萬萬乎。此事今初起點。論國事者皆熟視無覩。而不知卽此一端。已足亡中國而有餘。而作俑者之罪。真擢髮難數矣。（後略）

鄙人昔爲此論。非有惡於其人。而故爲尋癥索垢之言也。誠以遺毒無窮。爲中國前途計。不得不大聲疾呼也。聞張之洞自受事南洋以後。甫下車。卽又與上海某洋商議借巨款。其播毒種以便私圖之野心。方

興未艾。此次袁能直揭之。其識卓矣。此實張氏千萬年不可磨滅之罪狀。頃張氏忽有開去署缺之旨。論者謂袁之言。與有力云。中國政界。或從此添一段活氣。

張之洞借款問題

張之洞開去兩江署缺。而無飭回湖廣本任之明文。內幕中必有一段歷史矣。據日本報言。以借款問題。故外務部告英公使。以政府不負責任。其如何償還。皆責成張之洞云云。審如是也。雖化張之洞之爲千百身。一一身中千百毛孔。一一毛孔中千百銀錠。其亦無以爲贖也。以此苦張之洞。而懲將來之效。尤未始不可。然此事願可行乎。恐張氏不久。必有借外國之力以復其位者矣。張氏何足輕重。而失國權者。其又一事也。又聞有電詢鄂撫端方。若能代張籌還。則實授以鄂督。不能則飭張回任。而別置大員以監督之。端氏其將何以應此耶。張氏回任被監督。大妙。彼最惡人言自由。請君入甕。嘗此不自由之風味。

咄！張之洞劾梁鼎彜！！

官吏社會之鬼域。實千種萬種。不可思議。炙手可熱。咳唾珠玉之武昌知府梁鼎彜。盤踞湖北要津者十餘年。千辛萬苦。千迴萬折。乃始揭開假臉。而蚤得此一官。見將軍而長揖。對嬖豎而足恭。一電而殺陶模。一語而懼劉坤一。豈非大丈夫得志於時者之所爲耶。天下崇拜之洞者。必並崇拜鼎彜。唾罵之洞者。必

並唾罵鼎蔡。洞與蔡殆三生石上不可解之緣矣。何圖近日忽聞有之洞劾梁鼎蔡事。其考語八字。則於才恃己舉動浮躁也。嘻異矣。吾欲語之洞曰。此八字者。公與鼎蔡共之者也。鼎蔡卽小之洞。之洞卽大鼎蔡。公得毋欲作自傳耶。

古詩曰。雨落不上天。水覆難再收。君情與妾意。各自東西流。昔日芙蓉花。今成斷根草。以色事他人。能得幾時好。又曰。君恩不可保。中道長棄捐。鼎蔡文人。得毋誦棄婦詞而惻惻耶。

又聞此事原因。蓋由之洞去鄂時。端方揚言先劾鼎蔡。後劾之洞。之洞懼。乃先劾以自贖云。端方劾之洞以求代。已奇。之洞劾鼎蔡以求免。尤奇。雖然。奈何奇。義和團之最大戎首。非劾剛毅載漪英年趙舒翹於外國政府。以自贖耶。是無以名之。名之曰不可思議而已。

陶方帥之死狀

陶方帥猶不失爲大吏中之賢者也。徒以魄力不足。故不惟不能有所施設。而竟以速其死。耗矣哀哉。客有自粵來者。述方帥之死狀。蓋方帥而不辭職。則可以不死。方帥本無甚病也。其患哮喘者已十年。近亦非有所增益也。而坐畏事之故。日日思退。請開缺之第三摺上。識者已知粵事益無可爲矣。開缺得許。電報到之日。德壽自兩點鐘往拜會。九點鐘始退。德見陶。向吶吶無多言。惟彼日則滔滔汨汨。若決江河。

一片皆教訓方帥語也。歷數其到粵後所辦各事。如此不妥。如何無狀。陶惟垂頭以聽。默不一語。及德退。陶遂嘔血數口。其夜梁鼎棻罵姚文倬之一電到。

姚時充廣東大學堂總辦。姚本一庸人也。鼎棻以其設廣雅書院。濂溪祠。故以一電罵之。文曰：妖言惑道，亂我廣東全省士民思食汝肉。

翌晨張之洞一電到。亦爲大學堂事。不知其語云何也。而方帥遂嘔血升許。時滿城官吏。滿署胥役。皆競趨走。伺新督之顏色。陶以一人孤立於督署中。已如贅疣矣。而德壽復間日一至以罵之。南洋某商捐八萬金。以建武備學堂。陶所竭力運動而得者也。德壽以償款支絀爲名。遂乾沒之。於是乎陶遂日日嘔血。不得不死矣。嗚呼。世態炎涼。一至於此。做官者其鑒之哉。

聞方帥思想甚發達。乃至語其幕府中人云。中國終不可以不革命。嗚呼。斯人也。而有斯言也。世界風潮。略可觀矣。然知而不行。與不知等。舉國皆陶方帥。而中國遂不可救。嗚呼。

賭國

廣東自張之洞將衛姓歸入正餉。始多盜。李鴻章督粵。患盜思治。有軍無餉。乃抽賭。以賭之所入者治盜。盜益盛。今者全粵皆賭。全粵皆苦盜矣。聯軍賠款無所出。各省步粵塵。官以賭率民。於是。有江南彩票。湖北彩票。江西彩票。浙江彩票者出。其風潮之驟盛。不啻歐洲中原。各國聞法國革命。則風起水湧。以相從也。至是粵東殆以賭風易天下。然其力猶未足以動中央政府。近者有政府大彩票之議矣。聞其價票百

金總額三千兆云。天下籌款之妙術。孰有過此耶。前者昭信股票。自恭親王以下。悉有報効。恐不久將有報効彩票之事。

昔人云。以國爲孤注。虛言耳。豈有若今日袞袞諸公之豪舉者耶。

吾今不忍復有獻言。諸君亦知生計學學理乎。一國之民。耗其日力精力財力於無窮之地者。國未有不敝。在諸君之意。殆以爲此賭焉者。其所擲之財。仍歸本國人。未足爲損也。姑無論以此爲賠款。財源勢不得不外溢。卽不外溢矣。而一國民皆狂醉於大賭小賭。生產力消盡。而國以亡矣。法國革命前。其已事也。中外之貨力亦滿地矣。得其道而用之。何求不得。其忍更以此阱民也。噫。

商務可興乎

頃北京政府有設商務部之議。且飭美使伍廷芳。向僑美華商招股云。伍之必無所得。吾敢斷言之。但政府設一商務部。遂可以興商務乎。商法不立。中國之民。終無可見天日之望。然非悉定諸種法律。則商法何所附。非變更政體。與民更始。則諸種法律何所行。吾故言今日中國言改革。無一事之能改革也。商務一端如是。他可推矣。故今日不爲新中國。則爲死中國。無中立之理也。

真正奴隸學堂

今日舉國之學堂。皆奴隸學堂也。而奴隸程度最高者。當必以廣東大學堂。首屈一指。廣東大學堂自梁鼎葵一電後。改聘半男半女之丁仁長爲總教習。丁以堂中舊有體操一科也。不喜之。改爲習禮。猶可言也。所習之禮維何。曰朝覲之禮。升降拜跪。猶可言也。次者爲見官之禮。若何唱喏。若何請安。猶可言也。次者爲跟班之禮。若何疊衣服。若何裝水烟。學堂教科。而至於裝水烟。豈不可以入天下古今萬國之無雙譜耶。聞在堂中。行步必須彎腰低頭。頭稍昂。輒記過。嗚呼。養奴隸不足責。何可更養肺病之奴隸耶。南洋公學之壓制程度。低於廣東大學堂萬倍。而公學學生。已演出此一段有名譽之大活劇。廣東大學堂諸君。遂以一秀才易跟班之樂耶。丁某畸形豎子。何足責。而粵東士風。真羞天下矣。嗚呼痛哉。粵其先亡哉。

委內瑞拉事件

近日風潮。全起於歐洲以外。此帝國主義自然之結果。不足爲異也。南非洲之事。方告終。南美洲之葛藤復大起。

去年以來。南美洲之伊阿脫哥倫比亞。委內瑞拉三共和國。其國民中。有謀三國之合併者。哥倫比亞政府反對之。伊阿脫政府亦不願與聞。惟委內瑞拉政府贊焉。於是委國與彼二國有違言。既而彼兩國民中。有不懌於委政府之政策者。遂互通氣脈。舉叛旗。英美德諸國政府。乘機以各收漁人之利。其關係頗

甚複雜。又外國人之僑寓其地者。復多陰助之。兩共和國之政府。不得已。乃逮其私助叛黨者而拘禁焉。此委內瑞拉事件之發端也。

近者英德兩國。責言於委內瑞拉政府曰。以汝之故。拘繫我民。其賠償其所損害焉。委政府不應。其民激昂殊甚。境內德國人所開之鐵道。禁其運行。市民至圍德使館。此事之曲。不在委政府。而在英德。盡人所同知也。而英國卒調兵艦。盡擊沉委國之微弱海軍。頃已不得不俯首帖耳。託美國政府爲公判。以解於二強。而二強制猶主張強制政策云。嗚呼。天下惟有強者之權利耳。豈惟委內瑞拉。

論日本解散下議院

陽歷十二月二十八日。日本下議院被解散。

日本自頒憲法以來。迄今凡十三年。召集議會者十七次。下議院被解散者五度。其一。明治二十四年辛卯。散之者爲松方內閣。其二。明治二十六年癸巳。散之者爲伊藤內閣。其三。明治三十年丁酉。散之者爲松方內閣。其四。明治三十一年戊戌。散之者爲伊藤內閣。其五。卽今度。散之者爲桂內閣。

解散議院者。政府與民間最後之決戰。而現內閣之死活問題也。前列舉五度之中。惟癸巳一役。於再選舉時。適遇中日之戰。全國一致以禦外侮。故伊藤內閣得以不蹶。自餘三度。皆議院方解散。而內閣隨以

覆亡。其在辛卯。則再選舉開會後。而松方內閣總辭職也。其在丁酉。則不待選舉後。而松方內閣已辭職也。其在戊戌。則再選舉後。不待開會。而伊藤內閣已辭其職也。今茲桂內閣之前途。又將如何。

解散議院者。民權進化之大消息也。有衝突然後有解散。有衝突然後有進化。凡立憲國公例。政府每建一政府。不可不求人民之協贊。下議院者。代表民意者也。故將其政策提出於議院。而得過半之贊成者。則謂之通過。得過半之反對者。則謂之不通過。既不得通過。則其政策萬不能施行。不能施行。則政府員當去其位。於此而政府員堅持所信。不肯舍去也。則其所以待議院者。惟有兩法。小則停會。大則解散。停會者。意謂使議員再熟思其利害也。解散者。停會之後。而議員之反對如故。則政府謂此或不過代議士之偏見。而非國民之真意。於是解其現任者。而命全國人民再選焉。亦名爲訴意見於國民。停會解散二者。皆以君主之名。用其特權以行之。實則皆由政府意也。解散後。必隨命再選舉。開臨時議會。再選舉後。而新議員之反對政府者。仍居多數。則國民之意響益可見矣。於是乎政府員吏不得不辭職。於是而仍欲不辭職。則命再解散。而三選舉亦可也。雖然。果爾者。則政府員之無恥極矣。終亦必亡而已矣。故再選舉而議案猶不得通過。則政府必辭職。其常也。日本前此之三度。皆若是矣。故立憲國之政府。萬不能舉其私意。以行厲民之策。苟爾爾者。人民一心戮力。與之決戰。政府未有能久尸者也。此之謂權在國民。

英國者。政黨政治之完全模範也。其國爲兩大政黨。一在朝。一在野。在朝黨。必其在議院占多數者也。若在野黨。易而占多數。則在朝黨不得不與之易位。蓋政府之廢置。一聽諸議院者也。故英人恆言曰。『巴力門之權。無事不可爲。除是使男變女。女變男耳。』極言一國大小之主權。皆在其手也。日本維新日淺。民權方在萌芽。故未能純然爲英國所謂政黨政治者。明治三十餘年間。政權皆在藩閥之手。藩閥者舊藩維新之役而嘗爵賞者也。其人以薩摩長門兩藩最多。雖然。人民智識政治思想。既漸發達。其機固不可以終遏。明治七八年以後。民主

革命之聲徧國中。十三年終頒發立憲之詔。而板垣大隈。皆以元勳下山。結集民間政客。互標旗幟。建國體而自爲之領袖。日本之有政黨。實始於開國會以前七八年也。雖然。其所謂政黨者。甚幼稚。結集不肅。機關不備。故經十餘年。猶不足以代內閣。然藩閥之爲政府者。固已常不得不與一有力之黨相提攜。以自固焉矣。其間所謂「超然內閣」者。日本有所謂超然內閣者。謂超然於諸黨之外。不相提攜也。則常岌岌若不甚安。否則議會屢解。而

政府屢蹶。民間勢力日高一日矣。然其天皇固非深喜政黨者也。故政黨力雖日盛。然猶未能直接獨力以當政府之衝。及明治三十一年戊戌。伊藤當國。以俄人逼還遼東一案。國民恥其損威。聲譽頓減。議院反對之者大半。於是伊藤解散議會。及總選舉時。自由進步兩黨合爲一名。曰憲政黨。併力以向之。伊藤察事不可爲。故不待再開院。而先辭職。而大隈板垣代之。是爲日本第一次之政黨內閣。是時民黨萬歲。

之聲徧國中。論者至稱爲第二之維新。云雖然自由進步兩黨之主義常枘鑿不相容者也。一旦以利害之故相聯合。其事固不可以久。果也不過六月。而憲政黨內潰。自進兩派復裂爲二。而第一次政黨內閣亦隨而亡矣。繼之者復爲藩閥。所謂山縣第二次內閣是也。山縣內閣與自由黨提攜。得以安者兩年有餘。山縣感激不自勝。而自由黨之驕態亦可掬。於是伊藤忽翩然下野。徧國中演說。倡革新政黨之議。未幾取板垣十餘年來經營慘淡之自由黨。一舉而奪之。更組織新黨。名曰立憲政友會。會既成。庚子九月。山縣拱手相讓。伊藤復喪之。是爲日本第二次之政黨內閣。是時進步黨之勢蘊然。政友會占大多數於議會中。宜若可以久矣。乃亦不數月。而政府內部復訮。政友會內閣又潰。繼之者卽爲今之桂內閣。其成立殆兩年於茲矣。至今日而始有解散議會之事。而風潮又將一變。此十年來日本世界之大略情形也。由此觀之。日本之進步固不時謂甚緩。開議會僅十三年。而民黨與政府衝突。至被解散者既五度。取政府而代之者亦既兩次。謂其民之無力焉不可也。雖然。政黨內閣既成立矣。且皆以大多數立於議院矣。而皆不能持久。或半歲而蹶。或七八月而蹶。其蹶也。又皆由自腐。而非有敵黨從而特之。然則謂其真有力焉。亦不可也。經此二役以後。遂使前此之謳歌政黨政治者。漸變爲厭倦政黨政治。或且疑政黨員之閱歷淺。而行政之智識有所不足。反不如藩閥之可以持盈保泰焉。謂非政黨之自取侮於人固不可也。

雖然立憲政治之必與政黨爲緣勢也。其頃向固漸趨於彼端。欲避不得避。桂內閣之以「超然」立於今日。其能安然一年有餘。亦云幸矣。果也。遂有今度大衝突之事。

此次最大之爭點。則地租徵增繼續案也。政府提出此案。而兩政黨皆反對之。是以決裂。其案之始末內容。今勿具論。要之反對此案者。進步黨素所持之主義也。而政友會則新表同情。是以前此常相柄鑿之兩黨。政友會即自由黨之化身。身向與進步黨爲政敵。今忽提攜爲聯合軍。以向於政府。若此者。政府之所不及料也。兩黨既提攜矣。

於議會既占全數矣。論者以爲政府必更其主義。退讓以求調停。而政府強硬不屈。交涉不諧。而至停會。停會不已。而至解散。若此者。又兩黨之所不及料也。政府之強硬也。驕也。何驕爾。以其新與強英結同盟。自以爲功也。此其事與戊戌之伊藤內閣頗相類。伊藤內閣當時之強硬也。亦驕也。何驕爾。以新戰勝我。而自以爲功也。當時伊藤政府。且不能與大勢敵。今內閣可想矣。

議會之強硬也。恃聯合也。此其事亦與戊戌時之議會相類。至其再選舉再開會時之形勢。果何如。則非今日所能知也。以兩大政黨之力。同傾政府。則政府自顧。不得不蹶。即不遽蹶者。更解散一度焉。其蹶亦必矣。若蹶後而繼之者。仍爲超然內閣乎。將爲政黨內閣乎。果爲政黨也。則爲兩黨聯合乎。抑一黨獨立乎。非今日所能預言也。而今日兩黨之交涉。日親一日。其選舉至互相避。互相讓。則雖非如戊戌時之合

兩黨爲一黨。然相去亦不遠矣。意者數月以後。日本將有第三次聯合政黨內閣之出現乎。未可知也。雖然。聯合內閣。必不能久立。此立憲政治家所經驗也。憲政黨往事。亦其前車矣。兩黨首領。夫既熟知之。然則後此之人於何途。果有非旁觀人所能逆觀者也。雖然。自今以往。日本藩閥之燄將日衰。而日趨於政黨政治。此吾所敢言也。彼伊藤者。向來藩閥中最有力者也。而今已立於反對之地位。吾非以伊藤之進退卜輕重。然其機勢可觀也。民權進步之大勢。不得不如是也。

他人之內政。與吾最無與者也。然觀此可以測世界進化自然之大運焉。故略述一二。以爲內地人士之欲知外事者。告其久旅此邦之人。讀之。是不啻野人之語其曩也。抑吾與彼之政府。彼之政黨。兩無所憎好也。而聞其民黨之聯合之衝突之將勝利也。則色然若有喜者。然吾不知何心歟。

分類飲冰室文集全編

卷二十

雜著二



附錄

■異哉所謂國體問題者

秋霖腹疾。一臥兼旬。感事懷人。百念灰燼。而戶以外甚囂塵上。喧然以國體問題聞。以厭作政譚如鄙人者。豈必更有所論列。雖然。獨於茲事。有所不容已於言也。乃作斯篇。吾當下筆之先。有二義當爲讀者告。其一當知鄙人原非如新進耳食家之心醉共和。故於共和國體非有所偏愛。而於其他國體。非有所偏惡。鄙人十年來夙所持論。可取之以與今日所論相對勘也。其二當知鄙人又非如老輩墨守家之斷斷爭朝代。首陽蕨薇。魯連東海。此個人各因其地位。而謀所以自處之道。則有然。若放眼以觀國家尊榮危亡之所由。則一姓之興替。豈有所擇。先辨此二義。以讀吾文。庶可以無蔽而適於正鵠也。

吾自昔常標一義以告於衆。謂吾儕立憲黨之政論家。只問政體。不問國體。驟聞者或以此爲取巧之言。不知此乃政論當恪守之好則。無可踰越也。蓋國體之爲物。既非政論家之所當問。尤非政論家之所能問。何以言乎不當問。當國體徬徨歧路之時。政治之一大部分。恆呈中止之狀態。殆無復政象之可言。而政論更安所麗。苟政論家而牽惹國體問題。故導之以入徬徨歧路。則是先自壞其立足之基礎。譬之欲

陟而捐其階。欲渡而舍其舟也。故曰不當問也。何以言乎不能問。凡國體之由甲種而變爲乙種。或由乙種而復變爲甲種。其驅運而旋轉之者。恆存夫政治以外之勢力。其時機未至耶。絕非緣政論家之贊成所能促進。其時機已至耶。又絕非緣政論家之反對所能制止。以政論家而容喙於國體問題。實不自量之甚也。故曰不能問也。豈惟政論家爲然。卽實行之政治家。亦當有然。常在現行國體基礎之上。而謀政體政象之改運。此卽政治家唯一之天職也。苟於此範圍外。越雷池一步。則是革命家或陰謀家之所爲。非堂堂正正之政治家所當有之事也。其消極的嚴守之範圍。則既若是矣。其積極的進取之範圍。則亦有焉。在甲種國體之下。爲政治活動。在乙種反對國體之下。仍爲同樣之政治活動。此不足成爲政治家之節操問題。惟犧牲其平日政治上之主張。以售易一時政治上之地位。斯則成爲政治家節操問題耳。是故不問國體只問政體之一大義。實徹上徹下。而政治家所最宜服膺也。

夫國體本無絕對之美。而惟以已成之事實。爲其成立存在之根原。欲憑學理爲主奴。而施人爲的取舍於其間。寧非天下絕癡妄之事。僅癡妄猶未足爲深病也。惟于國體挾一愛憎之見。而以人爲的造成事實。以求與其愛憎相應。則禍害之中於國家。將無已時。故鄙人生平持論。無論何種國體。皆非所反對。惟在現行國體之下。而思以言論鼓吹他種國體。則無論何時。皆反對之。昔吾對於在君主國體之下。而鼓

吹共和者。常施反對矣。吾前後關於此事之辨論。殆不下二十萬言。直至辛亥革命既起。吾於其年九月。猶著一小冊。題曰新中國建設問題。爲最後維持舊國體之商榷。吾果何愛於其時之皇室者。彼皇室之。僂辱我。豈猶未極。苟微革命。吾至今猶爲海外之僂民耳。後以當時皇室政治。種種予人以絕望。吾非童。財。吾非聾。曠。何至漫無感覺。顧乃冒天下之大不韙。思爲彼匈垂絕之命。豈有他哉。以爲若在當時現行。國體之下。而國民合羣策羣力以圖政治之改革。則希望之遂。或尙有其期。舊國體一經破壞。而新國體。未爲人民所安習。則當驟然蛻變之數年間。危險苦痛。將不可思議。不幸則亡國恆于斯。卽幸而不亡。而。緣此沮政治改革之進行。則國家所蒙損失。其何由可贖。嗚呼。前事豈復忍道。

吾請國中有心人。試取甲辰乙巳兩年新民叢報中之拙著。一覆觀之。凡辛亥迄今數年間。全國民所受。之苦痛。何一不經吾當時層層道破。其惡現象循環迭生之程序。豈有一焉能出吾當時預言之外。然而。大聲疾呼。垂涕婉勸。遂終無福命以荷國民之嘉納。而變更國體所得之結果。今則旣若是矣。

今喘息未定。而第二次變更國體之議。又復起。此議起因之真相何在。未吾敢深知。就表面觀之。乃起於。美國博士古德諾氏一席之談話。古氏曾否有此種主張。其主張之意何在。亦非吾所敢深知。〔古氏與。某英文報記者言。則謂並未嘗有此主張云〕。顧吾竊有感者。古氏論中各要點。若對於共和君主之得。

失爲抽象的比較。若論國體須與國情相適。若歷舉中美南美墨葡之覆轍。凡此諸義。本極普通。非有甚深微妙。何以國中政客如林。學士如鯽。數年之間。並此淺近之理論事實而無所覺識。而至今乃忽借一外國人之口以爲重。吾實惑之。若曰。此義非外國博士不能發明耶。則其他勿論。卽如鄙人者。雖學識謏陋。不逮古博士萬一。然博士今茲之大著。直可謂無意中與我十年舊論同其牙慧。特其透關精悍。尙不及我什分之一百分之一耳。此非吾妄自誇誕。坊間所行【新民叢報】【飲冰室文集】【立憲論與革命論之激戰】【新中國建設問題】等不下百數十萬本。可覆按也。獨惜吾睛不藍。吾髯不赤。故吾之論。宜不爲國人所傾聽耳。夫孰謂共和利害之不宜商權。然商權自有其時。當辛亥革命初起。其最宜商權之時也。過此以往。則殆非復可以商權之時也。【湖口亂事繼起正式大總統未就任列國未承認共和時。或尙有商權之餘地。然亦僅矣】。當彼之時。公等皆安在。當彼之時。世界學者比較國體得失之理論。豈無一箸述足供參考。當彼之時。美墨各國。豈皆太平宴樂。絕無慘狀。呈現以資我龜鑑。當彼之時。迂拙愚戇如鄙人者。以羈泊海外之身。憂共和之不適。著論騰書。淚枯血盡。【吾生平書札不存稿。今無可取證。然得吾書者當自知之。吾當時有詩云。報楚志。易得存。吳計恐疏。又云。茲括安。可觸弛。恐難復。張又云。讓皇居其所。古訓聊可式。自餘則有數論寄登羣報也】。而識時務之後傑。方日日以促進共和爲事。謂共

和爲萬國治安之極軌。謂共和爲中國歷史所固有也。嗚呼。天下重器也。可靜而不可動也。豈其可以翻覆嘗試。廢置如弈棋。謂吾姑且自埋焉。而預計所以自捐之也。譬諸男女婚媾。相攸伊始。宜慎之又慎。萬不可孟浪以失身於匪人。倘陷危機。則家族親知。臨事犯顏以相匡救。宜也。當前此饒有審擇餘地之時。漫置不省。相率慫恿以遂苟合。及結褵已歷年所。乃日聒於其旁曰。汝之所天。殊不足以仰望而終身也。愛人以德。宜如是耶。夫使共和而誠足以亡國也。則須知當公等興高彩烈以提倡共和。促進共和之日。卽爲陷中國於萬劫不復之時。諺有之。既有今日。何必當初。人生幾何。造一次大罪孽。猶以爲未足。忍又從而益之也。夫共和之建。曾幾何時。而謀推翻共和者。乃以共和元勳爲之主動。而其不識時務。猶稍致留戀於共和者。乃反在疇昔反對共和之人。天下怪事。蓋莫過是。天下之可哀。又莫過是也。

今之論者。則曰與其共和而專制。孰若君主而立憲。夫立憲與非立憲。則政體之名詞也。共和與非共和。則國體之名詞也。吾儕平昔持論。只問政體。不問國體。故以爲政體誠能立憲。則無論國體爲君主爲共和。無一而不可也。政體而非立憲。則無論國體爲君主爲共和。無一而可也。國體無政體。本截然不相蒙。謂欲變更政體。而必須以變更國體爲手段。天下寧有此理論。而前此論者。謂君主決不能立憲。惟共和始能立憲。〔吾前此與革命黨論戰時。彼黨持論如此。〕今茲論者。又謂共和決不能立憲。惟君主始能

立憲。吾誠不知其據何種論理以自完其說也。吾今請先與論者確定立憲之界說。然後徐察其論旨之能否成立。所謂立憲者。豈非必有監督機關與執行機關相對峙。而政權之行使。常蒙若干之限制耶。所謂君主立憲者。豈非以君主無責任爲最大原則。以建設責任內閣爲必要條件耶。既認定此簡單之立憲界說。則更須假定一事實以爲論辯之根據。吾欲問論者以將來理想上之君主爲何人。更質言之則其人爲今大總統耶。抑於今大總統以外。而別熏丹穴以求得之耶。〔今大總統不肯帝制自爲。既屢次爲堅決之宣言。今不過假定以資辯論耳。不敬之罪吾所甘受也。〕如曰別求得其人也。則將置今大總統於何地。大總統盡瘁國事既久。苟自爲計者。豈不願速釋此重負。頤養林泉。試問我全國國民。能否容大總統以自逸。然則將使大總統在虛君之下。而組織責任內閣耶。就令大總統以國爲重。肯降心相就。而以全國託命之身。當議會責任之衝。其危險又當何若。是故於今大總統以外。別求得君主。而謂君主立憲即可實現。其說不能成立也。如曰卽戴今大總統爲君主也。微論我大總統先自不肯承認也。就令大總統爲國家百年大計起見。甘自犧牲一切。以徇民望。而我國民所要求於大總統者。豈希望其作一無責任之君主。夫無責任之君主。歐美人常比諸受豢之肥脂耳。優美崇高之裝飾品耳。以今日中國萬急之時局。是否宜以如此重要之人。投諸如此閑散之地。藉曰今大總統不妨爲無責任之君主也。而責

任內閣之能否成立。能否適用。仍是一問題。非謂大總統不能容責任內閣生存於其下也。現在國中欲求具此才能資望之人。足以代元首負此責者。吾竟苦未之見。蓋今日凡百艱鉅。非我大總統自當其衝。云誰能理。任擇一人而使之代大總統負責。微論其才力不逮也。而威令先自不行。昔之由內閣制而變爲總統制。蓋適應於時勢之要求。而起廢之良藥也。今後一兩年間之時勢。豈能有以大異於前。而謂國體一更。政制遂可隨之翻然而改。非英雄欺人之言。卽書生迂闊之論耳。是故假定今大總統肯爲君主。而謂君主立憲卽可實現。其說亦不能成立也。

然則今之標立憲主義以爲國體論之護符者。除非其於立憲二字。別有解釋。則吾不敢言。夫前清之末葉。則固自謂立憲矣。試問論者能承認否。且吾欲問論者挾何券約。敢保證國體一變之後。而憲政卽可實行而無障。如其不然。則仍是單純之君主論。非君主立憲論也。既非君主立憲。則其爲君主專制。自無待言。不忍於共和之敝。而欲以君主專制代之。謂爲良圖。實所未解。今在共和國體之下。而暫行專制。其中有種種不得已之理由。犯衆謗以行之。尙能爲天下所共諒。今如論者所規畫。欲以立憲政體與君主國體爲交換條件。使其說果行。則當國體改定伊始。勢必且以實行立憲宣示國民。宣示以後。萬一現今種種不得已之理由者。依然存在。爲應彼時時勢之要求起見。又不得不仍行專制。吾恐天下人遂不復

能爲元首諒矣。夫外蒙立憲之名。而內行非立憲之實。此前清之所以崩頽也。詩曰。殷鑒不遠。在夏后之世。論者其念諸。

且論者如誠以希求立憲爲職志也。則曷爲在共和國體之下。不能遂此希求。而必須行曲以假塗於君主。吾實惑之。吾以爲中國現在不能立憲之原因。蓋有種種。或緣夫地方之情勢。或緣夫當軸之心理。或緣夫人民之習慣與能力。然此諸原因者。非緣因行共和而始發生。卽不能因非共和而遂消滅。例如上自元首。下及中外大小獨立官署之長官。皆有厭受法律束縛之心。常感自由應付爲便利。此卽憲政一大障礙也。問此於國體之變不變有何關係也。例如人民絕無政治興味。絕無政治智識。其道德及能力皆不能組織真正之政黨。以運用神聖之議會。此又憲政一大障礙也。問此於國體之變不變有何關係也。諸類此者。若令吾悉數之。將累數十事而不能盡。然皆不能以之府罪於共和。甚章章也。而謂共和時代不能得者。一入君主時代卽能得之。又謂君主時代能得者。共和時代決不能得之。以吾之愚。乃百思不得其解。吾以爲中國而思實行立憲乎。但求視新約法爲神聖。字字求其實行。而無或思遜於法外。一面設法多予人民。以接近政治之機會。而毋或墜其智識。闕其能力。挫其興味。壞其節操。行之數年。效必立見。不此之務。而徒以現行國體爲病。此朱子所謂不能使船嫌溪曲者也。

主張變更國體者。最有力之論據。則謂當選舉總統時易生變亂。此誠有然。吾十年來不敢輕於附和共和。亦以此。論者如欲自伸其現時所主張。以駁詰我。吾勸其不必自行屬稿。不如轉錄吾舊著。較爲痛快詳盡也。今幸也。茲事既已得有比較的補救良法。蓋新頒之大總統選舉法。事實上已成爲終身總統制。則今大總統健在之日。此種危險問題。自末由發生所憂者。乃在今大總統千秋萬歲後事耳。夫此事則豈復國民所忍言。然人生血肉之軀。卽上壽亦安能免。固無所容其忌諱。今請遂爲毋諱之言。吾以爲若天佑中國。今大總統能更爲我國盡瘁至十年以外。而於其間整飭紀綱。培養元氣。固結人心。消除隱患。自茲以往。君主可也。共和亦可也。若昊天不弔。今大總統創業未半。而遽奪諸國民之手。則中國惟有糜爛而已。雖百變其國體。夫安有幸。是故將來中國亂與不亂。全視乎今大總統之壽命。與其御宇期內之所設施。而國體無論爲君主爲共和。其結果殊無擇也。聞者猶有疑乎。請更窮極事理以質言之。夫君主共和之異。則亦在元首繼承法而已。此種繼承法。雖今元首在世時制定之。然必俟今元首卽世時而始發生效力。至易見也。彼時所發生之效力。能否恰如所期。則其一。當視前元首生前之功德威信。能否及於身後。其二。當視彼時有無梟雄跋扈之人。其人數之多寡。其所憑藉是否足以持異議。吾以爲立此標準。以測將來。無論爲君主爲共和。其結果常同一也。現行大總統選舉法。規定後任大總統。應由前任

大總統推薦。預出其名。以藏諸石室金匱。使今大總統一面崇閱其功德。而鞏固其威信。令國人心悅誠服。雖百世之後。猶尊重其遺令而不忍悖。一面默察將來易於釀亂之種子。在何處。思所以預防維而消弭之。其種子存乎制度上耶。則改其制度。毋使爲野心家之資。其種子存乎人耶。則裁抑其人。導之以正。善位置而保全之。毋使陷於不義。〔漢光武宋太祖優待功臣之法〕更一面慎擇可以付託大業之人。〔依大總統選舉法無論傳賢傳子純屬前任大總統之自由也〕試以大任以養其望。假以實力以重其威。金匱中則以其名哀然居首。而隨舉不足重輕之。二人以爲之副而已。如是則當啓匱投票之時。豈復有絲毫紛爭之餘地。代代總統能如是。雖行之數百年不敝可也。而不然者。則區區紙片上之皇室典範。抑何足恃。試歷覽古來帝王家之掌故。其陳尸在堂。稱戈在闕者。又何可勝數。從可知國家之安危治亂之所伏。固別有在。而不在憲典形式上之共和君主明矣。論者盛引墨西哥之五總統爭立。及中美南美葡萄牙之喪亂。以爲共和不如君主之鐵證。推其論指。得毋謂此諸國者。苟變其國體爲君主。而喪亂遂可以免也。吾且詰彼。彼爹亞士之統治墨西哥三十年矣。而今歲五月〔月份記不確〕始客死於外。使因總統繼承問題。而致亂。則亂宜起於今年耳。若謂國體果爲君主。斯可以毋亂。且使爹亞士當三十年前。而有如古德諾者以爲之提示。有如籌安會者以爲之鼓吹。而爹氏亦憬然從之。以制定其皇室典

範則墨人宜若可以長治久安。與天同壽矣。而豈知苟爾爾者。則彼之皇室典範。未至發生效力時。彼自身先已遜荒於外。其皇室典範猶廢紙也。夫及身猶不能免於亂。而謂死後恃一紙皇室典範。可以已亂。五尺之童。有以知其不然矣。故墨西哥之必亂。無論爲共和爲君主。其結果皆同一也。所以者何。爹亞士假共和之名。行專制之實。在職三十年。不務培養國本。惟汲汲爲固位之計。擁兵自衛。以劫持其民。又慮軍隊之驕橫。常挑間之使互相反目。以遂己之操縱。摧鋤異己。惟力是視。其對於愛國之士。或賄收以變其節。或暗殺以戕其生。又好鋪張門面。用財如泥。外則廣借外債。內則橫征暴斂。以至民窮財盡。無可控愬。吾當十年前嘗評爹氏爲並時無兩之怪傑。然固已謂彼死之後。洪水必來。墨民將無瞧類矣。〔此皆吾十年前評爹氏之言。嘗見於新民叢報及新大陸游記。非今日於彼敗後而始非訾之也。吾友湯覺頓亦嘗著一文述爹氏之政治罪惡。其言尤爲詳盡。見國風報湯文出版時。墨亂方始起也。〕由爹氏之道以長國家。幸而託於共和之名。猶得竊據三十年。易以君主。恐其亡更早矣。中美南美諸國亦然。歷代總統皆以武力爲得位之階梯。故武力相尋無已時。共和不適。固不失爲致亂之一原因。若謂此爲唯一之原因。吾有以明其不然矣。若葡萄牙改共和後。不免於亂。斯固然也。然彼非因亂。又何以成共和。前此亂時。其國體非君主耶。謂共和必召亂。而君主卽足以致治。天下寧有此論理。波斯非君主國耶。土耳其非

君主國耶。俄羅斯非君主國耶。試一翻其近數十年之歷史。不亂者能有幾稔。彼曾無選舉總統之事。而亦如此。則何說也。我國五胡十六國五代十國之時。亦曾無選舉總統之事。而喪亂慘酷。一如墨美。則又何說也。凡立論者。徵引客觀之資料。不能專憑主觀的愛憎。以爲去取。果爾者。不能欺人。徒自蔽耳。平心論之。無論何種國體。皆足以致治。皆足以致亂。治亂之大原。什九恆繫於政象。而不繫於國體。而國體與國情不相應。則其導亂之機括較多且易。此無可爲諱也。故鄙人自始不敢妄倡共和。至今仍不敢迷信共和。與公等有同情也。顧不敢如公等之悍然主張變更國體者。吾數年來。懷抱一種不能明言之隱痛。深慟。常覺自辛亥壬子之交。鑄此一大錯。而中國前途之希望。所餘已復無幾。蓋既深感共和國體之難以圖存。又深感君主國體之難以規復。是用怵惕徬徨。憂傷蕉萃。往往獨居深念。如發狂易。特以舉國各方皆心灰意盡。更何必更增益此種楚囚之態。故反每作壯語。以相煦沫。然吾力已幾於不能自振矣。吾友徐佛蘇當五六年前。常爲我言。謂中國勢不能不革命。革命勢不能不共和。共和勢不能不亡國。吾至今深味其言。欲求所以戒此妖讖者。而殊苦無術也。夫共和國體之難以圖存。公等當優能言之矣。吾又謂君主國體之難以規復者。則又何也。蓋君主之爲物。原賴歷史習俗。上一種似魔非魔的觀念。以保其尊嚴。此種尊嚴。自能於無形中發生一種效力。直接間接以鎮福此國。君主之可貴。其必在此。雖然。尊

嚴者不可褻者也。一度褻焉。而遂將不復能維持。譬諸匏雕土木偶。名之曰神。舁諸閎殿。供諸華龕。羣相禮拜。靈應如響。忽有狂生。拽倒而踐踏之。投諸溷。經旬無朕。雖復舁取。以重入殿龕。而其靈則已渺矣。自古君主國體之國。其人民之對於君主。恆視爲一種神聖。於其地位。不敢妄生言思。擬議。若經一度共和之後。此種觀念。遂如斷者之不可復續。試觀並世之共和國。其不患苦共和者有幾。而遂無一國焉。能有術以脫共和之軌。就中惟法國共和以後。帝政兩見。王政一見。然皆不轉瞬而覆也。則由共和復返於君主。其難可想也。我國共和之日。雖曰尙淺。然醞釀之則既十餘年。實行之亦既四年。當其醞釀也。革命家醜詆君主。比諸惡魔。務以滅殺人民之信仰。其尊嚴漸褻。然後革命之功。乃克集也。而當國體驟變之際。與既變之後。官府之文告。政黨之宣言。報章之言論。街巷之談說。道及君主。恆必以惡語冠之。隨之。蓋尊神而入溷。膾之日久矣。今徵論規復之不易也。強爲規復。欲求疇昔尊嚴之效。豈可更得。復次共和。後規復君主。以舊王統復活爲勢最順。使前清而非有種族嫌疑。則英之查理第二法之路易第十八。原未嘗不可出現於我國。然滿洲則非其倫也。若新建之皇統。則非經若干年之艱難締構。功德在民。其克祈永命者希矣。是故吾數年來。獨居深念。亦私謂中國若能復返於帝政。庶易以圖存而致強。而欲帝政之出現。惟有二途。其一。則今大總統內治修明之後。百廢具興。家給人足。整軍經武。嘗膽臥薪。遇有機緣。

對外一戰而霸。功德巍巍。億兆敦迫。受茲大寶。傳諸無窮。其二。則經第二次大亂之後。全國鼎沸。羣雄割據。翦滅之餘。乃定於一。夫使出於第二途耶。則吾儕何必作此祝禱。果其有此。中國之民無孑遺矣。而定之者。是否爲我族類。益不可知。是等於亡而已。獨至第一途。則今正以大有爲之人。居可有爲之勢。稍假歲月。可冀旋至而立有效。中國前途一線之希望。豈不在是耶。故以謂吾儕國民之在今日。最宜勿生事。以重勞總統之廛慮。俾得專精壹慮。爲國家謀大興革。則吾儕最後最大之目的。庶幾有實現之一日。今年何年耶。今日何日耶。大難甫平。喘息未定。強鄰脅迫。吞聲定盟。水旱癘蝗。災區徧國。嗷鴻在澤。伏莽在林。在昔哲后。正宜撤懸避殿之時。今獨何心。乃有上號勸進之舉。夫果未熟而摘之。實傷之根。孕未滿而催之。實戕其母。吾疇昔所言中國前途一線之希望。萬一以非時之故。而從茲一蹶。則倡論之人。雖九死何以謝天下。願公等慎思之。詩曰。民亦勞止。汽可小息。自辛亥八月迄今。未盈四年。忽而滿洲立憲。忽而五族共和。忽而臨時總統。忽而正式總統。忽而制定約法。忽而修改約法。忽而召集國會。忽而解散國會。忽而內閣制。忽而總統制。忽而任期總統。忽而終身總統。忽而以約法暫代憲法。忽而催促制定憲法。大抵一制度之頒行之。平均不盈半年。旋即有反對之新制度起而推翻之。使全國民彷徨迷惑。莫知適從。政府威信。掃地盡矣。今日對內對外之要圖。其可以論列者。不知凡幾。公等欲盡將順匡救之職。何事

不足以自效。何苦無風鼓浪。興妖作怪。徒淆民視聽而詒國家以無窮之戚也。

吾言幾盡矣。惟更有一二義宜爲公等忠告者。公等主張君主國體。其心目中之將來君主爲誰氏。不能不求公等質言之。若欲求諸今大總統以外耶。則今大總統朝甫息肩。中國國家暮卽屬纊。以公等之明。豈其見不及此。及見此而猶作此陰謀。寧非有深仇積恨於國家。必絕其命而始快。此四萬萬人所宜共誅也。若卽欲求諸今大總統耶。今大總統卽位宣誓之語。上以告皇天后土。下則中外含生之儔。實共聞之。年來浮議漸興。而大總統偶有所聞。輒義形於色。謂無論若何敦迫。終不肯以奪志。此凡百僚從容瞻覲者所常習聞。卽鄙人固亦歷歷在耳。而馮華甫上將且爲余述其所受詰語。謂已備數椽之室於英倫。若國民終不見舍。行將以彼土作汝上。由此以談。則今大總統之決心可共見也。公等豈其漫無所聞。乃無端而議此非常之舉耶。設念及此。則侮辱大總統之罪。又豈擢髮可數。此亦四萬萬人所宜共誅也。復次公等曾否讀約法。曾否讀暫行刑律。曾否讀結社集會法。曾否讀報律。曾否讀一年來大總統關於淆亂國體懲儆之各申令。公等又曾否知爲國民者應有恪遵憲典法令之義務。乃公然在輦轂之下。號召徒衆。煽動革命。〔凡謀變更國體則謂之革命。此政治學之通義也。〕執法者憚其貴近。莫敢誰何。而公等乃益白晝橫行。無復忌憚。公等所籌將來之治安如何。吾不敢知。而目前之紀綱。則旣被公等破壞。

盡矣。如曰無紀綱而可以爲國也。吾復何言。如其否也。則請公等有以語我來。且吾更有願爲公等進一解者。公等之倡此議。其不願徒託諸空言甚明也。其必且希望所主張者能實見施行。更申言之。則希望其所理想之君主國體一度建設。則基業永固。傳諸無窮也。夫此基業果遵何道始能永固以傳諸無窮。其必自國家機關。令出惟行。朝野上下。守法如命。今當開國承家伊始。而首假塗於犯法之舉動以爲資。譬諸欲娶婦者。橫挑人家閨闈。以遂苟合。曰但求事成。而節操可毋沾沾也。則其既爲吾婦之後。又有何詞以責其不貞者。今在共和國體之下。而曰可以明目張胆。集會結社。以圖推翻共和。則他日在君主國體之下。又曷爲不可明目張胆。集會結社。以圖推翻君主。使其時復有其他之博士提出別種學說。有其他之團體。希圖別種活動。不知何以待之。詩曰。毋教揉升木。如塗塗附。謀國者而出於此。其不智不亦甚耶。孟子曰。君子創業垂統。爲可繼也。以不可繼者。詔示將來。其不祥不亦甚耶。昔于令升作晉紀總論。推原司馬氏喪亂之由。而歎其創基植本。異於三代。陶淵明之詩亦曰。本不植高原。今日復何悔。嗚呼。吾觀於今茲之事。而隱憂乃無極也。（附言）吾作此文既成後。得所謂籌安會者。寄示楊度氏所著君憲救國論。偶一翻閱。見其中有數語云。〔蓋立憲者。國家有一定之制法。自元首以及國人。皆不能爲法律外之行動。賢者不能逾法律而爲善。不肖者亦不能逾法律而爲惡。〕深歎其於立憲精義。能一語道破。惟吾

欲問楊氏所長之籌安會。爲法律內之行動耶。抑法律外之行動耶。楊氏賢者也。或能自信非踰法律以爲惡。然得毋已踰法律以爲善耶。嗚呼。以昌言君憲之人而行動若此。其所謂君憲者。從可想耳。而君憲之前途。亦從可想耳。

孟子曰。予豈好辯哉。予不得已也。以生平只問政體不問國體如鄙人者。曷爲當前此公等第一次主張變更國體時。而嘵嘵取厭。當今日公等第二次主張變更國體時。而復嘵嘵取厭。夫變更政體。則進化的現象也。而變更國體。則革命的現象也。進化之軌道。恆繼之以進化。而革命之軌道。恆繼之以革命。此徵諸學理有然。徵諸各國前事。亦什九皆然也。是故凡謀國者。必憚言革命。而鄙人則無論何時。皆反對革命。今日反對公等之君主革命。論與前此反對公等之共和革命論。同斯職志也。良以中國今日當元氣彫敝。汲汲顧影之時。竭力裁之。猶懼不培。並日理之。猶懼不給。豈可復將人才日力耗諸無用之地。日擾擾於無足重輕之國體。而阻滯政體改革之進行。徒阻滯進行。猶可言也。乃使舉國人心皇皇。共疑駭於此種翻雲覆雨之局。不知何時焉。而始能稅駕。則其無形中之斲喪。所損失云何能量。詩曰。嗟我兄弟。邦人諸友。莫肯念亂。誰無父母。嗚呼。論者其念之哉。其念之哉。或曰。革命者事實之不得已也。天下惟已成之事。實爲不可抗。吾子疇昔抗之不已。以自取僇辱。今何必復爾爾者。惟然。吾固知之。然使吾捐棄吾良

心之所主張。吾之受性實有所不能。故明知其無益焉。而不能以自己也。屈原賈志於汨羅。而賈生損年於墮馬。問其何以然。恐非惟不能喻於人。抑亦不自喻也。吾昔曾有詩云。十年以後當思我。舉國猶狂欲語誰。吾生平之言亦多矣。大抵言之經十年之後。未有不繫人懷思者。然非至十年以後。則終無道以獲國人之傾聽。其爲吾之不幸耶。其爲國家之不幸耶。嗚呼。吾願自今十年之後。國人毋復思吾今日之言。則國家無彊之休焉耳。

國體問題與外交

吾對於外間所謂國體問題者。既已辭而闕之矣。惟於外交方面。尙未論及。今約略一商榷如下方。變更國體。於內治上能生若何之效果。茲勿贅論。但曷爲當歐戰方酣之今日。忽倡此議。若有迫不及待者存。吾實惑之。推論者之意。得毋欲乘列強多事之秋。無暇相干涉。而我乃得孤行其意也。夫一國國體之變革。本爲戶以內之事。苟非緣此釀出大擾亂。以妨及國際間之治安。則外人應無所容其干涉。不必乘人多事而始圖之也。雖然。干涉與不干涉。其道存諸我。承認與不承認。其權操諸人。雖不干涉矣。而其承認新國體。猶必出以觀望。此事理之無可逃避者。徵諸民國之已事。而最易見也。就令非有意觀望。然既無干涉之餘暇。則亦必無承認之餘暇甚明也。故以吾料之。我國若於今日變更國體。就令列強皆無

違言而欲其完全正式承認則非俟歐洲平和會議告竣之日決無望也。夫此次之平和會議其必不徒解決歐洲問題而已。而遠東問題必爲重要議案之一。此稍有識者所能見及也。故我外交當局方日籌將來所以參預折衝之道。今若忽焉變更國體未經承認則並國際團體之資格而失之。更何塗以求參預於斯時也。恐有自命爲遠東主人翁者代表我以解決一切則吾國其從茲已矣。信如是也。則今之倡變更國體說者雖萬死何以謝天下也。

復次遠東之局雖爲歐美人所深注意而其發言力最強者實惟我肘腋間之一國。此衆所同見也。此一國者既有承認之餘暇則亦有干涉之餘暇。謂我國生此大事彼不乘機謀交換利益而袖手以相承認。雖五尺之童有以明其不然也。其不應耶。試揣彼力能否相撓不必積極的干涉。但使消極的不承認則新皇室其既盱食矣。其應之耶。試環觀國人對於彼之惡感爲何如。遷就之以締造新皇室則新皇室之府怨於民又何如者。而謂能長治久安。吾未之前聞。信如是也。則今之倡變更國體說者又雖萬死何以謝天下也。以上所陳皆至淺之事理。不易之形勢。而今也國體論八表同昏。似於此毫未有所觀察。吾雖欲無言。又安能無言。

京津泰晤士報論梁啓超氏關於國體問題之近著云。梁氏之文既出。京津各大報咸爭先登載。輿

情深爲所感動。而一般惴惴於國體變更。或至復起內亂者。其傾倒之情。尤爲切摯。梁氏以著作家。而具有如此勢力。環顧中國。直可謂並世無兩。然其文字。確係斟酌盡善。輕重適均之作。彼盲從籌安會之政策者。因此將稍稍斂迹。而其徘徊中道。去捨尙無一定者。自茲當益保守其觀望態度。而不肯輕於附和矣。雖然。我人就事實而言。則帝政派之聲勢。不特未消。且有潛滋暗長之象。此以籌安會爲官場所發起。向來政界每有舉動。祇須職位較高。名望較隆者。創之於前。不患無多數官僚附之於後。若輩一則爲熱鬧計。藉以助興。采而炫聲氣。一則爲飯碗計。非此不足以自保其祿位也。今日籌安會之情形。亦正類是。而政界中以少數凌制多數之積習。斯又其特著之例。向使籌安會既創。而政府中要人之尤衰衰者。明示以不贊成之意思。則該會早成小產。寧能飛揚至今日耶。梁啓超之論。北方各報之贊成君主者。或置而弗錄。或僅節登其一二。此亦一可注意之事實也。英文楚報論梁啓超氏之國體論云。梁氏爲維新老人物。戊戌政變。梁名特著。然今日乃反對帝制甚烈。讀其文字。則於鼓吹復古者之種種立說。無不一一解答。一一痛駁。斯誠今日一極有關係之著作也。其言論之明白痛切。頭頭是道。在今日殊未見其倫比。而梁氏之識力堅定。成竹在胸。卽此亦已昭然可觀。雖然。梁之發布此文。乃在由京出行。卜居於天津租界之後。斯亦未始非可注意之一

事也。彼鼓吹君政者流。對於梁之言論。曾無能駁辨之者。卽或有之。則其言亦至膚淺耳。按梁氏此稿。實作於籌安會極盛之時。自請願團上書代行立法院。請變更國體之說出。參政院之開會。遂爲羣衆所注意。六日參政院因此事特開談話會。大總統特派政事堂左丞楊士琦到院讀宣言書。其原文云。本大總統受民國之付託。居中華民國大總統之地位。四年於茲矣。憂患紛乘。戰競日深。自維衰朽。時虞隕越。深望接替有人。遂我初服。但旣在現居之地位。卽有救國救民之責。始終貫徹。無可諉卸。而維持共和國體。尤爲本大總統當盡之職分。近見各省國民。紛紛向代行立法院。請願改革國體。於本大總統現居之地位。似難相容。然大總統現居之地。本爲國民所公舉。自應仍聽之國民。且代行立法院爲獨立機關。向不受外界之牽掣。本大總統固不當向國民有所主張。亦不當向立法機關有所表示。惟改革國體。於行政上有甚大之關係。本大總統爲行政首領。亦何敢畏避嫌疑。緘默不言。以本大總統所見。改革國體。經緯萬端。極應審慎。如急遽輕舉。恐多窒礙。本大總統有保持大局之責。認爲不合時宜。至國民請願。不外乎鞏固國基。振興國勢。如徵求多數國民之公意。自必有妥善之上法。且民國憲法。正在起草。如衡量國情。詳晰討論。亦當有適用之良規。請貴代行立法院諸君子深注意焉。等語。則明以等安會爲民意。特未敢顯言改革耳。梁氏對症發

藥。即項城亦有所願忌。此為梁氏辛亥後經見之作。故附錄於此。以見梁氏之卓識偉論云。編者附

識



中華民國廿四年二月訂正再版

訂正分類 飲冰室文集全編

每册定價 大洋四元二角

(外埠酌加運費)

著者 新會梁任公

校訂者 吳興費有容

出版者 上海新民書局

發行者 上海新民書局

不准 照樣 翻印

代售處 上海福州路 廣益書局

